

# تاريخ حي (2)

أحمد حسني

## محتويات الكتاب

فتحية.....	4
الى اختشوا ماتوا .....	6
بلد أفلام صحيح .....	9
داستور يا عراقي .....	15
قطع ايدك يابا .....	20
يا بتاع الققط.. يا مخربش .....	42
الناصر "شاهين" الدين .....	45
وا سينماتاه .....	51
أكاذيب الملكية السبعة .....	60
الست عصمت .....	64
السقا.. لسه مماتش .....	67
شفا وخمير .....	70
غادة رشيد .....	72
ليكن الرعب مطلبنا اليوم .....	76
كولونيل وسط البلد .....	78
ممنوع التصوير يا مواطن .....	80
فاض حابي .....	83
شباك الزمكان .....	85
روشته برساي .....	88
السلطان حامد .....	94
لبت نداء ريهها .....	103
حنى المقام.. واتمني .....	105
حجاج الخضري .....	107
الله حي.. عباس "الثالث" جاى .....	111
انهم حيوانات .....	115
الجنتل .....	117
ان المذيعين لأنجاس مناكيد .....	120
بومبي .....	125
الجارية نوتيل .....	142

جاني بك الاشرفي.....	145
كيلو شقير لو سمحت .....	147
القميص يا يحيى .....	149
ابو الفقراء والمساكين .....	150
ان المذيعين لأنجاس مناكيد .....	153
صفقة خاسرة.....	158
تعالى مقولكشى .....	160
الخائن يخونه الله .....	162
المعزة المباركة .....	164
بتروف .....	165
دنشواي بشرطة .....	168
دنيا ملهاش امان .....	170
الست دولت .....	173
حفر على الناشف .....	176
ساعات القرض الأخيرة .....	180
عيد مأمور .....	183
جرائم لا تموت .....	185
حريق المسجد النبوي .....	188
نار الحجاز .....	190
ما عظم وخفى من محاولات نيش قبر المصطفى .....	197
دنشواي المغربية .....	208
وادی المخازن .....	212
ساعة الجزري .....	216

## فتحية

لم أجد عنوان مناسب لهذه القصة سوى "تلك الدنيا ما هي الا غرفة وصالة" .. فأينما ذهبت .. وجدت التاريخ يطاردني .. أحب تركيا ومدنها وأثارها وتاريخها .. طبيعة ساحرة وتاريخ مشترك .. طعام شهى لا تسأل ابدا قبل الفتك به ان كانت تلك اللحوم حلال للأكلين او تلكم الدجاجات ذبحت على الشريعة الإسلامية كما هو الحال في بلدان أوروبا.

التاريخ ورايا ورايا .. حتى لما قررت أهلس!!!

سمعت عن فتحة في تركيا.. بلد جديدة على خريطة السياحة.. قريبة من أنطاليا وبتطل على بحر ايجه عطلول.. بينها وبين إسطنبول ساعة بالطيارة و8 ساعات ونص بالأوتوبيس.. المشكلة بس ان مطارات المدن التركية بعيد اوى عن وسط البلد.. يعنى كده كده نص اليوم ضايع في المواصلات.

انما ايه يا مون بيه.. حدوته البلد دى..

مش عارف هل المدن الساحلية كلها حلوه كده وللا انا علشان ذكريات اسكندرية عندي كلها حلوه فحببتني في كل ما هو ساحلي؟  
الله اعلم..

المهم ان البلد دى جميلة جدا.. صاحبة جدا.. مليانه العاب شواطئ وحركات شقاوة جدا جدا..

بس مش ده الى خلاني اكتب الكلام ده..

وانا هناك متشعلق في الباراشوت على ارتفاع 2000 متر فوق سطح البحر ومراي بتصرخ من الرعب وهي قاعدة على الشط.. سيطرت عليا فكرة ان الحبال تتقطع وأسقط كجلمود صخر حطة السيل من عل.. تمنيت بس أقع في المية علشان يبقني في أمل.. فكرة الوقوع فوق الجبال دى مش لطيفة خالص.. خصوصا اني لابس شورت مش بنطلون وممكن اتعور في ركبتني.

طيب نهرب من الفكرة السوده دى ازاي؟

مع حلقات الدخان المتصاعدة من مناخيري – ماهو التدخين فوق مزاج برضه - بدأت استرجع معلوماتي عن فتحة..

فتحة اتبنت على أنقاض مدينة قديمه من العصر الهلنستي اسمها تيليبيوس.. فيها معبد الملك امينتاس المقدوني ومسرح ومقابر رومانية منحوتة في الجبل بالإضافة الى قلعة حربية من أثار مملكة ليقيا "من ممالك أرمينيا القديمة" ومتحف يحتوي على كم مهول من لوحات ومشغولات الخزف والفسيفساء.. الكلام ده كله يقول انها مدينة خضعت لحكم اليونان والرومان في يوم ما من أيام الزمان الغابرة.. اختاروا شواطئها الرملية الممتدة على خليج البحر الميت "ده غير بتاع الأردن" انها الأجمل في العالم.. سموه خليج البحر الميت بسبب غرق شاب فيه اثناء السباحة فقررت حبيبته "بيلجه كيز" انها تموت نفسها وراه في نفس المكان.. مش داخله دماغي الحدوته دى.. نسوان ايه الى تموت نفسها ورا رجاله.. ده مش بعيد تكون ورثته واتجوزت بفלוوسه.. ما علينا.. المهم ان فتحة دى زى كل مدن تركيا.. تاريخ وجمال وسحر.. طيب.. ايه الجديد بقي؟

الجديد هو الاسم حضرتك..

فتحة ده مش اسم واحده ست.. البلد دى اتسمت على اسم طيار عثماني سورى الأصل اسمه فتحي بك.. تكريما واجلالا لسيرة بطل من أبطال فترة الانهيار العثماني.

ايه ده.. طيار عثماني.. بطل وانهيار.. ده الموضوع كبير بقي!!

اه.. كبير جدا..

الحكاية يا سيدي ان الدولة العثمانية سنة 1913م أيام حكم السلطان محمد رشاد الخامس فتحت خط جوى ما بين إسطنبول والقاهرة مروراً بدمشق.. الدولة كانت منهارة اه.. على اعتاب الدخول في حرب هتقضى عليها تماما مقلناش حاجه.. سلطان ضعيف ومهزوز ميعرض.. انما الكبير كبير برضه.. القيادة العثمانية حبت تثبت ان الورد لو دبل برضه ريحته فيه.. قرر العثمانيون الدخول الى معترك الطيران واستعادة هيبة الدولة بطيارة الماني اسمها معاونت ملية "نصيرة الدين" طولها 7 متر هيركيها 2 مغامرني "اليوزباشي فتحي بك والملازم اول صادق بك" وهيطلعوا في رحلة طويلة من إسطنبول وينزلوا في حلب.. وبعدين من حلب الى دمشق.. ومن دمشق الى القاهرة.

وقف الجمع المهيب على رأسه السلطان محمد رشاد شخصيا في وداع الطائرة.. الناس بتكبر وتهلل على منظر النسر الحديدي الضخم المزمجر بعنف وبيطير في الهواء.. الناس في حلب منتظره ومجهزة الطريق الممهّد. كل ما يشوفوا حاجه طايره في السماء يهللوا.. لحد ما ظهر النسر الحديدي العثماني وحط على أرض حلب بأمان في 14 يناير سنة 1913م. بعد أذان المغرب بشوية. الكلام ده بيحكى واحد من المعاصرين اسمه خالد العظم "أصبح رئيس سوريا بعد كده".. قال في مذكراته ان الناس هللت وكبرت لمراي الطائرة بينما المسطحين أعداء التطور اعتبروا ان العمل ده كفر ومن اعمال الشيطان "ربنا ياخداهم علشان الكوكب ينصف".. الوالي وكبارات رجال الحكومة استقبلوا الطيارين استقبال الفاتحين.. مش كل يوم هيشوفوا حاجه زى دى.. حفله رسمية واستقبال.. وهوب طيران على المحطة الثانية..

العزيرة دمشق..

وفي دمشق كان في انتظارهم 100 ألف بنى آدم في مكان ارض المعارض حاليا.. الأطفال كل ما تشوف نسر طائر تقول اهى وصلت.. وبعدين يقعدوا يضحكوا لما يلاقوها مش هي.. لحد ما ظهر نسر كبير بيطلع دخان وصوته مزعج.. هبط بعنف على المدرج الأخضر الغير ممهد.. الناس هجمت على الطائرة ورفعت الطيارين فوق الاكتاف.. النسوان تزغرت والرجالة والمشايخ سجدوا لله رهبة وهيبة وشكرا على سلامة وصول الطيارين.. لولا الحراسة الشديدة كانت الناس فككت الطائرة وخذت منها أجزاء للذكري.. الناس شالت الطيارين على الاكتاف لحد صبيان الوالي.. الطيارين نزلوا ضيوف لمدة يومين على أسرة ساروجة الشامية العريقة.. اعتقد ان من كتر الأكل الى أكلوه وكرم الضيافة الشامي المشهور معروفش يركبوا الطائرة تانى.

في اليوم الثالث اجتمع نفس العدد في وداع الطيارين في النص الثاني من الرحلة.. الى القاهرة.. طلعت الطائرة وسط هتافات الناس وتمنياتهم بسلامة الوصول.. لكن للأسف الحلم الجميل لم يكتمل.. قرب بحيرة طبريا الطائرة خرجت عن سيطرة الطيارين.. وقعت الطائرة واتحرفت ومقدروش يميزوا جثث أبطالها الا من الأوراق الرسمية.

السبب العلمي لسقوط الطائرة هو رياح عنيفة كانت اقوى من محركات الطائرة البخارية ذات ال 200 حصان.. السبب الشعبي هو الحسد وعين الانجليز والفرنسيين الوحشة الى ضربت الطائرة لما شافتها طايره فوق دمشق زى النسور.

الناس عاشت في هم وحزن عظيم جدا على الشباب الشجعان الى راحوا في غمضة عين وعلى الحلم العثماني الى انتهى.. شحنا جثث الطيارين لدمشق بالقطر لجنازة رسمية مهيبة.. صوت ولولة النساء كان مغطي على صوت المؤذنين الباكي.. اتفتحت بيوت دمشق كلها بمسلميها ومسيحييها للعزاء.. كل شارع وحاره من حوارى الشام القديمة كان فيها عزاء وبكاء حار.. السلطان صمم على رحلة ثانية بعد أسبوع لرد الاعتبار.. رحلة بنفس المواصفات بقيادة الملازم أول نوري بك ان شاء الله تحقق الى مقدرتش تحققة الطائرة الأولى.. نزلت الطائرة في بساتين المزه في دمشق ولكن محدش كان منتظرها بسبب حالة الحزن على الطائرة الأولى.. ومنها انطلقت الى القاهرة علشان تسقط قرب سواحل يافا.. حظها لم يكن أفضل من سابقتها.. او يمكن في حالة نحس بسبب جهة الوصول.

وطبعا الحدث ده لم يغيب عن شعر شوقي.. الى قال فيهم رثاء حزين جدا:

يا أيها الشهداء لن ينسى لكم \*\*\* فتح أغر على السماء جميل

هلعت دمشق وأقبلت في أهلها \*\*\* ملهوفة لم تدر كيف تقول

مشت الشجون بها وعم غيطانها \*\*\* بين الجداول والعيون ذبول

في كل سهل أنه ومناحة \*\*\* وبكل حزن رنة وعويل

الملفت بقي والحدث القدري انى زرت سوريا سنة 2007.. كتبت عن الزيارة دى بالتفصيل في كتابي الأول يوميات رحلة 1.. في أثناء زيارة قبر السلطان صلاح الدين الأيوبي.. على يمين القبر قبل الدخول للضريح.. لفت نظري وجود قبر رخامي فخم عليه العلم الأحمر ذو الهلال الأبيض والنجمة البيضاء.. سألت يومها ايه ده.. قالولى طيارين عثمانيين.

لما عرفت قصة فتحية واسمها.. استرجعت الذكريات وفتحت الصور ادور.. لقيت ان الضريح ده مدفون فيه ال 3 طيارين العثمانيين الشجعان أصحاب اول تجربة للطيران بين إسطنبول والقاهرة..

اليوزياشي فتحي بك

الملازم أول صادق بك

الملازم أول نوري بك

أبطال عثمانيين.. دفنوا تكريما لهم بجوار السلطان صلاح الدين.  
الله يرحمهم كلهم.

## الى اختشوا ماتوا

يا ترى انهو الأهم.. تموت مستور وللا تعيش مفضوح؟

اول معرفتي بالمثل ده كان من فيلم المشبوه بتاع عادل امام وسعيد صالح.. سعيد صالح زى عوايده كان دوره رمة أوى.. بعد ما عادل امام رشق في السجن.. سعيد صالح حب يغوى مرات اخوه - فتاة الليل التائبة - علشان تشتغل رقاصه.. الولية تعجبت من موقف الأخ أبو قرنين وقالتله صحيح يا بيومي.. الى اختشوا ماتوا..

ورد سعيد صالح بتناحه وقالها كلام صحيح وله معنى..

وحكايتها قصة المثل.

ايه بقي يا اسيادنا يا كرام؟

قاهرة زمان كان القاهرة حلوه معجبانية.. الناس فيها كانت بتتنمظر على بعض بالذهب والمجوهرات والقصور والعطور والعربيات والخيول.. الترك "مش الأتراك" لما دخلوا مصر جابولنا معاهم عاداتهم وطباعهم.. وكان من ضمن الطبايع دى.. الحمامات العامة. في الأول كانت حمامات شعبية لكل الناس.. وحسب حالة البلد الاقتصادية كان السلطان من دول يبني مسجد ومدرسة وخانقاه ومستشفى.. وحمام.

حسب حالة الحمام وبانية وموقعه.. يكون الزبائن.. من زمان مصر فيها خيار وفاقوس.. يعنى حمام النحاسين مثلا ميدخلوش الأمراء.. بينما حمام القطامية هايّس مقفول على ولاد اللوات.

الحمام مش زى ما هيجي في دماغك كده.. مش زى "مبولة" رمسيس مثلا.. حاجه مقرفه ريحتها نشادر وكلها عيال شمال.. لا خالص.. حمام زمان كان ساونا وجاكوزي وكريكات وزيت ومساج وسخن وساقع وحكاوي ورغى وحاجه فل الفل تدخله عرقان.. تخرج منه ولهان حرنان سخنان مستعد تشوط في اى شيء مؤنث.. وبالمثل كانت حمامات الحريم.. يدخلوا فيها الله العالم بالمستخبي.. يخرجوا كلهم هياتم زمنهم.

تدخل الحمام من دول بتراب الفرن.. يستلمك المحميين والحفافين.. في الأول تدعك جسمك بالصابون المغربي الفاخر وحجر الخفاف الطلياني.. بعددين تضرب غطس في حوض الميه السخنة.. تخرج منه ضغطك عالي فتقوم مسلم نفسك للمكبساتية.. تنام على بطنك وتسترخي وهما بيدهنولك جسمك بزيت وعطاره واي كلام في اى كلام.. مساج بلدى بصواب زى الكلابشات يعيد توزيع الدم في العروق.. سر غريب في الحمام ده بيحصلك ويخليك تخرج منه أصغر وانشط وعاوز تهد الدنيا.

كان ليا تجربة مع حمام من دول في دمشق.. المساج البلدي ده حاجه تحفة يا جدعان.. انصحكوا بشدة تجربوه.

ما علينا.. خلينا في الى اختشوا..

الحدوتة دى حصلت أيام واحد من أعظم واعدل سلاطين المماليك الشركس.. اسمه الرسمي سيف الدين ابو النصر اينال بن عبد الله العلائي الظاهري الناصري.. نعرفه في الكتب باسم اينال الأجرود.. اسمه الأصلي له قصه هنعرفها حالا.

3 القاب في الاسم.. اكيد في سر.

سنة 1381م. السلطان علاء الدين على.. السلطان قبل الأخير من أسرة قلاوون اشترى طفل صغير عمره يا دوب سنه من أبوه في الشام.... فسموه العلائي.

وقعت دولة المماليك البحرية واتسلطن الظاهر سيف الدين برفوق سنة 1382م. الرجل رستق ملكه من هنا وبدأ يدور ويقلب في المماليك القديمة من هنا.. شاف صاحبنا ده وحس انه طفل سابق سنه.. فضمه لمماليكه وبقي اسمه العلائي الظاهري.

مات الظاهر برقوق سنة 1399 وورث الحكم مكانة ابنه.. الأسوأ على الإطلاق الناصر فرج.. فرج أعجب بصاحب الحدودة فعتقه لوجه الله رغم انه مكانش بيعمل اى شيء لوجه الله.. وضاف صاحبنا لالقابة لقب الناصري.. علشان يبقى لقبه كده..

العلائي الظاهري الناصري.

طب هو اسمه الأصلي ايه؟؟

اينال بن عبد الله.

وفين عبد الله في الحدودة؟؟

باع ابنه واختفى.

بدأ نجم اينال يلمع في عصر المظفر أحمد بن المؤيد شيخ.. عرف سكة الأمانة وبقي أمير على 10 ممالك.. لكن أيام الاشرف برسباي – الراجل المجدع الى حبس الحريم في البيوت- كانت أيام سعدة فعلا.. نط من أمير عشرة الى أمير 100 ثم الى نائب السلطنة في غزه وبعدين بقي أمير ألف مره واحده.. وبدأ يعرف سكة السياسة في عصر الظاهر جقمق.. كبر وارتقى من امير طبلخانة الى خاصكى.. ومن خاصكى الى داوادر.. لحد ما بقي اتابك العسكر كلهم بسم الله ما شاء الله يعنى.. كل ده في عصر الظاهر جقمق.. تدور الأيام وتعدى السنين.. يموت الظاهر جقمق الراجل العادل الطيب ويمسك مكانه ابنه العبيط المنصور عثمان.. معرفش ليه سلاطين الممالك اقليم متصفش في خلفه خالص..

تفتكر مكانوش فاضيين يربوا؟

الممالك الى شقت طريقها من تحت الصفر.. هي دى الى بقت سلاطين عظيمه زى ركن الدين بيبرس وسيف الدين قلاوون وسيف الدين برقوق.. بينما العيال الى ورثت الحكم كانت ولا هباب البرك.. زى بدر الدين سلامش واغلب عيال قلاوون والموكوس دائما.. فرج ابن برقوق.

المهم يا سيدي ان المنصور عثمان ده كان حلنجى وبتاع ال 3 ورقات.. حب ينصب على الناس ويضرب العملة.. حضرته حاول يبيع الميه في حارة السقاين.. بس السقاين بقي هاجوا عليه والشوه من فوق الكرسي بعد 43 يوم غسل بالظبط.. اقصد الممالك طبعاً مش السقاين.

في صبيحة يوم جمعه باب قصر الاتابك اينال خبط.. صاحت الجارية بدلع هياتمي مين بالباب.. رد الطارق بصوت ملوش اى لزمه زى صاحبه.. انا القائم بأمر الله ابو البقاء حمزة.

جريت الجارية على مخدع مولاه الاتابك مرتبكه متوترة..

- سيدي يا سيدي.. الحق يا سيدي
- مالك يا بت في ايه.. ما قلنا انا بتاع مراتي زينب بنت خاص وبس.. انجري على جناح الحريم بلا مسخره على الصبح.
- الخليفة العباسي عندنا يا سيدي.
- وده ايه الى جابه ده.. قوليلة سيدي نايم.. بلاها خوته.. عاوز انام.
- مقدرش يا سيدي.. ده معاك ممالك كتير اوى.. اشرفيه ومؤيديه وسيفيه وناصره.. كلهم بالسلاح
- انا كده بدأت اتوغوش.. روجي قدميلهم جلاب وكحك وانا نازل فكعبك علطول.
- حاضر يا سيدي

بس الممالك مشريوش الجلاب..

دول كلهم كلوا بقلاوله في قلعة الحكم بعد الصلاة علطول وهما راكعين على ركبهم ببيوسوا الأرض ويحلفوا يميني الولاء بين رجلين السلطان الجديد..

السلطان الملك سيف الدين ابو النصر اينال بن عبد الله العلائي الظاهري الناصري.. وزود في الأول لقب الأشرف.

يا صلاة النبي يا صلاة النبي.

جه مصر مملوك عمره سنه.. وبعد 73 سنه شغل بقي سلطان.. كده الواحد ممكن يطمئن.. فاضل حبه حلوين الحمد لله على السبعين.. ممكن وقتها الواحد يبقى أمين شرطه وللا حاجه.

الأشرف أينال كان راجل عادل ومحترم.. محدش اتقتل في عصره من غير محاكمات.. كلمة القانون كانت هي العليا.. مكانش بيثق في الممالك القديمة وبدأ يزود في الممالك الجلبان اللى في آخر أيامه عملوه دوشة بسبب الفلوس المضروبة.. هو كمان كان كبر وعجز وحس بدنو الأجل.. 81 سنه مش شوية برضه.. يا دوب بالإشارة وبكلمتين فتح بقه وقالهم ابني.. ابني.

ابنك مين يا عم اينال؟

الكبير طبعاً.. الأمير أحمد.

واتسلطن الأمير أحمد وأخذ لقب المؤيد في حياة ابوه اللى مات تاني يوم علطول علشان يقلب فرحة الأبن بالسلطنة الى محزنه. من ضمن ما بنى الأشرف اينال في شارع من اهم شوارع مصر المحروسة كان الحمام ده.. حمام ولاد الأكابر.. او ولاد الناس زى ما كان المصريين بيسموهم.

فيوم من ذات الأيام كان في فرح كبير أوى لأتابك عسكر السلطان أينال.. النسوان راحت الحمام علشان تتعطر وتتطيب.. موسم شقط العرسان بقي وربنا يعود علينا الأفراح بكل خير.. هوب قامت حريقه جوا الحمام.. هوب الصريخ اشتغل.. هوب كله قالك لما انفد بعمري.

- بس انفد بعمري ازاي.. يا نتاشتي.. هنخرج كده ملط يا نسوان؟

- خلاص يخني خليكي جوا.. يا روح ما بعدك روح.

وخرجت النسوان من الحمام عرايا ملط.. الفرجة على المفاتن كانت مجانية.. الناس يومها زأططت اخر زأططه.. الأنزال.. محدش فيهم صحاني ولا اداني رنة حتى على الموبايل علشان اصور فيديوهات وارفع على اليوتيوب واكتب تحته الفيديوهات "مقاطع مملوكية ساخنة شاهد قبل الحذف".

طب النسوان اللى اتكسفت تخرج حصلها ايه؟؟

ماتت محروقة طبعاً.. النار متعرفش المز.

طب واللى عاشوا؟؟

عاشوا والشارع كله عارف تقاطيع أجسامهم ولا مؤاخذه..

أخص..

يا ترى هتحس بأيه وانت ماشى في شارع كله عارف ان عندك حسنه مثلاً في مكان ما المفروض انه خفي في جسمك؟

وصار من الموقف ده مثل على استهجان الحياء وتقدير مبدأ الغاية تبرر الوسيلة.. كل ما تفتح بقبك وتعرض وتقول يا جدعان عيب اختشوا.. تلاقي واحد نذل يقولك يا اخي اللى اختشوا ماتوا.

صحيح والله.. اللى اختشوا ماتوا.. محدش بيطول في الدنيا دى الا اللى قبل يبقي ملط.

ملط من الهدوم..

ملط من الأخلاق..

ملط من المروءة..

ملط من اى حاجه.. على رأى احمد السقا كده في فيلم رخم اسمه حرب ايطاليا.. ملط يا بكورتي علشان تعيش.

لما تدخل شارع المعز من الصاغة.. كالعادة هتدخل يمين.. هتعددي على مجموعة قلاوون على شمالك.. بعدها هتلاقى متحف النسيج على يمينك وقصاده مسجد كبير عليه اسم الظاهر سيف الدين برقوق.. كمل مشى لحد قدام.. هيجيلك مسجد الأقمر على يمينك.. كمل مشى شويه كمان.. قبل ما توصل بيت السحيمي بص على شمالك.. هتلاقى محل شيشه وهدايا قديم اوى بتاع واحد اسمه خليل مأمون.. ده أول مصنع شيشه في الشرق الأوسط بالمناسبة.

جذب محل الشيشه علطول أفق شوية وبص على اليافطة الزرقاء.. واقرا الفاتحة للأحرار اللى بيختشوا.

افتكر دايم ان اليافطة دى شاهد على ان اللى اختشي في البلد دى مات محروق.

والملط بقي الكبير.



## بلد أفلام

يبدو ان زيارة مقابر شهداء القوات المسلحة دى مش هتعدى على خير أبدا..

في الأساس انا كنت رايح مدفن جمال عبد الناصر ومدفن السادات.. غصب عني لقيت رجلي خدتني من كوبري القبة على صلاح سالم.. الله يرحمهم الاثنين ويرحم كل الأموات.. بالرغم من البلاوي اللى عملوها.. الا انهم في وقت ما كانوا مجاهدين ضد العدو الأذدر على الإطلاق..

العدو الأجنبي.

طيب واللى جاهد ضد العدو الأجنبي.. يصح برضه يموت بالمهانة دى يا سيادة الرئيس الشهيد؟

ينفع بالصدفة كده اعرف ان المشير أحمد بدوي مدفون هنا؟

بذمتك يا ريس لو وقفنا في شارع الترة في شبرا وسألنا الى رايح واللى جاى عن صاحب النفق ده.. كام واحد فيهم هيعرف؟

ليه الناس النظيفة في البلد دى بتموت بطريقة مجهولة كده؟

اشمعنى الارذال بس هما الى بيموتوا بعد شبيه طويلة على سرايرهم وبعد ما يتعالجوا على نفقة الدولة وبعد ما يعينوا عيالهم في النيابة والقضاء ويفتحوا شركات ويكسبوا مليارات ويكرهوا الناس في العسكرية ويسيبوا وراهم الاف الأسئلة عن مصادر ثرواتهم المتلثة؟

أقنعني يا ريس ان الفريق أحمد بدوي بطل حرب 48 و67.. وقائد الجيش الثالث الميداني في حرب أكتوبر.. الراجل الى ربي نفسه بشجاعة في نار الثغرة علشان يهز جيش اليهود.. فجأة يموت كده وهو في عز صحته بعد ما قفش معاك وقالك انا مش موافق على ضرب ليبيا يا ريس ولا الجيش هيوافق ورايا.. ماهو أصله مش جيش أمك علشان لما تقفش مع القذافي تقوم تكسرله البلد.. دى بلد عرب ومسلمين برضه.

اديبي منطق يا ريس ان الفريق بدوي اول كشف تريح نائب السوء مبارك من تجارة السلاح يقوم فجأة كده يموت موته تافهة زي دى.

والنبي يا رياسه وانت منوفي وعم المنايفه كلهم.. لفلى معاك زغروف حشيش حلو ماركة "غدر الصحاب" علشان أقدر استوعب حادثة الطائرة دي.. لأحسن الموضوع ده محتاج دماغ عالية وخيال ما بعده خيال.. معلىش يا ريس.. أصلهم بيقولوا كلام عجيب لما حكيت له لأبني أبو 3 سنين.. الواد قالى باي.. قتلته نعم يا حمزة.. قاللى مامتك حلوه.

قالولنا يا ريس إنك طلبت من الفريق بدوي يروح سيوة علشان يبص بصبه كده على الحدود بينا وبين ليبيا لأنك مش مطمئن للقذافي وبالمره يجيبلك برطمان زيتون أخضر وكرتونة بلح.. قام الفريق مكديش خبر وخد معاه 9 لواءات و4 عمداء علشان يشوف الليلة فيها ايه.. قذافي ايه ده والنبي الى بيفكر يضر بنا.. ده اكيد اتلطش.

بس ازای یعنی یا ریس الفريق بدوي يركب الطائرة المعفنة دى!!

وازاى يا ريس الفريق بدوي ياخذ معاه 13 رتبة كبيره كلهم على نفس الطائرة!! ليه.. مفيش مواصلات تانيه!!

وازاى يا ريس ولا مؤاخذه يعني الطائرة بعد ما طلعت يكتشفوا ان دي لها كان مربوط في عمود كهرباء بحبل معدني شديد الصلابه!!  
تهريج صعايدة ده وللا ايه؟؟

وازاى يا ريس الطائرة تخبط في العمود بعد ما طلعت ب 5 متر.. ويموت كل اللى عليها ما عدا طقم الطائرة وسكرتير الوزير!!

ا هي كانت طائرة ورق!!

والسؤال المهم بقي يا مريسه..

العمود فضل واقف على حيلة ازاي بعد الحادثة دى.. ده كل سنة مع المطر العمدان بتقع لوحدها والكهرباء بتتقطع عن الناس.  
انتو بتشتغلونا يا ريس.. مش كده؟؟

يا ريس مش كده بقي يا ريس بقي وربنا بقي..

شوية احترام لعقولنا.. اكدبوا علينا مقلناش حاجه.. بس حسسونا ان الكذب مزوق ومحبوك شوية.. طائرة ايه ال "C-180"  
الخرده اللى هيركبها وزير الدفاع دى.. ليه يا حاج.. ده المقدم من دول بيبقي راكب المدرعة ولا كأنه السلطان بيبرس في زمانه..  
قوم وزير الدفاع.. ومعاه 13 قيادة.. يربكوا كلهم في طائرة واحده.. وكمان حالتها تعبانه!!

ايه الفيلم الهندي ده..

وبعدين يا ريس بعد اذنك يعني عاوزين نعرف حصل ايه بعد ما انت زنقت وزير دفاعك كمال حسن على في خانة اليك وسألته  
على عمولات السلاح اللى مبارك قفشها وهو نائب.. فاكر انت لما ابو كمال شرق ومقدرش يخلص فنجان الشاي من كتر ما كان  
مرعوب منك بعد ما قرا الملف الطخين اللى بعتهلوك الفريق بدوي عن مبارك وعمايه وبلاويه بداية من تعيين رجالته الهفأ في  
كل مكان.. وحتى الملايين اللى عماله تنط جوا حسابه من غير حساب؟ ايون.. هو اليوم ده بقي.. حصل في ايه بقي بعد كده؟  
مش انت يا ريس اللى قلت يومها بلسانك المنوفي ان مبارك يقعد في بيته ولما تعوزه هتندلهه..

امال ايه اللى رجعه تاني بقي؟

طيب يا ريس كبر دماغك.. أنسي الحبه دول..

قولنا وحياة الشهيد عاطف.. المقدم طيار سمير غيث كابتن الطائرة الخردة دى.. ازاي اتساب من غير تحقيق رسمي ولا محاكمه  
عسكريه وهو واحد من اتنين فلتوا من الحادثة دى.. ازاي يتساب كده علشان يموت بعد سنه كامله في بيته.. يا سبحان الله.. لما  
حرامي غسيل نط على البيت وقتله ولا مؤاخذه!!

حرامي غسيل يقتل مقدم طيار!!

ليه.. هو الكابتن مكانش بيحضر حصه الألعاب في الكلية وللا ايه!!

وبعدين حرامي ايه ده يا ريس الى بعد ما قتل المقدم سمير غيث.. يطلع بعد كده على بيت العميد أبو بكر "الناجي الثاني من الحادث وسكرتير الفريق بدوي الله يرحمه" ويروح مناولة عيارين في نافوخته هو راخر ويجب أجله.

حرامي ميري تخصص رتب كبيرة ده وللا ايه!!

ده لو معور عيلين من المطرية.. هحتاج يستخبى في الصعيد مش اقل من 3 سنين..

وبعدين من امتى أساسا زيارات وزير الدفاع مش متصوره بالفيديو يا سيادة الرئيس!! مش دى زيارة رسمية برضه؟

طيب أقولك حاجه بقي يا كبيرنا..

بعد 9 سنين من حادثة المنصة بتاعتك وبعد ما الاسلامبولي ورجالته زعلوك في العرض العسكري.. طلع في المجلس الموقر واحد من صحاب زمان الاحرار بتوع الجيش اسمه علوي حافظ.. كان طيار برضه أيام الملك فاروق بن برقوق.. دخل المجلس كده منفوخ زى الديوك الرومي ومعاه ملف بلاستيك ملوش لون جواه 38 ورقه.. طلع أول ورقة منهم.. لقيناها معلومات مختومة بختم الفريق الشهيد أحمد بدوي عن تجارة السلاح في مصر.. محدش عبره.. طلع الورقة الثانية.. لقينا فيها معلومات عن ضلوع وزير الدفاع وقتها "الفريق يوسف صبري أبو طالب" قبل ما يبقي وزير دفاع ومعاه شوية عيال وسخة كده في الحصول على عمولات وهدايا من شركات السلاح الأمريكي تحت اسم شركات وهمية مستعارة زى الفوروينجز و"ATSI" مثلاً.

بدأوا يقرقضوا أظافرهم..

وفي الورقة رقم 16 الحاج علوي بيحكى ويقول "أنا أكرر وأصر على الربط بين صفقات السلاح المريبة وبين مصرع صديقي ودفعي 48 حربية وأخي وزميلي في السلاح المشير أحمد بدوي وأرجو من الحكومة والمجلس الموقر أن يعيدا فتح التحقيق في مقتل أحمد بدوي وزملائه 13 لواء أركان حرب هم قادة حرب أكتوبر".

وفي المجلس حاول كلاب الوطني انهم يستكوا الحاج علوي كثير.. الشاذلي وصفوت الغير شريف هاجوا وقعدوا يشوشوا عليه في الكلام.. عاطف صديقي قعد يقوله عيب يا حافظ.. اختشي يا حافظ.. ورفعت بيه المحجوب قعد يقوله اسكت يا حافظ.. بلاش تطلع الورقة الأخيرة يا حافظ.. دى سمعة بنات يا حافظ..

تحس يا ريس ان بتوع المجلس دول عاملين زى بتوع جروبات الفيس بوك الى بتقولك بلاش نتكلم في السياسة ولا الدين علشان منزعلش من بعض.. كانوا مستهترين لدرجة ان طلب الاستجواب ده فضل مركون في الدرج سنتين كاملين من سنة 88.. لولا ان الحاج علوي كان رزل.. مكانش حد عبره.. وحتى لما عبروه وعملوا الاستجواب.. واحد من أكبر المتهمين وهو الفريق يوسف صبري أبو طالب.. محضرش من أساسه.

تراه مجلس ابوه..

والحاج حافظ مسمعش الكلام وراح مطلع الورقة الأخيرة بالعند في الكل..

الورقة الى فيها أدلة من كتب أمريكياني بأقلام كبار ليهم وزنهم.. اتارى الكتب فيها صور الشيكات الى قبضها ولاد الجزمة الحرامية وارقامها.. زى كتاب "Man Hunt" مثلاً بتاع بيتر ماس.. الراجل كان بيوضح ملاعيب ال "CIA" مع بن لادن في الشرق الأوسط.. راح جاى الكتاب مفرقع في وشنا.. تحس ان اى كلام عن الفساد في اى دولة.. لازم نتلط فيه.

وللا كتاب "The Game Player" بتاع مايلز كوبلند.. يا لهوااااى.. ده جايب بلاوى.. ربنا يستر على ولايانا.

يقوم المجلس العره يردم على الكلام بتاع الحاج علوي بقفل الموضوع ويكفي على الخبر ماجور بقرار بمنع النشر وقرار تاني بشطب الأسماء المذكورة كلها من المضبطة وقرار ثالث بالموافق على غلق باب المناقشة في هذا الموضوع يتفضل برفع يده موافقه.. وقرار رابع بتنظيم ماتش كوره بين مصر ونيجيريا في نفس يوم إذاعة جلسة الفضائح.. 5 مارس 1990.. ساعتها مصر كلها كانت فرحانه اننا رايعين كاس العالم أخيرا على ايدين الجوهري.. ومحدث خد باله خالص اننا خسرنا 3 ماتشات في كأس الأمم الأفريقية.. يعنى لا عرفنا من اللى قتل الفريق بدوي.. ولا كسبنا كأس الأمم الأفريقية.. ولا اترحمنا من اللى عمله فينا مجدي عبد الغني بسبب الجون بتاعه في الكأس ده.

ده ايه حرقه الدم دي..

مشكلة بتوع السياسة انهم فاكرين ان التاريخ بيتنسى والظلم بيروح في الوباء.. بيفتكروا ان اللى مات ملوش أهل يسألوا عليه ويفتكروه طالما في أيديهم الاعلام وطالما المنتخب بيقدر يلعب الناس حواليه..

الحقيقة ان التاريخ باقى.. كل من أذى البلد دي الناس عمرها ما هتنتساه.. كل من سرق قوت الغلابة التاريخ هيلعنه.. كل من ضحك عليهم وعمهم فيوم من الأيام هيحكوا عنه لأولادهم لحد ما الحكاوي تملأ الكون بسيرة الأنذال اللى بيقتلوا رجالتهم لما المصالح تتعارض.

والله يا ريس عاوز اقولك كلمه عيب من 3 حروف بس عامل حساب الحريم اللى هتشوف الكلام ده..

لما تعدى على صحراء الممالك.. أبقي زور مقابر شهداء القوات المسلحة.. امشي فيها للآخر واقف كتير قصاد قبر المشير أحمد بدوي..

انت واقف دلوقتي قصاد واحد من العسكر.. شريف وطاهر اليد والذمة.. وانها لعمري حاجه شديدة الندرة في هذا البلد المنكوب. أقف انتباه من حديد.. خلي رجلك مفروده وايدك ورا خط خياطة البنطلون..

شد جسمك وارفع راسك لفوق شوية..

وأقرأ له الفاتحة..

واوعى تدبيله التحية العسكرية وراسك عريانه لاحسن يدورك مكتب..

بيقولوا الراحل ده في الميري مكانش عنده يامه ارحميني.. وزى ما كان شديد على اليهود.. كان شديد برضه على اللصوص..

بس اللصوص أعمارهم طويله.

الله يرحمه.

حوار مع المشير أحمد بدوي 1

<https://www.youtube.com/watch?v=wx-U0P3TCVs>

حوار مع المشير أحمد بدوي 2

<https://www.youtube.com/watch?v=SDUcUrtj27I>

تكريم المشير أحمد بدوي

<https://www.youtube.com/watch?v=bAz3gVruC7w>

المهم بقي يا اسيداندا.. فوتكوا انا امبارح في الكلام عن نقطه مهمه جدا.

المقدم طيار سمير غيث.. قائد الطائرة المنكوبة دى.. مات ازاي وامتي ومين قتله؟

هتقولني ما انت قلت في وسط الكلام..

أرد اقولك اه.. بس الموضوع مش سطحي اوى كده ويلزمه شوية تفاصيل.

سنة 1990 كان في سيناريست في مصر اسمه بشير الديك.. الراحل ده كان بيقرأ الجرائد في يوم فلقي خبر عن هروب مجرم أثناء محاكمته.. ايوه.. انت قرئت صح.. هروب مجرم.. من قلب المحكمة.. اثناء محاكمته.

الخبر ملفت وغريب.. يقولوا في واحد صديق للمتهم قدر انه يهربله مسدس ملفوف في منديل أثناء ترحيل المتهم من قسم الشرطة الى سراي المحكمة.. يعنى المجرم ده وهو بيدخلوه القفص.. كان المسدس عمران في جيبه.. طلقتين في الهواء في قلب المحكمة.. كله خاف على عمره.. راح المجرم مدور الجري خارج المحكمة وقال يا فكيك والكلابشات في ايديه.. علشان يلاقي عربيه منتظراه والمخطط يمشي.

ايه يا عم الى انت بتقوله ده.. مش ده الى عمله احمد زكى في فيلم الهروب.. لما كان اسمه منتصر.. مونتنصر بتاع الحاجر.. لما كان بينقط هالة صديقي ويقولها "الرجاصة دى.. وجسمها الملين.. وعينها الى تندب فيها رصاصة".

ماهو حضرتك بشير الديك لقط الحادثة دى وراح جاى عامل عليها القصة بتاعة الفيلم كلها مع استخدام الصقر كرمز لتمرد البطل على واقعه.. المجرم الحقيقي في المحكمة تحول الى بطل محبوب في السينما "رغم انه على خطأ برضه".. عاطف الطيب قدر يرسم خطوط الحدوتة كلها مع الموسيقى التصويرية التحفه وغناء راعي الجمال الحزين جدا وصوت الصقر المهيبة في الخلفية.. الفيلم الى اتعمل من 27 سنه لسه عايش معانا لحد النهارده.. ولسه مونتنصر فتى أحلام البنات.. رغم موت مونتنصر في اخر الفيلم وموت أحمد زكى في 2005 وموت عاطف الطيب في 1995.

ايه يا عم علاقة مونتنصر بالمقدم سمير غيث بالفريق أحمد بدوي!!

يا أخي صبراً..

المتهم الى هرب من المحكمة بعد ضرب النار والى حضرتك شففته في السينما باسم مونتنصر ده.. يبقى في الحقيقة اسمه عاطف زخاري.. لص وهجام وقاتل محترف.. مرتزق يبيع مجهوده ومهارته في القتل لأي حد يدفع.. هرب من تاريخه الإجرامي في مصر وسافر يشارك في الحرب الأهلية في بيروت.. ومنها على العراق لما سمع ان ميليشيات الحرب ضد الإيرانيين بيدفعوا أكثر.. على رأى عسران الضبع في فيلم الهلفوت.. انا خدام الى يدفع.

وهناك في العراق اتعرف بصديقه الى هربله المسدس أثناء المحاكمة.. الاتنين كانوا مرتزقة شغلتهم ضرب النار.. الهدف مش مهم.. المهم هو مين الى هيدفع في مقابل الهدف ده.

عاطف زخاري مطولش كتير بره مصر.. رجع في أوائل الثمانينات علشان يعمل عمليتين مهمين اوى..

الأولى كانت في العجوزة.. توجه حيث يسكن المقدم طيار سمير غيث.. اتهم عليه وقتله بعيارين في نافوخه.. وخلي الامر يظهر على انه محاولة سرقة تطور الى قتل.. الكلام ده كان في فبراير 1982 يعنى بعد 11 شهر بس من مصرع الفريق بدوي في طيارة الموت الى كان سايقها المقدم سمير غيث.

بعد كده عاطف زخاري نفذ عملية تانيه في نفس السنة قدر فيها انه يقتل العميد أبو بكر.. مدير مكتب الفريق بدوي السابق..  
واحد الناجين من حادث الطائرة اللى كان سايقها مين؟؟ ها؟

المقدم سمير غيث..

طيب حلو..

- هو في كام واحد بقي فلت بعمره من حادثة الطائرة دى؟
- 5 حضرتك.. 4 أفراد هما طقم الطائرة اللى يرأسه المقدم سمير غيث.. والعميد ابو بكر مدير مكتب الفريق الشهيد.
- الله.. يعنى طقم الطائرة اللى بيبقى قاعد قدام نجى وطلع سليم والناس اللى قاعده ورا هي اللى ولعت؟
- اه.. حكمته بقي..
- طب هما خرجوا ازاى ان كان كابينة القيادة بتاعة الطائرة دى بابها بيتفتح من بره بس.. يعنى هما جوا محبوسين زيههم
- زى الباقي.. يبقى ازاى بقي الطقم كله يطلع سليم كده والباقي يموت محروق؟
- امر الله يا اخى.. انت ايه.. كافر!!
- يعنى الاتنين شهود الحادثة اتقتلوا ورا بعض كده من غير ما نعرف ايه اللى حصل؟؟
- اه يا اخى.. تصدق؟؟
- واللى قتل الاتنين.. هو هو نفس الشخص؟؟
- الاعمار بيد الله يا جدع
- والاتنين اتقتلوا بغرض السرقة؟؟
- اه
- ممكن أقول كلمة عيب؟؟

من حقك والله.. السيناريو أصله مهلهل اوى.. خصوصاً لما تعرف ان القاتل – عاطف زخاري – اتقبض عليه بعدما قتل العميد أبو بكر واتقتل هو كمان في سجنه في ظروف مجهولة جداً..

يعنى شهود الحادث اتقتلوا واللى قتلهم اتقتل.. واللى هيتكلم في الموضوع هنسلخ وشه.

القاتل اتقتل علشان تختفي للأبد الحقيقة وراء موت الفريق بدوي.

يا لهوي على الأفلام.. ده ايه ده يا عم!!

نسيت اقولك بقي.. حنة على جمب كده.

- مين اللى هرب المسدس ملفوف في منديل قماش للمجرم عاطف زخاري في المحكمة علشان يعرف يهرب؟
- انت قلت يا عم.. صديقة المرتزق اللى كان معاه في العراق!!
- ايوه.. اسمه ايه بقي؟؟

كان اسمه أحمد حلمي المسيري.. اشتهر في مصر بلقب سفاح المهندسين.. كان اتهم على الجراح المصري الراحل دكتور أحمد شفيق واحتجزه مع أسرته ليله كامله سنة 1994. بهدف الحصول على بحث جديد كان الدكتور شغال عليه وقتها.. أحمد حلمي اتقبض عليه في نفس السنة وحوكم وأعدم بتهمة القتل العمد.

أحمد حلمي المسيري يبقى السفاح اللى عرفناه في السينما من الفيلم بتاع هاني سلامه لما كان مصاحب نيكول سابا. سيبك انت..

شديدة نيكول برضه.

بلد الأفلام.

## داستور يا عراي

قرأت مره للدكتور أسامة الغزالي حرب مقال في جريدة الأهرام اليومية مقال بنفس العنوان.. أتكلّم فيه عن الأصل التاريخي للمقولة وانه بعد بحث طويل في معجم الأمثال الشعبية للعلامة المغفور له أحمد تيمور باشا.. ملقاش أي صل للمثل ده.. ولكن بالمزيد من البحث.. عرف وعرفنا معاه ان تاريخ المثل ده بالتحديد يرجع الى 13 سبتمبر سنة 1882م.

صباحية دخول الإنجليز مصر.

ويقول صباحية لأن قارئ التاريخ عارفين كويس أوى ان الانجليز مقدروش يدخلوا اسكندرية.. فعملوا لفه كبيره وجربوا يدخلوا من قناة السويس.. برضه معروفش يدخلوا لأن عراي كان واقف زى الأسد في وشهم.. فلجأوا للحيلة والخسة والخيانة عن طريق الفرنسي دليسيبس والمصريين محمد باشا سلطان – رئيس مجلس الأعيان - "أبو هدى شعراوي" والأميرالاي على يوسف "خنفس باشا" والقائمقام عبد الرحمن حسن قائد فرقة السواري وشيوخ العربان الى تاريخهم مفيهوش ولا صفحه واحده بيضاء زى مسعود الطحاوي ومحمد البقلي.

كل كلب من الكلاب دى كان له دور في الخيانة مختلف ومتكامل مع أدوار باقي الكلاب الى شبهه.. مش عاوز اخوض في الموضوع ده كثير لأنه قيد الأعداد حاليا من الصديق طه محمود إسماعيل بكل تفاصيله.. يكفيننا بس نعرف ان خنفس باشا قام بليل في العتمة ونور الطريق لمعسكر عراي علشان يدخل الانجليز في عز الضلمه والعساكر نايمه.. حتى انهم ملحقوش يحاربوا وتقوم العساكر مفزوعة على ضرب النار وتفضل تجرى وتتخبط يمين وشمال وهما لابسين ولا مؤاخذه.. اللباس أبو دكه.

دخل الانجليز مصر في عز الضلمه.. وصبح الصباح و"الخليفة" العثماني أعلن كفر عراي.. ومن وراه شيوخ السبوبة على المآذن الى دنسوها بأكاذيبهم عن الفلاح الطيب الصادق لا سامحهم الله أبداً.. وقبلهم كلهم طبعاً عاهرة النظام التاريخية الأولى.. جريدة الأهرام.. الجريدة الى حاكمت عراي وادانته في نص يوم وأطلقت عليه لقب "العاصي عراي".

صحيح.. عاصي لأنه رفض دخول الأجانب أرضه.. هو الغلطان فعلاً.. ايه الى وداه هناك.. سبتمبر يعنى موسم المانجا كان خلص.. رايح تعمل ايه يا عراي!!

شاء الله عزوجل انى أتجوز من الشرقية.. علشان انفذ وصية المزجانجي طلب وأبقى ساكن في حي طنطا وحيبي ساكن في أبو كبير.. وعلشان انول كل الرضا.. لازم اعدى على هرية رزنه.. بكسر ال "ه" وتشديد ال "ر" في هرية وكسره ال "ر" منفردة في رزنه.

هرية رزنه تبقى قرية تبع مركز مدينة الزقازيق في محافظة الشرقية.. لو هتروح ههيا "بلد محمد مرسى" او كفر صقر او أبو كبير.. يبقى لازم هتعدى عليها.. 6 كيلو من الزقازيق وتلاق نفسك في ميدان قدر يتوسطه تمثال مريض جدا ان جاز التعبير للزعيم المناضل المفترى عليه ابن هرية رزنه.. أحمد عراي.

يا صدمتي في قلبي يانى!!

بقي هو ده مدخل بلد عراي.. جرى ايه يا جدعان.. هو كان عاصي ومغضوب عليه بجد وللا ايه؟

دايماً كانت القاهرة والشعور بالقرف يتصاعد في نفسي وانا رايح على بيت المحبوب.. لزومها ايه العكننه دى بس ياربي.. مش كفايه هكع دم قلبي في دستة جاتوه بالشيء الفلاني لزوم زيارة حماتي.. كمان أشوف تمثال الزعيم بالنظر المزرى ده!!

هو ده خير ما جادت بيه قريحة النحاتين في مصر لتكريم الراحل الى وقف وقال للخديو توفيق.. حمرا يا تيفا بعد ما تيفا الضعيف قاله أنتم عبيد احساناتنا.. وياللا بقي..

اخدم يالا..

اركع يالا..

أولاً.. التمثال نفسه غلط.. الحصان رافع رجل واحد.. جرى العرف ان تماثيل القادة المحاربين على الأحصنة بتبقى كالآتي:

- الحصان رافع رجله الايمن الأمامية.. بما معناه ان القائد ده مات في ميدان المعركة.
- الحصان رافع رجل واحد أماميه.. معناه ان القائد ده مات جريح او متأثر بجراحه ولكن مش في الميدان
- الحصان واقف عادى.. معناها ان القائد ده مات بعد ما تقاعد او مات في بيته زى اى حد.

كلنا عارفين أن عراي مات في بيته بعد ما رجع من المنفى.. يبقى الحصان رافع رجل واحد ليه؟

ما علينا.. دى ملاحظه فرعيه ملهاش لزمه.. خلينا في التمثال الهدف ده.

ايه بقي يا مصر.. في ايه؟

ما أحنا عندنا تمثال إبراهيم باشا "أبو أصبع" في ميدان العتبة.. تمثال قيمه وسيمه ومنحوت بفن ومزاج.. اشمعنى عراي يعني؟؟  
ما علينا ثاني..

نخلينا في الموضوع الأساسي..

في يوم ما قررت انى انزل من الميكروباص في هريه.. الوقت لسه بدري ومفيش ضرر من انى أزور بيت عراي.. خصوصاً انى عرفت حاجه غريبه أوى عن بيت الزعيم الله يرحمه.

نزلت وركبت توك توك.. 10 دقائق ولقيت نفسي في شارع أفقر من الفقر الفقير.. السواق قالي اتفضل يا باشا.. البيت على الشمال اهو.

الساعة 11 صباحاً.. البيت مفتوح وفي موظفين حكومة تبع الآثار.. طبعاً التصوير ممنوع لسبب ما نجعله ويلزم تصريح من جهة ما منعرفهاش هناخده في يوم مجهول بعد ما ندفع المعلوم.. العادي ان 20 او 30 جنيه ادفنهم في جيوب الموظفين ومش بس هيسمحولى بالتصوير.. لا.. دول ممكن يخلوني ادفن صورته قديمه ليا في وسط مقتنيات بيت عراي على أساس انى أبقي اخوه الأصغر من امه وكده.. وادخل التاريخ وأبقى الأميرالاي حسنى عراي انا كمان.. مش بعيد يعملولي تمثال أكبر من تمثال عراي نفسه.

شيء ما في هيئتهم او طريقة كلامهم.. اهمالهم وجهلهم الواضح بالمكان الى قايمين على حراسته وصيانته قفلوني منهم حتى انى استخسرت اقولهم صباح الخير.. دخلت اتفرج على البيت المهمل بشده وبعدين ركزت على الهدف الى انا جاى علشانه مخصص.  
باب البيت..

ركزوا كده في الصورة..

باب البيت عليه شوية رموز كده.. نجمه وخطوط وحروف وهاشتاج.

هو عراي كان عنده حساب على تويتر وللا عمل هاشتاج سماه [#اطردوا\\_الانجليز](#) مثلاً؟

سألت الموظفين عنه.. ايه الرسم ده يا جماعه لو سمحتم؟

وكأني رميت سؤال في صحراء جرداء لا زرع فيها ولا ماء علشان يردد الصدى صوت سؤالى وهو بيقول..

سمحتم

سمحتم

ظظ فيكو.. مش عاوز اعرف منكوا حاجه ومش هديكو حلاوة الزيارة برضه حتى لو قفلتولي 500 مره كل سنه وانت طيب يا باشا. شوية قراءه ودعبسه نعرف بعدهم ان ده حجاب.. طلسم يعنى.

حجاب اسمه "العهد السليمانية السبعة".

حجاب وطلاسم وسحر.. شعوده يعنى.. على باب بيت عراي.

يا نهار!! معقول عراي كان له في الهري ده!!!



عراي نفسه الله أعلم.. انما الواضح أهو ان عراي نشأ في بيت يؤمن الخزعلات دى.

طيب حكايته الحجاب ده؟

شوف ياسيدي.. في كتاب سحر منسوب للأمام العلامة جلال الدين السيوطي رحمة الله عليه.. اسمه الرحمة في الطب والحكمة.. حسب فتاوي دور الافتاء في مختلف الدول الإسلامية ان الكتاب ده من كتب الكفر الصريحة المحرم قراءتها.. شأنه في كده شأن كتاب شمس المعارف لأحمد بن على البوني.. وأنكر اهل العلم من الأساس نسب الكتاب ده للعالم الجليل. جاء في الكتاب ده ما دار من حوار اذكره باختصار بين جنيه اسمها التابعة ام الصبيان "عفريته يعنى" وبين نبي الله سليمان عليه السلام:

\*\*\*\*\*

ورد أن جنية عجوز شمطاء تدعي "التابعة" كانت تهدم الدور والقصور وتقلل الرزق بالليل والنهار وتخلف الربا والشور.. ما أن علم بها نبي الله سليمان حتى أمر بجرها بالسلاسل والأغلال وعذبها عذاباً شديداً.. فلما طلبت الرحمة قال لها: كيف نخفف عنك العذاب والشر كله منك؟

قالت: يا نبي الله.. أنا التابعة التي أخلي الديار.. وأنا معمرة الهناشير والقبور.. وأنا التي مني كل داء ومضرة.. نومي على الصغير فيكون كأن لم يكن.. وعلى الكبير بالأوجاع والأمراض والعلل والبلاء العظيم والفقر.. وأسلط عليه ما لا يقدر عليه.. ونومي على المرأة عند الحيض أو عند الولادة فتعقر ولا يعمر حجرها.. ونومي على التاجر في تجارته بعد الفرح بالربح فيها فيخيب ويخسر.. وأخذت التابعة تعدد ألوانا وأصنافا من العذاب والبلاء التي تمتحن بها عباد الله.. فأمرها نبي الله سليمان بأن تعطيه العهود والمواثيق التي تبطل افاعيلها الشريرة.. فأعطته سبعة عهود من علقها فإنها لا تقربه في نفسه أو أهله أو ماله.. بعد كل عهد منها يقول لها نبي الله سليمان عليه السلام أعطني عهدا وميثاقا فحلفت له على ذلك.

\*\*\*\*\*

اما نص العهود السليمانية فهو كالآتي..

### العهد الاول

بسم الله الرحمن الرحيم

بحق الله الذي لا إله الا هو.. كل شيء هالك الا وجهه.. له الحكم والية ترجعون.. إني لا أقرب ولا ادنوا من علق عليه هذا الحجاب.. ولا أضره في اهله ولا في ماله ولا في اولاده.. ولا أضره في لحمه ولا في دمه.. ولا في شعرة ولا في جسمه ولا في بشرته.. والله على ما اقول شهيد.

### العهد الثاني

بسم الله الرحمن الرحيم

بحق الله الذي لا إله الا هو.. عالم الغيب والشهادة هو الرحمن الرحيم.. رافع السماء بغير عمد.. وبسط الارض على ماء محبوس.. وبحق نور النور.. ومدير الامور.. وبحق الرب الذي خلق ادم وحواء.. وسجدت له الملائكة.. إني لا أقرب من علق عليه هذا الحجاب.. صغيرا كان ام كبيرا.. رجلا او انثى او فطيما كان او رضيعا.. والله على ما اقول شهيد.

### العهد الثالث

بسم الله الرحمن الرحيم

بحق الله الذي لا إله الا هو.. العزيز الجبار المتكبر سبحانه الله عما يشركون.. إني لا أقرب ولا ادنوا من علق عليه هذا الحجاب.. ولا ادخل له بيتا لا هو ولا أولاده ما دامت السماوات والارض بحق الله القاهر عبادة.. وهو الحي الذي لا يموت.. وبالإسم الذي خرج به يونس من بطن الحوت.. إني لا أقرب من علق عليه هذا الحجاب.. والله على ما أقول وكيل

#### العهد الرابع

بسم الله الرحمن الرحيم

بحق الله الذي لا إله الا هو.....الخالق البارئ المصور.. له الاسماء الحسنى.. يسبح له ما في السماوات والارض.. وهو العزيز الحكيم شديد العقاب.. إني لا أقرب من علق عليه هذا الحجاب.. ولا اتعرض له ان كان صغيرا او كبيرا ذكرا او انثى.. ولا أقرب حيوانه والله على ما أقول وكيل.

#### العهد الخامس

بسم الله الرحمن الرحيم

بحق الله الذي لا إله الا هو الكبير المتعال ذو الجلال والاکرام لا تدركه الأبصار وهو اللطيف الخبير.. إني لا أقرب من علق عليه هذا الحجاب.. ولا ادخل له بيتا ما دام معه هذا الكتاب.. والله على ما أقول وكيل.

#### العهد السادس

بسم الله الرحمن الرحيم

بحق الله الذي لا إله الا هو العزيز العظيم الاعظم الكبير الاكبر.. الذي خلق السماوات والارض هو الرحمن الرحيم.. إني لا أقرب من علق عليه هذا الحجاب.. صغيرا او كبيرا ذكرا او انثى.. والله على ما أقول شهيد.

#### العهد السابع

بسم الله الرحمن الرحيم

بحق الله الذي لا إله الا هو الأول والآخر الظاهر والباطن وهو بكل شيء عليم.. إني لا أقرب كل من علق عليه هذا الحجاب وهذه الأسماء.. وعهدا على كل عهد أعطيته.. والله على ما أقول وكيل.

وحق هذه العهود السبعة السلیمانية باني لا أقرب حامل هذا الحجاب ولا أصدع ولدا لا في اكل ولا شرب ولا في بعد ولا في قرب ولا في ليل ولا في نهار ولا عشي ولا في ايكار ولا عند موقد نار ولا في خراب ولا في عمار ولا في سواحل ولا في نهر ولا في جبال ولا في ابحار ولا في ابار ولا في بستان ولا في حمام ولا في يقظة ولا في منام ولا في قعود ولا في تنور ولا في القبور.

قال لها نبي الله سليمان بن دودا عليهما السلام في كلام عظيم لا يدركه الا مؤمن ومؤمنة.. ربطت يدك اليمنى إلى رجلك اليسرى ويدك اليسرى إلى رجلك اليمنى واخذت عليك ألف عهد وعلى كل ألف عهد عقدة وعلى كل عقدة خاتم وعلى كل خاتم ألف ملك وعلى كل ملك اسم من أسماء الله الحسنى يدفعون الأذى عن حامل هذه العهود السلیمانية. مادام الله يعبد.. والحج يقصد والماء يورد والحجر جلمد والغراب أسود والخلق يصلون على محمد وال محمد.

\*\*\*\*\*

أي كلام في أي كلام.. حازه ميصدهقاش نص عاقل ولا مجنون.. لكن للأسف كان سلو ايامهم في القرن ال 19 كده.. الجهل كان سيد أسياذ الموقف خصوصا في أرياف مصر المحروسة.

هيطلع حد يقولك بكل قوة وحماس.. اخرس يا كافر يا عدو الله.. السحر موجود في القرآن.

تروح عامل ايه يا معلم؟؟

بمنتهي الهدوء والثقة.. تقوله انت صح يا معلم.. انت صح.

بالأذن بقي علشان أقوم الحق الأسياذ قبل ما ينصرفوا.. عندي جلسة تحضير روح دى ستيفانو.. هجيبه يلعب مع الزمالك علشان يبطل أفعال الولية خديجة المغربية زى ما أكد وذكر مولانا الأمام مرتضى بن منصور.

داستور يا أسياذ.. داستور يا مباركين.

حييييييييييييييييييييييي.

## قطع ايدك يابا

بس يا سيدي.. وعرفنا ان الصالح طلائع صاحب المسجد الى قصاد باب زويلة كان اونطجى وبتاع التلات ورقات.. لا جاب رأس الحسين على مصر ولا يعرف من أمور السياسة الا "الدهلكه" زى ما قال المؤرخ العظيم محمود بن عبد العزيز المقرئ في كتابه الأثير السلوك في دهبزة الملوك.

طيب.. امال الجامع الثاني الكبير الى قصاد الصالح طلائع ده حكايته ايه؟؟

قصدك جامع المؤيد شيخ؟؟

شوف يا سيدي

عارف ايه الى حصل في أواخر القرن ال 14.. تحديدا سنة 1382 من بعد ميلاد السيد المسيح؟

نزل من على كرسي السلطنة في مصر سلطان مملوك اسمه الصالح زين الدين حاجى وطلع مكانه سلطان مملوك تانى اسمه الظاهر سيف الدين برقوق.. الموضوع مش سهل كده علشان نقول نزل مملوك من على العرش وطلع مكانه مملوك تانى.. الصالح زين الدين حاجى كان آخر سلاطين دولة المماليك البحرية.. دولة الحروب والفتونة والمجدعة والفلوس والدم.. بينما الظاهر سيف الدين برقوق كان أول سلاطين المماليك الشركس "المماليك البرجية" دولة المؤامرات والخيانات والدسائس والجهل والخرافات وعجب العجاب كله.. الدولة الى استمرت في مصر لحد ما دخل ولاد عثمان بالسيف والمدافع علشان يجيبوا عاليها واطيها ويقلبوها من سلطنة لها هيبة وشنه ورنه الى مجرد أيلاله "ولاية" في دولة الملك الجديد.

الظاهر برقوق كان من السلاطين الشداد في الحروب.. داهيه وابن لذي.. حريف في أمور السلاح والسيوف والرماح.. صحته حلوه ونفسه طويل.. مشهودله بالكفاءة من أيام ما كان امير عشره "جونبور" ميسواش مليم.. محب للفقراء وعنده رحمه وعدل.. صايح سياسيا وقلبه مليان رحمه بالفقراء.. لولا بس انه كان بيحب الغلمان كنت قلت بملء الفم انه سلطان عشرة على عشرة.

سموه برقوق لأن عينيه كان فيها شوية جحوظ كده وشبه البرقوقة فعلا.. له انتصارات كتير.. وعلشان كان راجل حقاني ويعرف ربنا.. عينوه في الوصاية على وريث السلطنة "الصالح زين الدين حاجى" الى مسك العرش مكان أخوه علاء الدين على وهو يا دوب عيل ابن 11 سنه.

هل برقوق هيصون العهد ويحافظ على العرش للوريث لحد ما يكبر؟

ده كلام.. مبيقاش مملوك طبعاً.

المتوقع حصل.. طمع برقوق في الكرسي فراح عامل شوية قلق على كام معركة خايبة خسرهم كلهم ضد السلطان المتسلطن على السلطنة.. ويتحبس الى كان نفسه يبقى سلطان.. وهوب هوب المجلس العسكري يقلب الليلة كلها علشان المحبوس يخرج من الحبس ويبقى سلطان والسلطان الى على الكرسي يركب المرجيحة.. ويزقها أمراء المماليك زقه عافية.. فتطير المرجيحة بالصالح زين الدين حاجى الى غير عوده ويتسلطن السلطان برقوق على كرسي السلطنة معلنا نفسه السلطان الملك الظاهر سيف الدين برقوق بن انس بن عبد الله الشركسي الى وصفه بعض المؤرخين - زى ابن العماد العكري مثلا- في كتاب شذرات الذهب في اخبار من ذهب بأنه "كان أعظم ملوك الشراكسة بلا منازع.. بل المتعصب يقول إنه أعظم ملوك الترك قاطبة".. ويبقى بعد كده

الصبييت	أحمد	ابن	عدوية	الرماح	ويغنيله:
سبع	سلاطين	استسلطاناهم	من	عند	المستسلطنين
تقدر	يا	يا	تستسلطن	لنا..	سبع
زى	ما	استسلطاناهم	من	عند	المستسلطنين
بس	يا سيدي..	وراحت	دولة	المماليك	الشركس.

.....

برقوق أول لما مسك عمل شوية شغل حلوين في البلد.. في الوقت ده كانت في عركه كبيره اوى دايره بين تيمور لنك بتاع المغول وبايزيد الأول بتاع العثمانيين.. ساحة الحرب كانت حوالين الشام.. الى هي أساسا جزء من السلطنة المصرية.. قوم الاتنين علشان يأمنوا ظهورهم.. كانوا بيحفوا علشان ينولوا الرضا من مين؟؟

برقوق

صح كده.. نتخيل بقي حال البلد أيام برقوق كان عامل ازاي وهو بيقبض من هنا بالدولار المغولي ويقبض من هنا بالليرة التركي..

أحلى شغل بالصلاة على النبي.. تلاقيه كان بيدعي ان الحرب دى تفضل دايره الى مالا نهاية. الجماعة الشركس دول فيهم خصلة مميزة أوى.. يحنوا لبعض ويتلموا حوالين بعض ويساعدوا بعض ويرقوا بعض.. مهما الزمن طال بيهم واتغربوا وافترقوا في الأرض.. تلاقهم ملمومين حوالين بعض زى اليهود بالظبط.. عندهم أحساس بالخوف وترقب الغدر من الناس.. شايفين الكراهية في العيون الى بتشكرهم دايمًا.. وعاملين حسابهم على يوم الكرسي او الدنيا هتتقلب بيهم.. علشان كده برقوق من قبل ما يتسلطن.. كان بيشتري ممالك بالهبل.. بس مش أي ممالك.. دول لازم يكونوا شركس أصليين من بلاده.. اهلهم معروفه او لا.. مخطوفين وللا متباعين.. مش مهم.. المهم ان برقوق وصل عدد ممالك الشركس في أواخر أيام الممالك البحرية الى 5000 مملوك مقاتل ومتدرب على أعلى مستوى..  
رقم يخض فعلا..

يمكن علشان كده لما الأمور ضعفت في أيام المنصور علاء الدين على.. برقوق ملقاش مشكله في السيطرة على الوريث زين الدين حاجي.. مفيش في كتب التاريخ أي شيء يشير الى معارك دامية او حروب عظيمة علشان ينتقل الحكم من هنا لهنّا.. مش زى الى حصل مثلاً بين الغوري وطومان باي وسليم الأول بعد الكلام ده ب 130 سنة. في يوم من ذات الأيام قبل ما برقوق يبقى سلطان "كان لسه اتابك العسكر" كان قاعد بيفطر في ساحة التدريب مع ممالكه.. دخل عليه خاصكى الساحة وقاله بصوت جهوري:  
- النحاس محمود اليازدي طالب الأذن بلقاء الأمير  
- خليه يدخل لما نشوف مجابية السودة  
ويدخل تاجر العبيد وهو بيتكعبل في عبايته الواسعة.. مش قادر يخبي نظرة الطمع في عينه ولا اللفظة الواضحة في كلماته الى بتسابق بعضها علشان تغري الاتابك بما تحتويه جعبته من بضاعة جديدة من الى بيعها.. شوية عبيد شركس انما ايه.. بكرتونه المصنع.

ينقي الأمير ويختار.. ده رفيع أوى.. ده وحش أوى.. ده هفأ أوى.. لا لا استني.. الواد ده شكله كويس وشرس..  
- خد ياض هنا.. سنك أد ايه؟  
- 12 سنه يا أمير  
- اسمك ايه.. وبلدكوا فين  
- انا جيت من الشام يا مولاي.. الى يؤمر بيه مولاي هيكون أسمى  
- خلاص.. طالما انت جاي من عند الجعر محمود اليازدي.. يبقى من النهارده انت اسمك المحمودي.  
- أمر مولاي.. ان شاء الله انول شرف خدمتكم.  
- وزادوا ممالك الأمير برقوق مملوك.. مملوك اسمه المحمودي..  
هو ده بطل الحدوة المره دى.

.....

تلف الأيام بسره ويركب الأمير برقوق على كرسي السلطنة.. قدر بذكاء انه يتخلص من كل منافسينه قبل ما يطلع الكرسي فعلا.. علشان كده أول ما حلفوله يمين الولاء كسلطان.. بدأ بسهولة إجراءات تدعيم أركان دولته عن طريق تعيين رجالاته في الأماكن الحساسة علشان يمسك بطن ومصارين الدولة كويس.. الى هو مصطلح الدولة العميقة يعنى. المملوك المحمودي الى بنحكي عنه كان ذكي ونبيه ومتميز أوى في تمارين الفروسية واللعب بالسلاح.. كسب ثقة برقوق بسره للدرجة الى خلت برقوق يرقيه من مجرد حارس الى رئيس الحرس السلطاني.. وفي نفس السنة عمله أمير للحج.. وده كان منصب شرفي مهم أوى.. قوافل الحجاج كانت بتتعرض دايمًا للنهب من قبائل الاعراب.. أمير الحج كان مسئوليته تأمين القافلة في رحلة الذهاب والعودة.. الشخص المختار كأمر للقافلة واثبت كفاءه عالية وإخلاص للسلطان.. حتى ان السلطان اتكيف منه تمام زى المملوك المحمودي كده الى راح ورجع بالقافلة واثبت كفاءه عالية وإخلاص للسلطان.. حتى ان السلطان اتكيف منه أوى.. فراح معينه نائب له في الشام.. كل ده وهو عمره 30 سنه بس. في الوقت ده حصل شوية قلق كده في حلب.. واحد من الأمراء المغضوب عليهم اسمه "منطاش" اتفق مع أمير حلب "يلغا الناصري" وقرروا يعملوا الدنيئة مع السلطان برقوق.. قدروا يهزموا جيوشه في الشام واتحركوا بالفعل على مصر علشان ينهزم السلطان برقوق في الأول ويتحسب في قلعة الكرك في الأردن ويطيح منطاش وصحابه في البلد.. رجعوا الصالح حاجي تاني وعملوه سلطان أي كلام.. وبعدها بدأوا حملة تصفية رجاله برقوق وعلى رأسهم طبعا دراعة اليمين.. المملوك المحمودي المحمودي كان حظه حلو.. خدوه زى ما هو ورموه في سجن سيء السمعة اسمه سجن شمائل.. السجن ده كان هو والمقبرة واحد.. مفيهوش زنازين ولا عنابر.. كل مسجون بيبقى مرمى في حفرة غويطه بيصب فيها الصرف الصحي.. متسلسل من ايديه

ورجليه في الحيطه وهو واقف وكأنه مصلوب.. بس بدل ما يدقوا مسامير في أيده كعادة الصلب.. كانوا يبشردوا دراعه بالسلاسل على الحيط علطول الى مستوى اعلى من مستوى كتفه.. ويفضل السجين من دول واقف غصب عنه على حيله طول النهار.. وعلى مغيب الشمس يرخوا السلاسل شويه علشان السجين يعرف ينام.. ينام وسط برك الصرف الصحي الى مالیه الحفرة.. مكانه كان فين بقي سجن شمائل ده؟؟ كان موجود في منطقه اسمها قيسارية "سوق" سنقر الأشقر.. دى على شمال باب زويلة علطول ولها قصة طويلة أكيد هنحكيها بعدين.

فضل اد ايه المحمودي في سجن شمائل ده؟؟ سنه كامله.. 12 شهر بالتمام والكمال قضاهم المحمودي قايم بالنهار مربوط بالسلاسل في الحيط.. ونايم لبيل وسط الصرف.. نهاره بيقضيه يهرش في جتته من أثر قرص البراغيث والحشرات الى اكيد لقت في جو التلوث ده بيته خصبه جدا للعيشة المرتاحة.. وليله كله عياط وتضرع لله عزوجل انه يفك محنته.. الإنسان في الغالب بيبيقي قريب اوى من الله عزوجل وهو في مصيبة وكالعادة ينساه اول ما المصيبة تتفك.. في واحدة من الليالي الطويله بلا نهاية.. يبدو ان قرص القمل كان تاريخي في اليوم ده.. المحمودي صعبت عليه نفسه اوى.. بعد العز والمنجه والحرب والأمره.. يترى الرمية دى.. حكمتك يا ربى.. ندر عليا لو خرجت من هنا.. ههد مقبرة الشمائل دى واعمل مكانها مسجد يحكوا ويتحاكوا عنه.. لا له مثل في الشرق ولا الغرب.. المكان الموبوء الى الانسان بيمتهن فيه ده بأذنك يا ربى هخليه مكان يذكر فيه اسمك انت لوحذك.. هخلي الناس كلها تيجي هنا وتقول يارب.. تذب وتزكى.. تصلى وتدعى.. مش هيبقى في مكان لدموع مظلوم ولا قهر مهزوم.. مش هيبقى في مجال لتجبر حارس ولا افتراء على أسير.. مش هيبقى في الا سبحان ربى العظيم.. سبحان ربى العظيم.. بس أخرج من هنا يا واسع الرحمة والكرم.. أنقذني بعطفك واغمرني برحمتك يا مالك الملك والملوك وانا أعيش عمري كله ليك انت لوحذك.. انت الباقي والوارث.. انت الحقيقة الواحده في دنيا كلها زيف ومؤامرات.. ارحمنى لو بريق الدنيا أخذ عقلي.. انا عبدك وندمان وراحي عطفك ورضاك.. ندر عليا ان فكيت أزمي.. ليترفع اسمك وذكرك من المكان ده طول ما انا حي وبعد ما اموت كمان.. أفلح ان صدق يا جناب الأمير سابقاً.. الأسير حالياً.. موضه الأيام دى كانت الطاعون.. كل سنه بسبب جفاف الأنهار او هجوم جحافل الجراد كان ييجي طاعون يحصد عشرات الالاف ويمشي.. الطب كان عاجز عن توفير أدوية.. السلاطين كانت منصرفة عن أحوال البلاد بتأمين حياتهم هما شخصياً.. الناس زى البهائم مكانش لهم هم الا توفير اللقمة واهيينى النهارده وموتى بكره.. الطاعون ضرب الشام.. حصل قلق وفوضى كبيره اوى استغلهم السلطان المحبوس سيف الدين برقوق علشان يهرب ويبدأ مرحلة الانتقام.. بدأ يجمع مماليكه ورجالته من كل مكان.. اتفق حتى مع العربان الى ملهمش كلمه ولا عهد.. أسرف جدا في وعوده لكل الى هيساعده.. الهدف غالى والمراد صعب.. يلزمننا رجاله عفيه علشان نحط على العيال الى قاعده تهبل في مصر دى.

- جاهزين يا رجاله؟ "بصوت منصور الحفني" - جاهزين يا كابير وهجم سيف الدين برقوق على مصر هجمة إنك ميت وانهم ميتون.. الصالح حاجى قالك ده شكله بيتكلم جد.. مبدعهاش بقي يابا العمر مش بعزقه وانا لوحدي خصوصا ان الأمير منطاش قرا الليلة كلها من بدري وخد ديله في سنانة وقال يا فكيك على الشام عملا بالمبدأ القائل "الجري نص الجدعنة".. بس هو جود شويه وبقي الجري هو كل الجدعنة.. المحمودي في "حفرته" معرفش غير ان ديك ام البراغيث دى بهدلت جتته والدنيا برد رصاص.. فبراير جاى السنة دى سانن سنانة اوى.. لكنه تفاعل خير لما سمع دوشه واصوات زغاريد جايه من فوق.. في ناس كثير بتجري وصوت حديد بيتكسر.. يكونش الى فبالك صح يابو المحاميد!! كريم يارب.. يا خبر النهارده بفلوس.. في نص فبراير 1390م بقي ببلاش.. دخل الظاهر برقوق على القلعة دخله معلمين.. المره دى دخل بغشم وغباوة والدم كان للركب.. كل الى خانوه ملحقوش ينطقوا الشهادة.. في عالم اثار ومستشرق إنجليزي اسمه ستانلي لين بول عامل كتاب روعه عن الفترة دى اسمه تاريخ مصر في العصور الوسطى.. حكى فيه عن كم مهول من الرؤوس الى اتعلقت لوحدها كده على باب زويلة.. رؤوس أعداء برقوق طبعا.. مين فلت من الليلة دى والدنيا ضحكته وبقى بمبي؟؟

- قلنا ان برقوق هرب من سجنه ولم رجالته واتفق مع طوب الأرض علشان يرجع مصر تانى ويركب كرسي السلطنة.  
 - اه صح.. وقفنا عند الجدع المرمى في الحفرة ده وهو بيعيط من قرص البراغيث  
 - عفارم يا رجاله.. ده كان المملوك المحمودي.. دراع السلطان برقوق اليمين.. نكمل بقي.  
 برقوق كسب الهجمة وبدأ يخرج كل رجالته من السجون.. خصوصاً سجن وللا مقبرة شمائل ده.. المحابيس خرجوا من هنا وجربوا على الحمامات من هنا علشان يزيلوا اثار البراغيث ومية الصرف والجرب الى سرح في جتتهم بسبب الحبسة الطويلة..  
 الدنيا زهزعت من تانى مع المحبوسين ومن ضمنهم طبعاً بطل الحدوتة.. المملوك الأمير المحمودي الشركسي.  
 طيب.. جميل..  
 وبعدين؟

الظاهر برقوق عمل في مصر شغل كويس.. رفع ضرائب كثير عن الناس.. عمل مستشفيات بكميات كبيرة.. مدارس فخمة لتعليم القران.. بنى أسواق علشان يفتح أبواب رزق للناس.. فكر بعمق في المعمار وبدأ يعمل جسور تربط الجزر المختلفة في القاهرة ببعضها علشان يسهل حركة المواصلات وينشط التجارة.. زى مثلاً جسر أروى الى كان رابط بين جزيرة أروى "الزمالك" وجزيرة الروضة.. واللى أبدع في بناؤه واحد من أخلص اتباعه "الصدوق الصدوق للمملوك المحمودي" الأمير جهاركس الخليلى.. الرجل الى بيكره الشيعة الفاطميين كراهية العمى حتى انه بنى على أنقاض مقابرهم الملوكية سوق كبير أوى اتعرف باسمه لحد النهارده.. رحناه كلنا في رحلات المدرسة واحنا صغيرين ورحناه تانى واحنا كبار علشان نشيش على قهوة المعلم فهمي الفيشاوي..  
 خمنوا كده يبقى ايه؟

يبقى خان الخليلي.  
 الناس حبت الظاهر برقوق جداً لرحمته وعطفه على الفقراء.. مصر عاشت فترة حلوه جداً في ولايته الثانية خصوصاً لما طقس في تيمور لنك وقتل رسله "وبرضه علقهم على باب زويلة" وخلاه يرجع جرى على بلدهم وقفاه يقمر عيش.. يبدو كده ان القدر شال لمصر حاجه حلوه أخيراً.

.....  
 - استني يا عم.. انت هتاكلنا في الكلام  
 - خير.. في  
 - جهاركس الخليلى ده حكايته  
 - حكايته ورواية.. نخلص من دى.. ونخش على دى.  
 - طيب ماشي.. متنساش المنشن وحية ابوك يا شيخ  
 - يا عم  
 - عارفها.. دى بتاعة مصطفى  
 - اسفخص على الى يقعد معاكو.

.....  
 9 سنين سعادة عاشتهم مصر في حكم الظاهر برقوق الى ان جاء العام 1399م بمفاجأة سيئة للمصريين. مات السلطان سيف الدين برقوق بعد رحلة مرض قصيرة.. الناس اترحمت عليه وافتكرته بالخير.. هو كان طماع شويه ولسانه طويل حبتين وشكاك الى ابعد الحدود ويبيدي المناصب للموظفين بالفلوس "براطيل يعنى" بس كان رجل خير وعمل كثير لمصر والمصريين.

مثلاً ابن حجر العسقلاني "أمير المؤمنين في الحديث والقطب الشافعي المشهور" قال عنه في كتابه انباء الغمر بأبناء العمر في وصف أحداث سنة 779:  
 " وفي هذه السنة تزايد الرخاء بمصر حتى بيع بدرهم واحد أربعة وعشرون رغيفاً بارداً والقنطار الجبن الجاموسي بثلاثين درهماً وبيع بدرهم أربعون حبة من البيض"  
 وقال تانى في وصف أحداث سنة 796 هـ قبل وفاة برقوق ب 4 سنين:  
 "وفي هذه السنة كان في القاهرة من الرخص ما ضرب به المثل.. حتى ان عنوانه ان البطيخ العبدلوى ابيع كل قنطار بدرهم.. وقس على ذلك"

طيب.. الأسعار دى غالية وللا رخيصة.. قيمة الدرهم ده تطلع اد ايه بالظبط؟  
 نشوف الحسبة دى.. مصدرها كتاب المكايل والموازين الشرعية للدكتور على جمعه وكتاب الميزان في الأقيسة والأوزان لعلى باشا مبارك.. وعلشان قيمة الفلوس النقدية بتتغير.. هنعسب بالوزن.. الحنفية أيديهم كانت فرطه شوية في الحساب.. علشان كده  
 هناخد برأي جمهور العلماء.  
 الدرهم يساوي 7 اعشار وزن الدينار واللاتين من الذهب عيار 24.



الدينار الوزن 4.25 جرام.. يعنى الدرهم يساوى 2.9 جرام ذهب.  
يعنى فى أيام الظاهر برقوق كانت ال 40 بيضه ب 2.9 جرام ذهب.  
جرام الذهب "24" حاليا ب 740 جنيه تقريبا.. يعنى ال 40 بيضه كانوا ب 2146 جنيه بأسعار الأيام دى.  
قنطار البطيخ "143 كيلو" بما يساوى 2146 جنيه بأسعار أيامنا برضه.  
طيب ما الدنيا غاليه اهى.. مش كده؟  
لا مش كده.. هنا فى معلومه مهمه جدا ناقصه.. الكلام عن الأسعار من غير ربطه المباشر بمستوى الدخل والأجور يبقى كلام عبيط زى كلام بتوع الحكومة عندنا كده لما بيتكلموا فى الفلوس.. تحس ان الدنيا ورديه وبعد ما يخلصوا كلام تنزل تدفع نص مرتبك فى شويه بقالة.  
الكلام عن الأسعار لازم يبقى معاه فى نفس الجملة ونفس السطر كلام عن الأجور.  
الأجور كانت كام طيب؟  
كمثال.. طائفة البغالة والحمارين "الى هما العربجية" كانوا بياخدوا فى النقلة او التوصيله ربع درهم.. الحداد كان بياخد فى مصنعية السيف درهمين.. مهر العروسة من المستوى المتوسط كان فى حدود 500 درهم.  
الحداد كان يقدر يعمل فى اليوم من 10 الى 15 سيف.. لو قلنا 10 سيوف يوميا.. يعنى 20 درهم فى اليوم.. يصرف درهم ويحوش درهم.. يعنى 10 دراهم فى اليوم متشالين.. يعنى 300 درهم فى الشهر.  
يعنى شغل شهرين يجيب لحداد ارزقي شغال بيومه مهر بنت لواء ويخليه يعمل فرح فى طبلخانه الفورسيزونز.  
أجرة شغل سيف واحد لحداد كان يقدر يشتري بيها 286 كيلو بطيخ أو 80 بيضه.. العربجي بتمن توصيله واحده كان يقدر يشتري 10 بيضات.. تجهيز جيش قنصوه الغوري كلفه 50 ألف درهم "145 كيلو ذهب" ودول سعرهم دلوقتى فى حدود 110 مليون جنيه.. 110 مليون جنيه علشان تجهز جيش قوامه 40 ألف عسكري بالأسلحة بتاعة زمان اعتقد مبلغ مقبول.. يبقى كده الحسبه  
ده حال الناس عموما فى سنين الظاهر برقوق.. ما بالنا بقى بالسلطان سيف الدين برقوق مثلا الى لما مات ساب 2 مليون و400 ألف دينار ذهب غير العقارات والأراضي واكثر من 12 ألف راس من مواشى وخيل؟  
هكذا.



فرج ده طبعا المقصود بيه فرج بن برقوق.. يا اخى ينعل أبو المطبلاتيه في كل زمان ومكان.. ممالك ان كانوا او تركمان.. انس عاشوا او جان.. في صحراء او حتى في أصغر بستان.. طيب.. المملوك المحمودي بقي.. موقفه ايه من برقوق الأبن؟ الأول.. برقوق الابن ده ظروفه كانت ايه؟

.....

شوفوا كده الظاهر سيف الدين برقوق كان ايه.. واعكسوا الايه تماما.. يطلعلكوا الناصر فرج بن برقوق.. ركب فرج ابن برقوق الكرسي وسنه 11 سنه تحت وصاية الأمير ايتمش الجاسى "حدوته راخر" أول ما تم 12 سنه قدروا ممالكه يقنعوا قضاة المذاهب الشرعية انه كده بقي راشد.. ويفتى القضاة لا فض فوهم ان العيل ده كده خلاص بلغ مبلغ الرجال.. فلا داعي للوصاية عليه من الأمير ايتمش.. ويجود فرج في الليلة دى بأنه لا داعي للوصاية ولا داعي الأمير ايتمش نفسه.. فيبعته على الشام علشان تطير هناك رقبته برومانسية وشاعريه.. معلومة صغيرة كده على الهامش.. فرج بن برقوق امه كانت يونانية اسمها خوند شيرين.. بعكس سلاطين الشركس كلهم فرج بن برقوق الوحيد الى مكانش بيتق في بنى جنسه من الشركس.. علشان كده رقى ممالك كثير اوى يونان "روم يعنى" وفضلهم على ممالك أبوه الشركس.. نقدر نتخيل ايه الى حصل؟ طبعا حزب ممالك السلطان العيل طقش مع ممالك الحزب الوطني القديم.. الطقش ده كانت نتيجته مذابح دموية مهولة كان بيتسلى فيها فرج بذبح المعارضين ورميهم من فوق اسوار القلعة.. حتى انه في ليله واحده دبح 100 مملوك ورماهم لو كشه واحده كده من فوق سور القلعة.. يهدك ربنا راجل.. المثل بتاع يخلق من ظهر المعلم مبلم ده ينطبق حرفيا على الناصر فرج بالظبط.. بخلاف انه كان دموي مجنون مصاب بالبارنويا.. كان هفأ وضعيف وجبان ومتحجر القلب وقاسى جدا.. لا يجيد في الدنيا الا فنون القتل والغدر.. منغمس في كل أنواع الموبقات بلا حدود.. ضحل الفكر وانفعالي الى اقصى حد.. فاشل سياسيا واجتماعيا ودينيا.. تركيزه كله كان منصب في حياته كلها على حاجتين..

الخمر.. والهوب هوب المقريزي مثلا قال عن أيامه الطين ان أسعار العنب فيها وصلت لمستويات قياسييه.. لأن البية أحترك زراعات العنب علشان يصنع منقوع البراطيش الى بيشربه ليل ونهار وعمال على بطل ده.. بنى جامع ازاي ده.. الله اعلم.. مصر والشام كانوا في أسوأ حالاتهم في أيام هذا الفرغ.. معرفش الحقيقة اسم فرج ده جاله من أنهي مصيبه.. هو أساسا اتولد يوم ما أبوه اتقبض عليه واتحبس في الكرك.. حتى ان أبوه اتشائم منه واعتبره نحس وسماه ملفاك.. ودي كلمه تركي معناها "النحس".. يعنى اسمه الحقيقي.. النحس بن سيف الدين برقوق.. فرج ده يطلع ايه بقي؟؟ في أيام فرج مثلا هجم تيمور لنك على الشام.. وكرر نفس المأساة الى عملها سلفه هولاكو في بغداد.. قتل وذبح وسرق واستباح اعراض.. 20 ألف روح فطسوا في دخلته دمشق بس.. عمل كل البلاوي الى ممكن تتعمل في البلد دى حتى بعد ما أهلها اخدوا منه الأمان علشان يسلموا..

سبحان الله.. تيمور لنك الى سيف الدين برقوق قتل الرسل بتاعته علشان لغة الخطاب مكنتش اد كده.. جاب جيوشه ودخل على الشام دخله بلدى وقال لفرج بن برقوق.. أملك خوند شيرين في العش وللا طارت!! كل ده حصل وفرج غرقان في الهوب هوب والعبه مع امراء الممالك.. يضرب إسفين هنا.. يقتل ده.. يحبس ده.. يوقع ده في ده ويقعد يتفرج.. رغم انه كبر وبقي عنده 24 سنه.. يعنى راجل ملو هدومه.. الا ان تصرفاته كانت لا ترقى لمستوى حتى حد عبيط.. بايزيد الأول صعبان عليه بلاد المسلمين.. بعثله مرسال علشان يتحدوا سوا قصاص المتوحش المغولي الى ميعرفش ربنا ده.. يا فرج يا خويا حط ايدك في ايدى وتعالى نعلم على العيال دى.. دى عيال صوت ومنظر على الفاضي وربنا.. ياما رقنناهم علق قبل كده وخليناهم يقولوا جانااا.. لكن فرج كان في دنيا تانيه خالص.. حتى مكلفش خاطره يرد عليه.. زى ما يكون بيقوله نفذ لنفسك يا

تاني بقي.. المملوك المحمودي.. موقفه ايه من الليلة دى؟ الصراحة الراجل كان ذكي.. فضل لايد تماما في الذرة ولعب على كل الحبال علشان يحتفظ بربته زى ماهي.. فضل متمسك بإخلاصه لذكرى السلطان سيف الدين برقوق.. انا لا تبع الأهلي ولا الزمالك يا رجاله.. انا مع المنتخب.. فرج مبسوط بيه.. والمحمودي مبسوط بفرج.. الأمور بتدهور زيادة في الشام.. تيمور لنك هجم على دمشق.. الناس وقفت فوشه زى الأسود.. مقدرش يدخل الا بالخدعة بعد

ما اتفقوا على الصلح الى كان مهندسينه عالم الاجتماع المشهور ابن خلدون والقاضي ابن مفلح تلميذ الأمام ابن تيميه.. دخل  
 تيمور من هنا وسرق فلوس من الناس بالهبل من هنا.. ولما شاف ادايه الدولة منهارة وضعيفة.. راح جاى لاحس كلامه واشتغل  
 دبح وتقطيع في دمشق.. 20 يوم بلياليهم المغول بيقتلوا الناس في دمشق.. استفتحوا بالقاضي ابن مفلح نفسه وبعده حبسوا  
 الأمير المحمودي وانطلقوا بعد ما اصابهم سعار الدم يقتلوا ويحرقوا كل شيء حي خصوصا ان الشام بالذات تحملهم ذكريات  
 اليمه جدا.. ما بين شقحب وعين جالوت.. في علامات على قفاهم صعب اوى يتناسوها مهما طال الزمن.  
 كانت كارثة ما زالت حتى اليوم مضرب للأمثال على الضعف والخذلان والهزيمة.  
 كل ده وفرج مش مركز الا في جودة أنواع الهوب هوب المصنعة من عنب زمام البحيرة.. ده كمان بلغ بيه الضعف والوقاحة انه  
 خضع لكل شروط تيمور لنك بخصوص إطلاق سراح أسرى المغول بدون اى مقابل وزود عليهم كمان من عنده تعهد بالدعاء  
 لتيمور لنك على منابر المساجد في صلاة الجمعة.. بس هو ميعصّبش نفسه ولا يكلف نفسه ييجي مصر.  
 تيمور لنك خليفة المسلمين.. والله عال.. اشمعنى هو يعنى.  
 بسبب الانهيار في الشام.. بدأت ثورات ضد فرج بن برقوق نفسه.. كعادته بدل ما يحل المشكلة.. بدأ يوقع الناس في بعض..  
 عرف ان المحمودي قدر يهرب من السجن ومش راضي عن سلوكه وبدأ يتفق مع أمراء الشام ومصر على حركه مش تمام ضده..  
 راح جاى قابض عليه ورماه في السجن تانى.  
 سجن  
 يا  
 نهار  
 اسوح..  
 سجن  
 شمائل!!  
 تاني!!  
 هنرجع تاني لأيام البراغيث والحفر المقرفة والسلاسل والبلاء الأزرق.. يا وقعتك المهيبه يا محمودي.  
 مصيبة  
 ايه  
 دى  
 بس.  
 (يتبع)

السلطان.. حريم السلطان (5/3)

فرج بن برقوق.. المجنون

=====

.....

تحذير

الحلقة دى +18.. محتوى غير مناسب لمن هم دون 18 سنة.

.....

الجزء (1)

<https://www.facebook.com/ahosni77/posts/10155753436760630>

الجزء (2)

<https://www.facebook.com/ahosni77/posts/10155756640040630>

حواديت #مفتاح\_سر\_التاريخ كلها هنا

[/https://www.facebook.com/events/125795991527635](https://www.facebook.com/events/125795991527635)

.....

- وقفنا فين امبارح يا زغللة؟

- العيل فرج بن برقوق صابته البارانونيا ودخل في طور الهرتله

اه.. فرج اتجنن تماما.. بدأ يعدم في كل الى حواليه بمجرد الشك.. حتى انه في مره كان بيلعب مع مماليكه في الميه.. قريعوا لحد ما بقوا طينه.. واحد منهم بيهرج معاه تهريج صعايدة فغطس دماغه بغباوة في الميه لحد ما فرج قطع النفس.. الاهبل سكران ومش عارف هو بيعمل ايه.. الميه فوقت فرج الى خرج من الميه وراح جايب رقبة الأمير الى كان بيلعب معاه.. ورجع كمل شرب تاني ولا كان حاجه حصلت ولا كأنه قتل فرخه.. مكانش مهتم تماما خصوصا ان المملوك الى اتقتل ده كان شركسي وهو بيكره الشركس.

تحسه كده عمل زى احمد حلمى في فيلم كده رضا.. بعد ما دبجه بصله بقرف وقاله ليه كده يا عصام.. فصلتلى دماغ البراطيش يا أخي.. لزومه ايه بقي تهريج البوابين.. اديك مت اهو.. كان زمانك عايش وبتشرب معانا.. متبقاش تترفضني تانى يا عصام يا أخي.

محراك الشر في حياة فرج بن برقوق كان وزيره القاضي ابن غراب.. الراجل ده كان راكب دماغه تماما وعمال يسممها من ناحية كل الى حواليه وخصوصا الشركس.

في يوم صحيت القاهرة على فاجعه من فواجع فرج.. ايه يا جدعان.. خير يارب؟؟

فرج قرر هدم التحفه الفنية الى اسمها مدرسة السلطان شعبان المجاورة لأسوار القلعة بالظبط.

ليه يا عم!!

ال ايه المدرسة مبنيه على ارض اعلى من القلعة وهيبقي سهل يصطادوه منها لو تمردوا عليه!!!

فيوم تاني في نفس السنة 1405م أقنع ابن غراب فرج انه لازم يهرب علشان ممالك ابوه الشركس الى هو سهران يقطع فيهم كل يوم دول جايين على القلعة دلوقتى وهيحطوا عليه.

يعمل ايه فرج؟

راح مدور الجري واستخبي في بيت صديق السوء ابن غراب.

طيب قعد اد ايه مستخبي هناك؟؟

شهرين و10 أيام.

طيب والبلد والحكم والسلطنة؟؟

طظ.

الأمراء طبعا مسألوش فيه.. كما هي العادة راحوا جايين عيل صغير تاني – اخوه عبد العزيز بن برقوق – وراحوا مسميينه المنصور.. قعدوه على الكرسي وعملوا نفس الفيلم الاولاني.. عهد وحلفان وقسم بالولاء وبوس الأرض بين ايدين السلطان.. وهما خارجين من عنده بعد الحلفان كانوا متفقين على خطة عزله.. ثم تعيين وصى على السلطان هو الأمير بيبرس الاتابك.. الى كان متفق هو كمان مع القاضي ابن غراب على تقسيم السلطنة.. ده يحكم وده يقبض.. بينما العبيط فرج مستخبي عند ابن غراب الى مفهمة انه صاحبه الانتيم وخافيه عن عيون السفاحين بينما هو في الأساس مخطط كل ده علشان يقفش فلوس البلد من ناحية ومن ناحية تانية يخلي معارضين فرج يظهروا ويحشوا رقابهم مره واحده بدل التنقيط بتاع كل يوم ده. وهوب.. يظهر فرج بن برقوق تاني ويقولهم بصوت رفاعي الدسوقي في اعلان اتصالات:

"ايييه.. انتو فاكرين مش هتشوفوني تاني.. انا صحيت"

اتارى الفترة دى فرج بن برقوق كان بيتفق فيها مع أقوى الامراء – الأمير يشبك الشعباني – على السيناريو الجديد.. يظهر فرج ويقبض على الكل بما فيهم اخواته عبد العزيز وإبراهيم.. بعدين يبعثهم على سجن إسكندرية.. وسبحان الله يموتوا هناك بالصدفة.. الاتنين.. في يوم واحد بالسم.. وطبعا فرج برئ من كل ده لأنه حنين وقلبه قلب خساياه.

سجن إسكندرية في الوقت ده بالنسبة للمماليك كان زى البدلة الحمراء كده.. اى حد يروح هناك معناها انه هيركب المرجيحة خلاص.. نادر اوى ان حد يروح هناك ويرجع سليم.

.....

جنون فرج بالدم وصل لمرحلة غير مسبوقة.. سمع ان طليقته خوند بنت صُرُق عامله جو مع واحد من أمراء المماليك البلاصيه "فرقة ممالك كانت عايشه في بلد في الصعيد اسمها بلاص".. اتجنن واتشال واتحط.. بعثها فيوم علشان تجيله القلعة.. الولية افتكرت انه عاوز يرجعها.. راحت متزينه ومتحنيه وسهرت ليلتين في الحمام علشان تبقى زى المرمز.. لبست الحته الى على الحبل وراحت تبوس الأرض بين رجليه.. هو شافها من هنا واتجنن.. راح مطلع المنجاة بتاعته.. ودي تبقى سلاح أطول من الخنجر وأقصر من السيف الى هو دلوقتي بيتقال عليه سافوريا.. وجرى وراها في القلعة وهو بيصرخ:

"يا قحبة.. مراكيب الملوك تركبها البلاصيه؟"

والبت تجري وتصرخ وهو وراها زى المجنون ومحدث عنده الجرأة يحوش عنها والا يحصلها في مصيرها المحتوم.. كل ما يقفشها يقطع من لحمها حته.. لحد ما دم البت غرق القاعة راح جاى ماسكها من شعرها وجز رقبتها كلها وحطها في كيس قماش.. بعد كده بعث للأمير الى شك فيه.. الأمير حضر ووطى يبوس الأرض بين رجلين السلطان.. رفع راسه لقي فرج ماسك راس الولية طليقته من شعرها.. الراجل ملحقش يقوله برئ يا مولاي.. فرج راح جازز رقبتة هو كمان.. بعد كده اخذ الراسين دفنهم مع بعض علشان يكملوا في القبر قصة العشق الممنوع دى ويخلفوا رؤوس مملوكي حلوه كده صغيره.. ورعى جثثهم للأسود.

يا ابن المجنونة!!

بس عفارم عليك يا فرج.. اى حد يقتل مراته او طليقته يبقى جدد علطول.

بعد كده مصر هديت على فرج بس الشام لسه.. سافر فرج للشام علشان يخمد واحده من الثورات الى قامت ضده.. اخر مره كان بايت في قلعة دمشق ومش واخذ خوانة.. محوط نفسه بشوية مزز تحل من على حبل المشنقة وقصادهم ازايز الهوب هوب المعتادة.. اذ فجأة دخل عليه 4 ممالك عيينهم بتقول كل حاجه.. ده لو سلمنا يعنى انه مخدش باله من الخناجر المسنونة ماركة انى راحلة الى انصالحا بتلمع تحت أضواء المشاعل.

المماليك دى عدت من الحراس ازاي؟  
الله اعلم.

نهاية زى الزفت.. هيقاوم ازاي وهو سكران وسلاحه بعيد وقاعد بلبوص وسط المزز.. مخدش في ايد العيال غلوه وهوب كان الخنجر المتين راشق في قلبه لحد المقبض.. بعدها خنقوه بخيط حرير وعلشان يتأكدوا تماما انه مات ولزوم الفاينال تاتش راحوا دابحينه من الودن للودن بمنتهى الشاعرية والرومانسية.. بعدها رموه من فوق اسوار قلعة دمشق عارى الجسد تماما.. علشان في الفجر يتعرف على جثته واحد من العوام ويوارى سواته التراب في هدوء من غير جنازة ولا غسل حتى.  
سبحانك يارب.. فرج بنى لنفسه مسجد كبير في صحراء المماليك "مقابر الغفير حاليا" علشان يندفن فيه.. يشاء ربنا انه يندفن في مكان مجهول محدش يعرفه ويفضل المسجد فاضي ومهجور لحد النهارده.  
وينزل الستار على كده معلنا انتهاء عصر البرقوقيين في السياسة والحكم المصري.  
أبو التوريث على الى بدعه.. الجدد ده مكانش له فيها خالص.  
طيب والمحمودي بقي.. موقفه ايه؟

بعض الخبثاء من المؤرخين بيقلوا ان حفلة الدم دى كانت برعاية المملوك الأمير المحمودي وأن العيال الأربعة دول كانوا من ممالكه وهو الى سلطهم علشان يقتلوا فرج لأنه كان متفق مع الخليفة العباسي المستعين بالله أبو الفضل.. نقتل فرج وانت تمسك مكانه يا أبو الفضل.. المستعين بالله مسك الحكم فعلا لمدة شهرين.. لكن مفيش دليل على ان الأمير المحمودي له يد في قتل الناصر فرج.. تخمينات لا أكثر خصوصا انه كان مسجون وقت قتل الناصر فرج.. ومفيش اى وسيلة اتصال بينه وبين أي حد.

.....

لحظه كده..

- بتقول ان مسك الحكم في مصر خليفة عباسي لمدة شهرين؟  
- اه.. واحد اسمه المستعين بالله أبو الفضل  
- يعنى حكم فعلا؟  
- ايوه.. حكم وكان له الأمر والنهي كمان.  
- طيب ليه مآحياش دولة الخلافة العباسية.. الناس في مصر زهقت من المماليك وقرفهم وكانوا بيحبوا البيت.. يعنى الراجل ده كانت فرصته حلوه أوى ينضف البلد.. ليه بقي مكملش  
- مش كل من حكم قادر فعلا على الحكم.. ومش كل عباسي ينفع يبقى خليفة.. في وجود أمراء المماليك الى هما كانوا الحاكم الفعلي للبلد.. يبدو ظهور اى حد من بيت العباس كوميدي مضحك.. خصوصا انه معندوش اى خبره حربي ولا معاه جيش ولا حتى فلوس.. حتى لو قعد على الكرسي فعليا مش منظر زى الى سبقوه.

- طيب والمحمودي عمل ايه؟

- عمل الصح.. بعد ما خرجوه من السجن.. فضل ساكت لحد ما الفتن هدبت.. امراء المماليك الكبار دبخوا بعض على خير والحمد لله ومفضلش في البلد غيره.. بهدوء كده ومن غير قلق راح للخليفة العباسي المستعين بالله وقاله خد يا معلم.. ده مفتاح فيلتي في العجمي.. مفروشه ومتشطبة سوبر لو كس.. هتلاقى هناك حنتين طراي من بلاد القوقاز وبلاي ستيشن نازل عليها فيفا 1412.. روح هناك وجهاز القعدة واستناني اجيلك لو سمعتك صوت.. ولو جيتلك.. انت عارف بقي.

الجدع العباسي قال بينه وبين نفسه انا مالي يا عم ومال الليلة دى.. عبو كوا كلكوا.. إسكندرية زى الفل.. انا اروح هناك اقضى العيشة انتخه الصبح على البحر وبليل أبقي انزل محطة الرمل اتعشى عند مطعم الفلاح بن

أينال الشركسي.. شوية كبده مملوكي من اللى وصى عليهم الظاهر برقوق بنفسه.. خليكوا يا عم انتوا هنا اياكش تولع ببيكو.

باقي أمراء المماليك وأهل القضاء والاكابر في مصر اجتمعوا ودعموا موقف الأمير المحمودي.. بعضهم كمان جود من عنده وقاله يا مولانا بعزلك للعباسي انت مؤيد من الله.. ويكتب لك النصر.

ومن هنا أصبح لقبه الرسمي.. السلطان الملك المؤيد أبو النصر شيخ بن عبد الله المحمودي الظاهري. سادس سلاطين الشركس في مصر والرابع والثلاثين في قائمة حكام الترك الأجانب للمحروسة.

الكلام ده كان سنة 1412م. القرن الخامس عشر داخل على مصر سخن اوى يا جدعان.

- السلطان المؤيد شيخ بقي سنه كان اد ايه وقت الكلام ده؟

- 44 سنه بالتمام والكمال.

.....

طيب..

دخلنا القرن ال 15؟

مسك مصر سلطان محبوب ذو دين وعدالة؟

أمراء المماليك اتهدوا شويه؟

اه.. كل ده حصل.. بس لازم نبص بنظره اجماليه كده على الموقف علشان نعرف الدنيا شكلها عامل ازاي.

تيمور لنك رفع العثمانيين علقه موت في معركة انقره سنة 1402م. اخد بايزيد الأول اسير في قفص ولف بيه البلد كلها.. الراجل متحملش الأسر ومات بحسرتة.

الشام أغلبها مستقر في ايد التتار.. تيمور لنك بيحكم امبراطورية مهولة تشمل اسيا الصغرى كلها وأغلب مدن الشام والعراق كلها والجزيرة العربية كلها واسيا كلها ما عدا الهند.

مصر بتحاول تتعافي من فرج وايامه.. دولة السلطان المؤيد شيخ تشمل مصر والسودان والحبشة وليبيا وأجزاء من الشام والشريط الساحلي في الجزيرة العربية "المقدسات" واليمن.

طيب.. المؤيد شيخ أول ما مسك الحكم عمل ايه؟

فاكرين لما اتحبس في سجن شمائل وقام في عز الليل يعيط ويدعي ربنا يفك أسرہ ونذر لله انه لو خرج من هنا هيجول السجن الكئيب ده الى مكان يذكر فيه اسم الله تعالى؟

اهو المؤيد كان فاكتر القسم بتاعه.. وبدأ فوراً في الوفاء بالندر.. يعنى.. كنوع من أنواع شكر المولي عزوجل على نعمته.

عصر المؤيد شيخ كان عصر هادي الى حد ما.. نقدر نختصره في 3 قصص مهمه جدا.

- المسجد

- أزمة العيش

- ابنه إبراهيم

المسجد ما زال موجود لحد النهارده في مكانه في شارع المعز.. لازق علطول في باب زويلة.. تحفه من تحف المعمار المملوكي المتعددة اللى ما زالت موجودة في مصر تشهد على عظمة فن المعمار في العصر المضطرب

ده.. قبة المسجد الداخلية ارتفاعها تقريبا 40 متر.. كم الرخام الموجود فيه يوحى بأن الأحوال الاقتصادية

لمصر وقتها كانت في السماء وده مش حقيقي.. البناء نفسه حاجه عظمه.. كمان المسجد كان فيه مكتبه

ضخمة أشرف عليها السلطان بنفسه وجمع فيها نفائس الكتب في مختلف العلوم.. الناس كانت بتهادي

مكتبة المسجد بأرقام خرافية من الكتب.. زى قاضي القضاة ناصر الدين البارزي اللى وهب للمكتبة 500

مجلد قيمتهم ألف دينار من جيبه الخاص.



السلطان المؤيد كان من المهتمين جدا بفنون العمارة.. علشان المسجد ده مخصص اشترى الأرض المقام عليها سجن شمائل كلها ومعها قيسارية الأمير سنقر الأشقر وبعض الأملاك المجاورة.. جاب واحد من أربع مهندسين العصر ده اسمه محمد بن القزاز وكلفه بعملية البناء.. أنفق أموال كثير على بناء المسجد.. الحقيقة ان الأموال دى مكنتش بتاعته ولا كان يمتلكها.. الرخام مثلا كان بياخده قسر وغصب من بيوت أمراء المماليك.. علشان كده لو ركزنا في قطع الرخام هتلاقى تنوع كبير أوى في الألوان ونوعية الرخام نفسه.. الباب الخشب الرئيسي الضخم والفخم المطعم بالنحاس الأصفر والذهب والفضة.. أخده زى ما هو كده من مسجد السلطان حسن الموجود في الدرب الأحمر.. علشان كده وانت داخل المسجد هتلاقى اسم السلطان حسن على الباب.. شيء مثير للدهشة فعلا.. ايه الى جاب السلطان حسن للمؤيد شيخ وهما أساسا بينهم 50 سنة؟

السلطان المؤيد كمان بني منارة في الجامع الأزهر وجدد مسجد المقياس في الروضة وجدد الخانقاه الخروبية في الجيزة وبني مساجد وأسبلة في مصر والشام.. لكن للأسف مفضلش حاجه من الروائع دى الا بقايا سبيل ومصلى في قلعة الجبل والمستشفى المؤيدي في شارع سكة الكومي "الخليفة" ومسجد المؤيد شيخ الى بنحكي عنه ده.

يوم افتتاح المسجد نزل السلطان المؤيد إلى صحن المسجد وعمل احتفاليه كبيره جمع فيه الأمراء.. الهدايا كانت بتتوزع بالهبل.. ذبائح بلا نهاية لإطعام الفقراء.. حلقات ذكر واحتفالات في المسجد.. الاف بتزاحم بعضها في المسجد الجديد الى اتبنى مكان اوسخ سجون دولة المماليك.. الجامع مش كله كامل اه.. مش مشكله.. الجزء الى خلص يصلح لإقامة طلبة العلم على المذاهب الأربعة – كل واحد في ايوانه – زى ما جرت العادة وقتها.. الجزء الناقص ده كمله مسئول المشروع المهندس محمد بن القزاز بعد وفاة السلطان. تيجوا نشغل ماكينة الخيال ونشوف الصحافة قالت ايه عن المسجد ده وقتها؟ "السلطان المؤيد يوفى بالنذر ويبنى تحفه معمارية محل سجن شمائل" – المملوك إبراهيم بن نافع الخاصكي "سجن الأمس مسجد اليوم.. وتعلو مصر" – المملوك اسامه بن سرايا العمرى "خبراء البناء من كل أنحاء العالم يقفون مذهولين أمام المعجزة المصرية" – المملوك ممتاز بن القط الاستادار

"بمسجد المؤيد شيخ.. بقينا اد الدنيا" – المملوك بلحه بن نخله الدودار "احباط محاولة تفجير مسجد المؤيد شيخ دبرها أفراد جماعة الإخوان المماليك" – المملوك عمرو الدين بن اديب المعرض

"قناة الجزيرة المغولية تسخر من البناء وتفشل في إجابة سؤال عن مساحتها مقارنة بميضأة المسجد" – المملوك البكري

ومش بعيد كمان نلاقى صحفي مملوك من السلالة الروزالويسفيه كاتب مكتوب اسمه "طشة الملوخية" يتساءل فيها عن وقت نوم السلطان مع الشغل ده كله. اعلام قذر من يومه.. خيلنا في التاريخ أحسن.

المسجد نفسه تعرض لكوارث.. كتر خير الدنيا أن حالته دلوقتى كده.. عندك مثلا في أيام الحكم العثماني "فترة ولاية عمر باشا السلحدار سنة 1664م." اعتصم في المسجد ده ناس من طائفة الزرب.. متعرفش بقي كانوا عايزين ايه بالضبط.. المهم ان عمر باشا استشار أهل العلم وقتها في شأن ضرب المسجد بالمدافع.. الناس طبعا عندها مرونة عالية جدا.. قالوله اضرب المسجد بس بشرط تصلح الى هيفسد فيه.. وتحمل المسجد ضربات 12 مدفع والحمد لله موقعش. تحفه معمارية يا ناس.. تنضرب بالمدافع!!! ايه الناس دى.

وانا هناك اتعرفت على موظفة هيئة الاثار.. أول مره أشوف موظفة آثار مصرية عارفه هي بتشتغل فين وفاهمه ايه الى مفروض تعمله.. والأجمل انها بتعرف تقرأ وتكتب.. دى حاجه معجزه.

سألته.. ليه المسجد حالته في الضياع كده؟؟ ازاي يعنى أبقي واقف في حضرة مسجد من أعظم الاثار الاسلامية واسمع صوت قميء يقول "خش على المستورد.. خش على الفانلة واللباس.. لباس يلبس فريد شوقي"

فانلة ايه الى هدخل عليها دى كانت مراقى تقطعني.. وبعدين مالي انا بمقاس لباس فريد شوقي وللا رشدي أباطة حتى.. دى حاجه تخص حريمهم بس.

ضحكت الست بغلب وقالتلي:

- يا بيه قلبك أبيض.. السنة الى فاتت اتقدمت بمشروع انشاء سور حديد حوالين المسجد علشان بس نحمي المبنى من الواغش.. المبنى بس مش المنطقة.. تعرف حضرتك حصل ايه؟

- اكيد المسؤولين طنشوا.. ماهو ده من صميم شغلهم

- ياريت.. المحل الى في الوش هناك ده قالي ان السور ده هيقطع عيشه.. وهددني انه هيرمى على وشى مية نار

- نعم!! مية نار!! ليه.. هي سايبه؟؟

- لا طبعا مش سايبه.. هي ممسوكه كويس بس ممسوكه علينا مش لينا.. السؤال المهم هو ازاي الراجل ده عرف اني قدمت مشروع للهيئة.

- ابوه صح.. عرف ازاي؟

- الأمين وهو بياخد منه "الفردة" بلغه وحذره.

- الأمين.. اااااه.. مش ده ابن هارون الرشيد.

أمين ولد أبو جميل وللا أمين ولد الطحاطح اااااان؟

خلينا في الجامع أحسن..

(يتبع)

السلطان.. حريم السلطان (5/4)

سلطان قوى وآراء متضاربة

=====

الجزء 1

<https://www.facebook.com/ahosni77/posts/10155753436760630>

الجزء 2

<https://www.facebook.com/ahosni77/posts/10155756640040630>

الجزء 3



<https://www.facebook.com/ahosni77/posts/10155759171140630>

حواديت #مفتاح\_سر\_التاريخ كلها هنا

[/https://www.facebook.com/events/125795991527635](https://www.facebook.com/events/125795991527635)

.....

- مصر انت يا حسنى تحدفنا على ام السياسة.. مش هتهدى الا لما تروح معتقل شمائل
- ما خلاص بقي.. قلنا ان السجن ده اتهد والسلطان المؤيد شيخ بنى مكانه جامع كبير
- ولا تصدق.. مصر ولادة يا معلم.. إذا انهدم فيها سجن.. اتبنى مكانه ألف سجن
- ما شاء الله والله أكبر اللهم لا حسد.. نخلينا أحسن في حواديت زمان.

.....

تعرفوا المقريري قال ايه عن مسجد المؤيد شيخ؟؟

قال في خططه:

"هو الجامع لمحاسن البنيان الشاهد بفخامة اركانه وضخامة بنيانه.. إن منشئه سيد ملوك الزمان.. يحتقر النظار له عند مشاهدته عرش بلقيس وايوان كسرى انو شروان، ويستصغر من تأمل بديع أسطوانة الخورنق وقصر غمدان".

بس يبدو ان المقريري كان من دراويش السلطان المؤيد شيخ لأن في مؤرخين تانيين رأيهم في الراجل ده مش كده.

وطالما وصلنا لكلام المؤرخين.. يبقى نشوف قالوا عنه ايه.. وهو ده الى بسميه دايمًا تعدد المصادر.

جاك دنيس دولابورت - ده كان مترجم ومؤرخ فرنساوي- قال عنه في موسوعة وصف مصر:

"إن العدالة والانسانية هما الاسس التي استند عليها حكم الملك المؤيد الشيخ فقد كان عصره من أعظم العصور التي مرت بها مصر من حيث الاستقرار والرفاهية"

بدر الدين العيني -ده كان مؤرخ معاصر برضه وذو مكانه خاصه عند المؤيد شيخ- قال عنه:

"أنه مؤيد بفتح الياء وكان مؤيد بكسر الياء.. لأنه كان مؤيدا لدينه وشريعته.. كان يباشر الأحكام بنفسه. وينزل الناس منازلهم".

المقريري - وده كان راجل معاصر - قال عنه في السلوك لمعرفة دول الملوك:

" انه كان ملكا شجاعا مهابا مقداما عارفا بالحروب جوادا محبا لأهل العلم مبجلا للشرع مدعنا له وكان موسيقاراً بارعا وخطيبا بسيط الملبس والمعيشة يختلط بالشعب كأنه منهم.. متواضعا جدا وكان يعيش حياة بسيطة"

وقال عنه تاني:

"إن وجود المؤيد في الشام لمواجهة حركات التمرد سبب انتشار فساد الأمراء وموظفي الدولة في مصر وانتشرت الرشاوى وعم الفساد الإداري والظلم"

ابن تغرى بردى وصفه بالبخل لكنه رجع تاني وقال عنه في النجوم الزاهرة في ملوك مصر والقاهرة:

"انه اشتغل بالعلم وقدر العلماء وأنه كان ملكاً مهيباً ماجداً أديباً جواداً عالي الهمة.. جليل القدر يملأ العين..

ويرجف القلب.. وكان المؤيد ملك قوي فسيطر علي ارض الشام والعراق وارض الحجاز واجزاء من اليمن

واجزاء من ليبيا والسودان وكان خليفة المسلمين"

ابن اياس الحنفي قال عنه:

"كان والى القاهرة يهجم على الناس في بيوتهم ومعه المرخمون فيقلع رخام الناس طوعا او كرها وخرب دورا كثيرة.. كما امتدت يد العبث لمسجد السلطان حسن فخلع بابه وجعله باباً لمسجده.. وتم بناء المسجد بعد

أربع سنوات عانى فيها المصريون الويلات وكعادة المصريين سخروا من المؤيد ومسجده فأسموه المسجد الحرام ورفضوا الصلاة فيه".

شايفين تضارب آراء الناس؟؟

طيب نفهم من كده ايه؟

ليه المقرزي رفعه السماء بينما ابن اياس وابن تغري مش حابين الراجل؟

طيب ممكن نتخيل مع بعض ان السلطان المؤيد شيخ لما قرر يستولي على الرخام من بيوت الأمراء.. يكون

ابن اياس الحنفي وابن تغري بردى من الناس اللي بيوتهم اتلطت في الليلة دي؟

ماهو ابن تغري كان أبوه أمير من بتوع الملايين.. وكذلك ابن أياس.. كان عاطل لكتابة التاريخ وأهله هما اللي

بيصرفوا عليه.. والمؤيد شيخ كانت ايده ثقيله اوى على الأغنياء.

منطقي؟؟

الخلاصة ان السلطان المؤيد شيخ كان مملوك زى ما الكتاب بيقول.. جمع المتناقضات بشكل يثير التساؤل..

كريم مع الفقراء بخيل مع الأمراء.. مهذب يقدر أهل العلم.. بتاع مصلحته لما الأمور تحكم.. ذكي في دهاء

ومقاتل في شراسه.. متدين ومقدر لأوامر الشرع.. لكنه يختلف عن سابقه من الممالك في كونه مش دموي.

مملوك ومش دموي!!! دي معجزه.

طيب.. ده المسجد والمعمار.. ايه بقي حكاية ازمة العيش دي؟

المؤيد شيخ صعب عليه وجود الشام مره في ايد المغول ومره في ايد العثمانيين ومره في ايد التركمان.. علشان

كده عمل أكثر من حملته على الشام علشان يخلصها من كل القلق ده وبالمره يخلص على بقايا الشيعة

مدبرين القلاقل دوما.. هو بنفسه خرج مرتين علشان الحرب قدر فيهم انه يخمد فتنة الأمير نوروز "صديق

الأمس في صراعه مع الأمير منطاش" في دمشق وقدر كمان يسترجع طرسوس والقدس من العثمانيين.

لكن خروج السلطان من مصر معداش من غير تمن.

الخروج كان بيدي فرصة كبيرة للمادة الخام للقلق والخيانة – قبائل الاعراب – علشان يقطعوا طرق التجارة

بين الصعيد والقاهرة.. في الوقت ده الصعيد كان الممول الأساسي لوجه بحري في كل ما يتعلق بالأمن الغذائي

وخصوصا القمح.. لما انقطعت خطوط التجارة.. سعر القمح على جدا وأصبح اندر وأغلى سلعه موجودة في

القاهرة.. وتحول الناس الى السرقة والنهب علشان يوفروا دقيق الخبز.. بيحكي ابن اياس ان سعر القمح

تضاعف 100 مره حتى تعذر على الناس توفيره.

تحس كده من بين السطور ان اكيد المؤيد شيخ كان متجوز أم ابن اياس بالعافية.

طيب يعمل ايه المؤيد شيخ؟

اضطر يرجع بنفسه على مصر ويأجل شويه موضوع الحملات التأديبية للانفصاليين بتوع الشام دول.. خاض

بنفسه حروب كثير ضد العربان لحد ما قدر يهزمهم تماما ويفرق شملهم في الصحاري.. وتنتظم تاني خطوط

التجارة ويرجع القمح لمعدلاته الطبيعية.. كل ده من غير ما يفرض على الناس دينار ضرائب زيادة.. علشان

كده الناس حبوه.

وزى ما كان خروج السلطان تمنه غالى.. رجوعه برضه كان تمنه غالى اوى.

حملات الشام لازم تستمر لزوم استقرار الدولة.. مصر لازم يكون فيها حاكم لأن الأمور على صفيح ساخن..

مش هيقدر يبعث حد من امراؤه لأنهم عارفهم.. رمم ويموتوا على القرش وبتوع مصلحتهم.

- طيب تبعت مين يا أبو النصر؟

- مفيش غير إبراهيم ابنه.. شاب ذكي ومحارب عشريني قوى.. الامراء بتحبوه ومش هيقبلوا عليه وقت الجد..

كمان كده كده هو بيتجهز علشان يمسك مكان أبوه بعد عمر طويل.. يبقى الحملة دي ما هي الا تدريب عملي

لسلطان المستقبل على كيفية إدارة أمور السلطنة.

تبدو الأمور منطقية.. مش كده؟

وفعلا.. اتحرك الأمير إبراهيم بن المؤيد شيخ المحمودي الشركسي على رأس الجيش في اتجاه الشام.. الأمير الصغير اثبت كفاءه وجداره وقدر يتوغل بالجيش لحد قيسارية وقونية ورجع معاه أسري بالمئات علشان يفرح قلب أبوه الى فعلا فرح واستقرت نفسه باستمرار اسمه في الملك حتى بعد ما يموت.. ابنه اهو.. شاب زى الورد.. من فرحته بيه جوزه بنت سلطان سابق.. هو اى نعم كان سلطان رمه وابن ستين في سبعين.. بس اهو.. اسمها بنت سلطان.. يعنى يقدر كده يغازلها يوم خميس وللا حاجه ويقولها يا بنت السلطان.. حتى على المملوك.. الميه في ايديكي.. وانا لابس لكوك.

طيب مين بقي يبقى حما الصاري إبراهيم بن المؤيد؟

شوفوا.. خدوها قاعده كده.. طالما قلت سلطان ابن ستين ف سبعين.. يبقى فرج بن برقوق علطول.

عارفين لو قلت بنى ادم رمه وحقير؟

يبقى فرج بن برقوق برضه.

وسبحان الله.. يقال ان البت كانت زى الورد.. ازاي الجعر ده يخلف دى.. وازاي أساسا الجعر ده يخلفه

الراجل الجدد سيف الدين برقوق؟

الله اعلم.. يظهر ان امه خوند شیرين اتوحدت فيه على برميل زباله.. الى يهمننا هنا ان السلطان المؤيد بيفرش السكه لابنه علشان يمسكه مكانه.. جوازه ملوكي.. تربية حسنه.. دين واخلاق ومهارات عسكريه..

يعنى مش فاضل اى حاجه.

وتقدرون.. وتضحك الأقدار

الأمير إبراهيم رجع من حملة الشام ومعاه طابور طويل من الأسري.. غنائم وفلوس بالهبل.. خزينة الدولة

هتنتعش.. يعنى مباني زيادة وتجاره زيادة.. يعنى ضرائب أقل على الناس.. يعنى الناس هتتهف وتدعي

للسلطان بطول العمر.

بايضالك في القفص يا مولانا المؤيد.. يا بخت من كان له وريث زى ده.

ستوب هنا..

قبل ما الخيال يشطح بيك لأي حاجه حلوه.. أفكر دايما ان احنا بنتكلم عن مصر.

مش بس في التاريخ على فكرة.. في كل مناجي وأمور الحياة عموما.. إذا حصلك أي موقف كويس في مصر

اسعدك او خلاك متفائل ولو لو هله من الزمن.. اعمل زى جدتك كده لما كانت بتضحك كثير وفي الآخر تقول

"خير اللهم اجعله خير" متفتكرش انها كانت كئيبة أو مأفوره.. دى ست ناصحه وواعيه.. في مصر لا مجال

الا للكوارث والمصائب.. بالك انت لو ربنا نزل علينا سيول وأمطار من الذهب الخالص؟؟ برضه مفيش

فايده.. هتلاقى ناس ماتت بسبب كثرتها.

عارف لو ابنك جاب مجموع كبير ودخل كلية الطب؟؟

هيتخرج بعد 7 سنين معجنه علشان يشتغل في الحكومة وياخد بدل عدوى 19 جنيه بحالهم ويصرفهم على

المزاج علشان ينحرف ومستقبله يضيع وبدل ما يبقى دكتور.. يبقى تاجر كيوف زى البهظ بيه كده.

يا جدع ده الانجليز جم عندنا اسياذ العالم.. خرجوا وهما مديونين لطوب الأرض.

الانبياء نفسهم مسلموش من اذى البلد دى.. واحد اتسجن ظلم والتاني هرب من الخوف رغم قوته البدنية

الهائلة.

حتى لما اتذكرت في القران.. اتذكرت بالبول والعدس والبصل.. يعنى مش بحتة لحمه موزه مثلا ولا ديك

رومي.. لا.. بقوليات وانتفاخ ووجع قولون.

وطن اتعجن بالنحس واتعجنا معاه فيه حتى اننا مش قادرين نرميه من قلوبنا.  
ما علينا..

فيوم استقبال الأمير إبراهيم.. السكك مفروشه بالورد والزينة.. الناس واقفه على الصفين في انتظار البطل الجديد بتحييه بلقبه.. عاش الصارمي عاش الصارمي.. العجر عاملين حلقات ويحتفلوا بألعابهم المثيرة للناس.. راقصي التنورة شغالين لف حوالين نفسهم الله ينور.. التكييرات في مآذن المساجد والذبائح في الشوارع بلا نهاية.. هذا يوم من أيام السعد "القليلة جدا" في السلطنة المصرية المنكوبة جدا.  
في بلكونة القلعة واقف السلطان المؤيد شيخ والسعادة بتخر من وشه.. شايفين الواد الحليوه الى على الحصان الأشهب ده يا أمير منك ليه؟؟ اهو ده يبقا أبني.. رغم ان امه رخمه وطلعت ميتين أمي بعشرتها النكد.. الا اني قدرت اربي الواد كويس.. شايفينه رافع راسه ازاي.. الفخر ده ورثه مني.. طالعلى.. ايني حبيبي حنة من قلبي.

على يمينه كان واقف الشيطان بذات نفسه.. هو هو نفس الشيطان الموجود في كل قصور الحكم.. شخص قميء بذيء سخيف ملوش اى لزوم ولا أي عازه اسمه داوادر السلطنة.. كاتم أسرار السلطان ومستشاره.. رئيس الديوان الملكي أو رئيس ديوان رئيس الجمهورية بلغتنا الحديثة.. الجسد الذي يسكنه الشيطان دوما علشان يوصل لأي ملك او صاحب قرار.  
من الآخر.. زكريا عزمي.

صعود نجم الأمير إبراهيم المحبوب من الناس معناه التخلص من جوقة الفساد المحيطة بالسلطان.. الطبالين والتهتيفة في الغالب بيكونوا مظبطين الموجه على ملك او سلطان معين.. لما يموت بيفشلوا في التطبيل لي بعده.. علشان كده بنلاقي كل ملك او سلطان معاه فرقته الخاصة من المطبلاطيه السلطاني.. طبعا القاعدة دى سقطت في العصر الحديث نتيجة تطور وسائل التعريض والتطبيل.. وأصبح الصحفي من دول قادر يتعامل مع عشرتاشر مليار حاكم ورا بعض كلهم اسياده ولهم فضل عليه.. ونفس الكلام اللي بيتقال هنا يتقال هناك مع شوية ذواق.

الأمير إبراهيم ده خطر على الناس دى.. مشروع سلطان صالح منتصر وهو لسه أخضر مستواش.. امال لو دخل في معترك السياسة هيعمل فينا ايه.. اكيد هينفخنا.. يبقى لازم نتغدى بيه قبل ما يتعشى بينا.  
انا واقف وشايف كل ده ومش قادر افتح بقي.. اتفاقي مع العفريت الى حضرته ونقلني من ايامي لأيام السلطان المؤيد كان اني متدخلش اطلاقا ولا اغير اى حدث من احداث التاريخ.. اتفرج من سكات وبس علشان ارجع تاني وأقدر احكي للناس الى شفته.

شايف بعيني اهو الملعون الداوادر وهو بيميل على ودن السلطان ويبخ فيها الى اشد من السم الهاري.. المنظر مش محتاج ذكاء.. ان كان عندك حاجه مهمه مفيدة.. تقولها ليه في السر يا ابليس.. قربت شويه كده علشان اسمع.. ياريتني ما سمعت كلام العفريت وكنت غزيت البني ادم ده في نن عينه من جوا.

- مبروك علينا عودة الأمير الصارمي يا مولاي السلطان

- الله يبارك فيك.. هو ابنكم ومن تربيتكم الحسنة

- صحيح.. راجل من ضرر راجل.. ولد ابن حلال ومجدع صحيح.. واحد غيره كان طمع في الشام وملكها لوحده.. لكن إبراهيم ميعملهاش لأنه ولد متربي وعنده دين ويحب ابوه ويقدره.

- اه.. ولدى.. ولدى ورب الكعبة

- متعكم ومتعه الله بالصحة حتى تبلغون الخمسين بعد المائة.. فتكون الخاقان سلطان الأرض

- شكرك يا عزيزي الداوادر.. ربنا يقدرنا على خدمة مصر وأهلها

- وأهل مصر بيجبوك يا مولاي.. من حبههم فيك بينادوا الأمير الصارمي بمولانا السلطان.. الفرحة اكلت

عقولهم ومبقوش قادرين يفرقوا بين السلطان وابن السلطان.

- تقصد ايه يا داوادر؟؟

- ولا حاجه يا مولاي.. ولا حاجه.. استأذن جلالتكم علشان الحق اجهز لاستقبال السلطان.. يوه.. يقطعني..  
قصدي ابن السلطان.

ومشي الداوادر بعد ما أتأكد ان السم اتزرع في عقل السلطان تماما.. عيون السلطان الحائرة المكسورة تقول  
انه اتهبل وبلع السم وبدأ يشك في ابنه.. صنيعة ابليس قدم السبت وفتح الطريق قصاص ابليس علشان يكمل  
الاحد والاثنين والثلاثاء.. والأربعاء كانت الخطة اختمرت في ذهن السلطان.. والخميس كانت دعوته لأبنه  
إبراهيم في قلعة الجبل.

والشيطان قاعد بيتفرج وياكل فيشار وشوكولاتة ريتير سبورت بالبندق.. الحقيقة ان قراءة التاريخ وصلتني الى  
قناعة كاملة ان ملوش لزوم نستعيز من الشيطان خالص لأنه مش موجود عندنا.. ملوش سوق ولا شغل الا  
لو حب ياخذ كورس مثلا او يتعلم تكنيك جديد في اغواء البشر.. ابتلانا ربنا ببيع الناس تفوقت على  
الشيطان تماما في المهارات القذرة.. هو يعني ابليس كان عمل ايه.. رفض يسجد؟؟

طب ده احنا عندنا ناس رفضت تسجد وحرمت السجود وهدمت المساجد وهتكت اعراض العذارى  
وشككت الاب في ابنه والراجل في مراته واكلوا مال اليتامى وسيلوا دم الأبرياء حتى ان الشيطان نفسه يقولهم  
حرام عليكم اتقوا الله مش كده.. شيطان مين ده الى نستعيز منه ونلعنه.. احنا المفروض نستعيز بالله من  
البشر دي.

(يتبع)

السلطان(5/5)

حريم

السلطان..

سوداء

نهاية

=====

.....

ملحوظه مهمه: الصوره المرفقه من المسلسل التركي حريم السلطان.. هي نفس قصة السلطان المؤيد  
شيخ.. علشان كده اخترت العنوان يبقى بالشكل الحالى.. الموضوع ملوش علاقه بالستات.. الصوره للتوضيح  
ليس

.....

قفلنا حكاية امبارح على ايه؟  
اه.. ابليس مشى من قصاص السلطان المؤيد شيخ بعد ما بخ السم في ودانه.. السلطان استقر على فعل ما هنعرفه  
حالا.

غصب عنى مقدرتش احتفظ بكلمتي للعفريت الى نقلني للماضي بخصوص عدم التدخل في الأحداث.. انا بشر  
برضه.. مقدرتش امسك نفسي من انى اتف على الداوادر والسلطان.. كان نفسي اغزهم بالمنجاة في مناطق



حساسة من اجسامهم.. بس اهو.. محدش يقدر يغير التاريخ.  
.....

الأبن مستبشر خير من دعوة أبوه.. يا تري هيكافئه بأية علشان حملة الشام؟؟  
دى فيها مش اقل من بي ام على الزيرو.. مش خسارة فيه والنعمة.. هو السلطان يعنى عنده كام إبراهيم؟  
ليس إبراهيم الحته الى على الحبل.. هذب لحيته البسيطة وتعطر.. جهز كلام كثير هيقوله لأبوه عن الشام  
وأهلها وفرص جديدة لحملات هناك علشان نستعيد كل الأراضي الى أخذها التركمان في هوجة الطاعون..  
فرصه كويسة نتحرك دلوقتى والوقت صيف قبل ما يدخل شتاء الشمال الجليدي.  
دخل الأبن مجلس أبوه وركع على رجليه.. باس الأرض بين رجلين السلطان كما جرت العادة.. ضربت الأبواق  
والنفر احتفالا بزيارة الأمير للأب السلطان.. كل الناس فرحانه ومزأطه ما عدا واحد.  
عارفين مين هو؟؟

مشروع قاتل.. قاتل.. ومش أي قاتل ..  
بدأ الحديث بين الأب والأبن.. كلام متفرق من هنا واخبار الجيش من هناك.. كام جاريه دخلوا علشان يزغللوا  
عيون الحرس ورجال الحكم والسلطان وأبنه.. جميلة حياة الممالك في القصور دى.. أكل ومز بالهبل.. طبعاً  
العفريت الى انا متفق معاه كان محرج عليا ابص يمين او شمال.. هو عارف ان مراتي ايديها ثقيله ومش بتهزر  
في الحاجات دى.

السلطان يرحب بأبنه بزيادة.. بياكله بأيده.. الأبن بياكل ويبوس أيد أبوه.. مين في الدنيا يتخيل ان ايد الأب الى  
بتطعم وتحمي تكون هي السم الى بيهلك ويقتل؟ الواحد بيامن أساساً لما يسمع كلمة عابرة من حد كبير بيقوله  
انا زى ابوك.

أبني بيجري على الباب اول ما ادخل ويقول بفرح طفولي وكلمات تحمل كل معاني الاطمئنان.. بابا جه.  
بقي انا ممكن اتخيل ان ابويا يسمني أو انا اسم أبني؟  
لو كان في موتي رضا وسعادة لأبويا.. هاكل السم من ايده وانا مبسوط.. بس السؤال هو ليه يابا كده.. ده انا  
ابنك.

ايه نوع الخلاف الى يمنع وجودي ووجودك في الدنيا سوا.. وازاى أساساً إذا كان وجودك هو سبب وجودي  
وجودي هو سبب خلودك؟

انا الى هكمل رحلتك في الدنيا وهشيل اسمك.. انا الى لو عملت اى حاجه حلوه لازم هينكروا فضلى ويقولوا  
هذا الشبل من ذاك الأسد.

بص فوشى يا ابويا.. مش دى عينيك؟؟ مش ده شعرك المكلع؟ مش دى نظرتك وانت مركز؟؟  
هو انا يعنى بشخر وانا نايم لمين.. مش دى عوايدك؟  
بذمتك مش انا باكل قلب العيش وارمى وشه تمام زى ما انت بتعمل؟  
مش عيني زايعه وبصباص وعلقت جاريتين ومراتي قفشتني تمام زى ما أمى قفشتك ولمت عليك الجيران في  
بولاق أيام الشقاوة؟

أمرني يابا وانا انفذ.. أتمنى عليا وانا كلى تحت امرك.. لو عصيتك أبقي عاقبي.. احبسني وعلقني لو حببت..  
انما تديني الأمان يابا وبعدين تغدر بيا؟

فرقت ايه انا كده عن الاغراب؟  
هان عليك شقاك وتربيتك؟ مصعبش عليك عمرك الى راح علشان تعمل منى راجل تفخر بيه؟

.....

---

39

يا	مين	يجيلي	حيبي
والفؤاد	يرتاح	يا	لالالي

- ابراهيم..  
- ابراهيمiiiiiiiiiiiii

- .....  
-ابناا|||

وعند .....  
 الله  
 تحتتمع  
 الخصوم.



وصل خبر موت الأمير إبراهيم من هنا ووقع السلطان المؤيد مشلول من هنا.. كبر 20 سنة مره واحده.. موت الأمير كان النهاية الفعلية للسلطان المؤيد.. بتحكي كتب التاريخ انه كان كالميت الحي.. بياكل بس علشان يفضل يتنفس.. شارد الدهن معتل الصحة.. بيخطر بأى كلام في اى وقت.. دايمًا بأصص للسماء زى ما يكون بيطلب الرحمة.

السلطان المؤيد أمر بدفن أبنه في ساحة مسجده الفخم.. ولكن مش في مقام مخصوص او حجره مغلقه زى ما جرت العادة في دفن أمراء المماليك.. ده أمر انه يدفن بعد المدخل علطول.. علشان الداخل والخارج من المسجد يقرأ الفاتحة للفقيد وهو نفسه يتعظ مع كل دخله وخرجه من المسجد.. يفكر الناس بأبنه إبراهيم ويفكر نفسه بمصيبته الى عملها وهو في كامل قواه العقلية الشرورية. خرجت الجنازة من القلعة ومشيت لحد مسجد المؤيد الفخيم.. اجتمع الناس كلها بالالاف حوالين المسجد متعرفش مين بيطلب ومين جاى يمسح جوخ.. كثير من الى جاين حزاني على الأمير المحبوب فعلا.. بعض الحضور جاين علشان يطمئنوا على مواقعهم ومصالحهم في دائرة الحكم.. المهم ان اليوم ده كان زحمه جدا والناس خارج المسجد اضعاف العدد الموجودة في داخله. ارتفع صوت أمام المسجد بالقراءة وبالنداء للمتوفى.. في مقدمة الصفوف قاعد السلطان المؤيد مشلول ضعيف فاقد الحيلة والناس مش عارفه جواله ايه.. كله متخيل انه بيعاني من مصيبة فقد الأبْن الشاب ومحدث يعرف ان عذاب الضمير أشد وانكى.. الأمام حب يعزیه بزيادة فذكره بقصة رسولنا الكريم عليه الصلاة والسلام.. قول ورايا يا مولاي سلطان.. "إن العين لدمع والقلب يحزن ولا نقول إلا ما يرضى ربنا وإنا بفراقك يا إبراهيم لمحزونون." بفراقك يا إبراهيم.. الرسالة دى كانت في الجون. ينهار السلطان في نوبة بكاء عنيفة.. يبدا الأمام زى ما يكون بيحط ملح على جراحه المفتوحة.. مقدرش يقوم من مجلسه بعد ما تمكن منه الشلل تماما.. شالوه زى ما هو على القلعة علشان يقضى 7 شهور في هذيان ومرض يموت بعدهم السلطان المؤيد شيخ في 14 يناير 1421م. ويندفن بناء على طلبه في مسجده.. جمب ابنه علطول. ابنه الى قتله بأيده. بعد المؤيد شيخ مسك الحكم ابنه أحمد.. كان عيل صغير عنده سنتين يعنى يادوب لسه بياكل سيريلاك مملوكي.. سموه الملك المظفر شهاب الدين أبو السعادات.. نسبة الى امه "سعادات" تولى الوصاية عليه الأمير أبو الفتح ططر الظاهري.. وده كان من كبار ممالك الظاهر برقوق زيه زى السلطان المؤيد.. ما هو واضح من اسمه

.....

استأذنكم نعيد نفس الفيلم تانى.

سلطان طفل.. وصى قوى عليه يتجوز امه "سعادات" ارملة السلطان المؤيد ويتسمى الوصى سلطان في نفس يوم الزواج وتانى يوم يطلقها "مش عارف اساسا هو اتجوزها في ايه وطلقها ليه.. جازيلقها مش بنت مثلا؟" الام تخطط للانتقام.. يموت السلطان ططر.. ييجي سلطان هفأ ويمشي سلطان مقتول لحد ما وقفت البلد شوية حلوين عند الأشرف برسباي "كاره النساء" لشان تاخذ نفسها من المرجيحة دى. بتخيل نفسي السلطان أحمد بن حسنى برقوق الأشرفي.. لو ملكت حكم مصر والشام مثلا.. وكبر أبني الأمير

المكسراتى حمزه أبو الام حمزات.. نسبه لاه ام حمزة برضه.. وقرر فيوم انه يخلعن من الحكم.. هل ممكن اقتله؟

مش لاقى منطق الصراحة.. ماهو كده كده أبني وهيورثني فيوم من الأيام.. لو استعجل شويه وورثني بالحياة.. مش أزمه ولا مشكله يعنى.. خليه ياخذ فرصته.

السلطان المغولي شاه جهان عمل كده لما ابنه القوى اورانكزيب عزله عن الحكم.. فضل في قصره يراقب ويتفرج.. لا قتل ابنه ولا نيله.. مش عارف انا السلطان المؤيد كسب ايه من قتله لأبنه علشان مجرد شكوك؟ خيلنا نتفق ان القوى لازم يحكم.. لو قدر الابن القوى يزيح ابوه.. خلاص.. ايه المشكله.. ماهو الاب او الحاكم لو قوى كفايه "بالقانون او بالجيش" مكانش حد قدر يشيله من مكانه. مش كده؟؟

سليمان القانوني كسب أیه من قتله لأبنه البكر الأمير مصطفى.. وريث السلطنة وحبیب الجيش والشعب غير انه خسر الوريث وقهر قلبه هو وبدأ مرحلة الانحدار لسلطنه عظيمه جدا؟ الحافظ لدين الله الفاطمي كسب ايه من عداوته مع ابنه الا انه اجبر على قتل ابنه في الاخر؟ لا كسب رضا المؤيدين بقتل ابنه ولا ارضى المعارضين لما عرفوا انه هفأ. السلطانة كوسيم وقفت ضد ابنها مراد الرابع "الى قتل اخواته الثلاثة علشان الكرسي" علشان تحافظ على حياة الأمير الى فاضل.. الأمير إبراهيم.. وبعد ما وصلته للسلطة.. وصلته للإعدام علشان هدها بالنفي.. وتعيش حياتها موصومه بأنها الأم الى شنقت ابنها. ايه الناس دى!! الحمد لله ان الواحد مش سلطان.. كفايه عليا العيال وامهم. (تمت)

## يا بتاع القطط.. يا مخربش

ينسب الى حبيب جبرائيل انطون.. الملقب بالسكاكيني نسبة الى مهنة اهله في تجارة الاسلحة و السكاكين الحربية .. رجل اعمال مصرى من أصل سورى .. ولد في عام 1841م و توفي عام 1923م .. هاجر الى مصر عندما كان في السادسة عشره .. عمل في بداية حياته كموظف بسيط في شركه قناه السويس بمرتب 4 فرنكات فرنسيه. اثناء حفر قناة السويس .. انتشرت الفئران بشكل مزعج ..حيث استهلكت طعام و مؤنه 20 ألف عامل .. و افسدت العديد من الاحبال و الات الحفر لدرجة ان دليسيبس قرر وقف العمل بالحفر الى اجل غير مسمى و حتى الوصول الى حل نهائى لتلك المعضله .. حتى كان اقتراح حبيب باشا بشراء العديد من القطط و تجويعها بشكل وحشى .. حتى اذا تمكن منها الجوع تماما .. اطلقوها في منطقة القناه .. فتصير سلاحاً بيولوجياً طبيعياً ضد الفئران .. كان ثمن القطه الواحده في حدود 20 مليماً (نكله مصريه واحد) و نجحت الفكره ليحوز حبيب باشا على ثقة و اعجاب دليسيبس .. تم القضاء على الفئران بالفعل و لكن سوء التعامل مع جثث و رمم الفئران بعد ذلك ادى الى انتشار الطاعون بشكل وبائى هلك بسببه اكثر من 60 ألف عامل. \*\*\* سؤال

هل كان السبب في هلاك العمال هو فكرة حبيب باشا نفسه .. ام سوء تطبيق الفكره من العاملين في أرض المشروع ؟؟  
 قرر دليسيبس بعدها تعيين حبيب باشا في وظيفة رئيس ورش تجفيف المستنقعات والبرك في القاهرة بعد ذلك .. ليتكشف من دهاليز القانون و الفرمانات امام ناظرية الكثير.  
 علم حبيب باشا ان هناك فرمان اصدره الباب العالي ينص على أنه يجوز إعطاء البرك والمستنقعات المملوكة للدولة إلى من يتعهد بردمها و تحويلها الى ارض سكنيه .. فصوب حبيب السكاكيني ناظرية الى بركة ماء كانت تسمى بركة "قراجا التركمانى" نسبة للأمير المملوك زين الدين قراجا التركمانى .. كانت تقع بين حى الحسينيه و حى الخندق (الدمرداش حاليا) تحدث عنها المقريزى في تأريخه و قال ان السلطان الناصر محمد بن قلاوون وهب الامير المملوك تلك المنطقة عام 717هـ (السلوك لمعرفة دول الملوك (527/2) ..

حصل حبيب السكاكيني على تلك البركة و الارض المحيطة بها بالمزاد في عام 1880م (هناك اخبار ان المزاد لم يكن شريفاً) .. قام بعده بتجفيف البركة و اعادة تخطيط المنطقة عن طريق رصف الشوارع المحيطة بها .. ليبنى في وسطها قصرا منيفا على الطراز الايطالى الفاخر .. يشع منه 8 شوارع رئيسيه .. و تعرف المنطقة حتى اليوم بأسم السكاكيني .. الا انه حدث نزاع بينه وبين الحكومة بسبب عدم وجود التراخيص اللازمة من مصلحة التنظيم .. و حركت الحكومه قضيه ضد حبيب باشا الا انه تم الصلح بعد عدة شروط تقضى بتنازل سكاكيني للحكومة عن الثمانى شوارع التي انشأها على ان تدفع نظارة العموم للسكاكيني باشا مبلغا وقدره 1200 جنيه وذلك تعويضا عن أعمال الردم والتمهيد للشوارع واعتبار الشوارع المتنازل عنها من السكاكيني باشا من المنافع العامة والتابعة لمصلحة طرق القاهرة .

مساحة القصر في حدود 2700 متر مربع تقريبا .. مكون من خمسة طوابق بالاضافه الى البديروم .. يحتوى على 50 غرفه و400 شباك وباب و300 تمثال .. يحيط بالقصر سور حديدى وحديقة صغيره .. في المدخل الرئيسى يوجد تمثالان لاسدين من المرمر .. الباب الرئيسى للدخول مصنوع من الخشب المزين بالحديد المشغول يؤدى الى صاله مستطيله مفتوحه على عدة غرف مزينه بالزخارف والرسومات سواء على الحوائط او الأسقف.

اعمال بناء القصر و نشاط حبيب باشا في اعمال المقاولات و الأسلحه وصلت الى الخديو اسماعيل .. الذى امر ان يقوم بأعمال المقاولات في الاوبرا الخديويه تحت قياده المعمارى الايطالى .. Pietro Avoscani .. كان حبيب باشا صاحب عقله فذه في ادارة العمل .. حيث ابتكر نظاماً للعمل بالورديات (8 ساعات لكل ورديه) بواقع 3 ورديات في اليوم .. وكان حلاً سحرياً اعانه على افتتاح دار الاوبرا المصريه في موعدها المقرر .. 29 نوفمبر 1866م .. الامر الذى ادخل السرور على قلب الخديو اسماعيل .. فوجه الدعوه الى حبيب باشا لحضور العرض الاول في دار الاوبرا الخديويه المصريه .. و كان العرض لأوبرا ريجوليتو في حضور الامبراطوره الفرنسيه اوجيني.

بتأثير رضا الخديو اسماعيل الشديد عنه .. يدعوه السلطان عبدالحميد الثانى للاصطيف مع أسرته علي ضفاف البوسفور و الاقامه في ضيافة السلطان بقصر ضولما بخشا .. كما يمنحه لقب بك ثم لقب باشا .. كما منحه بابا روما اللقب الباباوي "كونت" نظرا لجهوده في خدمه طائفه الروم الكاثوليك في مصر وبناء دار لايتم ابناء تلك الطائفه وشراءه قصر "لينودى بيفور" في الفجالة واهداؤه للطائفه كمقر كما بنى مقابر للجاليه موجوده حاليا في مصر القديمه حيث يرقد فيه جثمانه حتى اليوم. تزوج حبيب باشا من سيدة سورية تسمى هنريت وأنجبا ولد وحيد اسمه هنرى .. حصل على الدكتوراة في الحقوق من جامعة باريس سنة 1915م و لا توجد اى اخبار عن عودته الى مصر بعدها.

عاش حبيب باشا في القصر وحيدا بعد وفاة زوجته حتى وفاته سنة 1923م .. و ظل القصر مملوكا لورثته حتى يوليو 1952م .. حتى وهب أحد احفاده حصته في القصر الى وزاره الصحه و تنازلت باقى الاسره عن القصر للحكومه المصريه .. اشك في تلك المعلومه بقوه .. يهدينى تفكيرى الى انه تم نزع ملكيه القصر قسراً من تلك الاسره .. حاله حال الاراضى الزراعيه و باقى ممتلكات 300 اسره اقطاعيه حدها رجال الجيش.

حالة القصر الآن .. كحالة مصر كلها .. منهار. \*\*\* سؤال

هل تريح حبيب باشا السكاكيني من وظيفته كرئيس ورش تجفيف المستنقعات والبرك في القاهرة .. ليحصل بدون وجه حق على قطعة الارض التى بنى عليها القصر ؟؟ \*\*\* سؤال آخر

هل هناك صلة قرابه بين حبيب باشا السكاكيني .. و رجال المقاولات في مصر في ايامنا الحاليه .. ام ان هذا البلد حلت عليه لعنة الطبقيه و الاقطاعيين و الحكام الظلمه منذ فجر تاريخه ؟؟ الصمت افضل.



## الناصر "شاهين" الدين

فيلم حلو وجميل .. يلعب على وتر حساس .. الدين لله و الوطن للجميع .. جيوش العرب الى كسحت جيوش اوروبا .. الشاب العربي الى علق ناديه لطفي قائدة الهوسبيتاليين .. روح التسامح و الاخوه و الموده بين المسلمين و المسيحيين في الجيش العربي الى درجة تعليق القتال علشان عيد الميلاد المجيد .. ريتشارد قلب الاسد .. الفارس الجسور و العدو الشهم النبيل .. وطبعاً طبعاً طبعاً .. ست الكل بلا منازع .. فرجينيا جميلة الجميلات. الفيلم ده و معاه فيلم تاني (عنتره بن شداد) كانوا بيتعرضوا في التلفزيون المصري يوم 4 مايو من كل سنه .. فيلم عنتره وقت العصر و فيلم الناصر صلاح الدين بلبل .. في السهره. حد يعرف او يخمن ليه؟؟ كان عيد ميلاد القائد الطيار الملهم أبو عيلاء.. بس كده. الفيلم سينمائي جميل جدا .. - 9000 جنيه ... اعلى اجر لمخرج وقتها ... يوسف شاهين طبعاً - 200 الف جنيه ... اكبر ميزانية انتاج من اسيا داغر ... الست فلست بعدها لأن الفيلم فشل في السينما - الوان طبيعیه و سینما سکوب .. تكنولوجيا جديده يعنى - عمل جماعی اشترك فيه اكبر نجوم مصر وقتها. - في مشهد عبقري .. زكى طليعات يلعب في دماغ حمدي غيث علشان يرفض الدعوه للذهاب الى بيت المقدس حاجاً .. ظل زكى طليعات منعكس على رقعة الشطرنج باللون الاحمر طيب و هو في ظل احمر؟؟ المفروض ان الظلال سوداء المخرج هنا عاوز يقولك ان ده شيطان يعنى .. اللون الاحمر يرمز دايماً الى الدم و الشيطان و الوحشيه بمقاييس الامكانيات المتاحة في العصر ده .. المشهد ده يعتبر تكنولوجيا متقدمه جدا. بالرغم اللغه العربيه الكوميديه في الفيلم .. لاهي فصحي ولا هي عاميه .. انما عموماً اداء حمدي غيث كممثل غطي على كل شيء .. انا نفسي كنت متأكد ان ريتشارد الحقيقي لا يختلف كثير عن حمدي غيث و لما شفت صورة ريتشارد الحقيقي اتصدمت .. كمان انا حبيت ريتشارد في الفيلم اكثر من احمد مظهر بكثير. يبدو اقوى شخصيه و جسداً و تكويناً .. ريتشارد يبدو ملك ذو هيبة .. خصوصاً لما جمع الامراء و كان سكران و قالهم هل سمعتم من قبل عن احد خدع ريتشارد؟ .. كله قفل بقه و محدش نطق .. كمان بحبه جدا لما قالهم ما دمت افودكم في المعركه .. بلا شريك . و اذك كده على كلمة بلا شريك دى .. علشان يعنى يوربنا انه فتوة اوروبا طيب .. انا زعلان ليه بقى؟؟ تاريخياً .. الفيلم ده يعتبر كارثة .. اخطاء بالجملة .. جيل كامل "و انا منهم" اترى و كبر على معلومات غلط 100% .. منها الخطأ الصريح و منها الغير منطقي .. شخصيات ظلمت و شخصيات وجدت من العدم ... احداث مخالفه للتاريخ تماماً. في الاول احب اوضح .. انا فقط مهتم بالتاريخ.. مش ضد الفيلم و السينما.. انا بس عاوز أقول ان التاريخ في الكتب .. لفت نظري شوية حاجات مش منطقيه .. مع القراء و السفر .. الحاجات الغير منطقيه زادت .. قررت اني افضفض .. لعل و عسى صوتي يوصل للمرحوم صلاح الدين .. و يقوله احنا اسفين يا صلاح. بدأ الموضوع معاً من زياره للمتحف البريطاني .. شفت فيها اثار الفرسان في العصر ده .. التساؤلات المنطقيه كترت .. فقررت اقرا و ادور .. لحد ما وصلت للنتيجه المعروضه امام حضراتكم دلوقتي.. حد هيقولى ده فيلم .. سينما .. دراما يعنى .. مفيش اى مشكله اطلاقاً .. انا ما زلت اعشق الفيلم ده و بشوفه باستمرار .. لكن كل المطلوب اننا نشوف الفيلم و نعرف ان الحقيقه في الكتب مش في السينما. كمان انا مش بلعب على نقطة الاتجار الرخيص بالمشاعر الدينيه .. من نوع يوسف شاهين المخرج الصليبي النصراني الى عمل و هيب و سوى .. ابدأ .. انا بحب يوسف شاهين جدا .. و مقتنع تماماً انه من انجب و ابرع من انتجت السينما المصريه .. كمان التساؤل بالنسبه لباقي افلام العك التاريخي .. هل يا ترى مخرجها مش مسلمين؟؟ بالطبع لا

اذن الموضوع زى ما وضحت .. فضفضله .. نعرف مع بعض .. كفايه ان لحد النهارده في ناس متعرفش ان انتونى كوين يختلف تماماً عن عمر المختار و ان المسيح مش هو روبرت بويل و ان ويليام والاس شخص و ميل جيبسون شخص تاني خالص.

اللہ..

بسم

.....

اولا : صلاح الدين قائد عربي

=====

معلومه كفته تماما .. الملك الناصر أبو المظفر صلاح الدين والدنيا يوسف بن أيوب بن شاذي بن مروان بن يعقوب الدؤيني التكريتي ... مولود في تكريت (العراق) من بيت كردى هو بيت نجم الدين ايوب .. و نسب الايوبيين يعود الى أيوب بن شاذي بن مروان من أهل مدينة دوين في أرمينيا.. يعنى الراجل كردى من أصل ارمنى ... مش عربي.. السلطان صلاح الدين كان مسلم سنى .. يحارب من اجل الاسلام و ليس من اجل العروبه .. ايامها مكانش في حاجه اسمها الدين لله و الوطن للجميع .. كمان صلاح الدين اشتهر بمواقف متشدده جدا ضد الشيعة في مصر .. ذهبت بعض المصادر الى انها مذابح .. يبقى منين بقى فيلم الدين لله و الوطن للمنايفه الى ظهر ده ؟؟ كمان مصطلح القومية العربية ده ظهر بعد سقوط الحكم العثماني في إسطنبول.. الناس كانت ساكتة على العثمانيين من باب انهم مسلمين يعنى زينا.. قبل كده لم يكن هناك وجود لأى نعره قوميه اطلاقا.. الكلام كان الإسلام وبس.. اغلب الظن ان فيلم "الناصر" كان معمول "الناصر" علشان "يناصر" قضية "ناصر" بتاعة العروبه الى لبسنا بيها كلنا في الحيط. رحم الله الجميع اصابوا او اخطأوا. المصدر : النوادر السلطانية والمحاسن اليوسفية - سيرة صلاح الدين الايوبي

.....

ثانيا : عيسى العوام مسيحي

=====

معلومه ثانيه كفته .. عيسى العوام كان جاسوس مسلم ماهر جدا في السباحه من ابرع جواسيس صلاح الدين .. ورد ذكره في كتاب القاضي بهاء الدين بن شداد في 6 سطور بالظبط .. قال عنه انه كان بيدخل و يخرج من عكا ايام الحصار بمهاره شديده و كان اذا رجع البلد يسبقه منادى يدور في البلد و يقول عيسى العوام رجع .. عيسى العوام رجع. في احد المهام كان في البحر و رابط حوالين وسطه 3 اكياس فيها الف دينار ذهب لمصروفات الجيش و رسائل للقاده من اهل عكا .. البحر هاج عليه فغرق .. المنادى تأخر في الاعلام عن وصوله .. فتشائم الناس .. بعدها بيومين البحر لفظ جثته على الشاطئ شأنه شأن اى غريق. يعنى عيسى العوام مات قبل المعركه الفاصله .. يبقى قابل لويزا فين بقى ؟؟؟ ده اذا سلمنا ان قائدة اشرس كتفيه في الجيش كان واحده ست .. و ست ايه .. مانجايه. يعنى لا في لويزا اين انت .. و لا لويزا ادينه قبله في الخباثه. المصدر : النوادر السلطانية والمحاسن اليوسفية - سيرة صلاح الدين الايوبي .

.....

ثالثا : اورشليم

=====

العرب في الوقت ده عمرهم ما قالوا عن بيت المقدس اورشليم و لا حتى القدس .. اورشليم هي اسم انثى باللغة الاراميه (لغة المسيح عيسى الاصلية) كانت زوجه لواحد من ابناء سيدنا يعقوب اسمها اهوليبا .. هاجرت من مصر و استقرت في المكان ده و عرفت بأسم اورشليم .. مش متأكد من الجزء الاخير ده الحقيقه .. انما متأكد منه هو ان اسم اورشليم باللغة الاراميه القديمه يعنى مدينة السلام. القدس بالانجليزي "جيروسيلم .. بالعبري "يروشاليم" .. اليهود العرب بيكتبوها أورشليم .. اصلها الارامى اور سالم. طيب سلام مدينه يعنى معناها ايه ؟؟ غير شالوم .. صح كده .. الاكيد كمان ان العرب عمرهم ما قالوا عنها اورشليم .. انما كان اسمها دائما الارض المقدسه او بيت المقدس.

المصدر : معجم المعاني

.....



رابعاً : والى عكا

الراجل ده مظلوم اوى يا جدعان.  
 الثابت تاريخيا ان والى عكا كان بطل .. فضل يقاوم الاسطول الصليبي 20 شهر .. و اخر معاركه معاهم قتل منهم 600 و اسر 270 ... ولم يقبل بتسليم المدينة الا بعد اتفاق مع قادة الاسطول يضمن الحفاظ على حياة اهل عكا .. و اول ما دخلو البلد هو اول واحد رموه من فوق السور و قتلوا اكثر من 2000 اعزل من اهل عكا.  
 يعنى تحول من بطل الى خائن .. و من شجاع الى خادم يصب الخمر الى ملوك اوربا و من محارب يدافع عن ارضه الى مرتشى جبان يبيع اهله فى مقابل وعود زائفه و  
 كل ده ليه ؟؟  
 علشان خاطر فرجينيا .. جميلة الجميلات الغير موجوده الا فى خيالنا احنا بس.  
 مصدر (1) : النوادر السلطانية والمحاسن اليوسفية - سيرة صلاح الدين الايوبي  
 مصدر (2) : الوطن العربي والغزو الصليبي - خاشع المعاصيدي (الطبعة الاولى - صفحة 123).

خامساً : لوزيا و فرجينيا

فرقة فرسان ماطله .. او فرقة القديس يوحنا .. او فرقة الاسبتاريه .. اسامى مختلفه لفرقه شديدة الشراسه و الاجرام من فرق الجيش الصليبي .. كونها الايطاليين فى البدايه فى جزيرة مالطه .. خرجت من رحم الجماعة الام و هى فرقة فرسان المعبد ذات السمعه السيئه .. هى ليست احد فروعها .. انما لولا فرسان المعبد .. ما كانت فرقة فرسان ماطله.  
 طيب .. الاسم العجيب ده .. الهوسبيتاليين .. جه منين ؟؟  
 فى بداية تشكيل الفرقة دى .. كان الهدف منها حماية المرضى و الجرحى فى مستشفى القديس يوحنا القريب من بيت لحم فى فلسطين .. علشان كده اخدت اسم فرقة القديس يوحنا .. او فرقة فرسان المستشفى .. "Hospitaliers" .. و بقدرة قادر .. الترجمة قلبتها  
 طيب .. فرقة فرسان المعبد .. "Knights Templars" .. ليه مقلناش عليهم التيمبليين و نقول كمان لندنيين و باريسيين و برلينيين ؟؟  
 عموماً .. انا ممكن اسامح يوسف شاهين مخصوص علشان خاطر لوزيا دى ... مانجايه يا جدعان والنعمه .. مفيهاش غلطه .. طبعا انا بتكلم عن ناديه لطفى .. المشكله بقى ان لم يرد ذكر الاسماء دى اطلاقا فى اى مصدر عربى او اجنبى .. حتى فى المتحف البريطانى نفسه (اقدام و اهم متاحف العالم) .. اعنى لوزيا دى لويزينيون قائدة الهوسبيتاليين طبعا .. اسم دى لويزينيون ده بتاع واحد تانى خالص هنتكلم عنه فى النقطة الجايه.  
 الثابت كمان ان فرقة فرسان مالطه كانت اشرس و اقوى فرقه فى الجيوش الصليبيه كلها و كانت بتتعرض لاختبارات الحرق الجزئى بالنار لاثبات قوة التحمل و الولاء .. كمان السيوف الاوروبيه وقتها كان وزن الواحد فيهم فى حدود 8 كيلو و طوله 120 سنتى زى ما هو معروض فى المتحف البريطانى و لبسهم كان دورع حديد .. يعنى علشان تشيل سيف و تلبس درع من دول .. محتاجلك 3 شهور فى الجيم علشان تعمل فورمة الحرب.  
 يبقى ازاى الكتكوتة دى تقدر تشيل سيف زى ده و تلبس حديد و كمان تحارب و تبقى قائدة اشرس الفرق المحاربه ؟؟؟  
 كمان فرقة الفرسان دى كانت من الشراسه و الهمجيه انها لو شافت واحده زى ناديه لطفى كده على بعد كيلو .. ممكن ياكلوها .. مش يخلوها  
 القائد  
 بقى انت هترعى القطه دى .. وسط عساكر جيش ؟؟  
 حد يقول يا ناس اننا ممكن مثلاً نعمل صافيناز قائدة فرقة ال 777 او ال 999 ؟؟  
 كلام مش راکب على بعضه خالص.  
 طبعا هى طالعه فى الفيلم بتستحمى و اتكسفت من عيسى العوام .. قالتله غمى عنيك يا سافل .. و هو راح مديها ضهره علشان عيب .. راحت جايه راشقه السهم فكفته .. و قالتله المره الجايه السهم يصيب قلبك .. و راح الجدع مفرفر فى ايديها.  
 معاه حق طبعا .. انا نفسى كنت بتفرج و ماسك ورده و مشغل جمى فانت جمننا لعبد الحليم .. بس الكلام ده يبقى منطقي لو حصل مثلاً فى فرايداي او تيفولى هيليوبوليس .. انما فى حطين .. و الحرب شغاله .. اعتقد صعب .. كثير عليها كده الصراحه.  
 اما عن فرجينيا .. ففى كل كتب التاريخ و المصادر الى قريبها .. لم يذكر اى واحد بالمواصفات دى خالص .. زوجات رينو هنتكلم عنهم .. لم يكن فيهم اى واحد اسمها فرجينيا ولا صاروخيه زى ما شفنا كده.



يعني فرجينيا طلعت وهم يا جدعان .. يا خساره .. ده انا كنت بحبها اوى .. خصوصا بعد ما زرعت اسافين و وقعت الدنيا في بعضها بأسلوب لولا صدقي و ميمي شكيب و عشت الكل بالقرب و اللقاء بينما هي مربوطه مع كونراد دى مونفران .. ابن المحظوظه.

مصدر (1) The Leper King and His Heirs - الملك المجذوم و ورثته. بلدوين الرابع و الصليبيين في مملكة القدس - الصادر من جامعة كمبريدج "انجلترا" - برنارد هاميلتون 1 يناير 2000  
مصدر (2) : الحروب الصليبيه كما رآها العرب - امين معلوف.

.....

سادسا : رينو السفاح  
=====

هذا رجل مثير للجدل و القلق.  
رينو دى شاتيون .. او ما نطقه بالعربي أرناط .. مجرم طريد من اوروبا .. سافر للقدس سنة 1147 و حط قدراته في خدمة الملك بولدوين الثالث .. الى استخدمه في حماية كونستانزا اميرة انطاكيه .. الست جوزها مات سنة 1149 .. راحت متجوزه رينو سنة 1153 .. الست مضيعتش وقت .. و من هنا بقي رينو امير انطاكيه. استمرت حملات رينو الهمجييه ضد قوافل الحجاج و قطعان المواشي .. و حاول اكر من مره السيطرة على المدينه و مكه و نيش قبر الرسول .. لكنه فشل .. في احد هجماته على قطعان المواشي في سهول حلب وقع في فخ نصبه ليه الامير الزنكي مجد الدين ابن الدايه .. اتسجن 16 سنه في حلب .. خرج بعدهم لقي مراته ماتت بعد ما سلمت ملك انطاكيه الى بيهموند الثالث .. ابن جوزها الاولاني.

رجع صاحبنا على القدس .. سلم نفسه للملك بولدوين الرابع .. وقتها كانت ستيفاني ارملة اوتر جوردون (امير الكرك) موجوده و شغاله .. اتجوزها رينو و من هنا بقي امير الكرك. اتجوز مرتين .. كل جوازه بمملكه .. ابن المحظوظه .. ناس ليها جوازات بممالك و ناس ليها جوازات و بامبرز .. رينا يجعل كلامنا خفيف.

رينو دى شاتيون و صاحبه الانتيم جى دى لويزينيون وقعوا اسرى القائد حسام الدين الصارم التكريتي .. حسام الدين سلمهم لصالح الدين .. صلاح الدين عمل خيمه كبيره لأسرى الحرب من الامراء .. و اخذ الاثنين دول تحديدا علشان يعمل معاهم الصح. امر صلاح الدين بشراب ساقع .. ذكرت بعض المصادر انه مشروب الجلاب .. اعطى منه لجى دى لويزينيون بس .. الراجل عزم على صاحبه .. صلاح الدين اتنزف .. وراح مطير رقبة رينو و بعثها لخيمة الامراء الاسرى .. و قاله وقتها قبل ما يقتله "ها انا انتصر لمحمد" لأن رينو لما هجم على قافلة الحجاج قاللهم "اطلبوا النجده من محمد" بس بلفظ سافل. يعني رينو لم يتحدى صلاح الدين .. ولا صلاح الدين قال اعطوه سيفا .. و يقتله عبد فقير بأذن الله .. بالمنطق كده .. رينو لم يكن من شباب مصر الجديده بتاعة اوروبا .. ده كان مقاتل شرس شديد .. احتمال من اتنين .. يا صلاح الدين هيقتله يا هو هيقتل صلاح الدين.

بالذمه في قائد جيش .. في حرب .. يخاطر باحتمال مقتله و انهيار الجيش و معنوياته علشان واحد استفزه؟؟  
مصدر (1) : النوادر السلطانية والمحاسن اليوسفية - سيرة صلاح الدين الايوبي  
مصدر (2) : الحروب الصليبيه كما رآها العرب - امين معلوف.

.....

سابعا : ريتشارد قلب الاسد .. الملك الكيوت  
=====

من الفيلم .. انا حبيت ريتشارد الصراحه اكر من احمد مظهر .. و زعلت اوى انه مشى من عندنا .. ياريتيه كان قعد طالما هو راجل مجدع كده و يصون العيش و الملح كده.  
ريتشارد السينمائي زعل اوى من عمر الحريري و قاله فلتطارد اللعنه من لطخ الرايه المقدسه بالدم الحرام .. ده علشان 70 اسير اعزل اتقتلوا بالغلط .. الله ... ده على اساس ان ريتشارد كان جاي عندنا يعمل شوبنج لان كارفور انجلترا مش بيعمل خصومات. بقي هو جاي اساسا ارض مش ارضه .. علشان يسرق خيراتها و كنوزها .. و اول دخوله فيها قتل اكر من 2000 اسير اعزل .. و كمان غدر بالوالى الى عمل معاه اتفاقية تسليم المدينه "عكا" في مقابل حفظ الارواح .. و في الاخر يزعل على 70 واحد ماتوا بالغلط؟؟

طب و ال 2000 واحد دول .. عادى كده؟؟  
ده ريتشارد السينمائي .. ريتشارد الحقيقي بقي كان ملك شجاع و جسور احمر الشعر قوى البنيه و طويل بشكل ملحوظ .. بيصطاد

الاسود بايد من غير سلاح .. وضع النفس لا يلتزم باخلاق ... شديد النهم في الاكل و الشراسه .. عاشق لمنظر الدم المسال .. لايتورع عن اى خطيئه في الدنيا طالما ترضى طموحه و تحقق اهدافه .. منها انه قتل البابا نفسه في حادثه مشبوهه لأنه اعترض على سلوك ريتشارد المشين.

قريت في مجله معروضه في المتحف البريطاني بحث في اصول انساب الملوك الانجليز و سيرهم الذاتيه لمؤرخ مشهور اسمه جون هارفي "1948" يقول ان ريتشارد كان عرييد السلوك الجنسي .. احم .. مش كويس يعنى .. مش عاتق .. رجاله و ستات .. و ذكر تحديدا انه اعترف و تاب عن السلوك ده مرتين .. بينما الدكتور جون جيلينجهام اصدر بحث مفصل اخر في سنة 2001 في جامعة اكسفور ذكر فيه ان ريتشارد كان طبيعى تماما .. ما بين هذا و ذاك .. يظل ريتشارد انسان قذر و سافل.

الكلام ده طبعا قبل ما ييجى عندنا .. لما جه عندنا بقى .. عمل ايه ؟؟

ريتشارد قتل الاسرى وقت دخوله عكا بعد ما امن الناس و والى على حياتهم .. خاف ان اكثر من 2000 اسير اعزل من السلاح يعوقوا حركته فقتلهم .. بالاضافه الى انه في انتصاراته على صلاح الدين لم يكن شريف ولا نزيه .. الذبح كان سلوكه المفضل.

كمان في حادثه غريبه جدا يلزم التنويه عنها توضح اد ايه ريتشارد كان حيوان في صورة انسان.

ريتشارد كان بياكل خنازير دايم على الفطار .. الخنازير خلصت .. و الخنزير عموما حيوان ملوش مجال في المنطه العربيه .. الطباخ بتاعه احتار يتصرف ازاي .. فديح اسير عربى و طبخه لريتشارد .. رتشارد لاحظ ان اللحمه مختلفه عن كل يوم .. سأل الطباخ و الطباخ اعترف .. فريتشارد ضحك و عجبته الفكره و امره ان لحمته اليوميه الاساسنيه تبقى من لحوم الاسرى العرب.

مصدر (1): Richard I-The English Monarchs - جون جيلينجهام - جامعة ييل 2002

مصدر (2) : الحروب الصليبيه كما رآها العرب - امين معلوف.

.....

ثامنا : اللعنه على الابراج

=====

الفيلم صور الابراج كسلاح من اخترع الصليبيين .. ده غير صحيح .. الابراج الحربيه و المقاليح من اختراع القاده العرب في الاندلس .. الكلام ده موجود بالصور في بيبليوتيكا ناسيونال في مدريد "المكتبه الرسميه" .. موجود كتب كبيره اوى و قديمه جدا .. ورقها اصفر و فيها صور من الابراج الى استخدمها العرب للهجوم على قلاع الاسبان و البرتغاليين في ايبيريا (اسبانيا و البرتغال)..

.....

تاسعا : السائل الفاتك بالابراج

=====

انتبه يا رجل .. اتريد حرقنا ؟؟

اليوم دمشفى يومك

انا قلت الدمشقى هيتجوز بقى و الناس بتشجعه علشان نضرب نار و كده.

الاول .. مين هو الدمشقى الى عمل السائل الفاتك بالابراج .. صدق الله وعده ؟؟

أبو الفضل جعفر بن علي الدمشقي .. عالم في الاقتصاد و التجاره .. اهم انجازاته كان كتاب الاشاره الى محاسن التجاره صدر سنة 1175 .. وجدت اثار من الكتاب ده في المكتبه الخديويه في مصر.

في افلام يوسف شاهين فقط .. يتحول عالم الاقتصاد الى عالم كيميائى و يتحول المسلم الى مسيحي و البطل الى خائن.

و لقد كان انا من اكل الجبنه ايها الصليبيون الخونه.

هل مقبول مثلا انى اعمل فيلم .. اطلع فيه نجيب ساويرس عالم ذره ؟؟ او مجدى يعقوب شيف في الهيلتون و احمد زويل اعمله لواء فى الشرطه ؟؟

مش راكبه برضه فى عقلى المتواضع.

ازاي راجل بتاع اقتصاد يخترع السائل الفاتك بالابراج صدق الله وعده ؟؟؟

فى مسأله السائل ده .. فى مقولتين ..

المقوله الاولى : السائل ده اسمه الزاج الاخضر او حمض الكبريتيك المركز او بالبلدى مية النار .. ذكره جابر بن حيان مكتشفه الاصلى و قال عنه ... انه زيت يحرق من دون نار.

المقوله الثانيه : ان السائل ده اسمه النار الاغريقيه .. و ده كان معروف في اوربا لان البيزنطيين استخدموه في الدفاع عن القسطنطينيه .. سائل يحترق مخلقا نار لا تطفأ الا بالرمل او بالمعاجله عن طريق الخل .. نار بتلرز .. حاجه كده زى النابالم بس بدائيه شويه .. ذهب بعض الكيميائيين الى تفسير تكوينه الغريب بوجود معادن زى الصوديوم و المغنيسوم بنسب معينه .. الله اعلم .. لا اعرف عن الكيميائى الا ما ذكره محمود عبد العزيز من انها السبب في اننا اتمنجهنا و اكنا الباكالا "و المصحف ما دقته

لحد  
المهم في الليلة دى كلها .. ان الدمشقي مكانش بتاع كيمياء .. بالمناسبة .. كتب الدمشقي في الاقتصاد ما زالت موجوده للتداول.

عاشرا : السهم العربي المسموم

و" بسهم عربي ... احبيك"  
و راحت بصاله بصبه كلها حنيه بقميص النوم البمبي المسخسوخ .. وقالتله مات الملك ريتشارد .. فهو سخن و قاللها عاش الملك جون.

الحقيقه .. انا لو مكانه .. كنت كتبتلها كل الى حيلتي بعد م افوق من حالة الاغماء الى هتحصللى .. كمان كنت هاخذ سيفي و اروح اعلم على العيال دى كلها .. هقتل صلاح الدين و حسام الدين و بهاء الدين و عز الدين و يوسف شاهين و اسيا و عبد الناصر نفسه لو لزم الامر .. و اجبيلها مفاتيح اورشليم ليها لوحدها في ميداليه ذهب عليها قلوب و دباديب و حاجات كده. ليلي فوزي يا ناس .. حته سكر متغرقه عسل و كراميل و شوكولاته و متمرغه في مكسرات مختلفه .. الواحد ممكن يغمى عليا لو وقف قصاها كده من بعيد .. ما بالك بقى بزكى طليعات الى فضل ماسك نفسه قصاها طول الفيلم وهو عضمه كبيره ؟؟ طيب ده الفيلم ... الحقيقه بقى موضوع تاني خالص ... ريتشارد لا انضرب بسهم عربي ولا افرنجي ولا اساسا كان له تابع اسمه ارثر الامين ولا ارثر الخاين... ريتشارد مكانش بيتثق في اى احد و لا كمان قبل دعوة صلاح الدين بالدخول كحاج .. بالعكس .. رفض و قتل رسوله و حارب المسلمين بعدها حرب عنيفه .. انجرح فيها جرح جامد فشحنوه على اوروبا يتعالج و في الطريق اسره احد ملوك اوروبا .. يقال في بعض المصادر انه ليوبولد ملك النمسا .. انتقاما من مقتل كونراد دى مونفران .. هو كان فاكر ان ريتشارد له يد في قتله .. كونراد دى مونفران الى هو محمود المليجي في الفيلم .. الوحيد الى كان مضطرب مع ليلي فوزي .. في الحقيقه كان ملك صور .. ملك النمسا انتقم لصديقه بخطف ريتشارد و طلب فديه كبيره من اخوه جون .. واستغل اخوه جون الفرصه و اشعل ضده ثوره مات فيها ريتشارد متأثر بجراحه و بسهم من طفل صغير. و نعم الاخ يا حاج جون. مصدر (1) : Richard I-The English Monarchs - جون جيلينجهام- جامعة ييل 2002.

احد عشر : القائد هيكارى

حسين رياض دمه كان ثقيل اوى في الفيلم .. خصوصا لما رمى السيف لاحمد لوكر "رينو" و قاله خش .. خش على صلاح الدين يعنى .. فارس فارس و لفراس و الخيمه واسعه. القائد عيسى الهيكارى .. الشيخ الجليل و استاذ علم الحديث .. الصديق الشخصى لاسد الدين شيركوه .. وقع في الاسر بعد هزيمة الرمله .. و بدأ صلاح الدين مفاوضات مع بلدوين الرابع بطلب الافراج عنه .. بلدوين طلب 1000 دينار ذهب .. مبلغ ضخيم جدا .. لضخم من امكانيات بيت المال .. صلاح الدين دفع باقي المبلغ من جيبه الخاص لاهمية القائد و مكانته المعنويه و الروحيه في ارشاد العساكر للطريق السليم و تحفيز الهمم. شايفين رجال الدين لما بيكونوا صالحين بيعملوا ايه ؟؟ نحاول كده نربط و نقارن موقف و مكانة القائد الشيخ عيسى الهيكارى و مكانة و منزلة الشيخ العز بن عبد السلام في عين جالوت .. و نقارنها مع مشايخنا حاليا. ربنا يهديهم و يهدينا لطريق الخير المصدر : صلاح الدين... البطل المغوار... والشاب المنتظر - الشيخ رجب ديب - الفصل الرابع عشر

مصادر عامه

- الكامل في التاريخ - ابن الاثير - الجزء العاشر احداث 588 هـ - صفحات 218 الى 228
- البدايه و النهايه - ابن كثير - الجزء الثامن - احداث 587 هـ - صفحات 466 الى 472
- قصة الحروب الصليبيه من البدايه الى عهد نور الدين زنكي - راغب السرجاني.
- الدوله الزنكيه - علي محمد الصلابي
- صلاح الدين الايوبي - علي محمد الصلابي

بس للأمانه .. انا بحب الفيلم ده جدا .. لو كنت ممثل .. كنت هعمل دور من اتنين .. يا اما ريتشارد علشان ابقى شرير و الناس تعرفنى وتحبني وابقى جوز ليلي طاهر .. يا اما ارثر الامين و طظ في الرقابه .. دى ليلي فوزى يا ناس. نهاركوزى الغل 😊😊

## وا سينماتاه

بعد نشر مقالى السابق عن الفيلم الخالد الناصر صلاح الدين .. نالى من سهام التقريع و الاذى و المهانه ما طال امى و ابويا شخصياً بالفاظ غير لائقه بالمره .. وكأني غلظت في البخارى .. لا و الله .. بل كأني اعتقلت البخارى نفسه و بلغت عنه امن الدوله.

بعض الناس تعاملت مع المقال بأسلوب "اقتلوا حامل الرساله" .. حامل الرساله لا يفقه شيء عن محتوياتها المنافيه للأدب .. هو فقط يحملها .. مش مشكله .. نقلته و نستمتع بكل قاذورات الرساله و كاتبها. سابوا الفيلم بكل ما فيه ما بلاوى و اخطاء .. و مسكوا في اسئلتى المنطقيه البريئه جدا .. رغم تأكيدى في بداية المقال على حبي للمخرج و احباط كبير جدا .. لدرجة انى فكرت الغى الفكره كلها .. الى عايز يقرأ يقرأ .. و الى مش عاوز .. هو حر .. هو انا يعنى حسنى عبد الرحمن الجيرتى؟؟

لكن تواصل معايا بعض الاخوه من اصحاب الاخلاق النظيفه و الالسنه المنقوعه في السكر و مية الورد .. و الهمونى الكثير من الصبر و الامل .. مصرنا ان شاء الله بخير .. حتى و ان طفا على السطح بعض الشوائب. زى ما بقول دايم .. انا مش باحث تاريخى .. انا فقط قرئت كلام مختلف عن الى شفته .. ان اصبحت لله الفضل و المنه و له الحمد و الشكر .. و ان اخطأت فاتوقع التصويب لا التقريع متشفعا بما في نيتى من تصحيح الاخطاء التاريخيه. تمام كده

استعنا على الشقى بالله .. اعتذر عن طول الموضوع .. لكن التفاصيل مهمه .. اخر المقال موجود كل المصادر .. كلها متاحه في مكتبه جروب سطور للمراجعه و الاطلاع.

الحلقه الثانيه في كشف المستور من الاخطاء التاريخيه في الدراما المصريه .. بأكد تانى .. الرساله دى للجمهور مش لصناع الفيلم .. الحقيقه في الكتب .. ما تراه امامك على الشاشة ما هو الا اكشن اغلبه محصلش. معادى النهارده مع الفيلم الخالد .. و أسلاماه يا دين النبى .. أحمد مظهر برضه طب و النعمه مش مقصوده .. هو الراجل علشان كان حريف في ركوب الخيل فكانوا بيحبوه في كل الافلام الى فيها خناقات على مستوى على



فضل فارس الدين اقطاعى فى خدمة المملكة المصريه بأخلاص بعد وصول ايبك للحكم .. مش كده و بس .. لا .. ده كمان اخمد  
 محاوله للأنقلاب حاول يعملها الناصر يوسف "حاكم دمشق" فى الشام.  
 ولكن اقطاعى مقدرش ينسى ان كان بينه وبين العرش خطوه .. فقرر السعى من تانى عن طريق تقوية نفوذه فى الشام والاسكندريه  
 و الصعيد و ضمهم الى اقطاعاته .. و بالتالى زاد نفوذ المماليك البحرى فى الدوله ..  
 ايبك قلق من محاولات اقطاعى المستمره لمحاصرته .. فقرر قطع رأس الثعبان الى بدأ فعلا يطوق جسد القاهره.  
 ايبك حط خطه لقتل فارس الدين اقطاعى.  
 ايه بقى الخطه دى ؟؟

ثالثا : قطز هو الى قتل اقطاعى

=====

ايبك اتفق مع قطز .. مملوكه الاول و بعض المماليك التانيين الى بيدينوله بالولاء "المماليك المعزىه" على  
 قتل اقطاعى .. طبيعى يا جدعان .. ما هو اقطاعى مكانش سهل علشان يأجروه واحد يجيب رقبتة .. ده كان  
 قائد الجيش .. فى ايام كانت فيها الحروب اساسها القوه البدنيه.  
 يعنى اقطاعى دخل الجيش علشان كان شديد مش علشان ابوه كان لواء .. و مش بس دخل الجيش .. ده كان  
 قائد الجيوش كلها .. يعنى صحه و طول بعرض و قوه تهد جبل.  
 فكانت الخطه كالاتى .. اقطاعى ييجى القلعه للتباحث حول كيفية سد خرم الاوزون "اى كلام يعنى" .. و هو  
 خارج من القلعه فى ظلام الليل .. حد يديله بالخنجر فى جنبه .. مش علشان يقتله طبعا .. اقطاعى مش  
 هيموت من طعنة خنجر .. طعنة الخنجر بس تهد حيله شويه .. تهد قواه .. علشان لما يطلع له قطز ..  
 مياخدش فى ايده كتير و يبقى قتله سهل .. و مع ذلك اقطاعى مكانش بالسهيوله دى و كاد ان يقتل قطز .. لكن  
 قطز هو كمان مكانش هفأ و قدر يخلص فى الليله.  
 كانت شديده اوى الناس دى.

يعنى ببساطه .. قطز هو الى قتل اقطاعى .. بالاتفاق مع السلطان عز الدين ايبك .. و بعدها رموا راسه  
 للمماليك البحرى "رجالة اقطاعى" الى كانت واقفه حوالين القلعه .. وروهم العين الحمرا يعنى .. قام المماليك  
 دول عرفوا ان ملهمش لقمة عيش فى البلد دى .. فقالوا يا فكيك .. منهم الى راح على سوريا و منهم الى راح  
 الكرك .. من ضمن المماليك الى هربت .. بيبرس البندقدارى و قلاوون الالفى .. و الاتنين رجعو مصر بعد ما  
 ايبك اتقتل .. و الاتنين بقوا سلاطين على مصر .. ماهى كانت ميغه بقى .. قلاوون الالفى "اسم الالفى على  
 اساس انه كان مملوك اشتروه بألف دينار" اسس اسره استمرت فى الحكم اكتر من 100 سنه .. و مازالت  
 مدرسته قائمه فى شارع المعز بالقاهره.  
 ملحوظه سريعه كده.

هو مين فخر الدين اقطاعى ده ؟؟ الى نعرفه اسمه فارس الدين اقطاعى .. جابوا فخر الدين دى مين ؟؟  
 تكونش المماليك كانت بتدلع فارس و تقوله يا فخر ؟؟ زى ما بنقول لمصطفى يا درش او لمحمود يابو حنفى  
 ؟؟  
 جازيز.

رابعا : شجر الدر ماتت غرقانه فى البيسين

=====

حد يقدر ينسى المشهد العظيم ده ؟؟  
 بتكلم جد فعلا .. مشهد عظيم جدا .. لسببين :-  
 اولاً .. صوت الطاووس المرعب بعد ما الحريم خلصوا على بعض .. فعلا ما زلت لحد النهارده بتقبض لما



بسمع صوته .. مكننتش اتخيل ابدأ ان الكائن الجميل بشده ده يطلع منه الكآبه دى كلها.  
ثانيا .. اتنين ستات بيقطعوا بعض .. فى ايه فى الدنيا اجمل من كده .. كل ما اشوف ستات بتتخناق و تشد  
شعر بعض .. بموت من السعاده .. علطول اقول اللهم اضرب الظالمين بالظالمين .. ولا تخرجهم منها ابدأ ..  
لا سالمين ولا حتى متعورين 😊 :-D

فى الفيلم .. زوجة ايبك الاولى الست ام على (المنصور) دفعت رشوه لفريد شوقى علشان يسيبها تقتل ضررتها  
شجر الدر .. و فريد شوقى عمل فيها مرشد من بتوع الحكومه و حب يقبض من شجر الدر و ينصب على  
الوليه التانيه .. شجر الدر حلقتله .. فراح جاى ملبسها فى الحيطه و دخل عليها ام على و راح جاى قافل  
عليهم الباب من بره بالترباس .. و ام على راحت جايهاها من شعرها فى مشهد يطرب له القلب و دفست  
راسها فى الميه زى كفار قريش .. صحيح يا ولاد .. الضره مره و لو كانت جره.  
ده الفيلم .. الحقيقه بقى موضوع تانى خالص.

ايبك كان وعد شجر الدر باشراكها فى الحكم .. طبعا الكلام ده فى الخطوبه .. بعد الجواز لحس كلامه و ركنها  
على الرف تماما .. رجاله تكسف .. مش كده و بس .. ابن اللذينا كان عاوز يتجوز التالته كمان .. صحته  
مساعداه بقى .. بنت الامير بدر الدين لؤلؤ حاكم الموصل.

شجر الدر ست مش سهله .. وجهته دعوه باسلوب انا اسفه يا بيبي مش هزعلك تانى .. الجدع صدق و  
راحها القلعه و مستحمى و متظبط .. قامت هى الى ظببطه مع حراسها و قتلوه .. و اعلنت انه مات موته  
ربنا .. مما ليكه طبعا مدخلش عليهم الكلام ده .. قبضوا عليها و سلموها الى غريمته الاشهر .. ام على زوجة  
ايبك الاولى .. الست مكذبته خبر و أمرت جوارياها بقتلها بمنتهى المهانه .. الضرب بالقباقيب على راسها  
حتى الموت .. و بعدين رموها جثتها من على اسوار القلعه و فضلت 3 ايام من غير دفن.  
الحريم لما بتقدر على بعض مبتخليش الصراحه .. احسن .. طالما الخناقه حريمى .. يبقى طوبه على طوبه و  
خلى العاركة منصوبه. 😊 :-D.

و ابتهاجا بقتل شجر الدر .. ام على وزعت على الناس اطباق لبن بفتافيت العيش المحمص و السكر و  
المكسرات و الزبيب .. و سموا الطبق ده على اسمها ... ام على 😊 :-D.  
يقال ان قطع الزبيب دى كانت قطع من صدر شجر الدر الى قطعته ام على.

خامسا : المنصور .. ابويا ابويا

=====

فاكرين العيل العبيط الى صدق ان احمد مظهر بلع حصانه و قعد يصرخ و يدبذب فى الارض و يقول ابويا  
ابويا؟؟

ارموا بقى الواد ده من دماغكو خالص .. ابن ايبك كان اسمه نور الدين على .. تولى الحكم بعد مقتل ابوه و  
كان سنه 15 سنه .. و بقى اسمه الملك المنصور .. مكانش عبيط ولا اهيل ولا اى حاجه من الى قالتهم  
تحية كاريوكا دى .. دى غيرة نسوان مش اكثر علشان الواد يبقى ابن ضرته.  
بعد مقتل ايبك .. المماليك الى كانت هربت للشام رجعت مصر تانى علشان تلحق اى حاجه من طبق الفتة  
.. فوجئوا ان سلطان مصر طفل سنه 15 سنه .. ملوش فى اى حاجه فى الدنيا الا تربية الحمام و صراع  
الديوك "الهندي" و الجرى بالحمير فى القلعه.  
اتفقوا مع الملك المغيث ملك الكرك "الايوبى" و حاولوا يعملوا قلق و ياخدوا السلطنه .. لكن قطز وقفلهم  
زى الاسد .. بيرد جميل اميره السابق ايبك فى ابنه المنصور .. مش كده و بس .. لا .. قطز كمان قدر يأسر  
المملوك قلاوون الالفى.





في الآخر عملوا صلح .. بمقتضى الصلح ده الملك المغيـث سلم المماليك الى اتسببوا في الفتنة دى كلها للناصر يوسف في دمشق تسليم اهالى .. و طبعا الناصر يوسف عمل معاهم الجلاشه.  
اما قطز .. فرجع الى قلعة الجبل و اعدم المماليك الى ساعدت الملك المغيـث ..  
البلد فيها قلق و التثار على الابواب .. و المنصور يسبح في مية البطيخ..  
يعمل ايه قطز ؟

دكتور جمال الدين الشيال في كتابه تاريخ مصر الاسلاميه "طبعة دار المعارف سنة 1966" يقول ان المنصور عاش هناك و تنصر و اصبحت اسمه ميخائيل ابن ايبك و اكد الكلام ده شمس الدين الذهبي في سير اعلام النبلاء (مجلد 23 - صفحة 200). بينما ابن اياس في كتابه "بدائع الزهور في وقائع الدهور" قال انه فضل عايش في برج السلسلة في دمياط لحد ما مات سنة 700 هجرية (مجلد 1 - صفحة 78).

يعني لما رسل التتار وصلوا الى ارض مصر .. قطز فعلا كان في الحكم .. مش بس كده .. قطز اتصرف صح تماما .. قطع رقبة الرسل دي و علق جثثهم على ابواب زويله لزوم الروح المعنوية للجيش و جمع الامراء و بناء على فتوى القوى في الحق الشيخ العز بن عبد السلام استولى على اموالهم لزوم بناء و تسليح الجيش . تأميم يعني.

اه يا معلم .. ولااااااا حصل منها ای بتنجان في الحقيقة.

کتبغا کان قائد جیوش التتار .. حاجه زی سامی عنان کده .. مش عسکری مراسله .. عمل بلاوی فی جیش المسلمین فی المعرکه .. لحد ما قتله امیر اسمہ جمال الدین آقوش الشمسی یوم 25 رمضان فی عین جالوت. و بعدین التتار ملقوش رسل یبعثوها غیر العیال الجعانه دی؟؟؟ العیال کانت واقفه هتقع من طولها من الجوع .. بقی ده شکل مقاتلین ده!!

خد عندك يا سيدى .. ده جزء من نص رسالة هولاكو الحقيقه الى قطز .. افروا كده و شوفوا الى يقول الكلام ده يبقى شكله عامل ازاي و قارنوهم بالهياكل العظميه الى ظهرت فى الفيلم .. الرساله كامله ذكرها المقرئى فى كتابه "السلوك لمعرفة دول الملوك"

يعلم الملك المظفر قطز .. وسائر أمراء دولته وأهل مملكته بالديار المصرية وما حولها من الأعمال .. أنا نحن جند الله في أرضه .. خلقنا من سخطه .. وسلطنا على من حل به غضبه. فلکم بجميع البلاد معتبر .. وعن عزمنا مزدجر .. فاتعظوا بغيركم وأسلموا لنا أمرکم .. قبل أن ينكشف الغطاء .. فتندموا ويعود علیکم الخطأ .. فنحن ما نرحم من بکی .. ولا نرقّ لمن اشتكى .. وقد سمعتم أننا قد فتحنا البلاد .. ووطهرنا الأرض من الفساد .. وقتلنا معظم العباد .. فعليکم بالهرب .. وعلینا بالطلب .. فأی أرض تأویکم .. وأی طریق تنجيکم .. وأی بلاد

تحميكم؟

فما لكم من سيوفنا خلاص .. ولا من مهابتنا مناص .. فخيولنا سوابق .. وسهامنا خوارق .. وسيوفنا صواعق .. وقلوبنا كالجبال .. وعددنا كالرمال .. فالحصون لدينا لا تمنع .. والعساكر لقتالنا لا تنفع .. ومطركم علينا لا يُسمع فإنكم أكلتم الحرام .. ولا تعفون عند كلام .. وخنتم العهود والأيمان .. وفشا فيكم العقوق والعصيان .. فأبشروا بالمذلة والهوان.

.....  
يا خبر اسود على الكلام .. انا خفت و انا قاعد مكاني.

سابعاً : اتفوو ... لو شفتوه في الحرب اقتلوه

=====

مين بلطاي ده يا جدعان؟؟

في الفيلم هو الى قتل اقطاي .. و هو الى قبض فلوس من ام على علشان تخلص على شجر الدر .. وكان جاسوس للتتار علشان ياخذ العرش.  
و النعمه الجدد ده ملوش ذكر في اى كتاب من كتب التاريخ .. ولا حتى مجلات ميكي .. فريد شوقي في الفيلم قتل اقطاي .. الى هو محمود المليجي .. ده غالبا كان تار تاريخي بايت بينهم من افلام قبل كده.. هما علطول كده ناقر و نقير .. انما في الخقيقه .. بلطاي ده اساسا مكانش له اى وجود.  
و بعدين حرص الشخصيه الخياليه دى "بلطاي" على قتل جهاد علشان يبقى هو الحاكم الشرعى ... بأماره ايه ولا مؤاخذه ... اذا كان التتار هياخدوا البلد بالى فيها .. يبقى شرعية ايه و بتاع ايه.  
شويه منطق يا ناس.

ثامناً : الله احد .. الله الصمد

=====

لا يخلو الفيلم من الكوميديا الحقيقه .. احمد مظهر شاف 5 عساكر لابسين لبس فرسان المعبد ... فطلع يتفق معاهم وقتى كده انهم يشتركوا معاه في حربه مع التتار .. فالراجل المسكين يا عينى قالله ان دول الى فضلو من معركة المنصوره و مش هيقدر يخاطر بيهم .. عدد برضه يا جدعان.  
دى الكفته .. قصدى ده الفيلم ...  
الحقيقه بقى ان معركة المنصوره ... اخر معارك الحمله الصليبيه السابعه .. انتهت في مايو سنة 1250 م بهزيمة جيوش لويس في فارسكور "دمياط" و لويس التاسع اتقفش في منية عبد الله .. الى هى دلوقتى ميت الخولى عبد الله "مركز الزرقا - دمياط" .. واتعلق من كعوبه في دار القاضى ابراهيم ابن لقمان في المنصوره.  
بينما عين جالوت حصلت سنة 1260 م ... يعنى وقت الحرب مع التتار لويس كان دفع الفديه و رجع عكا و منها الى فرنسا علشان الامراء هناك يظبطوه على كل التكاييف الى اتصرفت على حملة مجابتش همها .. كمان بقايا الصليبيين في الشام حاولوا يتفقوا مع التتار ضد المسلمين .. بس التتار نفضولهم ... على اساس انهم كفاءه كفايه.

يبقى مين الى كانوا فوق الجبل دول و قالوله "الله .. بتاع مين؟؟" و احمد مظهر اتضايق جدا .. ده على اساس ان مصر وقتها مكانتش تعرف ان في ديانه اسمها المسيحيه!!!  
الانبهار يقتلنى ببطء.

تاسعا : الى الجهات

=====

[illegible]

کده برضه با مخرجين؟؟

لما القطه دى تنزل الحرب .. امال هياتم تعملوا بيها ايه ؟؟

و یسمع النداء ده راجل میت و راشق فی فضره خازوق .. فیصیحی و یجیب عسکری تتری من فوق حصانه و بموته بطوبه فنافوخه.

دی لو کانت عارکہ فی خمارہ بلدی .. کانت بقت اسخن من کده.

الاميره جلنار حب الرمان - وده اسمها الحقيقي - بنت السلطان جلال الدين خوارزم شاه .. استشهدت في اول المعركه خالص لما التتار كانوا ضاغطين على جيش المسلمين .. قطز شالها على دراعه و قالها "وا حبيبتاه .. وا زوجتاه" .. هي عرفت انها بتموت .. فقالته "بل قل وا أسلاماه .. الى النصر يا سلطان المسلمين .. ها قد سبقتك الى الجنه" .. و فاضت روحها شهيده بين ذراعى زوجها.

الملك المظفر اغمض عينيه و رمى خوذته في الارض و فك سرج الحصان و خلع درعه و انطلق زى السهم فى قلب جيش التتار صارخا .. وا محمداه .. وا أسلاماه.

فعلا واأسلاماه .. التتار كانوا اكبر نكبه فى التاريخ على الاسلام .. طبعاً مقارنة بحالنا دلوقتى .. احنا اسوأ من التتار على الاسلام نفسه و على البشره كلها.. ربنا يفكها من عنده.

عسکریا .. نحلل الجزئیہ دی .. لما قائد الجیش یخلع درعه و خوڈتہ و یفک سرج حصانہ .. معناها انه خلاص .. مش باقی علی ای شیء .. ایده مش هتبقى مشغوله الا بالقتل و بس .. و لما ینفذ لوحده فی قلب جیش التتار .. تبقی دی رساله الی کل من خلفه . اعمل زیه او هتموت .. یا اما مهزوم بسیوف الاعداء لو ملیک انتقتل .. او متحاکم من ملیک علی جینک لو جیشک انتصر .

نفس الحركة تقريبا عملها الفريق الشهيد عبد المنعم رياض في حرب الاستنزاف .. التواجد في الخطوط الاماميه مع العساكر .

و معنويا .. لما يكون الملك و قائد الجيش مستبوع .. ده معناه ان التتار كان بينهم و بين النصر تكة .. و ده فعلا حقيقى .. خطة الهجوم كانت عبارة عن تقسيم الجيش 3 اقسام .. قلب و ميمنه و ميسره .. القلب يتظاهر بالهزيمة فيتراجع .. يروح التتار يهجموا فيطبق عليهم الميمنه و الميسره "بقيادة بيرس من غزه" .. كماشه يعنى ... الى حصل بقى ان القلب فعلا انهزم فى الاول .. و حصل ارتباك فى الميمنه و الميسره الى ان انقذهم السلطان بصراخه .. و اسلاماه.

کده يبقی المشهد مقبول.

عاشرا: یا بخته ... مش هیکمل حیاته اعمی

=====

كل اللي فات ده كوم .. و سلامه ده كوم تاني لوحده.

اساسا اساسا .. انا مجبش حسين رياض .. و شايف انه ممثل سقيم جدا و اوفر على الآخر .. كفايه مشهده الكوميدي في رد قلبي "تحيا الثورة .. انا بتكلم يا علي" .. لما بشوف فيلم فيه حسين رياض .. بكتئب .. يمكن الجدة ده كان من اسباب اني قررت احط على الفيلم ده.

بما ان فريد شوقي جاى فى السيناريو بالعافيه .. يبقى لازم حسين رياض كمان ييجى محبه و اخوه .. و اهو كله بيرزق.

الحقيقه بقى .. لا فيها سلامه .. و لا فيها انتى فين يا جهاد .. و لا انا هنا يا سلامه .. ولا حتى انجى بتاعة لازم تدفعلى اكر .. لازم تدفعلى اكر .. و شغل العبط ده كله.

انا حاسس انى عاوز اعمل زيه .. بس انا همشى فى الشوارع اقول انتى فين يا انشراح.  
ملك مصر .. الملك المظفر سيف الدين قطز .. كان بيستعين بالشيخ العز بن عبد السلام "الى هو عباس فارس فى الفيلم" .. الرجل القوى .. و ده درس لمشايخ السلطان عن اهمية دور رجال الدين فى اسداء النصيح للحكام .. لما رجل الدين بيصلح .. و يفضل بعيد عن العاب السياسه .. يقدر يكون حر فى قراره و فتواه .. لا يخضع الا لله عزوجل.

بالمناسبه .. بعد مقتل قطز .. الشيخ العز بن عبد السلام رفض الاعتراف "منفردا" بولاية بيبرس لانه مملوك .. و خرج من القاهره غاضب .. الناس خرجت وراه .. واضطر بيبرس انه يتباع و يعتق علشان يبقى حر و تجوز له الولايه.

طيب ما كان قتله و خلصنا ؟؟  
و هو كان يقدر ؟ ده كان اهل مصر فرتكوه .. الشيخ العز بن عبد السلام كان رجل علم و دنيا و دين .. يمكن اهم عند المصريين من السلطان نفسه.  
نحسبه عند الله من المقرين ولا نزكى على الله احداً

أحد عشر : الاسامى بقى

=====

قطز : طول الفيلم بيندهو بأسم محمود .. هو فعلا اسمه الحقيقى محمود ابن ممدود ... بس الاسم ده متعرفش الا لما اتقتل على ايد صديقه الاثير بيبرس البندقدارى .. و بيبرس اكتشف من مذكراته اصله و نسبه و انه كان ناوى يسيبله السلطنه بالفعل حسب الاتفاق المبرم بينهم وقت تولى قطز العرش.  
جلنار : طول الفيلم بيندهوها برضه بأسم جهاد ... الحقيقه غير كده ... هى استخدمت اسم جلنار حب الرمان من اول ما اتباعت فى سوق الجوارى و متعرفش اسمها ولا نسبها الا لما استشهدت.  
شجر الدر : شجر مش شجرة .. هى عصمة الدين و الدنيا ام خليل الحاكميه المستعصميه .. اعتقها الصالح نجم الدين ايوب و تزوجها .. تولت عرش مصر لمدة 80 يوم حتى استدعاء ابنه توران شاه.  
اقطاى : هو فارس الدين اقطاى .. مش فخر الدين.

## أكاذيب الملكية السبعة

في البدايه .. اعتقد انه يتوجب على توضيح حقيقة انتمائى السياسى .. للأمانة ليس الأ .. شخصياً .. اعشق التاريخ و الغوص فيه بحياديه .. لا املك سلطة الحكم على أى طرف .. كلهم موتى بين يدى خالقهم لا تجوز عليهم الا الرحمة .. كلهم حاولوا .. منهم من اصاب .. و منهم من أخطأ .. لست من مؤيدى الملكية .. و لكنى أراها شرعيه .. لست من مؤيدى انقلابات جنرالات الجيش .. اختلف مع الدراويش و تجار الدين فى السياسه و اكراه المتسلطين على رقاب البشر تحت اى مبرر .. اكراه الحاكم عندما يتعمد اثاره خوفاً اما بالعذاب فى الدار الآخرة او بعدواً مجاوراً طحن عظامى بالأمس فى منافسة رياضيه ..

أرى ان رأسى برأس الحاكم .. بل أنا افضل منه .. فأنا لا اكذب بينما أهل السياسه فى مستنقع الكذب يغرقون .. انا اطول منه عمراً اختصاراً .. كلهم فى نظرى لصوص ينحدرون من أرحام العاهرات.

.....

المتابع لأحوال مصر منذ أيام نشأة الدولة الحديثه على يد محمد على باشا الكبير – او كما سوق لهذا المصطلح صاحبه- سنة 1805م سيلاحظ انهياراً منظماً بدأ منذ العام 1840م .. او تحديداً بعد خسارة محمد على لحروبه فى أوروبا و تشكيل الحلف الانجليزى-الروسى-الفرنسى لانقاذ الرجل العثمانى المريض من بين انياب أسد هصور افترسهم بالفعل و لم يتبق على وراثته للعرش العثمانى الا النذر اليسير .. لم يتشكل هذا الحلف بالطبع من اجل الحق و الفضيله .. بل كانت العيون تشخص و تتجه الى وراثة طبيعيه دون صراعات للدولة العثمانيه التى كانت فى مراحل الاحتضار بالفعل .. كانت أوروبا متخوفه من ظهور دولة فتية جديده تعيد ما بدأه معهم ابطال آل عثمان فى القرون الوسطى .. شبح سليمان القانونى ما زال يقض مضاجعهم .. لذلك .. لا ينبغي السماح لهؤلاء الذين يتجهون الى المشرق فى صلواتهم بالتجمع مرة أخرى تحت اى رايه. سنجد عصر الخديو اسماعيل اقل فى انجازاته من عصر جده محمد على .. و عصر توفيق اسوأ من عصر اسماعيل .. و عصر فاروق انحدرت الدولة الى ما هو اسوأ مما كانت عليه فى ايام الخديو سعيد .. حتى كان الانقلاب الميمون فى الثالث و العشرين من يوليو عام 1952م .. فأصبحت مصر كأنها رفعت بذراع مفتولة من مصارع قوى مصر الى عنان السماء و هوت على غره الى اسفل سافلين .. لينقصم ظهرها و تنسحق عظامها و تتحول الى شبه دولة .. شبه حياه .. شبه اخلاقيات انهارت بالفعل .. بالاضافه الى التسول العلنى و القروض الغير منتهيه. سوء الأحوال فى الفتره الأخيره .. تحديداً من بداية الألفيه و حتى ايامنا الحاليه .. دفع البعض للترحم على أيام الملكية و الملك المخلوع فاروق الأول .. انتشرت حملة قويه من حملات الحنين الى الماضى "نوستالجيا" .. حملات تمجد الحياه الدستوريه و الوضع الأقتصادي للدولة المصريه و مقارنه – غير عادله – بين أحوال مصر فى أيام الملك فاروق و أحوالها أيام ما تلاه من الملوك المقنعه .. مقارنات بين سعر الدولار و قت ان كان يساوى 20 قرشاً مصرياً و بين سعره الحالى بعد ان اصبح يساوى 11 جنيهاً مصرياً بالتمام و الكمال. كانت البدايه الصريحه عن طريق مسلسل رمضانى من تأليف الدكتور لميس جابر نقلاً عن كتاب الباحثه التاريخيه .. دكتوراه لطيفه محمد سالم .. الأستاذ بكلية الآداب جامعة بنها .. هكذا قالت مؤلفه المسلسل الذى حمل أسم فاروق .. ان مصدرها الأساسى فى التأريخ كان كتاب دكتوراه لطيفه المسمى بفاروق من الميلاد الى الرحيل .. بينما الكتاب و محتواه و صفحاته التى قاربت على ال 1000 صفحه .. بعيد الى حد كبير عن المسلسل.

بمراجعة الكتاب .. و عدة مصادر أخرى .. سنجد عدة فروق أساسيه و جوهريه بين التاريخ الحقيقى و رؤيه الطبيبه لميس جابر و من رافقها من حملة لواء الملكية الشهيد على مذابح الانقلاب.

فهل كان صحيحاً أن أحوال مصر كانت أفضل أيام الملك فاروق ؟

رصدت سبعة أكاذيب ... اعتقد انها تغرس خنجر الحقيقه كاملاً حتى المقبض فى قلب تلك الأوهام حتى نفذ نصل الصدمه من ظهر الجسد الكاذب للأشاعات.

.....

الكذبه الأولى : الملك رفض مقاومة عسكر الانقلاب.

=====

ليس صحيحاً على الإطلاق أن الملك رفض مقاومة الثوار وأنه قدم مصلحة مصر على مصلحته الشخصية .. الحق انه لم يكن يكثرث .. الحق انه لم يقدر الأمر حق قدره رغم توافر المعلومات عن حركة وشيكة فى الجيش .. و الحق انه لم يجد الوقت الكافى للتصرف .. و الحق ان الجيش و ضباطه كانوا متحفزين للملك المهمل و وزير حربيته خصوصاً بعد الغاء نتائج انتخابات مجلس ادارة نادى الضباط.

بالعودة إلى مذكرات أحمد مرتضى المراغى .. آخر وزراء الداخلية فى العهد الملكى سنجد القصة كالاتى:

كان الانجليز يعلمون بواسطة قلم مخابراتهم الكثير عن حركة الضباط الاحرار ويعلمون أسماء مقاتليهم فى منطقة قناة السويس . وكان من زعماء تنظيم الكتائب فى منطقة قناة السويس وجية أباطة وعبد اللطيف واكد .. وفى اصطدام بين دوريه بريطانيه ودوريه من الكتائب أسر البريطانيون ضابطاً مصرياً وأخذوه الى المخابرات لتستجوبه .. ودخل الضابط المصرى غرفة ضابط المخابرات البريطانى الذى بادره بالسؤال عن اسمه :

الضابط المصرى : اسمى محمود .

ضابط المخابرات : وما صناعتك ؟

الضابط المصرى : طالب فى الجامعة .

ضابط المخابرات ضاحكاً بسخرية : ان اسمك هو عصمت وصناعتك ضابط فى الجيش المصرى . أرايت أننا نعرف كل شئ عنكم ؟ والآن قل لى لماذا تقاثلونا ؟

الضابط المصرى : لانكم تحتلون بلادنا ولا تريدون ان تذهبوا .



ضابط المخابرات : ولكن قبل أن ترحلونا .. أليس بكم أن ترحلوا الملك فاروق .. نحن نعلم أنكم تنظمون حركة ضده .. فلماذا لا تعجلوا بالخلاص منه ؟ اذهب الى وجية أباطة و عبد اللطيف واكد وقل لهما هذا الكلام .  
 فهل أراد الانجليز أن يطلقوا بهذه الرسالة الضوء الأخضر لحركة الضباط الاحرار للقيام بحركتهم بغير خشية أو رهبة من أن يقاومها الجيش الانجليزى ، كما حدث فى حركة عرابى ضد الخديوى توفيق .  
 لقد أراد الملك فاروق فعلاً أن يستعين بالانجليز فى اليوم التالى لقيام الثورة . فأرسل مبعوثاً الى السفارة البريطانية قابل فيها الوزير المفوض مستر كرسويل الذى كان قائماً بأعمال السفير .  
 قال المبعوث : أنا موفد من الملك فاروق برسالة اليك .  
 المستر كرسويل ( بسخرية ) : وما هى الرسالة ؟  
 المبعوث : إنه يود معرفة ما اذا كنتم تستطيعون مساعدته ؟  
 المستر كرسويل . وهل تظن أننا نساعد مجنوناً ملعوناً .  
 وترك الانجليز فاروق لقدره .  
 المصادر ..

- غرائب من عهد فاروق وبداية الثورة المصري – أحمد مرتضى المراغى  
 - شاهد على حكم فاروق – أحمد مرتضى المراغى

.....

الكذبة الثانية : منجم السكرى

=====

الأشاعة تقول ان الملك فاروق أمر باغلاق منجم السكرى لىبقى حق الأجيال القادمة فى ثروات مصر.. حيث ان مصر فى تلك الأيام تملك ما يكفيها بالفعل!!  
 يبدو الأمر عسير على التصديق .. خاصةً أن "أخبار اليوم" قد نشرت فى 23 فبراير 1947 فى صفحتها الأولى أن هيئة الجيولوجيا ستعيد فتح مناجم الصحراء الشرقية بعد رخص ثمن استخراجه بعد أن كان طن التراب يعطى 4 جرامات ذهب فقط !! لا شأن إذن للأجيال الجديدة ولا القديمة بالأمر .. التصريح فى أخبار اليوم كان على لسان أشهر علماء الجيولوجيا فى مصر وقتها .. الراحل الكبير الدكتور رشدي سعيد ومعه المهندس إبراهيم كامل رئيس شركة النصر للفوسفات فى تلك الأيام.

.....

الكذبة الثالثة : مصر عاصمة النظافة

=====

مصر النظيفة .. مصر الموضه .. مصر المنظمه .. مصر التى كانت تنزل فى اسواقها الموضه من قبل بيوت أزياء باريس .. هى مصر جاردن سيتى و الزمالك و الحلميه فقط .. هى مصر زكى بيه الدسوقى فى فيلم عمارة يعقوبيان .. هى مصر الايموبيليا و شارع شريف .. اما القرى و النجوع و مدن الأقاليم .. فحدث ولا حرج عن الجهل والفقر والبلهارسيا التى اصابته 45% من ابناء هذا الشعب والحفاء والأمية التى تجاوزت ال 90 % من الشعب المصري.

فى العام 1941م .. اعزى الملك فاروق الأول لله التصدي لمشكلة الحفاء التى يعانى منها الملايين من أبناء الشعب المصري، سواء كانوا من أهل القرى والأرياف أو المدن .. فوجه ناظر خاصة خطاب الى رئيس مجلس الوزراء جاء فيه:  
 " لما كان كثير من أهل القرى والمدن يمضون لرقه حالهم حفاة الأقدام، وفى ذلك ما فيه من مضار صحية وأدبية رأى مولاي أعزه الله وأعز به البلاد أن يكون عيد ميلاده السعيد هذا العام ذا أثر كبير فى القضاء على هذه الحال بالتيسير على أمثال هؤلاء لتحتذوا أحذية كل وما يناسبه... وقد تفضل جلالته فأمرني أن أبعث إلي دولتكم بمبلغ 2000 جنيه لهذا الغرض رجاء اتخاذ ما ترون من تدابير لتحقيق هذه الرغبة السامية وتنفيذها بأسرع ما استطاع..

ولا ريب أن تسابق الموسرين من المصريين وغيرهم من مختلfi الهيئات فى البذل لتعصيد هذا المشروع كفيل بدوام تمتع هؤلاء بذاك المظهر الحسن العديد من المزايا المحمود الأثر فى الحياة المصرية صحيا وأديبا..

وإني إذ أشرف بإرسال أذن صرف رقم 905597 بالمنحة المتقدم ذكرها .. أرجو يا صاحب الدولة التفضل بقبول فائق احترامي

تحريرا فى 6 فبراير سنة 1941"

البحث كاملاً على موقع محيط

<http://www.moheet.com/.../%D8%A8%D8%A7%D9%84%D8%B5%D9%88%D8%B>

.....

الكذبة الرابعة : التقدم الاقتصادى

=====

وهم التقدم الاقتصادى الذى كانت تعيشه مصر .. حتى أنها أقرضت بريطانيا ما يعادل 25 مليار جنيه استرلينى بأسعار هذه الأيام..  
 القصة بالأدلة عند المؤرخين .. مثل الانجليزى مارك كيرتز.. أن بريطانيا أجبرت مصر على تقديم خدمات لها فى الحرب العالمية ولم تسدد بريطانيا بالبلطجة شيئاً منها .. إذ كيف يسدد البلد المحتل للبلد الذى يحتله .. وتم تسجيل الديون عاما بعد عام دون أن تجرؤ حكومات الملك ولا الملك نفسه بالمطالبة بها.

هل سدد الانجليز فاتورة قناة السويس .. دنشواى .. القمح ؟؟



القصة في مجملها دليل على مدى ضياع الكرامة الوطنية وليست دليلاً على التقدم الاقتصادي .. المبلغ لم يمنح لبريطانيا من فائض الانتاج .. بل سرقته بريطانيا قسراً من اقوات المصريين ليزدادوا فقراً على فقرهم.

.....  
الكذبة الخامسة : الحياه السياسيه القويه.

لنعد معا على اصابع اليدين عدد الوزارات المصريه في الفتره من 1937 الى 1952.. في خلال 15 سنه .. كم يكون العدد المنطقي للوزارات في بلد مستقل ؟؟

الطبيعي .. او المتوسط .. وزاره كل 4 سنوات .. بما يعنى 4 وزارات .. او 6 على الأكثر .. حتى يمكننا القول انها فترة استقرار وديمقراطية .. دعنا نتخيل انها كانت فتره قلقه مضطربه.

اليس كذلك ؟؟

التاريخ يخبرنا عن 15 وزارة .. لم يعمر بعضها اكثر من 3 أشهر .. تقال بعدهم الوزاره و يأتي الملك بمن يحمل له لواء الولاء و الطاعه. يكفي النظر إلى شروط الترشح لمجلسي النواب أو الشيوخ لتدرك أن هذه المجالس لا علاقة لها بالشعب المصري وأنها فصلت خصيصاً على مقاس طبقة معينة .. فلم تكن أغلبية الشعب تملك شروط الترشح من ضرورة امتلاك أراض كبيرة أو أرصدة في البنوك وغيرها فضلاً عن تلاعب القصر بالحكومات والأحزاب وجميعها لم يحقق لمصر الجلاء الأجنبي أصلاً .. و هي القضية التي كان يلعب بها المرشحون في فترة الانتخابات. القارئ في كتاب البحث عن الذات للرئيس الراحل محمد أنور السادات يتوقف طويلاً عند الفقره التي استعرض فيها السادات لقائه و ابيه بأبراهيم باشا خيري و ذلك من أجل طلب "واسطه" من الباشا حتى يستطيع الفتى أنور الألتحاق بالكلية الحربية. و الثابت أيضاً أن الدفعه التي قامت بالانقلاب على الملك .. هي الدفعه الوحيدة التي التحق بعض افرادها بالجيش دون أن تنطبق عليهم الشروط .. فلا هم من ابناء الاعيان .. ولا يملكون اطيافاً ولا عقارات .. فكانت النتيجة الطبيعیه .. ملكوا السلاح .. فانقلبوا على الملك.

المصدر :

- تاريخ الوزارات المصريه - يونان لبيب رزق

.....  
الكذبة السادسة : عصر السلام

مركز التأريخ العسكري التابع للقوات المسلحة تحدث عن نصف مليون شهيد مصري في الفتره بين 1914 الى 1944م .. حيث قال إن الرقم من الممكن أن يتضاعف .. في الواقع هو رقم يرصد شهداء مصر ممن أرسلوا إلى الحريين العالميتين واستشهدوا في أوروبا ودفنوا هناك .. و يعد ذلك الرقم كبيراً جداً قياساً لعدد السكان وقتها .. اذا علمنا ان مصر في عام 1955 كان تعداد سكانها 18 مليون .. إذا من الممكن ان يساوي رقم الشهداء بأرقام اليوم 7 ملايين مصري!

ای انه في عصر الاستقرار و السلام .. خسرت مصر ما يقرب من 3% من سكانها في حريين لا علاقة لنا بهما من قريب او من بعيد. رقم مربع..

مصر اشتركت - مرغمة - في حريين عالميين .. قال عن أولاهما الشيخ محمد مصطفى المراغي .. شيخ الأزهر .. هي حرب لا ناقة لنا فيها ولا جمل .. و اسفرت الثانيه عن الغام مزروعة في الاراضى المصريه تقتل العشرات كل عام .. المنطق يقول ان الدول التي زرعت تلك الالغام مجبره على ازالته و دفع تعويضات مناسبه للحكومه المصريه و اهالى المصابين عن اثار انفجار تلك الالغام .. ما يحدث في الواقع .. ان تلك الدول .. ترفض حتى ان تطلع مصر عمل نسخه من خرائط تلك الالغام.. حتى اليوم.

.....  
الكذبة السابعه : المعونه المصريه لبلجيكا.

الاشاعه تقول .. أن مصر أرسلت منحة لبلجيكا تبلغ 500 الف فرنك سويسرى لانقاذ الشعب البلجيكي من الجوع و الفقر. الموضوع على موقع اللطائف المصوره

<http://www.allataif.com/20.../.../Egypt-aid-to-Belgium-1918.html>

القصة الحقيقيه تقول ان بلجيكا دفعت ثمن رغبة ألمانيا في احتلال فرنسا .. إذ كانت بلجيكا هي المعبر الى فرنسا في موقعة "لييج" الشهيره .. وكان التعويض الرمزي لبلجيكا من الدول الخاضعة لعدو ألمانيا الأول وهي بريطانيا .. فأرسلت تلك الدول أموالاً رمزية .. بلغت نصيب مصر منها نصف مليون فرنك سويسري.

هل وضع الأمر ؟؟

المانيا تضرب فرنسا عن طريق بلجيكا .. فيتم تعويض بلجيكا من دول تخضع لسلطة عدو المانيا .. و كأن ام زوجتك شتمت جارة عمتها التي تعيش في الأسكندريه .. فوجب على ابيك تعويض محافظ اسيوط عن اضرار سيول الشتاء في سيناء.

.....

و رغم كل تلك المثالب .. فأني لا أتفق مع ما فعلته طغمة الضباط الأشرار - هكذا اسماهم زعيمهم الصوري بعد ان حبسوه - يبقى الانقلاب أنقلاباً .. مشنوماً مكروها مغتصباً لحق لا يجوز له ..

تخبرنا كتب التاريخ عن ولايات تعانيتها الشعوب اذا ما ترك العسكريون ساحات القتال الى ساحات السياسه .. اتفق في هذا الرأي تماماً مع رأى المشير الراحل .. محمد عبد الغنى الجسمي عندما قال ..

"إن الرجل العسكري لا يصلح للعمل السياسي قط، وإن سبب هزيمتنا عام 1967 هو اشتغال وانشغال رجال الجيش بالألاعيب في ميدان السياسة؛ فلم يجدوا ما يقدمونه في ميدان المعركة"  
كان شعار الانقلاب الأول انه أرفع رأسك يا أخى ..  
الآن .. بعد مضي ما يقرب من 60 عاماً على تلك المطالب برفع الرؤوس .. أرى ان الرؤوس انحنت بالفعل أكثر و أكثر بفعل الجوع والعوز و الحاجة .. و ارى ان احفاد الاقطاعيين الذين صادر الانقلاب املاكهم .. اصبحوا من اصحاب المليارات مرة أخرى .. و انقرضت الطبقة المتوسطة .. و زاد الجميع فقراً.  
او كما قالت الراقصة .. تحيه كاريوكا .. و كانت ذات نشاط سياسى واضح و شخصيه قويه..  
قبل الثوره كان عندنا فاروق .. بعد الثوره بقى عندنا فواريق.  
رحم الله الجميع .. ان أصابوا أو اخطأوا.  
و لك الله يا مصر

## الست عصمت

عصمت حسن محسن حسن الإسكندراني .. المولوده لاسره ارستقراطييه في عام 1898م .. رحلت عن دنياها في العام 1973م .. ابوها كان حسن محسن باشا من كبار رجال السياسه في الدولة المصريه و عضو البرلمان المصري عند دائره محرم بك .. و امها عزيزه هانم ابنة الأمير حسن ابن خديو مصر إسماعيل باشا ابن ابراهيم باشا ابن محمد علي باشا .. و شقيقه الجنرال عزيز باشا حسن احد قادة الجيش المصري الذين اشتركوا في حرب البلقان عام 1912م.

كانت أديبه و رحالة مصريه من اصل شركسي عاشت اغلب فترات حياتها في مدينة الإسكندرية حيث عشقت البحر و البحريه منذ نعومة اظفارها فسكنت الى جوار قاعدة رأس التين البحريه تكتب و تؤرخ لتاريخ مجيد شهدته المدينه المناضله في نهضة الاسطول البحري المصري أيام محمد علي باشا .. اشترك جدها الأكبر في حرب القرم ضد روسيا عام 1854م محارباً الى جوار العثمانيين بأمر من خديو مصر عباس حلمي الأول .. حيث كان جنرالاً بحرياً يقود أسطولاً مصرياً قوامه 12 سفينه مقاتله و ما يقرب من 6800 جندي مقاتل ابلى بهم حسناً في مواجهة الروس و وضع الاسطول المصري على قدم المساواه مع كبرى الاساطيل المحاربه آنذاك .. و بسبب ذلك التاريخ المجيد .. نشأت السيده عصمت محبة للبحريه وللأسفار حيث قامت برحلات متتابعة في خلال 18 عاماً استقرت بعدها مدة من الزمن في باريس.

لعبت بنيت بطوليه وبأم البحريه المصريه .. كتبت مقالات كثيرة بتوقيع مستعار في مجلة الثقافة المصريه بالقاهرة في الفتره بين عامي 1946 و 1947 ونشرت من تأليفها عدة كتب و مقالات باللغات الفرنسيه و التركيه و الانجليزيه و الروسيه بالاضافه الى اللغه العربيه .. لها عدة كتب بالفرنسيه تؤرخ فيها لتاريخ البحريه المصريه .. قبل وفاتها أوصت بكل ما تملك من مواد تاريخيه و وثائق عن البحريه الى الكليه البحريه .. كما أهدت إلى الأسطول المصري السفينه الحربيه "مصر" التي شاركت عام 1948م في حرب تحرير فلسطين.

اصل و نسب ارستقراطي مشرف يدفع للتساؤل..

من هو هذا الجد الذي اورث حفيدته كل هذا الحب و العشق للقوات البحريه المصريه "الذكوريه" عادة ؟؟

.....

أمير البحار (الريس زكريا)

=====

عصمت الإسكندراني هي حفيده الفريق أمير البحار .. حسن باشا الاسكندراني .. الذي ولد في انجاسيا "اماسيا حالياً" على مقبره من البحر الأسود باسم زكريا حسن .. زار ابوه مصر عام 1800م في طريقه للحج و بغرض الحاق ولده بالأزهر الشريف للدراسه .. و ثناء الاقدار ان يتوفى الاب في الرحله الى مكه و يكفل الصغير اليتيم زكريا واحد من أصدقاء والده المماليك السلحداريه "صانعي الأسلحه" كان يعمل في خدمه الباشا محمد علي .. اشترك زكريا مع كافلة الجديدي في تلك المهنة حتى عرض يوما ما صنع على محمد علي باشا الذي اعجب بمهارته و جراته و قوته البدنيه .. و قرر الحاقه بالديوان .. فقرر زكريا استخدام اسم والده "حسن" مع لقبه الجديدي "الاسكندراني" .. و عند بداية تكوين الجيش المصري .. اشترك حسن باشا في سلاح المشاه .. حتى قرر محمد علي استغلال نبوغه و الحاقه بعد ذلك بالبعثه التعليميه الأولى التي ارسلها الى اوروبا سنة 1826م ليكون احد الطلبة النوابغ فيها حيث درس علوم الملاحه البحريه و الفنون الحربيه في فرنسا ثم عاد الى مصر ليكمل مهمه كبيره بدأها محمد علي باشا.. الا و هي المشاركة في تأسيس و انشاء اسطول مصري بحري قوى يرفع العلم المصري في المتوسط .. و نجح حسن باشا بالفعل في بناء قاعدة ابو ورده "رأس التين" البحريه و انشاء العديد من ترسانات البحر و احواض اصلاح و صيانة السفن في الاسكندريه .. كما قاد البارجه الحربيه "أحسانيه" و اشترك بها في معركة نافارين البحريه سنة 1827م تحت قيادة محرم بك للأسطول المصري آنذاك.. حيث واجه حسن باشا مقاتلاً الى جوار الاسطول العثماني الحلف الفرنسي الانجليزى الروسى الذى بدأ بإرسال أسطول بحري يوم 20 أكتوبر الى اليونان لاستنزاف قوات إبراهيم باشا المرابطه في المتوسط لاختماد ثورة اليونانيين ضد الحكم العثماني .. حاول الاميرال الانجليزى ادوارد كودرينجتون استدراج قوات ابراهيم باشا في معارك جانبيه دون الدخول في مواجهه مباشره .. حيث كان الأنجليز وقتها – صدق او لا تصدق – يحسبون الف حساب لقوة الاسطول المصري .. و إجبارة على إخلاء جزيرة بيلوبونيز اليونانيه .. و بالرغم من خسارة الاسطول العثماني (و المصري و الجزائري بالتبعيه) لتلك الحرب .. الا ان معركة نافارين تعتبر واحدة من المعارك البحريه التي غيرت مجرى التاريخ و غيرت مواقع الكثير من القوى المعروفة آنذاك و وضعت اسم الصاغ المصري "آنذاك" حسن باشا الاسكندراني الى جوار كبار القاده البحريين في التاريخ.

توفي الفريق حسن باشا الاسكندراني في عام 1854م اثناء حرب القرم .. لدى توجهه الى اسطنبول لصيانة بعض السفن .. حيث اصطدمت سفينته "مفتاح جهاد" و سفينه رفيق دربه محمود شنب باشا "البحيره" بصخور البحر الاسود .. و كما ترافقا في الشباب معاً في رحلة العلم و العمل رحلا عن الحياه غرق معاً ايضاً .. و كما ولد حسن باشا في البحر الأسود يشاء الله ان يموت ايضاً في البحر الأسود .. لتخلد الاسكندريه بعد ذلك اسم واحد من ابنائها الابطال باطلاق اسمه على واحد من اهم الشوارع في حى محرم بك .. كما اقاموا له تمثالاً في حديقته الخالدين على شاطئ الميناء الشرقى .. ما زالت الحديقته و التمثال متواجدين .. لا مجال للحديث عن حالتهم حالياً حفاظاً على مستوى ضغط الدم للقارىء.

.....

على الهامش ..

كلما ابجرت في التاريخ المصري الحديث بحثا عن نقاط مضيئه .. وجدت قاسماً مشتركاً هو محمد علي باشا الكبير..

ماذا فعل باقي حكام مصر من بعد هذا الرجل "باستثناء الخديو اسماعيل" لصالح بلداً يحكمونه كان يوماً في مصاف الدول العظمى ؟؟

.....

تلقت عصمت الإسكندراني علومها في مدينة الاسكندريه .. و تعلقت منذ صباها بالبحر والسفن والأسفار وبمجد جدها أمير البحار وبتاريخ البحريه المصريه ومواقعها الحربيه و أمجاد العرب في المتوسط .. كما سافرت إلى سوريا ولبنان وتونس والجزائر والمغرب والأندلس .. درست

المساجد والقلاع والآثار القديمة كما ترددت على متاحف ومكتبات فرنسا وبلجيكا وسويسرا وغيرها حيث قضت 18 عامًا في رحلاتها الاستكشافية والدراسية .. و في سفرياتها الدائمة كان يطيب لها مشاركة الملاحين والبحارة حياتهم الخشنة في البحر ولم تستهوها بواخر الترف ورحلات البذخ.

استقرت عصمت بعد ذلك في باريس للبحث وكتابة التاريخ العربي .. ونشرت بالفعل مقالاتها في الصحف الفرنسية عن التاريخ العربي و الاسلامي وأمجادها .. كما تعرفت على المستشرق الفرنسي الشهير كريستيان شيرفيس الباحث في المخطوطات العربية و صاحب الكتاب الأشهر "نابليون و الاسلام" .. و الذي لاحظ شغفها بالآثار والرحلات ففتح لها مكتبته على مصراعها تستقى منها ما تشاء من مراجع و مخطوطات نادرة وأشار عليها أن تكتب تاريخ بلادها بعدة لغات.. كما اطلق عليها لقب "بنت بطوطه" .. و هو اللقب الذي رافقها حتى وفاتها.

اثناء وجودها في باريس .. أعلنت جريدة ماثان الفرنسية عن مسابقة ثقافية للكتابة التاريخية عن أشهر المعارك الحربية الفاصلة.. تقدمت عصمت للمسابقة وكتبت عن أكثر من موقعة حربية خلدت التاريخ العسكري المشرف الاسلام و المسلمين مثل حطين وعين جالوت وموقعة شريش (وادي لكه) التي أعلنت فتح المسلمين للأندلس لعدة قرون .. و فازت بالجائزة الأولى و كانت قيمتها 500 فرنك فرنسي.

عادت عصمت في اربعينات القرن المنصرم إلى مصر و بدأت الكتابة في الصحف والمجلات العربية .. و مع بداية حرب فلسطين بدأ دورها النضالي في الظهور .. حيث كانت تشحذ الهمم وتنادي إلى ضرورة مناصرة الشعب الفلسطيني والوقوف إلى جانبه ضد الصهيونية العالمية .. وقامت بالتبرع بسفينة حربية كاملة مجهزة على نفقتها الخاصة "السفينه مصر" و أهدتها إلى القوات البحرية المصرية .. كما أهدت منزلها الواقع في منطقة رأس التين "المنزل الذي اهداه محمد علي باشا إلى جدها حسن باشا الاسكندراني" إلى القوات البحرية ليكون ناديًا بحريًا ووهبت جميع ممتلكاتها من عقارات وأراض زراعية وما لديها من اموال في وصيتها بعد وفاتها للكلية البحرية المصرية .. تأثراً بتاريخ جدها المجيد و مساهمته منها للنهوض بالأسطول المصري ليقف على قدم المساواه مع أكبر أساطيل العالم.

.....

من كتبها التاريخيه ..

-أحاديث تاريخية .. نشر سنة 1940م

-من تاريخ هارون الرشيد والبرامكة .. نشر سنة 1943م

-فينيقيا .. نشر سنة 1945م

-صفحات من تاريخ البحرية المصرية .. نشر سنة 1947م

-معركة نفاارين .. نشر في 23-يوليو-1960م

-بطولة قرصان .. نشر سنة 1952م

ولها كتابان آخران لم يحالفهما الحظ للنشر .. هما "مذكرات تكميلية" و "سيف الدولة".

.....

لم تكن عصمت الاسكندراني مجرد كاتبة و مؤرخه و اديبه .. بل ساهمت ايضاً منذ إنشاء الكلية البحرية في تشجيع الشبان المصريين المثقفين على الالتحاق بالكلية ليكونوا ضباطا في أسطول مصر الذي تعتز به كل الإعتزاز لما أحرزه جدها أمير البحار من إنتصارات تاريخيه عظيمه .. و زودت مكتبة الكلية بكثير من المؤلفات و الكتب العلمية القيمة في علوم البحار .. و لها الكثير من المؤلفات عن تاريخ البحرية المصرية و المواقع البحرية التي إنتصرت فيها مصر بإسطولها القديم .. و قد وضعت هذه المؤلفات بأكثر من لغة كما أنشأت مكتبة قيمة أخرى لضباط القوات البحرية و تعتبر هي الأكبر من نوعها.

لم تكف عصمت بالمشاركة المعنويه و الماده التاريخيه فقط .. بل كانت ترعى شئون الطلبة و تعتبر نفسها أم لكل البحرين المصريين .. كما كانت تساهم في تسديد مصروفات الدراسه للطلبة المعسرين .. كما خصصت بعض الجوائز و المكافآت السخية لأوائل الضباط الخريجين كل عام .. و إشتكرت فعلياً في إنشاء المتحف البحري و قامت بتزويده بكثير من النماذج البحرية و الوثائق التاريخية و اللوحات الزيتية لأهم المعارك التي خاضها الأسطول المصري.

و نتيجة لافضلها الجمه على البحرية المصريه .. في عام 1955م قرر الرئيس جمال عبد الناصر منحها وسام الكمال الذهبي .. و اصبحت لقبها الرسمي .. أم البحرية المصرية .. و للأسف لم يسلم الوسام من ايادي اللصوص الذين سرقوه من بيتها بعد ان رأوا فيه مجرد قطعة ذهبيه .. فأهدى إليها الرئيس عبد الناصر وساماً آخر في الاحتفال بيوم البحرية المصريه و إنشاء المتحف البحري بالإسكندرية في 29 أغسطس عام 1960م .. و في يوم 21 مارس من كل عام "يوم الأم" كان يزورها في منزلها كبار ضباط السلاح البحري وطلاب الكلية البحرية و يقدمون إليها باقات الورد و الهدايا الرمزية .. و هي تقص على مسامعهم الأمجاد العربية في البحار وكيف كان الأسطول المصري عام 1840م ثالث أقوى أساطيل العالم بفضل جنوده الشجعان.

عاشت عصمت الإسكندراني ايامها الأخيرة في عزبتها الخاصة بشبراخيت "بحيره" حتى رحلت إلى الرفيق الأعلى في هدوء تام في نوفمبر من العام 1973م .. و بعد ان شاهدت و سمعت اخباراً جيده عن اقتحام القوات المصريه لخط بارليف.

.....

الكلمات التالية كتبها عصمت الاسكندراني في مقدمة كتابها معركة نفاارين .. الذي نشر في عام 1960م.

"تحتاج البلاد إلى جنود، وإلى جنود قبل كل شيء، جنود يُطيعون ليستطيعوا أن يقودوا، ويقودون ليستطيعوا أن يخدموا، ويخدمون ليموتوا في الخدمة التي يؤمرون بها، فإيا شباب اليوم كيفما تكن مراكزكم، سواء أكنتم فلاحين في الحقول، أم عمالاً في المدن، أم طلبة في المدارس والجامعات، تعلموا أن تخدموا في الجيش جنباً إلى جنب في ظل المساواة، فخوبين بأنكم جنود تتعلمون السلاح، إن أجمل تراث لذريتكم هو أن تسقطوا كما سقط أسلافكم في ميادين الشرف بالبر أو البحر، في سبيل عظمة الوطن، وإذا كان بينكم أنتم المغمورون في الجماهير من لا يزال متعياً عليهم أن يدعوا إلى الخدمة في البحار، ويشعرون بأن يد القدر تدفع بهم إلى المحيط حينما يخدمون البحرية العربية، بحريتنا، فليخرج

هؤلاء من صفوفكم، وليأتوا إليّ لكي أسمعهم قصة معركة نفارين."

.....

عصمت الأسكندرانى .. انسانه مصريه المولد و الهوى .. حملت فى قلبها تاريخا مشرقاً و حبا لهذا الوطن عبرت عنه بكل ما ملكت من علم و مال.  
عصمت الأسكندرانى "مواطنه مصريه شريفه" بحق .. رحمه الله عليها.

سؤال ختامى (للعلم و ليس الاستنكار) ..

اين الكتب و المخطوطات التى تبرعت بهم السيده عصمت لمكتبة البحريه ؟؟

.....

المصادر

-الاعلام .. خير الدين الزركلى

-الجيش المصري فى الحرب الروسية المعروفة بحرب القرم .. عمر طوسون

-تاريخ البعثات المصريه الى اوروبا .. عبد الحكيم عبد الغنى قاسم

-الجيش المصري البري والبحري.. الأمير عمر طوسون

-البحرية المصرية من محمد علي للسادات 1805 – 1973 .. عبده مباشر

-تاريخ البحرية المصرية .. جميل خانكي

.....

## السقا.. لسه مماتش

في حد في مصر ميعرفش التمثال ده الموجود في ميدان لاطوغي ده؟ الحكاية وما فيها ان سنة 1869م. في عز أيام الخديو المفلس أبو السباع.. طق في دماغه انه يخلى مصر حته من أوروبا.. حكينا في الليلة دى قبل كده وملوش لزمه التكرار.

أبو السباع زى ما عمل قصور وعمارات واوبرا وحفلات.. قرر كمان يعمل تماثيل زى بتاعة بره.. ايشى واحد واقف لوحده.. وايشى واحد راكب على حصان.. واللى ببص على الشعب بقرف.. حاجات زى كده.. منها منظره لما تزوره صاحبتة الفرنساويه اوجيني ومنها سبوبة يرزق منها فنانون أوروبا.. معلش.. غلابه من اليابان على رأى الولية بتاعة تعبانة والله تعبانة. طيب نعمل تماثيل لمين يا جدعان؟

شوفولنا حد ينفع.. ماهو مش معقول نبقي في مصر ام الدنيا الى فيها تماثيل العظيم رمسيس والمحارب تحتمس والجميلة نفرتيتي والمؤمن اخناتون.. وفي الاخر نعمل تماثيل لنابليون مثلا.

- شوف حضرت افندينا.. احنا موش لازم اعمال زى أوروبا.. احنا اعمال فنون مصرية.. شخصيات مصرية..

- ايفيت.. رموز مصرية.. حضرتنا يحب الرموز.. اعمالوا تماثيل رموز.. مصر في كتير رموز

- طمام افندينا.. طمام..

واستقر الكلام على الرمز ده.

بس الحق يتقال..

لو اتكلما عن الرجولة والصاحب المجدع.. يبقى هو الرجل ده.

لو اتكلما عن الالتزام والانضباط.. يبقى هو الرجل ده برضه.

حقيقي كان راجل شديد وجدع ويفدى صاحبه بروحه.. انا بتكلم عن الشخصية الحقيقية طبعا مش صاحب التمثال.. صاحب التمثال.. سقا غلبان ملوش في التور ولا في الطحين.. الشخصية الحقيقية.. بسم الله الرحمن الرحيم.. يبقى محمد باشا لاطوغي "لاظ أوغلى" اللهم احفظنا وسلام قول من رب رحيم.

حدوته التمثال ده زى ما حكاه امين باشا سامي في كتابة الطخين تقويم النيل.. ان احمد باشا الدرمللي محافظ مصر وقع في حيص بيص لما الخديو اسماعيل طلب منه تماثيل يخلد سيرة لاطوغي باشا.. الرجل قلب الدنيا يمين وشمال.. سأل المعارف ومعارف المعارف عن صورة وللا رسمه للرجل.. ملقاش خالص.. محدش معاه ولا اى تصويره للرجل.. ولا حتى سفاراتنا في أوروبا.. 3 سنين بيدور لما ورم.. فيبيبيبين لما صاحبة اسعد باشا ثابت دخل عليه بواحد سقا وقاله هو ده يا دولت الباشا.. الرجل ده شبه لاطوغي باشا صاحب جدي الخالق الناطق.. شوبة زنجفه وهدمه نظيفة.. يربي دقنه ونعلمه ازاى يكشر.. وام لاطوغي نفسها هتتلخبط فيه.. نبعتة بعدها لأفريد جاكمار يقيم بيه التمثال.. وكفى الله السياسيين شر الكذب والعياذ بالله.

ولبس الخديو ومصر كلها العمه وهما واقفين يحياوا التمثال وصاحبه.. رمز مصر.. محمد باشا لاظ أوغلى.

التمثال اتحط مكان القبة القديمة الى كان مدفون تحتها لاطوغي باشا في ميدان الناصرية.. الناس كانت بتعدي على القبة – ولحد دلوقتي – وتطلع تجرى من كتر الرعب.

أصل الموضوع كبير اوى سعادتك..

لاطوغي وصل مصر سنة 1801م كعسكري ضمن امدادات الارناؤوط الى هتجارب الفرنسيين.. لما وصل كان محمد على اترقي وبقي نائب رئيس الفرقة.. الاتنين اترك زى بعض.. هما الاتنين بيكرهوا المماليك كراهية العمي.. هما الاتنين خبث وقسوة لو اتوزعت على الكوكب.. هتفيض.. طبيعى جدا الاتنين يبقوا أصحاب.

مؤرخ زى الرافعي ذكر كام سطر كده عن قصة حب عنيفة بطلها لاطوغي وبنت مملوكية.. المماليك كانوا وصلوا مرحلة من الاستعلاء انهم بيرفضوا جواز بناتهم الا من المماليك بس.. المملوكية رفضت لاطوغي وهو تانى اقوى راجل في البلد واتجوزت صعلوك مملوك.. لا لشيء الا ان لاطوغي تركي.

لاطوغي بذكائه أدرك ان هو ومحمد على توأم التنين.. كل واحد فيهم لوحده ضعيف.. مكانه الصحيح في الظل ورا محمد على.. محمد على يبقي المخ وهو العضلات.. ظهرت العلاقة دى لما محمد على جاب اخره من المماليك.. قام لاطوغي بخ فودنه.. يا باشا الصباغ الى يوجعك.. اقطعه.

ابليس قعد يسمع خطة المذبحة بانهار.. وقف يوم الجمعة يتفرج على الباشا وهو بيقطع رقاب اكابر المماليك في القلعة ووراه لاطوغي بيتفرج في براءة.. بينما عساكره طابحين في باقى المماليك في ربوع مصر.



خرجوا الاثنين من المذبحة منتصرين.. لعبة السياسة عجت لاطوغي.. مسك وزارة المالية ومن بعدها الجهادية "الجيش" لحد ما إبراهيم باشا ظهر.. سابه مكانه واكتفى هو بنظارة النظار.. رئاسة الوزراء يعني.

لاطوغي كان مثال للصديق الجدع بجد.. لما قدر أحمد طوسون انه يقفش مفاتيح المدن الى وقعت في ايده من العيال بتوع آل سعود.. بعثهم لأبوه في مصر علشان يزودله المصروف.. افندينا شحن المفاتيح على إسطنبول مع مملوك من رجالته اسمه لطيف.. ويظهر كده ان لطيف ده قدر يلف حوالين مولانا السلطان.. فالسلطان اتبسط منه وخلاه باشا واداله كمان لقب ميرميران.. يعني أمير الامراء.

ومحمد على ميعرفش الحدودة دى.

طوسون اتزق في السعودية.. يظهر اقامته خلصت وكفيله غضب عليه.. الحقنى يا دادى.. لم الباشا رجالته وشد الرجال علشان يربهم "خير ما عمل وربنا".. ساب البلد في ايدين متخرش الميه "لاطوغي طبعاً".. وسافر وهو مطمئن.

مين بقي معجبوش الحال ده؟

لطيف باشا..

لطيف باشا محمي من السلطان.. ازاي يسمع أوامر واحد تركي زى لاطوغي.. هوب الاثنين وقعوا فبعض.. هوب لاطوغي حطه في دماغه.. هوب رسملة خيه بنت حرام وقع فيها لطيف زى العبيط.. وكانت النتيجة ان لاطوغي احكم الحبل حوالين رقبتة وبعث لأفندينا يقوله ان في عيل سيس هنا حب يعمل عليك انقلاب.. نعمل ايه يا كبير؟

ال يعنى مش عارف.

لطيف باشا لما شاف لاطوغي قصاده.. ركع على رجله وقال برعب الدنيا "عرظنداي لاط باشا".. يعنى في عرضك يا لاطوغي.. بس على مين يابا.. لاطوغي دبجه بالراحة زى الخرفان.. منها يتألم زيادة ومنها يتشفى فيه وهو بيموت بالبطين.

ديشيليون عصفور بحجر واحد..

كسب رضا الباشا.. خلص من غريم محتمل.. فلوس بالهبل قلبوها من بيت الراجل.. ورسالة قوية اوى للسلطان والكل ان احنا خدامين السيادة اه.. بس الكرسي بتاعنا.. محاسيبكوا اه.. بس ابعدوا عن الكرسي.. وكله بالأدب والأصول واحنا لسه بصحتنا اهو ومحدث ببصرف علينا.

عمل ايه لاطوغي تاني في مصر؟

افتكس فكره بنت حرام..

احنا ليه منعملش جهاز امنى زى العسس كده؟

جهاز يكون كله بصاصين وجواسيس من الشعب على الشعب.. لازم نعرف دبة النملة علشان نأمن الكراسي.. كده كده المصريين رغاين.. ده يبص وده يتكلم.. نرعي قرشين لده ونقبض على ده وننفخه.. واهو كله علشان الأمن والأمان.

واتحول الشعب الخائف الى بصاصين على بعض.. بحجة الأمن طلق لاطوغي ايدين الشرطة في الشعب لحد ما وصل الأمر بعسكري منهم انه حاول يعتدى على طفل في خرابه في نهار يوم 19 رمضان سنة 1816م. لولا ان الواد كان معاه موس حامي حرم بيه العسكري من اعز ما يملك.. كان الواد انكسرت عينه وبقي انا كعاطف اتبسطت.. الجبرتي حكي الحكاية دى في الجزء الرابع وهو مبسوط اوى.. يموت في المصابيب الجدع ده.

ودي كانت بداية جهاز مباحث أمن الدولة.. أبو سمعة غنية عن كل تعريف.

مؤسس الجهاز الحديث هو اللواء سليم زكى.. حكمدار القاهرة سابقا.. انما الفكرة الأمنية نفسها فكره لاطوغليه بحتة.

وبعد 150 سنة ما زال تمثال لاطوغي قائم في نفس الميدان.. ميدان أمن الدولة.. صنيعة ايده.. ما زالت جثته في مكان مجهول تحت التمثال بتسمع صراخ المعذبين على ايدين الزبانية وتشهد على ظلم الأبرياء المحبوسين في مقابر الجهاز ده.

يا تري لاطوغي لما بيسمع صراخ الناس دى.. بيقول ايه للملائكة الى واقفه فوق نافوخه؟

اتصدمت الحقيقة لما زرت متحف الشرطة في القلعة ولقيتهم حاطين في لوحة شرف الشرطة صورة الجدع ده كمؤسس للجهاز.

ويقولك رموز مصرية.





## شفا وخمير

كنت ناوى اكتب مقدمة تاريخية عن العرقسوس وذكرياته وفوائده الطبية.. بس لقيت ان الكام ماسخ لأن الطب مش مجالي ولا بحبه .. فقلت نخلينا في التاريخ أحسن..

بمحض الصدفة كنت بفر في عجائب الآثار بتاع الجبرتي.. خلاص.. آخر صفحات الحملة الفرنسية القذرة بتتقفل.. اتجمعوا كلها في اسكندرية ويبيعوا كل ما استولوا عليه بالسرقة من مجوهرات وملابس فخمة وجواري وعبيد.. المركب تيجي ورا المركب تحمل كلاب الفرنسيين وتشد على تولون.. رؤوس الفرنسيين في الأرض مع انتشار عسكر الانجليز الى ذلهم في أبو قير.. المصريين كانوا أكرم من اللازم في اتفاقيات ترحيل العسكر.. مال ابونا احنا ومال نفقة علاجهم وسفرهم واكلهم وشربهم على المراكب.. مالنا احنا بتكلفة نقل متعلقاتهم او تأمين سفر الخونة الى سافروا معاهم زى برطلمين والمعلم يعقوب وباقي فرقة الكلاب دى!!!

ساعات كتير بحس ان الى بيعمل اتفاقيات مصر السياسة ماهو الا درويش او حد عبيط فعلا.. مفيش حد بيتنازل كل هذا الكم من التنازلات ولا بيستجده مع الى دبحوه بالشكل ده الا لو كان عبيط.. الأنبياء نفسهم موصولش لهذه الدرجة من التسامح لسبب بسيط جدا.. لأن ده مش تسامح.. ده اسمه عبط.

الجبرتي بيوصف كل ده وفي الخلفية تحس انه بتقرأ "مصر اليوم في عيد" بخط جميلة الجميلات.. الراحلة شادية.

لورجعنا بالذاكرة 3 سنين بس لوراء هنتكر ان مصر كانت راقدة تحت حكم العثماني يوم ما وصلوا الفرنسيين.. مش هنقول انهم دافعوا عن مصر وحموها من كلاب أوروبا لأن ده محصلش الا في عصور القوة بتاعتهم.. ولكن مش هنقدر نقول انهم خذلوها برضه.. لأن السلطان سليم الثالث بعث فعلا فرقة عسكرية تدافع عن مصر.. فرقة كان نائبها الألباني الذئب.. القرعة أبو مخ يوزن كوكب الأرض.. محمد علي.

الحملة عملت الى تقدر عليه.. حصل الى حصل بقي.. المهم ان الفرنسيين خرجوا.. طيب مين يحكم مصر؟

المنطق يقول ان الشعب في حالة ثورية غير مسبقة امتدت من أيام على بك الكبير.. الشيخ السادات والشيخ الشقراوي والشيخ الجوهري وباقي مشايخ الأزهر اساميهم بترن في الأذان ويقف لها الناس احتراما.. عمر مكرم عامل عند الناس حالة من التيه والغرام والافتتان.. اعتقد انه لو كان حلق شعره كابوريا وللا لبس العمه بالعكس.. كانت الناس هتقلده وتعمل زيه.. توقعت بالهداوة كده وبالراحة خالص ان عمر مكرم ياخذ بعضه ويروح على بيتهم.. يلم عزاله هو ومراته من سكات ويطلعوا الاتنين على قلعة الجبل.. يدخل يقعد ويبدأ مع مصر عصر جديد بعيد عن كل أنواع الحكم الزبالة بتاع العساكر ده.. خلاص بقي.. المصريين فاقوا أخيرا وعرفوا انهم بنى ادمين والله مش كلاب.. على رأى عم نجم..

مفيش عساكر وقهر تاني  
كل الاماني بقت حقائق.  
مش ده المنطق يا ناس!!!  
اه هو.. بس طالما هو ده المنطق.. يبقى ميمشيش في مصر.. حاجه تثير الجنون حرفيا.  
الناس خرجت للشوارع تهتف "الله أكبر.. انتصر السلطان.."  
سلطان!!!  
سلطان!!!  
سلطان يا ولاد الكلب!!!  
يكونش قصدهم سلطان بتاع العيال كبرت!!  
يهد حيلكوا ربنا ..  
بقي دمكوا الى ملو الشوارع ونسوانكوا الى اتبهذلت وعيالكو الى اتيتمت وفلوسكو الى اتسقرت ومشايخكو الى جتتهم اتهرت ضرب ومهانة ونسوانهم اتعرت في الشوارع.. بناتكم الى كنتوا بتخيطولهم فتحات الفروج من تحت علشان تحصنوههم ضد اغتصاب الفرنسيين وتفضل الواحد منهم هتموت بالتسمم علشان مش عارفه تخش الحمام.. شباب المجاورين والفتوات ومصطفى البشتيلي واحمد المحروقي.. الأزهر الى دخلوه بالخيول ومكتبته الى اتحرقت.. وفي الآخر.. انتصر السلطان!!!  
سلطان مين يا ولاد ال..  
يا ديني ..  
ده انتو سنين الاحتلال مش بس زرعت في نفوسكم الذل والهوان.. ده انتوا اتمسخت ضمائرکم وفطرتکم نفسها واتحولتوا الى كائنات من بتاعة تحيا مصر الى بيرقصوا عند اللجان دول.. يمكن هما اهون منكم شوية.  
خضع المصريين بعد خروج الحملة بهدوء تام الى والي عثمانلي جديد اسمه محمد نصوح باشا.. ولا كان كان في حملة ولا غزو.. ولا كان كان في حراك شعبي ولا ثورة.. ولا كان بلاق كانت بتولع وكوبري الليمون كانت جهنم.. لا كان مراد بيه مات بالطاعون وهو بيتهمز للمرة الألف ولا كان عثمان البرديسي اشتغل مع الفرنسيين ولا كان محمد بك الألفي كان جاسوس انجليزي.. وكان ثورة لم تقم في مصر.. رجع كل شيء لأصله والواجبات العثمانية رجعت تاني تبلطج على الخلق.. مش عارف جالهم اى وش ولا بأى عين كانوا بيعملوا كده وهما انكشفوا على حقيقتهم.. لصوص حرامية مش اكثر.. ميفرقوش حاجه عن عسكر الفرنسيين اللهم الا ان دول مسلمين.  
في عز ما الجبرتي بيوصف حالة مصر وفرجة الناس بخروج عسكر بونا برته.. حكي الموقف ده..

"وفي ذلك اليوم -14 يوليو 1801م- وقعت حادثة وهو أن شخصاً من العسكر بالجمالية شرب من العرقسوسي شربة عرقسوس ولم يدفع له ثمنها فكلّم العرقسوسي القلق الانكشاري فأحضره وأمره بدفع ثمنها ونهره وأراد ضربه فاستل ذلك العسكري الطبنجة وضرب ذلك الحاكم فقتله وهرب الى حارة الجوانية ودخل الى دار وامتنع فيها وصار يضرب بالرصاص على كل من قصده فقتل خمسة أنفار ومر شخصان من الأرئود بتلك الخطة فقتلها الانكشارية لكون الغريم أرئودياً من جنسهما فلما أعياهم أمره حرقوا عليه الدار فخرج خارجاً من النار فقبضوا عليه وقتلوه ومات تسعة أشخاص في شربة عرقسوس".

عسكري أرناؤوط من عسكر اوجاق الجمالين.. الجمالة يعني.. مشي في الشارع.. شرب عرقسوس ومش عايز يدفع.. ينتهي الأمر بقتل 9 افراد  
علشان خاطر كوباية عرقسوس!!

9افراد!!

ليه يعني.. هو في ايه؟

ايه الى صاب الراجل خلاه يتجنن بالشكل ده ويتعامل على انه فوق الكل ويعمل اعتصام يقتل فيه الراج والجاى؟

ايه الى صاب عسكر الانكشاريه خلاهم يتجننوا ويقتلوا اتنين لمجرد انهم اخوان زى المحاصر ويحرقوا البيت بالراجل؟

ايه الى كان فداغ الجبرتي وهو بيحكى موقف زى ده؟

هل كانت الحسرة؟ القرف؟ التعجب؟ الاندهاش؟

هل كان الجبرتي مش مصدق ان لسه عسكر الوجاقلية والانكشارية ليهم عين بعد ما اتفضحوا كل الفضائح دي.. علشان يقتلوا من تاني ويبلطجوا

من تاني ويسرقوا من تاني؟

هل كل ده بسبب كوباية عرقسوس وللا بسبب حكم العسكر؟

انت وضميرك بقي..

## غادة رشيد

- انا يا أستاذ.. انا يا أستاذ  
- قول يا احمد  
- يتفرع نهر النيل من بداية الدلتا الى فرعين.. فرع دمياط وفرع رشيد.. وتتميز الدلتا في مصر بخصوبة الأراضي ووفرة المياه الملائمة للزراعة.. لذلك قال عنها المؤرخ العظيم هيرودوت.. مصر هبة النيل.  
- برافو.. سقفوله.  
كنت صاروخ في الجغرافيا والتاريخ في المدرسة على فكرة.. كنت بحفظ الكتب عن ظهر قلب زى أسمي.. عمري ما سألت عن دمياط ورشيد دول.. طول عمري اعرف انهم فرعين النيل وخلاص.. لحد ما دخلت الاعدادي كنت فاكر ان رشيد لسه فيها الممالك بيحاربوا حملة فريزر.. ولما كبرت شوية وأختي اتجوزت عرفت ان دمياط هي مركز صناعة الخشب والموبيليا والمشبك في مجرة سكة التبانة.. عرفت دمياط وزرتها كذا مره.. لكن فضلت رشيد برضه مجهولة.. ملهاش ذكر اطلاقا الا في كتب الدراسات الاجتماعية في المرحلة الابتدائية أو في دنيا الأدب في رواية الشاعر على الجارم "غادة رشيد".  
حتى لما عادل امام عمل فيلم رسالة الى الوالي وظهر فيه بطل الفيلم الفارس حروفش بن برقوق الراكبدار بتاع النسوان.. كانت بدايته من رشيد.. قلت أخيرا اهو هنشوف حاجه عن رشيد أهو.. لقيتهم جايين اسم محافظ رشيد غلط "اسمه الحقيقي على بك السلانكي مش السلانكي" والتصوير تم في القاهرة ولا أي ذكر عن رشيد خالص.  
يا اخوانا.. يا ناس..  
رشيد تبقي مدينة مصرية.. فيها 37 أثر ولها تاريخ عظيم جدا.. فيها ناس عايشه محتاجة نظرة يا حكومة بدل ما يطلبوا حق اللجوء السياسي لإيطاليا اوعدنا يارب اللهم اجمعين.. فيها بوغاز بيطلع منه مراكب هجرة غير شرعية شايه شباب صغير كله أمل وطموحات انه هيروح أوروبا وبقي النمر الأسود موخاماد خاسان او يشتري مطاعم توسكانيي ويتجوز مزه أوروبي زى القمر ويرجع يغيب ايمان وام فرحات جارتهم.. بس للأسف اقلبه بيتحول الى وجبات لأسماك المتوسط.. خدي بالك من رشيد يا حكومة.. على الأقل كرامه لبطولات أهلها قصاد حملة فريزر سنة 1807م.  
او كرامه لزييدة بنت محمد عبد الرحمن البواب الميزوني..  
غادة رشيد.  
\*\*\*\*\*  
لما تفتح كتاب الجبرتي وتقرأ عن حملة الفرنسيين على مصر هتتحس ان الموضوع كان أكبر من كونها مجرد حملة عسكرية جت قعدت 3 سنين ومشيت بعد ما اتقتل واحد من أهم قوادها.  
هتتحس ان الموضوع أكبر من شوية لصوص جت مصر علشان تسرقها وتفرض على شعبها غرامة مليون فرنك بينما السلطان العثماني كان بيحفي علشان يطلع منها 300 ألف ومعرفش.  
الموضوع أكبر من جيش متطور وممالك خونة وشعب مقهور وقصص بطولات وملاحم شعبية.. الموضوع أكبر من نابليون ومراد بك وإبراهيم بك وعمر مكرم ومحمد على ونفيسة البيضاء ومصطفى البشتيلي واحمد المحروقي والشيخ الجوهري والشيخ السادات.  
الموضوع يا سادة ان نابليون جه مصر علشان يوسع فرنسا.. يزود مساحة فرنسا.. يبني المجد لفرنسا.. بونابرتة كان معاه خطة عظيمة وطموحة جدا لبناء مستعمرة فرنسية في الشرق تقطع خطوط التجارة بين أوروبا وآسيا وتتكبد على اعداؤه الانجليز ليل ونهار كل ما يفكروا بيعتوا او يستقبلوا حاجه من الهند.. كم العلماء والباحثين والأطباء والصنایعية المصاحب للحملة يقول ان نابليون مكانش جاي مصر ياكل عيش ولا جاي في سلام ولا جاي يخلص مصر من الممالك زى ما قال.  
الراجل ده جاي علشان يقعد ويطول.. ما علينا انه دخل البلد بالحنجل والمنجل والمسكنة.. العين الحمراء ظهرت وقت اللزوم.. مفيش حد بيتحرك بجيش معاه كل السلاح ده وكل الجنرالات دى الا لو كان ناوى على الشر.  
والشر بدأه فعلا نابليون..  
والشر طال صاحبة كبير..  
كبير الحقيقة كان قليل الأدب ورذيل اوى.. معندوش احترام للناس ولا هو كلمنجي ولسانه طليق زى مديره ولا هو اساسا كان مقتنع أساسا بجدوى الحملة مصر.. فضل يطلع زهقه علينا ويستفز في الناس ويقل ادبة على الخلايق لحد ما فلتت أعصاب سليمان الحلبي وراح مناولة بالسكينة فمنطقة حساسه جاب اجله علطول.  
احسن.. يستاهل.. ده كان راجل وسخ.  
جميل.. مين بعد كبير بقي يمسك الحملة الى نابليون سابها غرقانه وهرب دى؟  
الجنرال جاك فرانسوا مينو.. حاكم رشيد.  
العقل يقول ان القيادة دائما للأصلح.. الأقوى.. الأذكى.. الأشجع.. اى حاجه حلوة يعنى تميز القائد عن باقي العساكر..  
مش كده؟  
اه.. بس مش ده الى حصل في الحملة الفرنسية على مصر.. يبدو ان عندهم وسايط برضه وتوريث وبيروقراطية وحاجات كده.. الى حصل ان مينو مسك قيادة الحملة وهو واحد من أسوأ جنرالات فرنسا.. لا لشيء الا انه أكبر الجنرالات سناً.. أقدمية يعنى.. في العسكرية الأقدمية طبعاً لها اعتبار.. لكن مش في القيادات.. الى بيحصل في الجيوش ان القيادة لازم تكون متنقيه على الفازة.. ولو هي جيبوا قائد لجيش مثلاً وفي أكبر منه سناً في الخدمة لسه.. يقوموا بحيلوا الكبير ده للتقاعد علشان ميقاش في قفش.. المهم ان الكوماندر يبقى شخص غير عادى.

الموضوع طويل ومتشعب.. نكمل بكرة ان شاء الله

قلنا ان الشرف في مصر بدأه نابليون..

اختفى الوجه الناعم والكلام المعسول والإيمان إلى كان يبخر من لسانه مع أول خلاف أو قلق من جهة المصريين.

والشر إلى بدأه نابليون طال صاحبة كبير لما زود في قلة الأدب وتعتمد بهين الشيخ السادات ويضربه على رجله وهو ابن الاكابر الأشراف.

كبير الحقيقة كان زديل بزيادة.. معندوش احترام للناس ولا ديبلوماسية كبيرة.. مش مقتنع بجدوى حملة مصر وعمال يطلع زهقه على الناس ويستفهمه ويقل ادية على الخلايق لحد ما فلتت أعصاب سليمان الحلي بعد افعاله من الشيخ السادات وراح طالع عليه في جنية القصر وهو عامل فيها شحات.. كبير قاله بغطرسه مفيش مفيش.. امشي.. فضل سليمان الحلي متح وهو بيشاور على ايد كبير.. كبير افكره عاوز بيوس ايده.. كبير مدله ايده بكل غرور وكبر.. سليمان مسك ايد كبير بأيده الشمال.. ومن قلب جلايبته الرثة راح مطلع سكينه بنت حلال سلاحها بيضوي تحت ضوء الشمس.. رفع سليمان دراعة اليمين لفوق بالسكينة.. ضوء الشمس انعكس من النصل الاعمع زغلل عيون كبير.. عيون كبير أدركت ان ملك الموت قاعد مستعجل اوى على سن نصل السكين ومفيش اى مهرب من الذراع القوي إلى ماسكه من ايده اليمين.. ملحقش كبير ينده لعساكره ولا يطلب الغوث من كبير المهندسين المعماريين بروتان إلى كان بيتمشى معاه.. سليمان الحلي ناوله بالسكينة فكرشة 4 طعنات ورا بعض منهم واحده مفترية بنت أبالسة جابت اجله.. بروتان حب يعمل منظر كده ويدافع عنه كبيره.. سليمان هوشه ب 6 طعنات لم تكن كافية لإنهاء حياته القذرة.

غار في داهية كبير.. واستشهد وسكن الجنة بأذن الله سليمان الحلبي..

جمیل.. مین بعد کلییر بقی یمسک الحملة الی نابلیون سابها غرقانه وهر ب دی؟

الجنرال جاك فرانسوا مينو.. حاكم رشيد.

العقل يقول ان القيادة دائما للأصلح.. الأقوى.. الأذكي.. الأشجع.. اى حازه حلوة يعنى تميز القائد عن باقي العساكر..

مش کده؟

٨٥.. بس مش ده الى حصل في الحملة الفرنسية على مصر.. بيدوان عندهم وسايط برضه وتوريث ويورقراطية وحاجات كده.. الى حصل ان مينو مسك قيادة الحملة وهو واحد من أسوأ جنرالات فرنسا.. لا لشيء الا انه أكبر الجنرالات سنًا.. أقدمية يعني.. في العسكرية الأقدمية طبعاً لها اعتبار.. لكن مش في القيادات.. الى بيحصل في الجيوش ان القيادة لازم تكون متتقيه على الفزارة.. ولو هيجيبوا قائد لجيش مثلاً وفي أكبر منه سناً في الخدمة لسه.. يقوموا يحلوا الكبير ده للتقاعد علشان ميقاش في قفش.. المهم ان الكوماندر يبقَى شخص غير عادى.

امال آزي بقي مينو وصل للمنصب ده؟

مفيش تفسير غير ان جنرالات الحملة رضىت بيه مؤقتا وهو مدهول كده لحد ما فرنسا الكبيرة تبعتلهم جنرال تانى من اللى بيعرفوا.. عموما.. أبا كان السبب والتفاصيل.. الخلاصة هنا ان مينو جنرال هفأ مسك مكان جنرال دموي في وقت الحملة فيه فشلت في تحقيق اى هدف من أهدافها والبلد بتغلى والشباب والمشايخ والفتوات سنانهم حامية أوى على الفرنسييس وكل يومين في ضرب وعركه وخناق وقلق بينما جنرالات الحملة نفسهم تقبلوا وجود مينو على مضض.

يعمل ايه بقى مينو علشان يأمن نفسه؟

قالک انا هتجوز..

ومش أي جواز.. انا عاوز اتجوز بنت مصرية من أسرة كبيره ذات حسب ونسب.. الجماعة المصريين دول بيؤمنوا بفلان ابن فلان وعلان ابن

ترتآن.. یبقی من المنطقی انی لما ابقی جوز بنتهم.. زی ابنهم یعنی.. هینوبنی من حب الحماية جانب.. مش هبقی لوحدی کده فوش الكل.

وبدأ مينو يقلب في "أسر" البلد بحثاً عن عروسة..

خد بالك.. بيقلب في الأسر مش في البنات.. هو فعليا مش ناقص حريم ولا عاوز جواز من أصله.. هو عايز حماية وبس.

انتشر خبر بحث ميتو عن عروسة وأسرت عائلات رشيد تجوز بناتها من شباب مصريين فوراً.. كل ما ميتو يدق باب.. يقولوله معندناش بنات للجواز.. ومنهم على فكرة أسرة الجارم.. اللى ينحدر منها الشاعر على الجارم صاحب رواية غادة رشيد.

ولأن الحلال أجمل سأنتظر فضل رينو يدور على بنت الحلال لحد ما وقع على صاحبتنا دي..

صاحبتنا تبقى زبدة بنت تاجر الأرز المعروف محمد عبد الرحمن البواب الميزوني..

مفیش ناس اتکلموا کثیر عنها وعن سیرتها.. معرفش الحقیقة الشاعر علی الجارم جاب منین انها كانت عذراء ساحرة الجمال والشباب هتموت علیها وکم دلدلقة المشاعر والمحن الی کتبه فی روائته ده.. المتوافر عنها من کذا مصدر انها كانت ست عادیة الجمال جدا ومش آسفة.. دى كانت زوجه لواحد من عسکر الاوجاقیات العثمانیة اسمه سلیم آغا نعمة الله ولسه مطلقة جدید لما شافها منین.. یعنى مأوفتش عده.. ومش بعید کمان تكون نکدیه وبتدى جوزها کیس الزباله وهو نازل وفضلت تقوله رايح فین وجای منین لحد ما زهق وطلقها.

في رسالة من مينو لواحد من جنرالات الحملة يتكلم فيها عن زبدة يقول فيها..

الزوجة طويلة القامة، مبسوطة الجسم، حسنة الصورة من جميع الوجوه، لها عينان رائعتان، ولون بشرتها هو اللون المصري المألوف، وشعرها طويل فاحم، وهي لطيفة الطبع، وجدها تتقبل كثيرا من العادات الفرنسية بنفور أقل مما توقعت، وأنا لم ألح عليها بعد في الخروج سافرة على الرجال، فهذا سيأتي شيئا فشيئا، ولن أنفع بما أباحه التي من الزواج بأربع نساء خلاف السراي، فإن في النساء المسلمات شهوة حارة عنيفة،



وفي زوجة واحدة أكثر من الكفاية".

يبدو كده ان مينو كان مبسوط بيها أوى.. عريس جديد بقي وكده.. حتى ان إجازة جوازهم كانت شهرين غسل مش شهر واحد.  
بس هنرجع تاني نلاقي عبد الرحمن الرافي في تاريخ الحركة القومية بيقول إن مينو لم يقصد زبيدة بالذات، وإنما كانت لديه الرغبة في مصاهرة عائلة تتصل بالسلالة النبوية.

جميلة.. مش جميلة

آنسة.. مش آنسة

كل ده مش مهم.. المهم هنا هو ان ابوها تاجر ومليونير ومعروف.. وهو ده السبب الى جاب مينو لحد عندهم.  
رضخ مينو لكل شروط اسرة الميزوني علشان ياخذ بنتهم.. أعلن اسلامه وسمى نفسه عبد الله مينو.. كع دم قلبه في المهر.. 100 محبوب "كيس"  
كل واحد منها بمائة وثمانين نصف فضة.. مؤخر صداق قيمته 2000 ريال فضة تاخدهم من حباب عينيه سواء اتطلقت او مات وهي في عصمته.. اهو ده بقي عيب الى يروح يتجوز من غير ما ياخده معا.. هيلبس هيلبس.. مش بعيد كمان مينو يكون مضى على الذهب في القايمة.. ماهو خايب.

تم الزواج في مارس 1799م بمراسم إسلامية وعلى يد مأذون واتوفق في محكمة رشيد الشرعية في وجود شهود مسلمين من أكابر رشيد زى العلامة السيد أحمد الخصري المفتي الشافعي والشيخ محمد صديق المفتي الحنبلي والسيد محمد المفتي المالكي.. كل ده موجود في وثيقة زواجهم المعروضة في متحف رشيد الوطني.. لحد النهارده على فكره.  
انتقل مينو للعيش مع زبيدة في بيتها الفخم أبو 4 أدوار والى ما زال موجود لحد النهارده في رشيد يشهد على مكانة آل الميزوني.. مش كده وبس يا معلم.. ده بعد سنة بالضبط من الزواج الميمون شق سكن الليل في رشيد صراح طفل ولید في بيت الميزوني.. طفل اسمه سليمان مراد جاك فرانسوا مينو..

شفت نفسنة الجنرالات؟؟

مينو علشان مكانش بيحب كبير.. راح جاي مسمى ابنه سليمان.. على اسم سليمان الحلبي.  
جنرالات الحملة طبعاً ولعوا منه.. ازاي يهين ذكرى كبيرهم الراحل بالشكل ده.. كبير على فكرة كان نموذج للجنرال الفرنسي.. مكانش مكروه بين اهله خالص.. مينو هو الى كان هفأً وبيكرهه..  
عموما.. كلهم في الكلوبية سواء.

وكسب مينو عداوات زيادة فوق العداوات الى كسبها لما أعلن اعتناقه للإسلام علشان يتجوز زبيدة.  
لويس عوض في كتابة تاريخ الفكر المصري الحديث "الجزء الثاني" بيقول ان مينو – او عبد الله – كان بيعامل زبيدة معاملة سيدات الطبقة الراقية الفرنسية.. اتيكيت بقي وحركات.. يسحب لها الكرسي علشان تقعد.. يمدلها ايده علشان تطلع السلم.. يجييلها مندبل الأكل لو وقع منها.. حاجات المحن الى بتعجب الحريم الخايب دى.. وادعى لويس عوض ان ده كان مفتاح تحرر وتطور المرأة المصرية.. وكالعادة اتهاجم لويس عوض لأنه مزور وبلا أي مرجعية محايدة.. انما كان دائم الاستناد الى هواه الشخصي.  
(الزوج الفرنسي لو سحب الكرسي لمراته علشان تقعد.. يبقى اتيكيت.. بينما الزوج المصري لو عمل كده يبقى ابن كلب.. ايه يعنى الزوج المصري سحب الكرسي لمراته جامد شوية فلما جت تقعد قعدت على الهواء ووقعت!! ذنبه يعنى انه قوى.. مش هنيطل بقي عقدة الخواجة دى!!)  
الثابت في التاريخ ان أيام غسل زبيدة مع مينو مطالتش كثير.. الانجليز والأتراك اتفقوا على وجوب خروج فرنسا من مصر.. ولما تسمع كلمة اتفاق الانجليز مع الاتراك بقي لا تخرج قبل ان تقول سبحان الله والى يقولك الاتراك والإسلام والإسلام والعثمانيين ابقى حط صوايح ايديك في عينيه الاتنين.. الاسطول الإنجليزي حاصر مينو في اسكندرية ووقع مينو في مأزق.. اضطرت زبيدة انها تهرب من رشيد وابنها على كتفها على الرحمانية ومنها الى القاهرة.. عاشت شوية في بيت محمد بك الألفي في الازبكية وبعدين لما الضرب سخن طلعت استخبت في قلعة الجبل في انتظار ما ستسفر عنه الأحداث.

والأحداث اسفرت عن هزيمة مينو وركوبه السفينة ديدون في رحلته الأخيرة للخروج من مصر الى ميناء تولون في فرنسا..

المنطق يقول ان زبيدة تنفضله وترجع بلدهم.. مش كده؟

تخيل كده ايه الى حصل لحد ما ييجي بكرة.

"يتبع"

وقفنا بقي في اسكندرية.. مينو مستني زبيدة تحمله علشان يغور من مصر بلا عوده بعد فشل حملة البلطجة الفرنسية.. بمساعدة الجنرال ديزيه وخادمها المصري سرور قدرت زبيدة تلحق جوزها على نفس السفينة بعد مفاوضات كثير.. تخيل ان الانجليز كانوا عاوزين يردوها لأهلها.. وهي مصره تمشى مع جوزها.. ويودعوا الاتنين مصر سوا في الطريق الى فرنسا.

وقفت زبيدة جمب مينو في كل أزماته وأولها مرضه وهو على ظهر السفينة.. لكن مينو مكانش راجل جدد.. اول ما وصلوا فرنسا هو اتعين حاكم على إقليم فلورنسا.. ساب زبيدة لوحدها في مرسيليا بدون اى مصدر دخل ولا إنفاق ولا معاها اى حد الا خادمها سرور.. سابها لوحدها بعد ما استولي على كل ذهبها ومجوهراتها الى قدرت تخرج بيها من مصر.. هو رجع تاني للمسيحية ونفض خالص لزبيدة وابنها.. لم حواليه بنات ورقاصات المواخير الى كان بيسهر فيها كل يوم وعاش حياته بالطول وبالعرض وساب البنية تحرق هي وابنها.. كل ما يهغه الشوق للمزة المصري كان يروح يقضى الليل عندها.. يروح مزاجه ويرجع تاني لشغله الى مسك فيه حكم 3 أقاليم في 5 سنين.. وهي ولا كأنها كلبة.

كل ده وزبيدة ساكنه ومش بتنطق.. مفيش اى اعتراض.

نتيجة سوء سلوك مينو تم طرده من العسكرية الفرنسية واتحرم من اى مركز قيادي.. تراكمت عليه الديون وأفلس بعد ما خلص منه ذهب زبيدة.. بينما زبيدة على وشك إنجاب الطفل الثاني منه.. مينو حب ياخذ الطفل الثاني يعمده مسيحي وكفاية الاولانى الى فلت منه بإسلامه.. زبيدة رفضت وقالت "لا أنصر ولدي أصلاً".. مينو ضحك عليها وجابلها واحد من المستشرقين بتوع مقارنة الأديان اسمه البارون دساسي.. واحد من الناس المطلعة على الدين الإسلامي ولغات الشرق ويملكوا مهارات النصب بتاعة نوال سعداوي وسيد القمني.. عملوا كاشة على الست وأقنعوها ان الإسلام لا يمنع تعميذ الطفل كمسيحي والدليل اهو..



“إِنَّ الَّذِينَ آمَنُوا وَالَّذِينَ هَادُوا وَالنَّصَارَى وَالصَّابِئِينَ مَنْ آمَنَ بِاللَّهِ وَالْيَوْمِ الْآخِرِ وَعَمِلَ صَالِحًا فَلَهُمْ أَجْرُهُمْ عِنْدَ رَبِّهِمْ وَلَا خَوْفٌ عَلَيْهِمْ وَلَا هُمْ يَحْزَنُونَ” البقرة-62

وانطبق الفخ على الست الغير متعلمه.. مقدرتش ترد عليهم طبعاً ووافقت على تعميدها ابنها مسيحي.. مسألتوش مثلاً لما هو عادى كده ومفيش فرق بين كون الطفل مسلم او مسيحي.. انت ليه عاوز تعمده مسيحي؟

مينو أخذ منها الواد واداه لأسرة فرنسية تربية وهو فص ملح وداب لحد ما مات في داهية سنة 1810م.. يعنى ضحكك على البت في مصر.. سيبها أهلها وحالها ومحتالها في مصر وخدها معاه فرنسا.. أخذ منها ابنها الثاني ورماها من غير مصاريف ولا مصدر رزق ببصرف عليها خدامها.. وفوق من ده كله مات ومسابلهاش اى حاجه.. ولا حتى سيرة كويسة تتسند عليها.

ايه بقي حصل لزبيدة بعد كده؟

محدث عارف..

محدث قدر يتوصل لأولادها ولا ليها هي شخصياً.. كلها تكهنات مؤرخين عن انها اشتغلت في الدعارة وتحولت للمسيحية علشان تقدر تعيش في فرنسا.. مفيش أي حكايات مؤكدة عن الست المنكوبة دى الا ما حكاه رفاة الطهطاوي في تخلص الأبريز لما هو راح فرنسا تبع بعثات محمد علي.. حكى عن عودة مينو للمسيحية وقلعه العمامة ولبسه للبرنيطة الفرنسي وتعميد ابن زبيدة الثاني مسيحي.. حكى عن زبيدة كواحدة كده من ضمن المصريين الى شافهم في فرنسا.. غير كده مفيش اى رواية مؤكدة عن زبيدة نفسها.. عاشت فين وماتت ازاى وهل ماتت على الإسلام ام تحولت للمسيحية.. وفين ولادها بالظبط..

محدث عارف.

طيب ايه خلاها تسافر معاه؟

هنقول العرق المصري الطيب في كون الزوجة تمشى ورا جوزها..

طيب ماشى.. مشي وراه وسافرتي.. طلع وسخ وبخيل ورمه وراميك في بلد وهو عايش مع الى زيه في بلد تانيه.. انى عايشه ازاى مع خدامك كده.. مش ده غلط لأنه مش محرم؟

ولما لقيته بالوساخة دى.. مرجعتيش مصر ليه؟؟

اهلك زى ما هما.. عزوه وسند ومفيش أحسن من كده مكان ترجعيله خصوصاً ان الكلب مينو مخدكيش على باريس ولا شفتى ريجتها.. مفيش غير مرسيليا وشوارعها المليانة بروث الخيل.. مش أمله يعنى لو اتقارنت ببلدك رشيد وبيتك الفخم الواسع المليان خدم وحشم.. مفيش أي سبب منطقي او غير منطقي يخليكي تقبلي تكلمي حياتك في بلد لا ليكي فيها حد ولا تعرفي لسانها ولا انتى على دينها أساساً.

مش كده برضه!!

عموماً.. مفيش أي خبر أكيد عن زبيدة بعد موت مينو.. الأكيد بس اننا عرفنا ان مينو كان ابن كلب رمة زيه زى باقى الفرنسيين مش زى ما درسولنا في كتاب المدرسة قبحه الله من انه كان طيب ومسلم وحبیب المصريين.. خلاصة القراءة في تاريخ الحملة الفرنسية انه ان شاء الله لو الزمن لف وقدرنا على الفرنسيين.. يبقى لا تأخذنا بهم رحمة ولا شفقة في ذبحهم كلهم من الأذن للأذن حتى من كان يصرخ منهم رضيعاً.

ربما عاشت زبيدة في أواخر أيامها عيشة ضنك.. ربما كانت بتسرح في الشوارع تباع ورق يانصيب.. ربما كانت بتكسب من بيع الخضار او بيع الخمور او تنظيف اسطبلات خيول أسر النبلاء الفرنسيين.. ربما كانت بتلف على كعوب رجلها طول النهار علشان ترجع البيت آخر اليوم بشوية فرنكات قليلة يا دوب تكفي تمن الساليزون والكرواسون ومفيش لحمه ولا فراخ ولا هبر من بتاعة مصر في أيام العز.. ربما كانت بتقابل الطلبة المصريين الى بعثهم الوالي الألباني الجديد وتقعده تسمع منهم حكاوي مصر المحروسة الجديد.. ربما شحنت فلوس فيوم من حسن الإسكندرانى أو حسين أفندي أو قاسم الجندي.. ربما رقصت في يوم لإبراهيم وهبة والاخبار وصلت لأفندينا في مصر علشان تتسبب في جواب التهزيء الى بعته الوالي الجاد جدا من مصر للأفندية المغتربين في الخارج بغرض تحصيل العلم ..

ربما.. كل شيء وارد..

بس الأكيد انها كانت بتقعده بليل تفتكر نبوءة العرافة الى قابلتها في رشيد وهي طفلة وقالتها "في يوم هتكوني ملكة اكيد يا زبيدة.. الطالع بتاعك بيقول كده"

صحيح.. كذب المنجمون ولو صدقوا ..

وصدق كل من قال ان الفرنسيين ما هم الا مجموعة من اللصوص الدمويين أعداء الإنسانية والحضارة والأديان..

من فرنسا بدأت دعوات الحملات الصليبية القذرة على يد البابا اوربان الثاني..

ومن فرنسا خرجت حملة نهبت اثار وكنوز مصر بعد ما سفكت دماء أكثر من ربع سكان القاهرة..

ومن فرنسا انطلقت الجحافل علشان تعيث في الجزائر والمغرب وتونس فساداً ودموية..

ومن فرنسا انطلقت رسومات كاذبة صورت الفلسطينيين بيقتلوا اليهود بينما العكس هو الى كان حاصل..

وفي فرنسا حالياً جريدة تخصصت في إهانة الأديان وخصوصاً الدين الإسلامي.

في فرنسا حالياً تمثال لشامبليون في مدخل السوربون وهو حائط رجله فوق تمثال رأس أخناتون..

ومن فرنسا انطلقت شائعة سخيفة بتقول ان رمسيس الثاني هو فرعون الاضطهاد عن طريق طبيب باطنه كاذب اسمه مورييس بوكاي

يا فرنسا قد مضى وقت العتاب

وطوبناه كما يطوى الكتاب

يا فرنسا إن ذا يوم الحساب

فاستعدي وخذي منا الجواب

"كلمات من النشيد الوطني الجزائري"

## ليكن الرعب مطلبنا اليوم

سنة 1789م حالة فرنسا كانت صعبة أوى.. ديون بلا نهاية ومشاكل اقتصادية وشعب يأمن من الفقر.. ضرائب مرعبة قصمت ظهور الناس.. امتيازات مخصصة لطبقة من البرجوازيين والاقطاعيين ورجال الدين "الكليروس".. الطبقة الوسطى اختفت تماما من المجتمع الفرنسي المتطلع لجاره الإنجليزي اللدود بعين الحسد على نجاح ثورته.. المجتمع مقسوم لطبقات عليا لا ينطبق عليها القانون المدني ولا الكهنوت ولا تعاني من أى مشاكل اجتماعية او مادية وطبقة دنيا هي الى بتحاسب على كل المشاريع.

ومن الطبيعي في وجود كل هذا الظلم ظهور سجن سيء السمعة زى الباستيل..حاجه كده زى السجن الحربي بتاع حمزه البسيوني مثلا.

في النص بين الطبقتين.. جان جاك روسو وفولتير وثالثهم الأقل شهره والأخطر تأثيراً.. شارل دي سيكوندا.. او المعروف في التاريخ باسم مونتسكيو.. الثلاثة دول يعتبروا قلب عصر التنوير الفرنسي.. اشتغلوا تنظير على الناس بمقالات وكتابات وخطب في منتهى الخطورة ركزت على 3 محاور..

الفروق الطبقيّة الصارخة بين طبقتين المجتمع "فولتير"

قيم الحرية والائاخ والمساواة وان الناس بيتولدوا سواسيه وبعدين المجتمع الفاسد يميزهم الى طبقات "روسو"

الفصل بين السلطات ومبادئ العلمانية ومفهوم الاستقامة وروح القانون "مونتسكيو"

والنتيجة كانت ايه؟

ثورة دموية عارمة استمرت لسنة 1799م. الشعب والمثقفين في جهة.. والملك ومنتفعينه في جهة ثانية.. الشعب ملوش اى حاجه تسنده الا غضبه العارم من الفساد والفقر.. بينما لويس السادس عشر مسنود بالروس والنمساويين والشرعية.. الأمر الى استفز غضب الناس كلها وشافوه مجرد خائن واتفقوا على إعدامه بالمقصلة -بطلة المرحلة- سنة 1793م في قلب ميدان الكونكورد الموجود فيه المسلة المصرية حاليا.

وتحولت فرنسا من ملكية ظالمه الى جمهوريه دستوريه بدأت شغلها بقطع رقبة الملك السابق.

الفترة من 1793 الى 1794م كانت فترة مرعبة.. صعد فيها نجم محامي تأثر بشده بأفكار روسو ومونتسكيو.. اتعرف عنه انه رجل "ظاهر اليد" مش بتاع رشاوى ولا فساد.. خطبه الرنانة النارية كانت كلها بتدور حوالين مفهوم الاستقامة وعداء الملكية وضرورة استخدام العنف والإرهاب مع أعداء الثورة.. قالها كده بالنص الصريح في واحده من خطبه.. ليكن الرعب مطلبنا اليوم.. الوقت ده كان الصراع السياسي على اشده بين المتصارعين على الحكم والشارع غرقان في مشاكله الاجتماعية والانفلات الأمني ومحدث فاضي يركز مع الراجل الى عمال يطلع سنه سنه ده لحد ما بقي اقوى رجل في الحكومة كلها والأمور كلها في ايده.

ماكسيميليان روبسبير..

وبدأ عصر الأرهاب..

روبسبير حكم على كل واحد مش عاجبه بالإعدام.. لا محاكمات ولا بطيخ.. وحتى كل من برأتهم المحكمة.. برضوا خضعوا للإعدام.. اكثر من 6000 قتيل في اقل من 45 يوم طارت رقابهم بالتهمة الجاهزة.. تهمة عداوة الثورة..

روبسبير ولجنة السلامة العامة من وراه اطلقوا ايدن الشرطة بدون اى قانون لنشر الرعب وقتل الناس في انحاء فرنسا لمجرد الهواجس الشخصية وبدون اى ادله.. تهمة خدش مبادئ الثورة كانت فضفاضة اوى زى تهمة الانتماء لجماعة الاخوان ونشر المناخ التشاؤمي والكلام الفارغ ده كله.. كله بقي خايف على رقبته.. شركاء الثورة واعداها.. السياسيين وجنرالات الجيش.. حتى أصحاب الفلوس او كبار رجال الدين.. محدش أمن لحياته ابدًا في عصر روبسبير.

الفترة دي كانت هزائم جيش الفرنسيين في أوروبا بتحصل كل يوم تقريبا.. انهيار وتفكك على مستوى الدولة كلها.. فترة ارتباك وتخبط غير عادي لم تنتهي الا بانقلاب نابليون الناجح سنة 1799م وبداية عصر الحروب النابليونية وصناعة المجد الفرنسي الزائف.

طيب.. وبعدين؟

الخوف دفع شركاء الثورة الى تدبير خطة للتخلص من روبسبير.. اقتحموا عليه مبنى البلدية في باريس مطرح ما كان معتصم واشتغل ضرب النار.. رصاصه مجهولة المصدر اصابته في بقه.. جازي يكون هو شخصيا الى حاول ينتحريس مقدرش.. المهم ان روبسبير اتقبض عليه يوم 27 يوليو 1794م. واتساق متكثف تاني يوم على ميدان عام في باريس.. جسمه انتفض وبدأ يتعرش اول ما شاف المقصلة منصوبة.. نفس الأداة الى استخدمها علشان يتخلص من معارضيه.. بينه وبينها دلوقتي خطوات.

الجلادين الفرنسيين معندهمش قانون بيقول "اذا قتلتم فأحسنوا القتلة".. جان كلود عشناوي شد الرباط من على جرح بقه بغباوة خلت روبسبير يصرخ من الألم وهو بينكفى على وشه ويتقفل على رقبته ضلفتين الخشب بتوع المقصلة.. وقبل ما يهتف "تحيا فرنسا" او يقرأ الفاتحة بالفرنساوي.. نزل سلاح المقصلة الحاد على قفاه علشان يفصل رأس امتلأت بالأفكار الدموية وقتل البشر عن جسد مريض بمرض مناعي نادر اسمه الساركويد.

الثورة الفرنسية نجحت وأصبحت ملهمة ثورات العالم.. فرنسا أصبحت دولة عظمى بينما في الحقيقة هي دولة بنت كلب.. قبل الثورة الفرنسية ب 10 سنين بس مصر كانت سلطنة عظمى مستقلة يحكمها على بك الكبير لم يجزؤ الفرنسيين على الاقتراب منها.. دارت الأيام بسرعة جدا علشان فرنسا تتحول من دولة بتموت من الجوع الى دولة صاحبة مستعمرات.

حسب ما كتب د. محمد متولي في كتابه طغاة التاريخ.. اخر قرار اخده عبد الفتاح روبسبير كان اعدام 9 من زعماء الثورة الفرنسية..

بيقولك كمان ان نابليون لما مسك الحكم.. راح وقف قصاد قبر روبسبير وقاله..

عزيزي روبسبير..

ويل لقاضي الأرض من قاضي السماء.  
#فبراير\_الأسود

## کولونیل وسط البلد

شوارع وسط البلد بالنسبة لواحد زى حالاتى ما هي الا خميرة عكثنه.  
دايما بفتكر زكى الدسوقي وهو واقف سكران وبيعيط على شوارع مصر وعمايها وييقول ان العمائر بقت مزابيل من فوق ومن تحت مسخ..  
احنا فيبيبيبيبيبي زمن السيسي... لا مؤاخذه.. احنا في زمن المسخ.  
لما تاخذنى رجليا لشارع سليمان باشا.. غصب عنى برجع بدماعى لورا وافتكر كلام تركى وطربوش ولبس قديم ووالى جبار وشعب بيتحول بالراحة  
من شعب مقهور مسروق الى شعب نصف متظبط مسروق.  
بفتكر بعثات أجنبية.. خواجهات في البلد.. مشاريع ومصانع..  
وجيش..  
اى والله جيش..

جيش بجد مش جيش يزنس وكحك ومكرونة وبرلتي عبد الحميد.  
جيش قدر يحقق انتصارات مرعبة في السودان والشام ويوصل لحد أبواب إسطنبول ويحذف طوب على كل الى جوه لحد ما يخليهم يموتوا في  
جلدهم من الرعب ويجروا يستنجدوا بأعدائهم الأزلين علشان يحموهم من الأعداء الجدد.  
بس المره دى انا مش في وسط البلد.. انا يا دوب مخلص زيارة مقياس النيل وذكريات الاحتفال وعروس النيل وفاض حايي.. عديت بس الشارع  
علشان المح مع بعيد قبة الفرنساوي.  
يااه يا دنيا..  
أخيرا..

بقالي ادايه بخط احي اشوف القبه دى.. قوم دلوقتى.. وبالصدفة.. المحها من بعيد كده؟  
من بعيد لمحت الى كنت متوقعه ومش عاوز أشوفه.. بس مقدرتش امسك رجلاي علشان أقرب من القبه واقرأ الفاتحة لساكن القبر هو وزوجته.  
سنة 1787م اتولد جوزيف انتيلمى سيف في ليون.. ابوه كان عنده طاحونه بياكل منها عيش.. الواد منفعش في شغلانة العجين والخيز دى.. مش  
مقامه.. قدم ورقه في الكلية الحربية بتاعة نابليون وانضم للجيش الفرنساوي وبدأ يشارك في المجد النابليونى المزعوم في معركة ترافلجار وبعدين  
الحروب البرية في أوروبا بعد وكسة نابليون في مصر.. اترقي في الجيش لحد ما بقى عميد وبعدها طلعهو معاش علشان يقعد يتفرغ لزراعة حنة  
أرض في منطقة توشكى الفرنساوي ك ويقضى الكام يوم الى فاضلينله على ذكريات أيام الجدعنه.  
اتارى بقى ان الى فاضل من عمره كان هو أيام المجده مش الى فات..  
عين مين لقطته واصطادته علطول بمجرد ما طلع من الخدمة؟  
الوالي أبو عيون زرق وقلب زى الحجر..  
محمد علي باشا..

خط محمد على كل إمكانيات مصر تحت تصرف الكولونيل المتقاعد.. مطلوب نعمل جيش قوى حديث.. الاعتماد على فرقة الارناؤوط او الباشبوزق او المماليك في الحرب دائما يقلب عك.. عاوزين جيش من اوله كده يتبنى على نظافة.. ورانا شغل كثير اوى يا مون بيه..

- امين يا خواجه؟
- امين يا جناب الوالى

وخذ سليمان باشا 500 عيل صغير وطلع على أسوان.. بعيد خالص عن القاهرة وقرفها ومؤامراتها وزحمتها.. بدأ يربي جيل صغير من العسكر  
تربية عسكرية صارمه وحازمه.. الجيل ده اشترك مع إبراهيم باشا بعد كده في حروبه المجنونة في الشام والمورة وعلشان يبقى لمصر جيش نقدر  
نسميه الجيش المصرى.

طيب انتو عارفين الفجوة ادايه ما بين اخر جيش مصرى  
المثل بيقول الشاطرة تغزل برجل حمار.. وسليمان باشا غزل وعمل قمصان وبلوفرات وبيجامات وكل حاجه حلوه بامكانيات اقل من رجل  
الحمار فعلا.. سبحان الله.. نفس الفلاحين الفقراء الغلابة المرضazin أيام الممالك هم نفسهم الفلاحين الى قال عنهم سليمان باشا..  
"ان المصريين هم خير من رأيتهم.. فهم يجمعون بين النشاط والقناعة والجلد على المتاعب مع انشراح النفس وتوطينها على احتمال صنوف  
الحرمان.. ولقد رأيتهم في معركة قونية يقبون سبع ساعات متواليه في خط النار محتفظين بشجاعة ورياسة جأش تدعو للأعجاب دون ان تختل  
صفوفهم او يسرى اليهم الملل او يبدو منهم تقصير في واجباتهم الحربية"  
هالله هالله هالله.. انت لسه شوفت حاجه يا خواجه..

المصري من دول ظليلة انت بس.. وهتشوف منه العجب.  
الفيرس المصري أصاب الكولونيل سيف اسلم وكمل باقي حياته في مصر وان لم تنقطع علاقته بالوطن الأم.. سنة 1845 مثلا زار فرنسا في أيام الملك لويس فيليب الأول.. هما متابعين اخباره ويعمل ايه في مصر.. اتبسط منه جدا الملك وانعم عليه برتبة ضابط عظيم.. يعنى كده هيقدر يصرف معاش السادات من الجيش الفرنسي وهو مرتاح.  
طيب..

عارفین سلیمان باشا الفرنساوي اتجوز مين؟

واحدہ یونانیۃ اسمها ماریہ مریم ہانم..

مممم.. نورت المحکمة یا عم أحمد.. وبعیدین.. مالنا احنا ومال قصه جوازہ دی!!!

سليمان باشا خلف بنت اسمها نازلي.. دى يا سيدى اتجوزت محمد شريف باشا.. رئيس الوزراء أيام الخديو إسماعيل والخديو توفيق وأبو الدستور المصري اللى ببحاولوا يعملوا فيه بي بي دلوقتي.. نازلي دى عاشت في منطقة اسمها ارض شريف باشا.. الراجل كان بيخطط ببنى مسجد كبير هناك بس مات قبل ما بينه.. وإذا بالأرملة المخلصة تكمل مشروع جوزها وتعطف على الفقراء وتفتح بيتها للغلبة وهى عندها 90 سنة.. فالناس تحبها وتسمى المنطقة كلها على اسمها..  
العجوزه..

نازلي "العجوزه" بقى خلقت بنت اسمها توفيقه هانم. دى ربنا كرمها واتجوزت عبد الرحيم باشا صبري وزير الزراعة علشان تخلف نازلي الصغيره.. نازلي صبري يعنى.

ونازلي الصغيره اتجوزت الأمير أحمد فؤاد.. اللى بقى الملك أحمد فؤاد الأول بعد كده وخلفت منه فاروق الأول.. اللى معرفش يحكم ايده لا على البلد ولا على امه واخواته لحد ما انقلب عليه الجيش وزحلقة على إيطاليا علشان مصر تبدأ بعدها عصر الانحطاط الأعظم.

يا سلام..

سليمان باشا مات سنة 1860م. في أيام الخديو إسماعيل.. يعنى الراجل فضل في خدمة الجيش والدولة المصرية من أيام محمد على لحد أيام إسماعيل.. يعنى شاف بعينه سلاله المجد وهى بتبني أيام حروب الشام والبلقان والقرم ونافارين.. وشافها تانى بتهدم مع اتفاقية لندن سنة 1840 وشافها تالت وهى بتتوكس أيام عباس حلمي الأول وسعيد.. وشافها في الآخر وهى بتشحت وتستلف من طوب الأرض أيام أبو السباع. الراجل ليه حق يموت مقهور طبعاً بعد ما شاف الى كان معلمهم الأدب أيام المؤسس الكبير بيأمرؤا ويحكموا في البلد أيام الحفيد الخائب. المصريين شعب عاطفي.. حب سليمان باشا وارتبط بيه.. مدفنه في الروضة بقى اسمه مقام سيدي الفرنسي.. والدولة كمان منسيش إنجازاته فاختارت اسمه لواحد من أجمل شوارع وسط البلد.. بس بعد 52 راحت العاطفة وحل محلها الانقلاب وانقلب اسم الشارع من سليمان باشا الى طلعت حرب.

وبالعند في العسكري.. لسه الناس بتقول على الشارع شارع سليمان باشا رغم تمثال الاقتصادي العظيم طلعت حرب الى واقف وحيد وسط الميدان.. مش كراهية في طلعت حرب طبعاً.. انما رفض للقهر والاجبار.. هو شارع سليمان باشا وهي فضل شارع سليمان باشا..  
ولسه الناس بتفتكره بالخير لما تزور المتحف الحربي في القلعة وتعدى على تمثاله الموجود قصاد تمثال إبراهيم باشا.. لسه واحد زى حالاتي لما ببعدي على قبره ويشوف اكوام الزبالة حواليه.. بيحزن ويترحم عليه ويقراله الفاتحة.  
ياااه يا شوارع وسط البلد.. دايمًا تزودي شجون الواحد..  
خصوصًا لما شفت المكتبة العظيمة بتاعة الراحل حسن كامي وهي مقفولة وبستعد لاستقبال أطنان التراب الي هتتكوم فوقها لحد ما الورثة تبطل خناق ويقرروا هيعملوا ايه بكل الكنوز الموجوده فيها..  
بالالا.. حلال على تجار السور.

## ممنوع التصوير يا مواطن

### نجيب الحكاية من الأول خالص؟

افتتح معايا الخطط المقرينية.. طبعة دار الكتب العلمية في بيروت.. المجلد الثالث.. صفحة 328.. هتلاق المقريري كاتب الاقي.. بتصرف مي في الأسلوب واللغة طبعاً.

لما دخل الأسلام مصر.. كثير من الصحابة ساءوا ارض الجزيرة وهاجروا على البلد الجديد أبو نهر طويل في قلبه وأراضي خضراء على ضفافه وكتل حجرية عملاقة اتشكنت في صورة تماثيل ومعابد عليها رسوم ونقوش تقول ان الى كان عايش هنا من كام الف سنة بلغ من الحضارة مبلغ محترم. اول المستوطنين كان عمرو بن العاص.. حكمها وبني فيها مدينة باقي من اثارها مسجد يقول ان مصر يوما ما.. كانت شيئاً ما. طيب.. جامع عمرو ومكانه معروف..

ناحيته القليلة فيها انه بقي؟

كان في أرض فاضيه اخدها الصحابي الانصاري قيس بن سعد بن عباده وبني فيها دار كبير يليق بالأمراء.. مش بس حته الأرض الفاضية.. لا.. دي كمان كان جمبها بيت بناه نافع بن عبد قيس الفهري.. اشتراه قيس من نافع علشان يضمها للبيت الفخم جدا.. الى اصبح دار الأمراء والولاة في عصر الأمويين.

ثانية كده..

نافع بن عبد قیس الفہری.. الاسم ده یدو مألوف؟

اه حضرتك.. ده يبقي شريك عمرو بن العاص في فتح مصر.. وأبو عقبة بن نافع الى فتح شمال افريقيا.. قولى بقى انك مدخلتش اولى اعدادي ومتمعفش قصته الى كانت مقرره علينا في المدرسة.

اللہ.. جمیل جدا.. وبعدين؟

راحت أيام الخلافة الراشدة وجت أيام الدولة الأموية..

تولى الحكم هشام بن عبد الملك بن مروان.. عاشر حكام بني أمية..

طیب دار الأمراء کان حالها ایه فی آیامه؟

والى مصر في أيام هشام كان عبد الملك بن رفاعة بن خالد كان عنده موظف مسئول عن خراج البلد.. اسمه أسامه بن زيد التنوخي.. الرجل ده اشتري ب 20 الف دينار فلل علسان يهادى بيهم ملك الروم.. بس ملقاش حته يخزن فيها الفلفل الا بيت الامراء الفخم الى بناه قيس بن سعد بن عبادة قبلى جامع عمرو..

ولأن كمية الفلفل كانت مهولة.. فالناس نسيت الدار وصاحبها الأصلي.. وسموها دار الفلفل.

دار الأمراء أصبحت دار الفلفل..

طيب.. نسيب أيام الامويين ونتحرك محطه لقدام؟

أيام الخليفة المأمون بن هارون الرشيد لو رحت المكان ده هتلاقي ان كان في مشروع توسعة وترميم لجامع عمرو شغال فيها واحد من رجالة الخليفة المأمون اسمه عيسي بن يزيد الجلودي.. عيسي مجرد ما اتم شغلانة الجامع.. بص على دار القلقل وقالك المكان ده ميصحش يبقي مهممل كده.. ده على ناصبه وواجهته بحرى..

احنا نعمل فيه دار للشرطة..

وكتب عيسى بن يزيد على مدخلها

"بركة من الله لعبده عبد الله الامام بن المأمون أمير المؤمنين.. أمر بإقامة هذه الدار الهاشمية المباركة على يد عيسى بن يزيد الجلودي مولى أمير المؤمنين سنة ثلاث عشرة ومائتين"

سؤال اعتراضی..

مباركة ازای بس وهي دار للشرطة!!

ما علینا..

راحت أيام العباسيين وحت أيام ابن طولون..

خلصت أيام ابن طولون وجت أيام الاخشيد..

كل ده وحتة الأرض القبلىة من جامع عمرو عليها ايه؟؟

دار للشرطة حضرته..

طیب لما الخلیفة المعز فتح مصر.. عمل ایه فی حۃ الأرض دی؟

عمل "Upgrade" لدار الشرطة علشان تبقى سجن لأرباب الجرائم واللصوص والطبقة الدنيا من البشر.. الأمراء طبعاً والأكابر ميصحش يتسجنوا هنا..

ويبقى اسمه حبيس المعونة..

دار الامراء ثم دار الفلفل ثم حيس المعونة.. طب.. هل اتهدم السجن او اتغير بعد كده؟

تف من بقاء مصر میتهدمش فیها سجون.. تزداد.. انما نهدم السجون.. ایه.. احنا هنکفر؟

فضل حبس المعونة على حالة طول أيام الفاطميين وإيام بنى أيوب كمان.. لحد ما رسيت سفينة مصر الحائرة على شط الظاهر ببيرس  
البنقدارى فى أيام الممالك.

ونقف هنا همسة حائرة.. في سنة 658 هـ



بيرس في الحكم.. سلطان قوى حكيم عادل.. وفي حاشيته من يشبهه في القوة ويتحين الفرصة علشان ياخذ دورة هو كمان.. فلاوون الألفي.. الى  
بقي بعد كده المنصور قلاوون وأولاده الى عملوا في مصر العجب.

الفارس قلاوون الألفي لما كان بيزل من بيته الصبح ويروح على شغله في القلعة.. كان بعيد على مكان شنيع وريحته وحشه اوى ودائما يسمع  
منه صراخ ناس زى ما يكونوا بيتعذبوا.. دخله مره لقاها ضيق جدا ومليان فطح مجارى وقمل وبرايث وحاجه نكد.. الراجل قرف من المكان  
المقبض وقرر انه لو ربنا يسر له من أمر ملك مصر.. هيعمل هنا حاجه يحكوا ويتحاكوا عليها.

ولفت الأيام وملك قلاوون مصر..

وبر بوعد..

هدم المكان الكتيب سنة 680 هـ وبني مكانه قيسارية.. سوق كبير يعنى.. وخصصه لتجارة العنبر والعطور.

شوف ازاي؟

هو كان قرفان من ريحته.. فقرر يقلبه من النقيض للنقيض.. من سجن وبركة صرف مجاري.. الى واحة عطر فواحه..

متستغربش..

العنبر زمان في أيام العزكان من العطور المعتبرة الى ميقدرش عليها الا أولاد الأكابر.. ازازة برفان عنبر دى متنفعش الا هدية لأميرة او بنت أمير..  
وبلغ من مكانة السوق ده وعظمته ان دكة المحتسب كانت موجوده جمبه عطلول.

طيب.. وبعدين؟

مات المنصور قلاوون وجه الدور على ابنه.. اعظم حكام مصر على الاطلاق.. الناصر محمد بن قلاوون..

من ضمن أفعال الراجل العظيم ده في مصر كانت تجديد وترميم قيسارية العنبريين.. وتخصيص المكان كله بالمساكن الى حواليه وقف للجامع  
الى بناء في قلب الشارع علشان يكمل مجموعة ابوه.

نفوت 100 سنة كمان وتدخل على دولة المماليك البرجية.. في الفترة ما بين سقوط الناصر فرج بين برقوق وتولي المؤيد شيخ.. حكم مصر وقتها  
خليفة عباسي اسمه المستعين بالله.. كان هفأ زى كل بنى العباس في مصر.. ضحك عليه الرعاع من حاشيته واقنعوه ان السوق ده ملوش اى  
ثلاثين لزمه وخلوه ينقل السوق من مكانه ويضمه على قيسارية العصفور "السروجية حاليا".. خصوصاً ان العنبر بقى مضروب والناس بتغش فيه..  
بس الكلام ده معجيش تجار العنبر الى بقالهم في المكان ده دلوقتي فوق ال 600 سنة.. اتملوا على بعض ورجعوا السوق مكانه بالقوة بعد ما طلع  
المؤيد شيخ على الكرسي وهد السجى المرعب الى قصاده "خزانة شمائل" وبني مكانه مسجد فخيم اوى.

نفهم من كده ان رجالة الهي في أيام المستعين بالله كانوا عاوزين يعملوا سبوبة فلوس زى ما بتوع الهي بيعملوا أيامنا دلوقتي!!

"قول انت بقي.. بصوت سرحان عبد البصير".

طيب.. نسيب بقى أيام المماليك ونتحرك شوية لقدام؟

محمد على باشا كان عنده مساعد اسمه يعقوب بك صبري.. بشكل ما غير مفهوم آلت ملكية المكان ليه.. اغلب الظن ان محمد على لما حط  
ايداه على مصر بدأ يوزع في أملاك المماليك على رجالاته.. زى ما عمل مثلاً في بيت نفيسة البيضاء.. بالتالي ممكن يكون اتبسط في يوم من يعقوب  
بك على انجاز ما عمله.. فقرر انه يهديه المكان كله يبرطع فيه.

يعقوب صبري جدد المكان ورجع حركة تجارة العنبر والعطور فيه.. بقى اسمه وكالة يعقوب بك "قيسارية العنبريين سابقاً" شاء ربنا ان ريحته

القدرة الى اختفت من أيام المنصور قلاوون مترجعش تانى ابد الا في عصر المنصور مبارك والأربعين حرامي.

لما مات يعقوب صبري كتب لمراته فرخنده البيضاء ربح المكان والباقي اوقاف.. الربيع ده فضل يتنقل من وريث لوريث ومن والى الى خديو ومن  
ملكية الى جمهورية.. اتغير اسمه الى سوق العنبريين وبعدين التريعة.. مشاهير دخلوا في الليلة دى علشان يبقالهم رجل فيه زى فاطمة رشدي  
مثلاً.. لحد سنة 2005 حضرتك لما قامت فيه حريقه جابت اجله.. اللسانة الخبيثة كانت بتقول ان الحريق متعمد من فاروق حسنى علشان  
يفضى المساحة بين مسجد الاشرف برسباي ومسجد الغوري.. واكد الاشاعة صدور قرار رقم "14" لسنة 2005 بهدم المكان كله.. او بمعنى  
ادق.. الى فاضل منه.

ما بين 2005 الى 2019 كانت حركات الحكومات الوسخة علشان يهدموا المكان.. مره حريقه.. مره يحطوا الواح خشب علشان يقولوا ان المكان  
آيل للسقوط.. مره حكم محكمة.. وكله هجص في هجص.. القصة كلها ان ال 100 محل الموجودين في المكان كان فيهم محامين كبار قدروا  
يقفوا لواحد من رجال البيزنس عرض 11 مليون جنيه في 1045 مترهما كل الى فاضل من قيسارية العنبريين.. الراجل مكذبش الحقيقة.. قال انا  
ههد المكان واعمل مكانه مول تجاري يزود زحمة المنطقة وسيطرة البلطجية عليها ويهدد باقي الاثار الموجودة في الشارع بالخراب اكتر ما هي  
خربانه.

دفع كام بقى لبتوع الهي؟؟ عمل ايه علشان يقلب قرار محكمة جنوب القاهرة رقم 2032 لسنة 2007 من تنكيس العقار الى الهدم.. هل في حد  
ساندة من رجالة الأمن الكبار؟؟

ربك وحده هو العالم.

المهم في الليلة دى كلها اننا صحينا الصبح من يومين على بلدوزر في شارع عمره اكتر من 1000 سنة.. بيهدم مبنى عمره اكتر من 900 سنة  
بدعوى انه مش مسجل كآثر.

900 سنة ومش مسجل كآثر!!

طيب وبتوع الاثار الى بيصرخوا.. دكاترة كلية الاثار الى مناخيرهم ورمت من كتر الاعتراض؟؟

نقول ايه في كلامهم؟؟

اقولك انا بقى نقولهم ايه..

الفيديو ده فيه الزيتون.. سجله صديق من العاملين في شارع المعز.. توثيق للحظة تاريخية في حياة مصر المنكوبة.. في الفيديو صوت أمين

الشرطة واضح وهو يقول ممنوع التصوير هنا.  
ممنوع التصوير في شارع المعز؟؟  
لا والله!!!  
الشارع الى الكوكب كله بيصور فيه.. فجأة كده بقى ممنوع فيه التصوير؟؟  
طيب ليه؟  
اهو كده.. ممنوع التصوير وخلاص..  
طيب ممنوع التصوير عموما وللا ممنوع التصوير دلوقتى وفي الحتة دى بالذات؟  
اهو كده.. ممنوع التصوير وخلاص..  
وان كنت راجل.. اعترض على أمين الشرطة.. وانت عارف بقي.  
اثار ايه وبتاع ايه.. دى شوية طوب.  
تمام يا حكومة.. زى الفل.

## فاض حابي

مجاهش في دماغي وانا واقف هنا الا مشهد الاحتفالات بوفاء النيل من فيلم عروس النيل بتاع رشدي أباطله ولبنى عبد العزيز..  
نهر عظيم.. جاى من الجنوب شايل فيه حمراء فيها خير كثير لمصر الزراعية.. أجدادنا القدماء كانوا بيسموا الفيضان عيد الدمع.. كانوا فاكرين ان  
دى دموع ايزيس من الحزن على اوزوريس.. في أغسطس من كل سنة كان ينتهى الفيضان وتفتتح السدود والقنوات علشان تغمر مياه الحياه ارض  
كيمة السمراء.

وتبدأ وتعم الاحتفالات ربوع مصر كلها..

أصل النيل وقي..

المصريين القدماء كانوا بيعتقدوا انهم لو طنشوا الاحتفال بوفاء النيل.. يبقى هتجل عليهم اللعنة والفقر.. علشان كده كان كهنة كوم امبو بيجيبوا  
قراطيس بردي ويكتبوا فيه صلوات وادعيه وتضرعات الى "حابي" ويرموه في النيل مع احتفالات مهيبه حضرها الملك رمسيس الثالث شخصياً  
ومعاه تمثال فتاة جميلة جدا علشان تكون هدية منه لحابي على كرمه وفيضانه.. وتبدأ الناس تطلق البخور وترقص وتغنى وهى بتقول..

فاض حابي فاض حابي.. اهتفوا يا زراعين..

وراحت مصر القديمة وایامها العظيمة..

ودخل المسلمین مصر..

ایامها كان في مقياس تانى موجود عند حصن بابلون.. المقریزي في الخطط بيقول ان اسامه بن زيد التنوفي مسئول الخراج في دولة الوليد بن عبد  
الملك بنى واحد تانى في الروضة.. المقياس ده ملوش أثر.. او يمكن المهندس "العراقي" احمد بن كثير الفرغاني بنى المقياس الحالي فوق انقاضه في  
أيام الخليفة المؤمن.. بيحكينا المقریزي ان اسم الخليفة المتوكل على الله كان محفور على حجارة النص التأسيسي للمقياس الموجود حالياً..

الخليفة أبو الفضل جعفر المتوكل على الله كان مهتم جدا بالمقياس.. كلف واحد من رجاله اسمه عبد الله بن عبد السلام بن عبد الله بالمهمة  
دى.. وفصلت الشغلانه دى في اسرته يورثها أولاده من بعده.. زى ما تكون بقت شرف كده زى العمودية مثلاً..

بس للأسف.. ضاع الحجر بتاع المتوكل والمقياس كله اتشلفط خالص في أيام ابن طولون لما حاول يصلحه.

في كلام كثير عن بناء المقياس واصله وفصله.. هل هو أموي وللا عباسي وللا طولوني وللا عثماني.. مين بناه الأول ومين عرف طقوس قياس النيل  
قبل مين..

هل هو النبي يوسف؟

المصريين القدماء؟

العرب؟

المماليك؟

بص.. كل ده مش مهم..

المهم هو طقوس "الاحتفال" بقياس النيل..

مصر الفاطمية.. مصر العادات والبدع والافتكاسات الجديدة.. كان فيها راجل كباره ومحترم اسمه شيخ المقياس.. وظيفته هي قياس منسوب مية  
النيل وقت الفيضان.. مش مطلوب منه طول السنه الا كده.. في وقت الفيضان كان ينزل كل يوم بئر المقياس علشان يسجل النيل وصل لارتفاع  
كام النهارده.. يسجل القراءة ويقارنها بقراءة اليوم السابق.. كل يوم يعمل نفس الحركة.. ينط يتشعبط في عمود القياس في البير.. يسجل ارقام..  
ويطلع يبلغ مولانا الخليفة..

الخليفة والحاشية والناس قاعدين على اعصابهم في انتظار شيخ المقياس يطلع ويبلغ السلطان بالقراءة النهائية.. مبروك يا مولانا الخليفة..

ارتفاع منسوب مية النيل السنة دى بلغ 16 ذراع "8.5 متر"..

ويلف المتأدين في أرض مصر..

يا اهل مصر المحروسة.. طم ططم طم طم..

النيل وقي.. طم ططم طم طم..

النيل بلغ 16 ذراع.. طم ططم طم طم..

مفیش ضرائب ولا مكوس.. طم ططم طم طم..

مفیش فقر ولا جفاف.. طم ططم طم طم..

وتقوم الاحتفالات..

تمتد الولائم والعزائم للأكابر والاعيان والفقراء والأمراء على حد السواء.. سفرة كبيرة فيها صواني بالهبل عليها ذبائح مختلفة في 40 مكان من أماكن البلد.. قوافل الشطار والحواه بتوع الملاعب "الى هما دلوقتي بتوع السيرك" في كل مكان نازلين رقص وطبل وزمر وبخور وحلقات ذكر.. السلطان كان بيحب طشت كبير اوى يحط فيه مية ورد وحنه وزعفران ويخلطهم بمية ويعمل منهم عجينة ريحتها جميلة وجذابة.. يدى الطشت كله لشيخ المقياس الى كان بيلبس لبس التشريفة كامل بالعمه المميزة وينط على العمود يتشعبط فيه برجلة اليمين وايده الشمال ويبدأ يخلق "يعطر يعنى" العمود بالعجينة السلطاني زكية الرائحة..

كل ده ليه؟

علشان النيل بلغ 16 ذراع..

هو ايه الحكاية بقى؟

الحكاية ان ال 16 ذراع دول معناهم ان النيل وفي فيضانه السنة دى والميه الموجودة هتكفي الزراعة والري.. يعنى مفيش أسعار هتغلي ولا جفاف هيحصل ولا قحط ولا طاعون يحصد الاف.. سنه أخرى من الحياه في عز وكرامة.. يعنى هنزرع ونقلع ونبيع ونشتري بكرامتنا من غير ذل ولا امتهان ولا ضرائب زيادة تقص من لحمنا الحي..

يعنى السلطان يحط ضرائب معقولة على الناس.. والناس هيبقي معاها فلوس تدفع..

بكلمات أخرى.. تحس ان الناس بتحتفل ببقائها على الحياه.. بتعطر العمود كنوع من أنواع الشكر والعرفان للنيل على فيضانه.. ما هو من غير فيضان مش هيبقي في زراعه.. ومفيش زراعه يعنى مفيش فلوس للناس علشان تاكل ولا للخليفة علشان ياخذ ضرائب.. خراب مستعجل مسووجر في كل مكان لو امتنع الفيضان..

في الوقت الى شيخ المقياس ببشكر النيل فيه على طريقتهم.. يطلع الخليفة على سد الخليج ومعاه نائب السلطنة وكبار رجاله الدولة ومعاه فاس ذهب خالص.. يضرب السد 3 ضربات.. علشان يدى الاشارة للفلاحين ان كل واحد فيهم يشيل فاسه ويضربوا السد هما كمان علشان تجرى الميه في الخليج ويبدأ في مصر عام زراعي زاهر جديد..

انصحك بكتاب نزهة الأمم في العجائب والحكم لابن اياس الحنفي مع خطط المقرئ.. هتجس أد ايه مقياس النيل المهمل ده كان محور مصر كلها فيوم من الأيام.. الموضوع كله أشبه باحتفال ديني او مولد.. بلد الحسين والسيدة نفيسة والسيدة زينب مبخلتش على النيل وعملتله هو كمان ليلة كبيرة بمواصفات خاصة.. وفي كل ليلة كبيرة.. يزيط الشعراء واهل الطبل والزمر..

عندك مثلا شهاب الدين بن الشاب التائب قال..

أرى نيل مصر قد إذا يوم كسر \*\*\* إذا رأم جريا في الخليج تقنطرا

ولكن بهذا الكسر زاد تجبرا \*\*\* وافرط هجما في القرى وتجسرا

وعلى بن بردبك قال..

ان بحر النيل قد وفي لنا \*\*\* ما عليه من قديم قررا

وقضانا الدين الا انه \*\*\* حين وفاها عليه انكسرا

اويعي تقول ده كان زمان وايام الجهل والناس مش عارفه الألف من كوز الذرة.. افتركويس ان عبد الوهاب غنى كلمات أمير الشعراء..

النيل نجاشي حليوة اسمر

عجب للونه ذهب ومرمر

ارغوله في ايده يسبح لسيدة

حياة بلدنا يا رب زيده

المصريين شعب له تركيبة خاصه جدا.. تركيبة بتحب وتعشق وتكره وتسخر وتأفور في المشاعر يمين او شمال.. يفوت عليها الزمن وتعدى السنين.. وهى هي التركيبة.. مش بتتغير ابدا.

المكان الى انت شايفه في الصورة ده كانت بتبدأ منه احتفالات المصريين بسنة جديدة من الحياه..

النهارده بقى خرابه تزورها الناس علشان تتفرج وتتصور وبعدين تمشي..

دوام الحال من المحال.. وسبحان من له الدوام.

## شباك الزمكان

طفولتي الثمانينانية قضيتها في بيت جدي في طنطا.. البيت كان كبير ويساع 3 او 4 أسرات.. لم يعييه أي شيء في نظري الا خرابة بتطل عليها جنيئة البيت الخلفية.. وعارفين طبعاً ما تعنية كلمة خرابة في مصر.. الكلام ده أيام ما كانت مصر حلوة "الى حد ما".. كان فيها بعض الخرابات هنا او هناك قبل ما تتحول مصر الى خرابة كبيرة يتخللها كومباوند هنا او هناك.

لسبب ما يتعلق بسمعة جدي وهيبته لم تمارس في الخرابة خلف البيت أي أفعال تثير القلق.. مكاش يخوف بس منها الا سمعه عن كونها مسكونة بالثعابين.. مع سمعتها المشهورة بوجود الأفاعي.. الا اننا عمرنا ما شفنا في بيت جدي او حواليه اي ثعبان من أي نوع.. سألت براءة الطفل وباستغراب..

- هو ازاى الخرابة فيها ثعابين وعمر ما في ثعبان واحد جه البيت عندنا؟  
فكان الرد يجيلي باستهزاء..

- يبجي الثعبان ازاى وستك موجودة في البيت؟  
ودي كانت إجابة تكفي طفل عنده 6 او 7 سنين.. ستي كانت قوية الشخصية وكلنا "بما فينا جدي" بنخاف منها جداً.. بس الثعبان يخاف منها ازاى وهو أساساً معندوش لباليب توجهه كل ما يسمع صوتها؟  
بعد كده عرفت السبب "حسب ما حكولي"..

ستي الله يرحمها كان اسمها "فوزية محمد أحمد الرفاعي"..  
العله مش في أسم فوزية.. العله في انها "رفاعية"..  
وكبرت على كده.. متصور ان اى رفاعي في الدنيا تخاف منه الثعابين.. لحد ما وصلت بالعمر الى سن لا يصح انى اعتقد فيه في مثل هذه الخرافات ففتحت الكتب وبدأت ادور على ايه حكاية الرفاعية دول..  
ولقيت قصص كتير أوى يرفض تصديقها عقل الصبي المراهق..

وكبرت كمان شوية وتعمقت القراءة وأضافت الكتب للشخصية مزيد من الحده والانكار.. بدأت انتظم في حلقات الذكر في مولد النبي ومولد السيد البدوي.. بدأت اخرج من طنطا الى دسوق والقاهرة والسويس والإسكندرية والشهداء علشان احضر مولد سيدي الرفاعي أو سيدي إبراهيم الدسوقي أو سيدنا الحسين أو سيدي الأربعين أو سيدي شبل أو سيدي أبو العباس المرسى.. لفيت مديريات مصر كلها تقريباً أطارد الموالد والطرق الصوفية.. شفت بعيني ازاى ان كل شيخ وله طريقه.. السبب الظاهر هو ان الواد اتجذب.. بس السبب الحقيقي انى كنت بلف ورا الرفاعية والشاذلية والدسوقية والقادرية والبدوية.

سيبكوا من كل دول بقي.. ركزوا معايا شويه في الرفاعية..  
الرفاعية طريقة طوفيه تنسب الى الفقيه العراقي أحمد بن على الحسيني الرفاعي.. ده كان راجل زاهد متصوف عاش في القرن السادس الهجري في أيام الدولة العباسية.. ظهرت سيرته في أيام الخلفاء المستنجد بالله والمستضيء بأمر الله وتوفي في زمن الخليفة الناصر لدين الله.  
أساس الرفاعية هو العمل بمقتضى ظاهر الكتاب والسنة ومجاهدة النفس والإكثار من الذكر حسب إرشادات شيخ الطريقة وتوجيهاته مع الالتزام التام بالطاعة والخضوع لكل أوامره ونواهيه.  
اوباً.. أوامر شيخ الطريقة

يعنى اخوان.  
في كل حاجه لازم ألف وأدور وارجع ارشق في "شخص ما ينبغي اتباعه".. حتى لما دخلت الثانوية الحربية.. عرفت ان مخالفة أوامر العقيد لن تعني الا السجن او الإعدام في بعض الأحوال.. وحسب ما اتعلمت من أصدق الحديث..  
"قُلْ إِنْ كُنْتُمْ تُحِبُّونَ اللَّهَ فَاتَّبِعُونِي يُحْبِبْكُمُ اللَّهُ وَيَغْفِرْ لَكُمْ ذُنُوبَكُمْ" وَاللَّهُ غَفُورٌ رَحِيمٌ " آل عمران - 31  
الكلام ده عن لسان مين؟

سيدنا النبي عليه الصلاة والسلام.  
امال الناس دى عاوزانا نمشى وراها ليه؟؟  
ما هي سيرة النبي اهى.. حلوه وزى الفل.  
وقررت انه لا رفاعي ولا بكري ولا غيره.. سيدنا النبي وبس.  
بس ده لا يمنع انى حافظت على عاداتي في حضور مولد الرفاعية والاختلاط بيهم.. والأهم من ده كله.. حكاويهم عن كرامات الرفاعية الأوائل..  
ايوه.. اعز انا الحواديت دى اوى..

من واحد يركب الأسود.. الى واحد النار مش بتحرقه الى واحد الى واحد يدعو الله فتمطر السماء فورا او واحد يزور قرية ضاربه في جذور الفقر فتتحول الأراضي المقفرة الى جنات تطرح ثروات مختلفة تعم بها الخيرات.. الى آخره من الكرامات المختلفة.  
بعض الحكاوي كان يتضارب بشدة مع الى سجله المؤرخين من أحداث قحط او مجاعات عدت على مصر في زمن الفاطميين او المماليك مثلاً.. وبعضها يتنافى بشده مع العقل والمنطق والدين.. لكن في بلد زى مصر فيها 2850 مولد.. انكار الكرامات او مجرد التساؤل عن ماهية الراقد في هذا المقام "المبارك" هتعرضك فورا للتكفير وربما الأذى البدني في بعض الأحوال.. ده غير ان الحكاوي لطيفة فعلاً..  
خد عندك الحكاية دى مثلاً..

بيقولوا الرفاعية ان الإمام احمد الرفاعي المؤسس وقف قصاد القبر الشريف وقال..  
في حالة البعد روحي كنت أرسلها \*\*\* تقبل الأرض عني وهي نائبتي  
وهذه دولة الأشباح قد حضرت \*\*\* فأمدد بمينك كي تحظى بها شفتي

فانشق القبر ومد الرسول عليه الصلاة والسلام ايده للرفاعي علشان يبوسها..  
الكلام ده حصل قصاد 90 ألف بني آدم زى ما ورد في "قلادة الجواهر في ذكر الغوث الرفاعي وأتباعه الأكابر"..  
يا لهوي!!!

عارفين مشككتي مع القصة دى ايه؟  
ان مؤلف الكتاب اللى وردت فيه القصة دى يبقي أبو الهدي الصيادي.. شيخ المشايخ في زمن السلطان عبد الحميد الثاني.. ده راجل ادعي الورع  
ظاهرا وهو ثعبان افاق باطنا.. سماه جمال الدين الأفغاني أبو الضلال الصيادي وألف فيه عبد الله النديم كتاب شديد البذاءة مسح فيه بكرامة  
أهله الأرض اسمه "المسامير".. كنت حكيت عنه في أثناء رحلتي للبحث عن قبر النديم في إسطنبول.  
بيقول الصيادي في نفس الكتاب "صفحة 108"..  
"فخرج يد النبي صلى الله عليه وسلم لسيدي أحمد بن الرفاعي ممكن ولا يشك فيه إلا ذو زبغ وضلالة، أو منافق طبع الله على قلبه، وإنكارها  
يؤدي إلى سوء الخاتمة".

طيب.. متشكرين يا عم الصيادي..  
اذن هسمع وانا ساكت..  
وده كان حالي بالظبط لما زرت مسجد الرفاعي..  
سيبك من ان مسجد الرفاعي مدفون فيه خديو و2 ملوك وشاه.. سيبك من فخامته المبالغ فيها اوى.. سيبك من حكاوي ونفسه الضراير اللى  
كانت السبب في هذا البناء الرائع.. وسيبك كمان من الصليب الكبير على واجهته ومجسم الكنيسة جواه..  
ركز معايا بقي في الحدوتة دى..

خوشيار هانم لما قررت تكيد ضرته.. سابت أرض مصر كلها واختارت المكان ده تحديدا علشان تبني فيه مسجد اعظم واتخن من مسجد ضرته  
الموجود في درب الجماميز.. المكان مكانش فاضي ولا مهجور.. كان في زاوية صغيرة اسمها الزاوية البيضاء.. ويكفي جواره لمسجد السلطان حسن.  
الزاوية البيضاء دى هي مربوط الفرس في قصتنا النهارده.  
الزاوية البيضاء كان مدفون فيها الشيخ على بن احمد عز الدين الصياد.  
أحمد عز الدين الصياد اتولد في العراق.. يبقي من أحفاد الشيخ الرفاعي المؤسس ويصح برضه بيقاله كرامات.. جه على مصر في زمن الناصر  
قلاوون وأصبح من أهل الخطوة.. اتجوز بنت واحد من كبار أمراء المنصور قلاوون الكبير اسمها درية خاتون وخلف منها "على" صاحب حكاية  
ومقام النهارده.

هاتف في المنام زار احمد عز الدين الصياد وأمره بالهجرة من مصر الى سوريا علشان ينشر الطريقة الرفاعية.. الراجل امتثل للأمر وقرر يسب  
مراته الحامل في مصر.. لكن قبل ما يمشى.. جاب عقد جواهر واده لمراته.. وقالها يا درية لو كانت بنت.. خليها تلبسه في رقبته ولو كان ولد خليه  
يلفه حوالين دراعه.. ولو حب يشوفني فيوم من الأيام خليه يفتح الشباك ده ويص.. هيشوفني علطول.  
الله..  
ما علينا.

ماتت درية وهي لسه شباب.. واتربي على عز الدين الصياد عند جدته في بيتها في سوق السلاح.. كبر وبلغ مبلغ الرجال واشتهر عنه التقوي والعلو  
الهمة.. في يوم بكى على وقالها نفسى اشوف ابويا واعرف اهلي.. العجوز تأثرت وبلغته وصية ابوه..  
يا على لو عاوز تشوف ابوك.. بص من الشباك ده..  
وضرب على الشباك وبص منه.. فشاف ابوه.. راح جاي ناطط من الشباك.. لقي نفسه مع ابوه.. في بلد اسمها متكين.

تطلع فين متكين دى بقي؟

في حماة "سوريا".

صلاة النبي أحسن..

حاليا متكين ميقاش اسمها متكين.. بقي اسمها قرية مزار الصياد..

ليبيبيه؟

لأن طبعها فيها مقام أحمد عز الدين الصياد.. أبو الشيخ علي.. الى نط من الشباك من مصر.. نزل في سوريا.  
الشيخ على ظهر على الناس بالحدوته دى وبقي صاحب كرامات زى ابوه.. سماه المصريين الشيخ على أبو شباك ومعروف طبعاً ليه.. لما مات  
دفنوه في ميدان الرملة.. في الزاوية البيضاء.. نفس مكان مسجد الرفاعي بالظبط.. لم يروي عن الشيخ على انه قال كده عن نفسه.. انما هي  
مرويات وقصص متواترة بيضخنها الناس مع الوقت.. لما جت خوشيار هانم تبني المسجد.. خبطت في تقديس المصريين المبالغ فيه أوى  
للشيخ على أبو شباك.. فبدل ما تهدم الزاوية وتستفز الناس.. راحت الولية بانيه عليها مسجد اجدع من مسجد السلطان حسن.  
اكهن الحريم.. كسبت المصريين وفرست ضرته وضمنت لنفسها ولعيالها تاريخ زى الفل.  
متخيلين طبعاً المصريين استقبلوا الخبر ده ازاي وهما فاكرين ان خوشيار هانم بتقدرهم الى درجة إنفاق مبالغ وهمية علشان تبني مسجد فخم  
يليق بالشيخ على أبو شباك الرفاعي.  
الراجل اللى نط من شباك بيته في مصر نزل في سوريا.  
بس كده

مش عارف ليه بيرن في دماغى كلمات صلاح جاهين والحن سيد مكاي..

شفت في منام.. صاحب المقام.. ده ابوه.



ابھه.. ابھه  
ويمامة حايمة عليه تسبح ربها  
يا نور النبي يا نور النبي  
ميلت فوق يده وجيت احبها  
أحبها.. أحبها  
صحوني م النوم خدت بعضي وتني جي  
حييييييييييييييييييييييييييييييييييي

تيجوا معايا شارع المعز؟

في مصر برسباي بقي اسمه سيف الدين برسباي الدقماقي الظاهري.  
مات برقوق وقامت كام عاركة كده من بعده على العرش لحد ما وصل الكرسي للمؤيد شيخ.  
المؤيد كان عنده شعره.. ساعة تروح فيتبسط من برسباي ويوليه على حلب وساعه تيجي فيغضب عليه ويؤمر بسجنه.. وبعدين الشعرة تروح تاني فيفرج عنه ويعمله نائب على دمشق وهوب تيجي تاني فيجيبه من دمشق ويسجنه تاني في مصر.. ويفضل برسباي اسير سجون المؤيد لحد ما المؤيد يموت ويمسك مكانه ابنه العيل شهاب الدين احمد.. وتبقى البلد كلها في ايد الأمير القوي سيف الدين ططر الى فضل يتسحب ويتدحلب لحد ما اتجوز "سعادات" أم السلطان العيل وقعد هو على العرش وبقي الكل في الكل فعليا.. والطبيعي بقي.. ططر نظر السلطان العيل هو وأمه وبقي هو السلطان.. وتاني يوم راح جاي مطلع برسباي من السجن وخلاه دودار السلطنة والحاجات دى.. في لعبة صراع العروش بتاعة الممالك.. برسباي كان ذي بما فيه الكفاية علشان يسبب كل الأمراء الكبار يطحنوا في بعض وفي السلطان لحد ما مات ططر ومسك مكانه ابنه العيل برضه ناصر الدين محمد بن ططر.  
سنة 825 هـ الساحة فاضية من الأمراء الكبار اللهم الا الأمير سيف الدين برسباي.  
الباقي نقدر نخمنه..

لما طلع برسبای علی العرش کان سنه 60 سنه..  
متخیلین یعنی ایه امیر مملوک فی الوقت ده یعیش لحد ما یوصل 60 سنه کامله؟  
ملهاش غیر معنی واحد..

قبرص كان فيها مملكة اسرة لوزينيان "ولاد أبو إسماعيل" الصليبية الي مش عايزه تهدد.. كل شوية تعمل غارات على موانئ المماليك وتقتل وتحرق وتخرّب وتغتصب ستات وحاجه اخر قلة أدب.. بطرس دى لوزينيان "بطرس الأول" مثلاً في زمن الأشرف شعبان هجم على اسكندرية بقواته وقعد 3 أيام يبهدل في البلد وفي الآخر علق الصليبان على المساجد قبل ما يمشى وهو ساب وراه 20 ألف قتيل.

القبارصة اتلموا شوية أيام المؤيد شيخ.. بس رجعوا تاني للشقاوة مع القلق الي حصل بوفاته.. قلبوا المتوسط الى شغل قراصنة وحرب عصابات وتحرش دائم بالمماليك والسفن التجارية الي كانت رايحه جايه في البحر في أيام العز الاقتصادي بتاعة برسباي.

برسباي مكانش عاوز حرب وقلق.. الراجل ده كان بيعب الفلوس جدا وشاطر اوى في كل ما هو مالي.. سواء جمع ضرائب او فتح أسواق او سك عمله.. وهو فاهم كوس اوى ان الحرب ما هي الا محرقة فلوس.. علشان كده حاول أكثر من مره انه يتوصل لاتفاق مع جانوس لوزينيان ملك

قبرص.. ولكن بلا أي فائدة.. جانوس كان مغرور جدا.. حتى انه في يوم خطف سفينتين تجاريتين من البحر كان فيهم اكثر من 100 راجل وصادر كل ما كان فيها من بضائع وفلوس.. وقبل ما برسباي يفوق من الألم ده كان جانوس مهاجم سفينة تانيه متروسة هدايا ونفائس كان باعتها برسباي عربون محبة للسلطان العثماني مراد الثاني "أبو محمد الفاتح".

كده مبدعهاش بقي.. برسباي كان ساكت على قلة الأدب ومطنش.. بس طالما الموضوع وصل للفلوس.. يبقي عض قلبي ولا تعض رغيفي.. برسباي رد الألم لجانوس والقبارصة 3 أقلام ورا بعض بسرعه وعلى غفلة..

- الألم الأول كان بعد حكم برسباي بسنتين.. 10 سفن هجمت فجأة على ليماسول وحرقت 3 سفن كانت بتستعد للقرصنة وخذت كل اللي معاهم وجربوا على اسكندرية.

- الألم الثاني كان بعد الاولاني بكام شهر.. بس المره دى كانوا 40 سفينة معمره بالسلاح.. دمرت القلعة الكبيرة في ليماسول وقتلت 5000 قبرصي ورجعت على مصر ب 1000 اسير متكفتين بالسلاسل.

- الألم الثالث كان للشهرة والسيطرة.. كان بعد الثاني ب 8 شهور.. برسباي عرف ان جانوس لم صحابه بتوع رودس واليونان وعاوز يعمل منظر بس اتعطل لما ظهر الطاعون في قبرص.. برسباي استغل حكاية الطاعون وراح جاى ناطط عليهم ب 180 سفينة خرجت من رشيد على ليماسول عدل.. شعارها كان "حد ليه شوق في حاجه" بصوت المملوك عبد الملك زرزور الظاهري.. برسباي حط عليهم حطة التنين في بلدهم واستولى على الجزيرة كلها بما فيها العاصمة نيقوسيا.. رجعت الحملة على مصر محملة فلوس بالهيل من اللي بيعيها برسباي ومعهاها كمان 3700 اسير فيهم جانوس وصحابة كلهم.

صدق نابليون وهو كذوب لما قال "الهجوم خير وسيلة للدفاع".

في مصر كانت الحفلة كبيرة أوى على جانوس وصحبته.. كتفوههم بالسلاسل وركبوهم الحمير بالمشقلب ولفوا بيهم القاهرة علشان يجرسوهم.. دخل قائد الحملة القلعة على برسباي وهو جارر جانوس من قفاه ورامه تحت رجلين السلطان.. جانوس باس الأرض بين رجلين السلطان وأعلن الولاء والخضوع التام لسلطنة المماليك وفدى نفسه ب 200 ألف دينار ذهب وجزية سنوية قيمتها 20 ألف دينار.. قرر برسباي العفو عنه وتوليته بأسمه على ولاية قبرص.. ومنسيش برسباي برضه حته ذل مملوكي كده في النص.. راح جايب التاج بتاع جانوس ومعلقه على مدخل المدرسة الى لسه بانيها من كام شهر في شارع المعز.

المدرسة الى وقفنا عندها في أول الحكاية..

وفضلت قبرص ولاية من ولايات السلطنة المملوكية في مصر لحد ما دخلها سليم الأول سنة 1516م. دخلة بلدي في زمن السلطان الغوري.

متخيلين أسهم برسباي بقت عامله ازاى بعد العاركة دى؟

الله.. طيب ما برسباي كان كويس اهو.. امال ايه موضوع الروشة والنسوان ده؟

حاضر..

بس بكره بقي علشان طولت النهارده

(يتبع)

لما تقرأ في سيرة الأشرف برسباي.. هيلفت نظرك ان سنين حكمه— على ما فيها من شوية رشوه كده على خفيف — الا انها كانت سنين خير على المصريين.. برسباي نفسه ذكره المؤرخين بكل خير وذكروا حزن الناس عليه واستحسانهم صفاته وخلقه..

اللهم الا سنة واحدة بس ختم بيها 17 سنه عامره على الكرسي..

مممكن نقول معلش.. مرض الموت أكيد بيأثر على عقل الإنسان..

للأسف لأ.. السلطان خد قرار في منتهي الغرابة قبل ما يمرض.. حدث من غرابته لفت نظر ابن تغرى والمقريزي علشان يسجلوه في النجوم الزاهرة والسلوك.

القرار ده كان في رمضان سنة 841 هـ..

طاعون سخيف زار أرض مصر.. مكانش طاعون مهول زى اللى حصل أيام السلطان حسن اه.. انما اهو.. كان بيحصد في أرواح الناس خصوصا الأطفال والعبيد لحد ما بلغ عدد الضحايا 400 نفس بيتصلى عليهم في اليوم الواحد.. كسدت تجارة العبيد تماما لأن الناس كانت خايفة من العدوي.. افتركوا ان الطاعون ده مش بيصيب الا العبيد والجواري بس.

كلية الطب دى نعمه وربنا..

في الوقت ده كان في سنه سنه المؤيد شيخ.. سنه بدأت بخير وقلبت بغم.. في رمضان كان السلطان بيجمع الفقهاء وأهل العلم في القلعة ويختموا صحيح البخاري الى جانب ختم القرآن.. حجه حلوه اهي.. بس الى حصل مع الوقت أن أهل العلم تراجعوا عن الحلقات دى وتصدرها الجهلاء والسفهاء.. تحولت الحلقات من حلقات علم الى حلقات خناق على السفاسف وانتشر فيها التكفير وأصبحت فقرة لأضحاك الأمراء وكبار المماليك.

توك شو يعنى..

في السنة المذكورة انزعج السلطان برسباي من الطاعون.. فقرر انه يستشير الفقهاء في سبب انتشار الطاعون وكيفية مواجهته ولا خاب من استشار.

الله!!

فقهاء ليه يا عم الحاج والدكاترة موجودين!!

وبعدين مين الفقهاء دول؟

بتوع حلقات البخاري!!  
يا لهوي!!!  
بتوع النقاب فرض وللا بدوي والدقن سنة وللا الحاد ونقصر الجلابية وللا نشمر الكم!!!  
أيون.. هما دول حضرتك..  
طب والأطباء واهل العلم الحقيقيين؟؟  
يا عم دول ناس دمهم تقيل وأسئلتهم كثير.. انا ايه اللي يخليني أصدق الحافظ بن حجر وللا ابن العفيف الأسلمي وللا زين الدين خضر وأكذب المملوك سعيد حساسين الظاهري وللا المملوك عبد العاطي كفته الناصري؟  
بقي يبقي عندي الجارية خديجة المغربية وسر خلطة جلب الحبيب.. واسيها واروح البيمارستان المؤيدي؟  
من امتي يا بتوع قصر العيني بيغهموا حاجه.. ده الواحد منهم الكشف بتاعه بيعي ب 300 دينار أشرقي.. يا عم صلي على النبي فقلبك.. الشافي هو الله.  
طيب.. شار بأيه بقي "أهل العلم" على السلطان في مسألة انتشار الطاعون؟  
حبايينا الحلوين لا فض فوهم اجتمعوا وتمخضت أفكارهم دفنها الله واياهم في جهنم على أنه إذا انتشر الزنا تفشي الطاعون.. وكيف لا ينتشر الطاعون والنساء بتحط كحل و"بتمشي" في الأسواق ليل ونهار عيني عينك كده؟؟  
شوف النسوان السفلة..  
بقي بيمشوا في الأسواق كده؟؟  
فين اجوازهم دول ياخويا!!  
النهارده بيمشوا في الأسواق.. مش بعيد بكرة يجروا في الأسواق..  
ما هي زاطت بقي..  
سلم يا رب.. دى حرب على الإسلام لا محالة..  
- طيب نعمل ايه يا أهل العلم؟  
- شوف يا مولانا.. مفيش حل الا أننا نمنع النسوان من الخروج من البيوت.. كفانا مسخره وقلة أدب.. الست ملهاش غير بيتها وجوزها.  
- ودي نعملها ازاي؟  
- جنباك احنا نجيب محتسب ابن حرام ونطلقه على الناس.. وقابل وقعد زياينك يا مولانا.. سلمه انت السلاح وعد الجثث.  
كلام متقلعوش من رجلك الحقيقة..  
الغريب في الأمر ان الهرتله دى لقت طريق الى عقل السلطان برسباي وحطها محل التنفيذ الفعلي..  
وصدر قرار سلطاني يمنع خروج النسوان من البيوت.. النسوان كلهم.. عواجيز وبنات وجواري وارامل ومطلقات ومزوز..  
كله يابا.  
ال "XX" ده منشوفوش في الشارع خالص.  
وعلشان يضمن تنفيذ القرار بحزم وشده.. عين في وظيفة المحتسب واحد اسمه دولات حُجا السيقي.  
مين بقي دولات ده؟  
حسب ما ذكر ابن تُغري عن رأي السلطان برسباي نفسه فيه.. قال "ليس بمسلم ولا يخاف الله".  
دولت حُجا كان مسلم بالاسم بس.. حاجه كده زي سيد القمني مثلاً.. اشتهر عنه الكفر من شدة فسوقه وخروجه علي قواعد الأديان واستهانتة بكل ما هو اخلاقي.  
الله.. ولما هو سمعته كده.. السلطان جابه ليه بقي!!  
ده حتى كده تعيينه في المنصب ده يبقي مخالفة شرعية.  
اه.. بس السلطان عرف ان الراجل ده مع اخلاقه النبيلة دى.. شديد اوى مع النسوان ومش بيحجوا فيه دموع التماسيح بتاعتهم دى.. لما بيشد على الحرمة من دول.. بيطير رقبتها.  
زيي كده مثلاً..  
دولت حُجا زي مكانش محتاج وصاية.. انطلق في الأسواق يبهدل في بنات الناس.. طلق جواسيسه تشوف مين خرجت ومين زارت صحابها  
علشان يجيبها من بيتها ويعاقبها.. يحكى ان ست خالفت القانون وخرجت فشالوها من بيتها على المحتسب علشان تاخذ نصيبها من العقاب..  
الست يا عيني من الرعب عقلها خف.. وواحدة تانية ابنها مات ومقدرتش تحضر دفنته فرمت نفسها من فوق بيتها علشان تقع ميتة في الحال وتحصل الواد.  
طيب.. الحال انصلح لما النسوان اتحبست؟؟  
لا.. دى اتنبيلت زيادة..  
الأسواق فضيت والبضائع كسدت.. حركة البيع والشراء جالها امساك.. بقت الست من دول علشان تشتري حزمة جرجير.. لازم تاخذ اذن كتابي من السلطان شخصياً.. انقطعت زيارة الارحام وعبادة المرضى.. الشوارع مبقاش فيها ولا حطة طرية.. كله شنبات في شنبات.  
ايه الغم ده!!  
نفك اللبلة دى ازاي يا معلمين؟  
دولت حُجا قال احنا ممكن نسيب الجواري يخرجوا يقضوا حاجات البيوت.. وساعات محدده مش طول النهار.. وعلشان نتأكد انهم جواري مش حد متخفي.. نمنع النقاب وكله يبقي سافر.

النقاب!!!  
برضه!!  
(يضحك في قرارة نفسه)  
طيب.. الحال انصلح وللا لسه في نفس النيلة الى مش عايزه تخلص؟  
لا حضرتك.. لسه في نفس النيلة.  
وهنا كان لازم السلطان يتدخل.. كفاية عك بقي.  
وسع ياض منك ليه.. السلطان هيجلها..  
عمل ايه السلطان بقي؟  
انتبه ان الظلم مؤذن بخراب العمران زى ما قال الجلع بتاع تونس ده.. علشان كده هنرفع الظلم.  
افتح يا أبني السجون وأطلق الى فيها.. لوجه الله تعالى.  
كده يا مولانا!!  
نطلق المساجين!!  
ظالم مع مظلوم مع حرامي مع قاتل!!  
ده كلام والنبي!!  
انت عارف الكلام ده عمل ايه في البلد؟  
انتشرت السرقة والخطف وامتنع الناس عن أداء الحقوق.. كل من له دين راح في الوباء وكل من كانت لابسه حثتين صيغه انتتشوا منها في الطريق  
عيني عينك كده.  
وبقت بزمييط.. حتى ان شاعر اسمه الطويل "ده أحمد فؤاد نجم بتاعهم" قال عن السلطان ومجلسه في الوقت ده..  
ولو شاء ربك لخصهم بثلاثة \*\*\* قرون وأذنا وبشق حوافر  
بينما شاعر ثاني اسمه ابن الحسني الطنطاوي الرماح..  
وكأني بسيرة السلطان بلحاً حاضره \*\*\* تقتل وتكسر في رقاب أهل القاهرة.  
تعليق ابن تُغري على الموقف ده يتدرس الصراحة..  
"كل ذلك لعدم أهلية الحكام واستحسان الولاة على الخواطي.. فالحرّة معروفة لو كانت في الخمارة.. والفاجرة معروفة لو كانت في البيت الحرام..  
كل هذا وأمثاله لولاية المناصب غير أهلها"  
طيب خلصت على ايه الليلة دى سعادتك؟  
ولا حاجة.. فضل الحال منيل زى ما هو.. في نفس الشهر يشاء الله ان السلطان يمرض مرضه الأخير.. مرض الموت.. الى كان السبب في ثاني  
أغرب قرار اخده السلطان في حياته.  
الى هو ايه بقي؟  
بكره ان شاء الله..  
(يتبع)

آخر سنين حكم الأشرف برسباي لما ظهر الطاعون انزعج الناس بشده من كمية الموتى.. عجز الأطباء عن إيجاد حلول وكان من الطبيعي تصدر  
الأوطنجية للمشهد.. السلطان نفسه صدق كلام المهايل عن ان خروج النسوان للشوارع هو سبب البلاء وقرر حبس الحريم كلها في البيوت زى  
ما حكينا..

طيب.. عمل ايه ثاني برسباي علشان يحارب الطاعون؟  
بعث منادي يلف في الأسواق يؤمر الناس بصيام 3 أيام والاكتثار من الصدقات والذكر علشان ربنا يرفع البلاء.  
طيب والدكاترة والأدوية.. نعمل فيهم ايه؟  
دول تحطهم في.. عينك.. بصوت المملوك توفيق الدقن البندقاري المؤيدي.  
بس ثانية واحده كده.. هو الطب وقتها كان عامل ازاي؟ الكلام ده قديم جدا.. احنا في سنة 841 هـ.. يعنى من 600 سنة تقريبا.  
600 سنة اه.. بس هذا لا يعني ان مصر كان متخلفة طبياً وقتها..  
قبل الكلام ده ب 200 سنة تقريبا.. المنصور قلاوون كان في الشام ونقح عليه القولون.. ودوه المستشفى النوري في دمشق والراجل رجع مبهور  
بيها.. بعدها قرر ان مصر لازم يبق في فيها حاجة زى كده.. وبالفعل لما رجع بني مستشفى عظيمة جيدة التهوية نظيفة تعزف فيها الموسيقى  
باستمرار.. فيها نظام تسجيل للمرضى لزوم المتابعة ومصنع لتحضير الأدوية.. كمان كان فيها خدمة الزيارات المنزلية للمرضى.. وبالطبع كان فيها  
عدد كبير من الأطباء والتمريض والكتب.  
كتاب تاريخ البيمارستانات في الإسلام هيبهرك جدا على فكره.  
تصدقوا ان المستشفى دى لسه موجودة لحد النهارده في شارع المعز بنفس الاسم؟  
مستشفى رمد قلاوون.. تاريخ الانشاء 1285م.  
طيب وبعد قلاوون؟؟  
المؤيد شيخ هو كمان حط بصمته..

وانت رايح شارع باب الوزير اول ما تدخل في شارع سكة المحجر.. اكسر اول شمال في شارع المارستان.. امشي 50 متر واقف اتفرج على المكان الرائع الى خلص ترميمه قريب.. ارجع بالزمان لورا وتخيّل المكان ده وهو جديد.. خلية نحل مليانه ناس بتعالج وتتعالج من مصر وخارجها. اهو ده بيقى البيمارستان المؤيدي.

يعني الطب كان كويس اهو..

يعنى لما الأشراف برسباي يحصله قلق في معدته.. المفروض يسأل الدكاترة مش إياها.. برسباي فلت من الطاعون اه.. بس حصل في نفس التوقيت انه أكل أكلة مصرية متينة.. طبق كرشه وكوارع من عند حبايب السيدة انما ايه.. من الى وصى عليهم الحكيم لقمان.. أكل من هنا وبعيد عنك مصارينه سابت من هنا.. بقي شويه يسخن وشوية يرجع.. اسهال مستمر وصفار في الوش مع هزال عام في الجسم.. مبقاش قادر يصلب طولته حتى.

كل ده من أكلة كرشه.. ومن غير مميزات كمان!!

امال لو حضر معانا شم النسيم كان حصله ايه!!

ايه العالم الفرافير دى!!

فضل برسباي يصرخ من بطنه ومصارينه لحد ما جابوله وزير الصحة شخصيا علشان يعالجه..

أبو البركات بن عفيف بن وهيب بن يوحنا الملكي الاسلمي.. المعروف بشمس الدين العفيف.. رئيس قبة بيمارستانات مصر.. أشطر دكتور في المنطقة كلها.. راجل علم وسليل أسرة مارست الطب من أيام المارستان القلاووني.. وكان معاه مساعد اقل منه مهاره اسمه زين الدين خضر الإسرائيلي الزوبلي الحكيم.

وطلع الكونصلوتو ده على القلعة يشوف السلطان ماله.

سنة 1931م كان الأستاذ "صبيح عيد محمد" أمين عام المتحف الأسلامي في القاهرة.. أثناء مشاركته في حملة حفائر الفسطاط القديمة لقي ورقه كده مكتوب فيها الآتي.

"الحمد لله وحده..

سفوف يعرف بسفوف الكفاية من ديوان ابن العفيف ريس مرستان مصر..

قال يؤخذ فرض ربع قدح أنيسون مثله شمار مثله كمون كرماني وزن أوقيتين.. كابل وفيه سنانير أوقية بذر كشرت أوقية شامي أوقية لوز أوقيتين تحمص القرض والشمر ويطحنوا ويدق بقية الحوائج وأجمعهم وضمف إليهم من ماء الفجل الرملي ثلاث أواق وماء شمر أخضر مثله وورق حزمين ريحان وورق حزمة نعناع وماء عنب ديب ثلاث أوق ثم ورق حزمة مرسين طري مدقوق وماء كرفس ثلاث أواق فيخلط الجميع ويسقى بهم السفوف ثم يجف ثم يعاد كذلك حتى يشربوا جميع الماء ويضاف إليهم ربع رطل سكر أبيض ويسف منه صباحا ومساء نافع ذلك لداء في الجوف"

ديوان ابن العفيف ده كتاب يجمع كل الوصفات الطبية الى كتبها ابن العفيف في حياته.

الله.. روشة.

طب والنبي هيا.. الخط المهيب ده يقول انها روشة..

سيبك من أسماء المكونات العجيبة.. الروشة بتتعرف من الخط علطول.

الى عنده مجلدات دراسات آثاره وإسلامية الصادر عن متحف الفن الأسلامي يفتح المجلد الثالث هيلالي الروشة وحكايتها منشوره بعنوان "تذكرة دواء نادرة من عصر برسباي".

يعنى برسباي اتعالج بالطب؟؟

اه حضرتك.. خف وبقي زى القرد..

بس يبدو كده ان الدواء أثر على عقله وسبيله "مالخوليا".. فكانت قراراته في أواخر أيامه غريبه أوى..

غير قرار حبس الحريم وإطلاق المساجين.. طلع قرار بنفي كل الكلاب للجيزة علشان صوتها يزعجه.. الناس اتجننت وبقت بتطارده الكلاب في الشوارع علشان تقبض عليها وتأخذ مقابل كل كلب تسلمه للشرطة نصف فضه.

الراجل اتلحس تماما.. وغالبا هو حس بكده..

تقريبا كده كان بيقف قصاد المراية ويقول "بصوت علاء ولي الدين"

انا مش كويس..

انا مش حديد..

انا مش بمب..

وراح مطلع غضبه على الدكاترة الى كتبوله الدواء الى جنته.. امر بتوسيطهم.. يعنى قطعهم نصفين بالسيف من عند الوسط.

كده برضه يا سلطان!!

بقي الناس تعالجتك.. وانت تقتلهم!!

ايه القرار البلحاوى ده!!

الناس غضبت جدا واكثر من الدعاء عليه وتمني زواله.. والي القاهرة رفض حضور المسخرة دى وأصر برسباي على حضوره والا يحصلهم.. ابن العفيف كان ثابت وقت إعدامه بينما زين الدين خضر ملي الدنيا صراخ من كتر خوفه.. ولم يزيد الصراخ برسباي الا إصرار على قتله.

بعد الحادث ده بشهرين برسباي سلم نمر علشان يقابل رب عادل هيسأله بالتأكد عن خيانتة لناس كانت السبب في شفاؤه بأمر الله.

بقي كل ده بسبب أكلة كرشه وكوارع!!

طيب ما نجرب ناخذ واحد صاحبنا عند بحه مثلا.. جازي الفرج ييجي في سندوتش سجق وللا طبق مخاصي.. والحساب عندي والنعمة بس



يُحصل المراد.  
قولوا يارب.  
(تمت)

## السلطان حامد

الحكاية دى ملهاش مصادر كتير.. للدقة أقول ان ملهاش غير مصدر وحيد.. بس قلبي بيقولي انها صح.. في قصص زيتها كتير لها أكثر من مصدر بتدور حوالين نفس الفكرة.. يبقى اشمعنى دى الى هتكون كذب؟

أصل الموضوع كله عبارة ع.....

وللا أقولك.. بلاش مقدمات..

ما تيجوا نشوف.

.....

بص حواليك كده.. شايف احنا فين؟

احنا في الشرقية.. قرية صغيرة اسمها البيروم تتبع مركز فاقوس.. 35 كيلو من الزقازيق.. من عند الصاغة في الزقازيق تاخد يمين مع الطريق.. تطلع

وتنزل الكوبري الى هيقابلك وتكسر شمال علشان تاخد طريق هرية "بتشديد الرائ".. هتعدى هرية رزنه بلد البطل عرابي وبعدين ههيا بلد

الرئيس محمد مرسى وبعدين أبو كبير بلد المحبوب.. ثم البيروم.. حابب كمان اقولك اننا في سنة 1933م. آخر سنين حكم الملك أحمد فؤاد

الأول.

شايف الواد الصغير الحافي ابو طاقية وجلابية ده؟؟

الولد ده اسمه يوسف..

خليله معانا لأن هو بطل القصة بتاعة النهارده.

يوسف كان بيلعب مع العيال في الغيط قريب من الجبانة.. في الجبانة كان موجود مقام له هيبه واحترام كبير في قلوب الناس في بلدهم.. يوسف

مكانش مركز معاه اوى.. تركيزه الأكبر كان في نجاحه في سنة أولى ابتدائي.. هيتعلم ويدخل مدرسة الطب او المهندسخانه في البندر.. هيبقي من

الأكابر وموش بعيد بيبقي باشا يملك اراضى زمام الناحية كله.

جرى يوسف من فرحته يبلغ جده بنجاحه.. جده قاله لزمأ عليك تولع 6 شمعات عند مقام السلطان حامد.. صاحب المقام المهيب في جبانة

بلدهم.

يوسف مكانش مؤمن بخرافات المقامات دى.. بشقاوة العيال قرر انه هيروح المقام بليل.. هيخنصر من ثمن ال 6 شمعات نصه يشتري بيه

كرامله والباقي يولع بيه 3 شمعات بس.. كفايه عليه اوى كده.

من شقاوة يوسف واستهتاره.. راح المقام بليل في الظلام.. اتشعبط على جدران المقام لحد ما وصل للشباك.. مد رقبته يشوف ايه الى جوا..

وفجأة اتخض ولبسه الرعب ووقع على الأرض من هول الصدمة.

شاف ايه يوسف جوا المقام خوفه كده؟

شاف راجل ضخمة الجثة جدا.. رقبته زى رقبة الجمل.. ودراعه عامل زى الشجرة.. اسمر اللون ولا بس عمه خضراء فيها خيط اسود من الخلف..

وييمد راسه ناحيته علشان ياكله.

طلع يوسف يجرى من الرعب وقرر يروح المقام تانى بالنهار يشوف ايه الموضوع ده.. قرر يوسف ان أفضل طريقة لهزيمة الخوف هي مواجهته.

وبالفعل لما راح يوسف بالنهار خد باله ان الى شافه جوا ما هو الا ضريح زى كل الاضرحة.. والعمة الخضراء ما هي الا عمه عادية جدا محطوطة

على عمود خشب لتميز مكان رأس المدفون.. أدرك يوسف ان الى شافه ده ما هو الا مجرد أوهام.. خد باله ان المقام المهيب ده لا يختلف عن

أي مقام تانى من المقامات المنتشرة في مصر..

بس المشوار ده نيه يوسف لحاجه تانية..

لقيمة السلطان حامد نفسه.

خد باله ان الناس في البلد لما تترنق.. تقول مدد يا سلطان حامد.. لما حد يقع في مصيبة ينذر نذر للسلطان حامد.. لما الستات تيجي تفاصل في

الأسعار تقول للبياع بكام دى؟

- ب 10 يا ست

- وكرامة للسلطان حامد؟

- لجل خاطر السلطان ب 8.. بس ليكي انتي ب 9

يوسف انتبه الى ان الحمالين لما ييجوا يشيلوا حاجه ثقيله.. يقولوا ايدك معانا يا سلطان حامد.. الراجل من دول يقول لمراته السلطان حامد

جاني امبارح في المنام وقالى اعمل كذا وكذا.. البلد دى فيها جنون اسمه السلطان حامد.

بدأ يوسف يسأل عن السلطان حامد.. مين هو.. ايه تاريخه.. عمل ايه علشان الهيبة والمحبة والمهابة دى كلها في قلوب الناس.. سأل المعمرين

والمعممين.. سأل خدام المقامات وزوار المقام.. لف ودار بالسؤال لحد ما الناس افتكروه عبيط او كافر وبقي الرد الوحيد الجاهز لأسئلة يوسف

عن السلطان حامد هو انه كان راجل تقى وورع وبتاع ريناء.. ولى من أولياء الله الصالحين.

الله.. طب لما هو كده.. امال مقامه مش فخم ليه ولا مكسى بالحري ولا مفروش بالسجاد الغالي زى مقام السيدة زينب او سيدنا الحسين؟

لا اجابه.

كل قرية مصرية فيها "الأحمدي أفندي"..

رجل ثمانيني شديد الذكاء يعرف كل شيء عن كل شيء.. اول من لبس البدلة والطربوش في البلد.. موظف ميرى كان بيسافر القاهرة علطول

ويركب الوابور من غير ما يخاف.. راجل طول الليل قاعد ماسك الكتب وبالنهار بيلف على كام فدان عايش منهم.. بيمشي وسطهم بهيبه ووقار عصايته تشق طريقها قبله والناس حواليه تسلم وتبوس ايديه.

يوسف قرر انه يسأل الأحمدي أفندي عن السلطان حامد.. لو مش هو الى هيعرف.. امال مين؟

وكانت إجابة الأحمدي أفندي صادمة ليوسف.

الأحمدي أفندي قال ان ده لا سلطان ولا دياولو.. ولا حتى اسمه ينفع سلطان.. هو يعرف السلطان الغوري.. السلطان عبد الحميد.. انما حامد ده كان صعلوك وميديش العهد للنسوان الا في اوض ضلمه وهو سكران طينه بتأثير السبرتو.

اوبا.. ايه الكلام ده بقي!!

معقول يكون في ناس بتنذر نذور لواحد.. بينما هو في الواقع خياص!!

الأحمدي أفندي أشعل نار الفضول بزيادة عند يوسف.. الفكرة اللي بدأت ب 3 شمعات نذر.. اصحبت وسواس قهري مسيطر على الطفل الصغير.. نار الفضول اشتعلت في عقل الصبي ولم يزيدها إجابات أهل البلد الا اشتعالا.

الى يقول انه من نسل أبو زيد الهلالي.. والى يقول انه كان ولي من أولياء الله.. والى يقول انه كان سلطان بحق وحقيق أوصى بدفنه في كذا مكان علشان اعداؤه معرفوش مكانه.. الناس الطيبين كانوا بيقلوا انهم اتولدوا لقوا مقام السلطان حامد.. يبي هو خلاص.. السلطان حامد.

لحد ما فيوم قبل موسم الحج.. في مسجد القرية الكبير.. قابل يوسف واحد غريب..

غريب في لبسه..

غريب في سلوكه..

غريب في كلامه..

الغريب قال انه من الفيوم.. خرج بقاله 50 يوم ماشى على رجله في حب الله لزيارة "أضرحة" السلطان حامد.. ولسه قصاده كمان 100 يوم هيمشيهم على رجلة علشان يتم مهمته.

كان من عادة اهل القرية استضافة الأغراب.. الاكل والشاي والقهوة والدخان في بيوت الفلاحين متاحة للكل.. البيوت تقريبا من غير أبواب.. كلمة أهلا وسهلا زارنا النبي على كل لسان..

ومن حظ يوسف ان الغريب تمت استضافته عندهم في البيت.. وبدأ يوسف يسأله عن لبسه وشكله وسلوكه وان كان يتبع طريقه معنيه وللا لأ.. وبدأ الغريب يحكي..

هو لا ينتمي الى طريقه ولا جماعه معنيه.. هو بس من أولاد السلطان حامد..

يا الله.. شكلها هتفرج اهي.. واحد أخيرا يعرف حاجه عن الشخصية الوهمية دى..

عرف يوسف من الغريب ان السلطان حامد كان شخصية حقيقية.. بطل جبار حارب الأعداء.. ثبت ولم يهرب في أي معركة قصاد الكفار.. وقف بطولة لوحده وقالهم مش هتدخلوا البلد دى الا على جثتي.

ايه الإحباط ده!!

واحد حارب الأعداء!!

وحواليه كل الهالة دى!!

ييجي ايه ده جمب عراي وللا طومان باي.. هيبقي يعنى اجدع من سعد باشا؟

لم يلتفت الغريب لسخرية يوسف واستمر في سرد سيرة السلطان حامد..

قال ان الأعداء لما لقوه فلاح بجلاية استهزأوا بيه.. حاولوا يوقعوه على الأرض.. معرفوش.. لقوه واقف رجله غارزه في الأرض وثابت زى الجبل وطويل زى النخلة.. ويقدر يكسر اجدعها رقبة بايدته من غير اى مجهود.. بأت محاولاتهم كلها بالفشل وسقط القتلى تحت رجلين السلطان حامد بالعشرات..

لحد ما طلع واحد من عواجز الأعداء وقالهم انا عرفت السر.. الراجل ده علشان يتقتل.. لازم ننجسه.. علشان السيف يأثر فيه.. لازم طهارة جسمه تروح..

وراح مقرب منه وتبول على رجله اليمين..

وقطع الأعداء رجله اليمين..

وتحداهم السلطان حامد بأن لسه عنده رجل ثانية..

فالعجوز تبول على رجلة الثانية..

وقطعوا رجله الثانية..

فقالهم طظ فيكو.. عندي ايدين..

فتبولوا على ايديه..

وقطعوا ايده اليمين ثم ايده الشمال..

واستمر الأعداء يتبولوا على أجزاء جسم السلطان حامد ويقطعوها.. وهو واقف زى الجبل..

لحد ما حصلت المعجزة..

معجزة ايه.. هو في اكر من كده معجزات!!

يووه.. انت لسه شفت حاجه..

قالك يا سيدي ان كل جزء سقط من جسم السلطان حامد.. تحول الى رجل بالغ مسلح وهجم على الكفار وهو يصرخ.. انا ابن ابونا حامد.. انا السلطان حامد يا كفار.. كل ده والسلطان حامد الأصلي ثابت وهما بيخبطوا جسمه ويبجروا ورا كل جزء اتقطع لحد ما قدروا يحصلوا راسه في الشام.. وعلى ما حرقوها.. كان ولادة في مصر بقوا الاف مؤلفه حاربوا العدوين الكفار وطردوهم شر طرده. وتوقفت حكايات الغريب..

سقط رأسه على صدره وعلى صوت شخيره وغط في نوم عميق.. ساب يوسف بيضرب اخماس في اسداس من هول الصدمة وقوة الخرافة. انصرف الغريب يكمل رحلته في حب الله.. واستمر الناس في نذورهم للسلطان حامد.. وكبر يوسف ودخل كلية الطب وبقي اسمه الدكتور يوسف. الدكتور يوسف ادريس..

أمير القصة القصيرة..

كبر يوسف وكبرت معه رغبته المحمومة في الكشف عن أصل السلطان حامد.

عمل ايه بقي الطفل الفلاح ابن البيروم الى بقي الدكتور يوسف وهيبقي بكره من علامات الأدب في مصر؟

هل قدر يعرف مين هو السلطان حامد؟

ايه علاقة بونا برته باللبلة دي؟؟

(يتبع)

عرفنا ان الطفل يوسف كبر في بلدهم البيروم "شرقية" حواليين مقام لسلطان مجهول الناس بتقدسه اسمه السلطان حامد.. يوسف دخل مدرسة الطب وبقي دكتور..

الدكتور يوسف ادريس..

بيحكي الدكتور يوسف ادريس عن معاناته مع قصة السلطان حامد.. وازاي لف مكتبات مصر وحفيت رجلية بحثا عن تاريخ سلطان حكم مصر اسمه حامد.. اطلع على تاريخ سلاطين مصر كلها من المماليك والعثمانيين وغيرهم.. كان بيقضى الساعات الطويلة في مكتبة جامعة القاهرة.. دار الكتب.. تقرب من أساتذة التاريخ المصري في الجامعات علشان يطلع منهم بأى حاجه عن السلطان حامد ده..

وللأسف.. كل جهوده راحت سدى..

مفيش ولا ريع معلومة عن السلطان حامد.

ولا الهوا..

وكل ما يدور زيادة.. يزداد عنده إحساس الباحث عن السراب.. مطارد عروس البحور والغول والعنقاء..

لحد ما جه الفرج أخيرا على ايدين مدام انترناسيونال..

مين بقي الست دي؟

اقولك يا سيدي..

بعد عدوان 1956م. يوسف ادريس زار الإسماعيلية بالصدفة.. وهناك عزم عليه واحد من اصدقاءه الأطباء الإقامة معه في سكن الأطباء في المستشفى.. توفير نفقات وكده.. وهناك قابل الدكتور يوسف مدام "جين" او مدام انترناسيونال زى ما هي سمت نفسها.

مدام جين قالت انها هولندية.. بس معاها باسيور من دوقية لوكسمبورج..

قالت انها عايشه في باريس.. بس هي كانت جايه من جنوب أفريقيا على باخره سويدية..

متجوزه مهندس فحم تشيكوسلوفاكي بيشتغل في مناجم بولندا ورايحه تقابله في باريس..

الباحرة بتاعة مدام جين اتحشرت في القنال لما قامت الحرب.. مدام جين نفسها نقلوها للمستشفى في الإسماعيلية بسبب محاولتها الانتحار

بالأسيرين على السفينة.. حتى حكاية الانتحار الى قالتها فيها حاجات مش طبيعية.. قصتها بتقول انها بلغت كم مهول من الاسيرين وقالت

للعاملين على السفينة ان قلبها هيقف إذا متعملهاش "رسم قلب" في الحال.. وبما أن المركب مفياش جهاز رسم قلب.. يبقى مفيش حل غير

انهم ينقلوها من الباخرة الى مستشفى الإسماعيلية العام.. وهناك تعرفت بالدكتور يوسف علشان يفهم من حكاويها انها لا انتحرت ولا بطيخ..

هي بس زارت 39 مدينة ولما عرفت انها في الإسماعيلية راحت عاملة التمثيلية دي علشان ترجع تحكي لأصحابها عن المدينة رقم 40 في قائمة

زياراتها.

ايه الولية دي!!

مش عارف ليه اول ما قرئت الجزء ده.. افتكرت مسلسل رأفت الهجان.. الحلقات الأولى لما قبضوا على الصعلوك رأفت وجابوله محسن ممتاز

علشان يتفرج على مهاراته الثعلبية في المراوغة.. مشهد قسم الشرطة وهما مش عارفين ان كان احمد العلابي وللا جون برات وللا دانييل مارتان

وللا ليفي كوهين وللا مين بالضبط.

المهم ان العلاقة توطدت بين مدام جين وبين يوسفنا.. يبدو كده ان جو في شبابه كان ذئب حبتين.. مره جين انترناسيونال ومرة يعلق نجاة

الصغيرة من كامل الشناوي ويجرح قلبه علشان كامل أبو قلب حنين ينكد علينا بلا تكذي.. عينيه الخضراء شكلها كانت لا مستقيمه ولا فحالتها..

كان مصطفى أبو حجر في نفسه كده.

أصبح السيناريو اليومي لمدام جين في المستشفى هو قلق مستمر علشان تطلب الدكتور صديق يوسف ادريس.. كل شويه شكوى شكل.. مره

احتباس في البول.. مره مغص.. مره اسهال.. شويه عايزه حد يلعبها حواجه.. عامله زى ما كنا بنعمل كده مع اهلينا أيام المذاكرة لما بتهجم

علينا كل امراض الدنيا يوم السبت وتروح لوحدها يوم الخميس.. وكل شويه ييجي الدكتور ومعاها الاديب الحكواتي.. يشبط الاتنين في بعض..

ويسيههم يروح يشوف عيانيته.

حكايها يوسف ادريس عن موضوع السلطان حامد وبهذلتة في البحث عن تاريخه.. حكاياها ازاى أصبح زبون دائم لكل مكتبات مصر علشان يلاقي حاجه بتتكلم عن السلطان الغامض.. حكاياها ازاى بقي مضحكة صحابه الى كل ما يشوفوه يألسوا عليه وعلى رغبته المحمومة في البحث عن سلطان لم يجلس على عرش مصر يوما.

والستات تعز الحكاوي دى جدا..

لحد ما يوم زهقوا منها في المستشفى لما لقوها بتستهيل.. شالوها هيللا بيللا ورموها في المركب بتاعتها.. ياللا يا ولية على بلدكوا مش ناقصه خوتة دماغ.. فاضيين احنا لحكاوي النسوان الفاضية دى!!

وسابت مدام جين مصر.. بس قبل ما تمشى خدت عنوان يوسف ادريس وقررت ان الصداقة تستمر بالمراسلة.. الناس دى لو عندها فيس بوك وقتها كان زمانها بقت هي الكراش بتاعه وكل شوية تعملة منشن وللا بوك في الصفحات إياها.. وانبوكس بقي وحركات ولايك وشير وليله. رجع يوسف ادريس على شغله في القاهرة.. عاد الباحث الى المكتبات والتاريخ يبحث كالمجنون عن سلطان مش موجود في الوجود.. شغل الصبح.. مكتبات بعد الظهر.. جوابات ومراسلات وبحث في المساء.. ينام ويصحي علشان يبدأ نفس الفيلم المكرر كل يوم.

وفي يوم بيفر الدكتور يوسف في جواباته.. لقي جواب جاى من بره عليه طابع أجنبي..

اسم الراسل.. مدام جين عبد المتعال الحلواني.. عطفة فرانسوا قصاص محل عصير ام جيروم.. منشية باريس.

الله.. دى مدام انترناسيونال.

يهذك ولية.. انتى لسه عايشه!!!

مدام جين مش ناسية الصديق المصري ولا قضية حياته.. قررت هي وصاحباتها يساعده في البحث عن اى حاجه ممكن توصله لسيرة السلطان المجهول.. رأيي الشخصي ان النسوان الفاضية دى لو توظفها صح.. هتطلع من وراها بمصالح عظيمه.. جرب كده تطلب من مراتك تدورك عن القصة الحقيقية لأحمد المذكور في مأثورة "علمي العوم والننى يا أحمد" واحذفها كتاب السلوك بتاع المقريري مع كلمتين تشجيع من نوعية انا عارف ان محدش غيرك هيقدر يطلع الليلة دى.. و100% هترجعلك بمين هو أحمد وأصله وفصله واتجوز مين وامنى وطلقها ليه كمان والقائمة كانت بكام.

بس السؤال هنا..

واحد هولندية لكسمبورجية متجوزه بولندي وعائشه في فرنسا.. ايه الى تقدر تعملة في رحلة البحث عن سلطان مجهول في بلد موجود في قارة تانيه؟

هو انا لو حد طلب منى اعرف مين هو اول واحد ابتكر لبس الجيبات المقلمة في اسكتلندا.. هعرف منين!!

ده انا لو حاوي يا جدعان..

مش شايف أي رابط منطقي الحقيقة..

لكن نفكر مع بعض كده..

مصر.. فرنسا.. الحملة الفرنسية.. علماء الاثار والمؤرخين الفرنسيين.. شامبليون.. كتاب وصف مصر.. هنري لورنس.. تيودور لاسكارس.. روجيه كليمان..

اقفش.. حلق يا جلع..

أقف عند روجيه كليمان وقرب العدسة شويه.. زووم يا معلم على الاسم حبتين كده..

روجيه كليمان بقى واحد من مؤرخين الحملة الفرنسية المعاصرين.. عالم آثار يحمل دكتوراه في القانون.. جه مصر مع بونابرتة علشان يسجل ويدون ويأرخ.. بعد ما الحملة خرجت من مصر تقشر بطاطس.. كل واحد من العيال دى عمل مذكراته ونشرها في كتب علشان يطلع اى سبوبة من ورا الحملة الفاشلة دى.. مش بعيد روجيه كليمان ده يكون منهم.

وللا ايه؟؟

ده بالظبط الى قالته مدام جين ليوسف ادريس في الجواب.. وقعت بالصدفة على كتاب يحمل اسم روجيه كليمان.. الكتاب عبارة عن 10 جوابات بعثهم روجيه كليمان لصديقة المقرب جي دى موران.. مين جي دى موران ده.. الله اعلم.. بس الى نعرفه ان عالم كبير من متخصصي المخطوطات في أكاديمي فرانسيز هو الى حقق في صحة الخطابات دى وقال انها أصلية سليمة.. بقول آخر نقدر نقول ان الكتاب ده بما يحتويه من خطابات يعد وثيقة تاريخية مهمه جدا عن فترة الحملة الفرنسية على مصر.

مفهمناش برضه.. ايه علاقة السلطان حامد بالليلة دى؟

مدام جين بتقول ليوسف ادريس في الجواب انها قرأت شيء ما عن شخص يدعى حامد في الكتاب ده.. هل هو الى انت بتدور عليه؟ مرسل اليك يا عزيزي يوسف الصفحة الخاصة بالموضوع من الكتاب.. انتزعتها من اهلك.. أرجوك اقرأها وأخبرني على الفور بما توصلت اليه..

وختمت الجواب بالتوقيع..

عزيزتك.. جين.

(\*) ملحوظة: يوسف.. هل توجد في مصر بلدة اسمها شطانونوف بالفعل؟

ملفتش نظري انا في الليلة دى الا انها انتزعت الورقة من الكتاب.. إلهي يزعوا سنانك من حنكك يا بعيد.. هو الكتب يتعمل فيها كده!!

وبعدين ايه شغل المحن ده.. انتزعتها من اهلك.. عزيزتك مش عارف ايه.. ما تتلمي يا ولية انتى في عصمة راجل.

الكتاب كان بالفرنساوي.. وعلاقة يوسف ادريس بالفرنساوي زى علاقة السيسي بالإنجازات كده.. حاجه آخر بلج.. الطبيعي انه ياخذ الصفحة

لحد من الى يعرفوا فرنساوي.. العيال الى بيتكلموا بالطريقة النواعم دى.. عافينا يارب من فرفة فرنساوي وأهله.. كنت بحس بالحر ج وانا

بتكلم فرنساوي في مأموريات الشغل في كوت ديفوار او غانا.. منها لله الحوجه.

المهم ان يوسف ادريس نجح في ترجمة الصفحة..

وقرأ ما كتبه المؤرخ روجيه كليمان..

وخذ عندك..

(يتبع)

من الأجزاء الى فاتت عرفنا ان الطفل يوسف ادريس نشأ في قرية اسمها البيروم.. لغز طفولته كان مقام لواحد مجهول اسمه السلطان حامد.. كبر يوسف وتخرج في كلية الطب وفضلت محاولاته مستمرة لسبر اغوار اللغز ده.. حط القدر في طريقة مدام انترناسيونال الى وقعت على كتاب يعد مخطوطة أثرية يحتوي على مراسلات واحد من مؤرخي الحملة الفرنسية اسمه روجيه كليمان..

الجزء الثاني في الرابط ده ومنه الى الجزء الأول.

[theater&type=3&set=a.121934270629&https://www.facebook.com/photo.php?fbid=10156548449395630](https://www.facebook.com/photo.php?fbid=10156548449395630&set=a.121934270629&type=3)

لقي يوسف ايه بقي في الصفحة المقطوعة من الكتاب؟

.....

بادئاً ذي بدئ كده مينفعش اقولك الخطاب مكتوب فيه ايه قبل ما انقلك مشاعر واحساس كاتب الخطاب وبعض المواصفات عنه وعن حياته.. صدقني.. هتفرق كثير اوى.

الدكتور روجيه كليمان واحد من الفرنسيين الى ندهتهم نداة مصر.. بخط ايده هو كتب انه جه مصر معتدي وانه غير مقتنع بكل مبادئ الحملة الفرنسية المعلنة.. كان فاكراً انه يحمل شعلة الحضارة والتنوير لشعب من شعوب افريقيا المظلمة عبدة الأحجار الراقصين حوالين النار آكلي لحوم البشر.. لكنه فوجئ بشعب يحمل على اكتافه من الحضارة الاف السنين وفي نفسه من التحضر والرقى ما يذوب امامه الاتيكيت الفرنسي خجلاً.. ده الكلام ده الى كاتبه روجيه كليمان بنفسه مش انا.. وان الشعب ده وان كان سهل الغزو جداً.. لكن عمر المشكلة ما كانت في الغزو.. المشكلة هي الخروج من البلد دى ومن سيطرتها وتأثيرها على الغزاة.. الشعب او الفلاحين خصوصاً عاملين زى مطحنة الدقيق القديمة.. يستقبل كل أنواع الغزاة.. يطحنهم.. وزى ما الدقيق بيخرج من المطحنة ناعم.. الغزاة بيخرجوا من مصر غير ما دخلوا خالص.. ده ان خرجوا أساساً.. لما تقرأ الفرق بين وصفة للمماليك ووصفة للفلاحين.. تستغرب ازاى المماليك فضلوا كاتمين كل المدة دى على نفس الفلاحين بيلموا منهم ضرائب.. لما تلاقى انطباع الخوافة عن الفلاح انه طيب الى درجة تخليك تنخدع في طيبته وتفتكره عبيط تقدر تسكه على قفاه وتفاجئ انه أسد وقت اللزوم.. لما تقرأ مقارنته الدائمة بين الفلاح الطيب مكسور النظرات وبين الجندي الفرنسي المدجج بالسلاح وسخريته الدائمة من الجيش الفرنسي ومدحه الدائم للشخصية المصرية.. تستغرب جداً وينتابك فضول شديد علشان تسأل..

هو الراجل ده حصلة ايه في مصر بالظبط؟

أتكلم الدكتور كليمان عن نوع من البشر اسمه "الفلاحين".. أسهب في وصف طيبتهم وخجلهم وقوتهم وذكايتهم الفطري.. اقطع درايعي ان الراجل ده يا اما كان يينقل كلامه عن مصر وفلاحيتها من المطرب محمد نوح بتاع مدد مدد شدي حيلك يا بلد.. يا اما كان معانا في مدرسة سعيد العريان الإعدادية في طنطا وكان بياخد درس عربي عند استاد محمد سمية تحديداً.. علشان يكتب الكلام الى هو كتبه ده.

الراجل ده سيسي في نفسه اوى..

اختصاراً.. روجيه كليمان تحول الى مجذوب من مجاذيب مصر.. واحد جه يعلقها.. فلقى نفسه متدبس وقاعد عند المأذون بيكتب الكتاب ويمضي على قائمة هتحبسه لو قرر يطلق.. لو أشعلت فضولك عنه.. تقدر تقرأ قصته الكاملة في قصة سره البائع في المجموعة القصصية حادثة شرف للدكتور يوسف ادريس.

طيب.. ده الدكتور روجيه كليمان.. نرجع بقي للجواب الى بعته لصديقة مسيو روان ونشوف قال ايه خلي مدام انترناسيونال تقطع الصفحة دى من الكتاب وتبعته ليوست ادريس؟

الخطاب مؤرخ بتاريخ 20-يونيو-1801م. يعنى قبل 3 شهور من خروج الفرنسيين من مصر.. نقدر نعتبر الخطاب ده ملخص لكل الأحوال الى شافها الفرنسيين عندنا.

ازاى؟

بيحكى الدكتور كليمان انه كان من ضمن علماء حملة بونايرته المكلفين بدراسة أحوال الشعب وتاريخه.. كان من حظه الإقامة في دلتا النيل.. في قرية اسمها "كفر شندي" كانت تحتوي على بقايا قلعة قديمة بناها المماليك والفرنسيين هدوها وبنوا مكانها قلعة جديدة كبيرة سموها "شاتو نوفو" كانت مقر إقامة الجيش الفرنسي في الدلتا.. وبيسخر الدكتور كليمان من الفرنسيين وبيقول ان الفلاحين متقبلوش اسم "شاتو نوفو" وحرفوه الى شطانوف.. وهو ده الى نجح فيه الفرنسيين في 3 سنين في مصر.. إطلاق الأسماء على الأماكن وبس.. اكاد اجزم انى سمعت ضحكة الدكتور كليمان الساخرة وانا بقرأ المقطع ده.

وهناك.. في كفر شندي الى أصبحت شاتو نوفو او شطانوف.. حصلت أحداث قصة السلطان حامد.

بيحكى الخوافة ان حامد كان مجرد فلاح عادي جداً.. لا حد يعرفه ولا حد مهتم بيه.. مجرد واحد من آلاف يحملوا البشرة السمراء المميزة بلفحة الشمس.. طويل القامة والأنف.. يزرع الأرض ويصلي لربنا في الجامع.. لا يحمل اى شيء مميز في شخصيته او جسده الا انه "داقق عصافير" جمب حاجبه الشمال علشان تقوى البصر.. زى ما كانت الناس معتقده وقتها في الوشم ده.. ونص بنصره الايسر مقطوع.

وفي ظرف شهور تحول حامد من "نكره" الى اسطورة.

اسطورة صنعها الفرنسيين بنفسهم دون قصد.

ازاى؟



قائد قلعة شاتو نوفوو كان اسمة الجنرال بيلو.. الراجل ده كان عبيط ومتغطرس لما خالف تعليمات نابليون بعدم الاحتكاك بالمواطنين.. لو قريت تاريخ الجبرتي هتعدز نابليون الحقيقة.. هو قدر يهزم المماليك بدون مجهود يذكر اه.. انما المجاورين والفتوات والفلاحين المصريين زرعوله مسامير فوق كرسي الحكم.. مسامير قطعت كل بناطيله وعورته في مكان حساس.. خلوه حاجه كده زى ذلك المدارس الاميري في مصر. واحد من عسكر الجنرال بيلو كان ماشى في شطانوف.. ويبدو كده ان مشيه كان بطل.. ممكن يكون ضحك مع البحر للفلاجات وهي نازله تتدلع تملي القلل.. او يكون اصطاد بط وحمام واتسبب في قلق زى صاحبة عسكري كرومر بتاع دنشواي.. المهم ان اليوم ده في الآخر انتهى ان عسكري الفرنسي قتل فلاح من البلد وجري يستخي في القلعة.

وكانت الحادثة دى هي الفتيل الى فجر كل الأحداث الى حصلت وانتهت في النهاية بخروج الفرنسي من مصر مصحوبين باللعنات. نفس الفلاحين الى وصفهم كليمان انهم زى الديوك مع بعض وعندهم حصيلة مهولة من الشتائم البذيئة واوصاف مهينة بيستخدموها مع بعض دايمًا. تحولوا الى بنبان مرصوص يشد بعضه بعضًا.. لموا بعض بربطة المعلم وطلعوا على قلعة شاتو نوفوو وهما شالين النابيت ومصممين على حل من اتنين..

- يا تقتلوا العسكري الفرنسي ده

- يا تسلموهولنا نقتله احنا..

القصاص العادل يا ساري عسكر بيلو.

طيب وايه المشكلة في شوية نابيت؟ ما كانوا فتحوا عليهم النار وخلصنا.

خد بقي دى علشان تدهش..

الخواجة بيحكى عن خوف الفرنسي المريض - اى والله المرضى - من فلاح يحمل نبوت.. بيقول ان نابليون لما حب يسيطر على منطقة شرق الدلتا بعث فرقة ال 777 بتاعة الجيش الفرنسي وقتها.. فرقة الهوسيتاليين بتاعة ناديه لطفي.. فرقة كده اسمها فرقة الجنرال مارتن الى طحنت اسبانيا وبولندا والنمسا وإيطاليا.. الفرقة خرجت الفجر بتغني النشيد الوطني الفرنسي "لا مارسيز" وكلهم نشاط وحماس.. رجعت بعد العصر من غير سلاح وهدومها مقطعة ونصها التحتاني بيحجب دم.. نظراتها زائغه وعلى قفا كل واحد فيهم علامة تحتوي على 4 او 5 صواب.. وكل واحد فيهم بيحكى حكاية شكل عن كائنات اسطورية شايله فؤوس ونابيت خشب بيطلعوا فجأة من تحت الأرض وهما بيصرخوا "لهكبر".. ولا يخفي الدكتور كليمان سخريته من عسكر الفرنسي الى رجعوا وهما عاملين بي على نفسهم من الرعب "هو كاتب كده على فكره مش مبالغه مئى".. ولا يخفي أيضا ان بعض العسكر كان بيعملها تاني على نفسه من الرعب وهو بيحكى الى شافوه من الفلاحين الصارخين ب "لهكبر".. حتى ان الأطباء المصاحبين للحملة الفرنسية صنفوا هذا النوع من الخوف المرضي وحطولة مواصفات وأطلقوا عليه اسم علمي.. فلاحفوبيا..

على فكره.. انا بتكلم جد.

تخيل انت بقي حالة جيش نابليون لما سمع عن الى حصل لأقوي فرقه انها بقت مهزاه كده.

عرفت بقي الساري عسكر أصدر أوامر مشدده بعد التعرض للمواطنين ليه؟؟

علشان كان خايف من "لهكبر".

وده بالطبط الى حصل لعساكر بيلو لما شافوا الفلاحين جابين عليهم في قلعة شاتو نوفوو وهما ماسكين السلاح الأسطوري المسمى بالنابيت وبيتهفوا "لهكبر".. كلهم جربوا يحتموا بالقلعة وسابوا الجنرال بيلو لوحده في مواجهة الفلاحين الى مش ممكن ابدأ هيتكاتروا على واحد ويقتلوه..

ظط في الأخلاق الحميدة.

الجنرال بيلو رفض طلبات الفلاحين وامرهم بالانصراف.. مغرور جدا زى ما وصفه الخواجة كليمان.. سمع الفلاحين الكلام ومشوا على مضض.. لكن تاني يوم لقي بيلو واحد من أكبر قواده راجع القلعة على الحصان.. بس راجع جثة متخرمه متفرتكه ومعمول فيها حاجات عيب. اتجنن بيلو وصمم يرد الاعتبار للبدلة الميري الفرنسي.. خد عساكره ونزل البلد يقول جري ايه يا ولاد التيت هو احنا خلاص بقينا هفأ.. طب عليا الهرام من ديني لأقلبها ضلمه أليكو يا فلاهين يا ولاد ال.. ده انا صايح ومقطع مون بطاكتي.. وقال صايح دى بالفرنساوي طبعًا.. بس يبدو كده ان كلامه الفرنسي كان فرافيري في عين الفلاحين.. فمحدث عمله اعتبار.. الامر الى استفزه زيادة وخلاه يرتكب أكبر حماقة حصلت في تاريخ الحملة حسب وصف الخواجة كليمان.

بيلو أخذ شيخ البلد رهينة وأعلن ان مكانش الى قتل العسكري الفرنسي يسلم نفسه في خلال 24 ساعة.. هيقتل شيخ البلد.

وهنا ظهر حامد بمواصفاته الى قلنا عليها قبل كده.

عمل ايه بقي؟

يووه..

بلاوى

(يتبع)

لما الجنرال بيلو احتجز شيخ بلد قرية شطانوف كرهينه في مقابل اعتراف القاتل الحقيقي لواحد من عساكره.. ادعي حامد الفلاح البسيط ان هو الى قتل العسكري الفرنسي.. هو بيقول أي كلام طبعًا.. انما هو تطوع لفدية شيخ البلد بنفسه.. شيخ البلد يعتبر رمز لشطانوف وقتله يعتبر كسر للبلد كلها.. كمان جرت العادة ان شخص ما يفتدي الرهينة.. مش عارف ليه.. ماهو ده واحد وده واحد.. المفروض نركز على تحرير الرهينة مش فديتها.

أيا كان.. دى دماغ حامد.. الفلاح البسيط.

الفرنسييس مسكوا في حامد زى ما يكونوا مسكوا في عضمه.. ولزوم الحبكة عملوله محاكمه وصفها محاميه "الدكتور كليمان راوي الأحداث نفسه" بأنها هزلية وأنه لقي نفسه واقف بيهرتل بأى كلام عن الجمهورية الفرنسية وشعاراتها قصاص قضاة أصدرها الحكم مسبقا بالفعل.

قضاة أصدرها الحكم مسبقاً علشان واحد برئ يسجن او يعدم!!!

انا شفت الفيلم ده فين قبل كده؟

ما علينا..

لم ينتظر الفلاحين الفصل الأخير من المسرحية..

بنفس النبأيت وبالكلمة السحرية "الهكير" هجموا على عسكر الفرنسييس وهيئة المحكمة وحصل زينة كبيرة اوى خلصت في الاخر ان الفلاحين مشبوا والفرنسييس جربوا يستخبوا في القلعة كالعادة..

واختفي حامد.

وانتصر خبت الفلاحين علشان بيلو يتجنن زيادة ويقبض تاني على شيخ البلد بعد حصار عنيف لشطانوف كلها..

بس المرة دى مستناش حد يفديه وقتلة عطلول..

وولعت البلد.

وأدرك بيلو خطؤه بعد انتشار شائعة في البلد بتقول ان حامد حلف براس ابوه انه هيقول بيلو نفسه زى ما هو قتل شيخ البلد.. ولكن فات وقت التراجع.

بيلو على غيابه لم يكن جبان الحقيقة.. كان بيخرج عادي كل يوم يتفقد الامن ويتم على كل شيء في شطانوف بنفسه بعد ما أصاب عساكره الفلاحفوبيا.. لحد ما خرج يوم في دوريته المعتادة ورجع على حصانه وجسمه عامل زى المنخل من كتر الخروم اللي فيه.. الحصان ماشى بالراحة وجثة الجنرال محطولة فوقه بالعرض بترسم على الأرض ورا الحصان خط من دم الجنرال..

خط بيكتب ان حامد نفذ وعده وقتل الجنرال بيلو.

راجل يا حامد.. يا أبو قلب جامد.

واتجنن ساري عسكر..

- موضوع الفلاحين ده زاد عن هذه اوى يا كبير

- وي جينيغال

- خد معاك قوة كفاية وروح أدب شاتو نوفوو.. عرفهم مين هما لا فرانسيز.

- أ فوتر سيرفيس مون جينيغال..

يا لهوي.. كبير بذات نفسيته!!

دى هتبقى مجزرة أكيد.. كبير ده رهيب.. لسه من كام يوم بس مبهدل الشيخ السادات ولا فرق معاه مكانة الراجل عند الناس في مصر..

يا ترى هيعمل ايه في شطانوف وأهلها الغلبة خصوصاً انه لسه واكل علقه محترمه من الحاج مصطفى البشتيلي في بولاق؟

كبير المجنون حاصر البلد كلها وعمل منشورات فيها صورة حامد ومواصفاته.. اسمر وطويل وداقق عصافير ونص صباعه البنصر الشمال مقطوع.. الى هيبليغ عنه او يقتله او يقول معلومات تؤدي الى أي من كليهما هيبقي له مكافأة عظيمة.. مفيش حد في البلد دى ينشغل بحاجه الا البحث عن حامد.. مفيش حاجه في شطانوف هتعمل الا لما حامد يتقتل.. الزمن هيقف هنا لحد ما حامد يتقتل.. الكوكب هيبطل دوران حول الشمس في شطانوف لحد ما رقبة حامد تتطير.

قتل حامد في حد ذاته لم يكن الا رد اعتبار لكرامة الفرنسييس المبعثرة اكثر منه قتل مجرد فلاح.

طيب الفلاحين عملوا ايه؟

بدل ما يخافوا وينكسروا ويقلبوا قطط زى الجماعة بتوع ولا يوم من أيام مبارك.. الموضوع قلب معاهم بعند..

صبح كبير فيوم لقي رجالة البلد كلها دقت عصافير على خدودها "عرفنا العادة دى جت للفلاحين منين؟" وكلهم قطعوا نص صوابعهم البنصر اليسرى.. مش كده وبس.. دول كمان حصودوا محصول الذرة عن طريق قطف الكيزان بس مش حش العود كله زى ما هي العادة.

طب ليه؟

في ارض مستوية زى شطانوف.. مفيش مكان حد يستخفي فيه الا غيطان الذرة.. الفلاحين علشان يدوا الفرصة لحامد يتخفي.. سابوا العيدان زى ما هي وقطفوا الكيزان بس.. رغم ان عيدان الذرة لها أكثر من استخدام وعائد اقتصادي.. لكن في داهية.. المهم نخبي ابننا.

الله.. اللعب هيجلو..

بقت كلمة حامد على كل لسان.. نسبوا لسيرته كل أنواع الاساطير الممكنة.. بقي الواحد يقابل الثاني وبعد السلامات والتحيات يقوله "شفت حامد عمل ايه؟" .. بقي الشبالين يقولوا وقت الشغل "ايدك معانا يا حامد" .. بقي معيار الشجاعة او القوة هو "شجاع زي حامد" او "أطول من حامد" .. كم مهول من الأطفال اتولدت في الفترة دى وسموهم "حامد" .. الشيوخ في المساجد بقت تختم الاذان بجملة "اللهم اني لك.. حامد" ..

العيال الصغيرة بقت تجري ورا عسكر كبير في البلد وهي بتهتف حامد اهو.. اوعى حامد جاي.. والعسكر تسمع اسم حامد تتنفض وتستخفي من الرعب.. والعيال تضحك.. تحول اسم حامد من اسم لمجرد فلاح بسيط الى حاجه كده زى اررررررركب الهوا الى بتلعب بيها مع والدتك او مراتك في أيام معينه علشان تضحك على منظرها وهي بتنتظ مفزوعة من الخضة.

مش كده وبس..

الفلاحين امعانا في غيظ كبير.. سموه السلطان حامد.

وانتشرت سيرة السلطان حامد من شطانوف الى باقي قرى المنوفية والدلتا والقاهرة والإسكندرية والصعيد.. أعلنت كل قرية مصرية ان فيها بيت

مفروش و بنت بنوت "عروسة" جاهزين لحامد لو يشرف بلدهم..

فاكرين الراجل الدرويش غريب الاطوار الى قابله يوسف ادريس في اول الحكاية وقاله احنا أولاد حامد؟

فاكرين الأسطورة الى قالت ان كل جزء اتقطع منه تحول الى رجل أصبح من أولاد حامد وفضل يحارب الكفار؟

عرفتوا مين هما الكفار ومين هما أولاد حامد وازاي نشأت أسطورة أولاده؟

كل ما تزيد الاحداث.. كليبر يزداد جنون ودموية.. بقي بيقتل بالشبه ولمجرد الشك.. وكل فلاح يقتله يقتل قصاده عسكري من عنده.. وما زال حامد عامل زي الزئبق.. تحولت شطانوف وقرى مصر الى حوامد بالهبل.. زى ما تكون كل بلد اتكسفت ان الثورة تطلع من المنايفه وهما لأ.

وقرأ نابليون الليلة بدري وعرف ان ملوش أكل عيش في البلد دى.. وقرر يرجع بلدهم ويسيب كل حاجه في ايد كليبر.

الله أكبر.. حامد هزم نابليون..

بس كليبر لسه مصمم..

في يوم كان في طابط فرنساوي بيلف في شطانوف يتمم على الأمن.. لمح حامد من بعيد وعرفه لأنه كان من حراسة الشخصيين يوم محاكمته الهزلية.. طلع الفرير وضربه عيارين بدون تردد.. وقع حامد غرقان في دمه وطارت الاخبار السعيدة للجنرال الجديد الدموي.

وابتهج الجنرال بالخبر ووزع مكافآت جنونية على عساكره.. ونام لمدة ليلة واحده بس قرير العين زى ما حكي الخواجة كليمان.

كده منطقي على فكرة..

وارد ان الفلاح البسيط يدوخ العساكر اه.. بس مش منطقي انه يهزمهم..

ممکن عمر المختار يسبب خسائر للطلائنة ماشي.. انما كلمة الفصل مينفعش تكون لفرد قصاص جيش نظامي..

ممکن جيفارا بتحول بحرب العصابات الى ايقونة ثورية توقع المحتل.. لكنه هو لازم يتقتل..

كليبر كان فاكرك الحكاية خلصت على كده.. زى أي مغرور مكانش متصور ان الحكاية بدأت.

قتل حامد كان له أثر جنوني من الغضب في ربوع مصر.. خالد سعيد عمره ما كان فرد واحد علشان تقول كلب وراح.. خرج أهل شطانوف كلهم وحرقوا القلعة الجديدة باللي فيها.. ولعت ثورة القاهرة الثانية.. أعلن المماليك استقلال الصعيد.. وأصبح العساكر مش بيشفوا في احلامهم الا حرقهم احياء على ايدين الفلاحين.. الفلاحفويا زادت عندهم بصورة جنونية بالرغم من أوامر كليبر غير المنتهية وشحنهم المعنوي المستمر.

الموقف بقي عامل زى صواريخ حرب ايطاليا كده..

طب وحامد.. حصل فيه ايه؟

الفلاحين دفنوه مطرح ما مات وعملوا فوق قبره قبة كبيره مع الوقت أصبحت مقام له زوار بالالاف من كل ربوع مصر.. واشتهر المقام باسم مقام السلطان حامد.

كل ده وكليبر بيتفرج ويتجنن.. كان فاكرك ان قتل الشخص هيقضى على الأسطورة.. لكنه اكتشف ان قتلة زاد القصص كثافة والثورة اشتعالا والاساطير سخونة.. بدل ما كان بيطارد حامد واحد.. أصبح بيطارد الالف الحوامد في معركة خاسرة.

ازاي هتقضى على الأسطورة في النفوس؟

لما الموقف انفجر كده.. كليبر ازداد دموية وجنون وراح جاي مخرج جثة حامد ورماها في النيل.. اهو.. باللا بقي وروني هتعملوا مقام في النيل ازاي.

والفلاحين مش بيغلبوا..

في ظلمة الليل نزلوا النيل وطلعوا جثة حامد.. وفي غضون ساعات.. بنوا في نفس المكان ضريح تاني وقبة أكبر من الاولانية وسموها مقام السلطان حامد برضه.

وطلع الصباح على كليبر ولقى 2 ضريح للسلطان حامد بدل واحد كان عاملة خرم في دماغه.

دى مسألة عند بقي!!

طيب ماشي.. هنشوف انا وللا انتو يا فلاهين..

يا فرانسوا.. طلع جثة حامد من المقام الجديد وقطعها قطع صغيره واري كل قطعه في بلد مختلفة.. يبقوا يوروني شطارتهم بقي.

ونفذ فرانسوا الأمر..

واتقطعت جثة السلطان حامد وتفرقت بين ربوع مصر.

مش ده برضه الى عمله ست مع اخوه اوزوريس في الأسطورة القديمة؟

بس دوكتها كانت اسطورة.. انما حامد حقيقة.. الحكاية دى بتتحكى من واحد من المعاصرين العلمانيين.. الناس دى ملهاش في الخرافات ولا شغل الدروشة..

طيب.. خلصنا على كده يا فلاهين وللا لسه يا ما في الجراب يا حاوي؟

لا حضرتك.. لسه في الحاوي يا جراب.

الى حصل ان الفلاحين تتبعوا آثار أجزاء جسم السلطان حامد الممزق في كل بلد وبنوا مقام فوق كل جزء وسموه مقام السلطان حامد.. وكل مقام من دول بقي له زوار بالالاف.

وسالت دموع كليبر من القهر والغیظ..

مكانش عاجبه مقام السلطان حامد.. اهو بقي في مقامات السلاطين حامد.

مكانش عاجبه حامد.. بقي في الالف من أولاد حامد.

مكانش عاجبه الشيخ السادات.. اهو سليمان غزه بالخنجر في صدره وجاب اجله..

والجنرال مينو حب يعمل ناصح ويتجاوز مصرية ومكانش يعرف ان المصرية ميقدرش عليها الا الى خلقها.. استلمته هناك ايه النهارده وخد كيس

الزبالة وانت نازل لحد ما قال والنعمة مانا مكمل في البلد دي..

وانتهت اسطورة الفرنسييس في مصر.

وعاشت اسطورة السلطان حامد.

وتحققت مقولة عمر المختار وقت إعدامه لما قال لجراتزياني:

"مهما فعلتم.. عمري سيكون أطول من عمر جلادي".

طيب الحدوتة دي خلصت على ايه بقي؟

نهاية درامية تماما بيحكىها روجيه كليمان في اخر الخطاب لصديقة روان.. بيقول انه تحول الى مجذوب اسير من مجاذيب مقام السلطان حامد..

بقي بلبس طاقية وجلابية زى المصريين ويروح معاهم يفرق قرص رحمه ونور ويولع شمع عند مقامات السلطان حامد.. بقي بيمشي معاهم في

طواير طويله بالالاف من بلد لبلد علشان يزور مقام للسلطان حامد.. اغلب الناس دي مشافش السلطان.. هو الوحيد فيهم اللي شافه وحضر

كل احداث حياته.. هو الوحيد اللي عارف ومتأكد ان قصص الفلاحين دي مش أساطير.

هو الوحيد اللي عارف ان السلطان حامد مش أسطورة..

عارفين اخر سطر في جواب روجيه كليمان لصاحبه مكتوب في ايه؟

"انى أحس بنفسى سائرا بلا إرادة الى هذا المصير.. أحس بمقاومتي تتلاشي وتنتهي.. النجدة يا روان"

وانقطعت اخبار روجيه كليمان في مصر..

ذاب فيها زى ما كان خايف.. زيه زى الالف الشموع اللي بتولع عند مقام السلطان.

السلطان حامد.

الله يرحمه.

(تمت)

على فكرة.. الصور الموجودة مع المقال هي صور مقام السلطان حامد الحقيقة الموجودة في قرية البيروم.. مش عارف أقول ايه عن السعادة اللي

ركبتني لما واحد لا عمري شفته ولا شافني يتطوع مشكورا وينزل من بيتهم يركب مواصلات يروح بيها بلد تانية علشان يساعدي ويصورلي المقام.

العزیز أشرف سليم.. ألف شكر ليك.

## لبت نداء ربها

من 4 سنين بالظبط قرينا الخبر ده..  
سقوط رافعة انشاءات في صحن الحرم المكي تتبع شركة بن لادن للمقاولات.. والنتيجة 108 متوفي و 238 جريح.  
صحافة وبلاغ وقضية.. وصدا على السوشيال ميديا..  
المحكمة حكمت ببراءة الشركة لانتفاء الشبهة الجنائية في الحادث وان الونش العملاق سقط بتأثير الرياح القوية.. الهواء رماه يعني..  
ما علينا.. تعددت الأسباب والموت واحد.. ان لم تنسحق عظام هؤلاء في الحرم تحت الونش.. يبقى هتنسحق مع كرامتهم في سجون السيسي..  
لحد كده خبر عادى خالص من الأخبار اليومية المعتادة..  
طيب فين الفلفل والشطة؟  
انتشر على تويتر شوية صور وأبيات شعر لبعض المهايل المخابيل سبب خراب الأمم ونكبة كل العصور.. الدراويش المهايلش الى بيدوا شرعية  
للظالم ويحكموا بال جور على المظلوم.. الجبابرة الى قدروا يدعوا على الله عزوجل ما لم يقل او يذكر.  
قالوا ايه بقى؟  
قالك ان الرافعة دى موقعتش ولا حاجه.. ابسوليوتلى.. الرافعة دى لقت الناس بتركع وتسجد في الحرم فحست بالغيرة.. ومع صلاة المغرب..  
الرافعة مقدرتش تتحمل وراحت هي كمان لبت نداء ربها.. خصوصا ان المؤذن كان بيقول "حي على الصلاة"  
وسجدت الرافعة..  
سجدت على رؤوس المصلين والمعتمرين علشان تحصد منهم ما ذكرنا فوق من ارقام.  
الدليل على انها سجدت وموقعتش ولا حاجه.. هو قول الله تعالى في سورة الحشر..  
لَوْ أَنزَلْنَا هَذَا الْقُرْآنَ عَلَى جَبَلٍ لَّرَأَيْنَاهُ خَاشِعًا مُّتَصَدِّعًا مِّنْ خَشْيَةِ اللَّهِ ۚ وَتِلْكَ الْأَمْثَالُ لِنُظَرِّبَهَا لِلنَّاسِ لَعَلَّهُمْ يَتَفَكَّرُونَ  
اذا كان الجبل مستحملش.. يبقى الونش هيسحمل؟  
اتفضل.. عارض بقي ان كنت كافر وللا ملحد.. عارض علشان تلاقى الشتيمة فوشك والمدافعين بيبررو السفه بألف مبرر ومبرر.. ومن ناحية ثانية  
هتلاقى الف عبيط خد الكلام ده شيره في جروبات التخريف والتجديف وصفحات العيط واللبط في رحلة شاقة من أجل حفنة لايكات.  
فتقوم قافل بقك من سكات ويعصر الحزن قلبك على دين مستباح وآيات بيتمسح بيها البلاط.. وأنت لا حول لك ولا قوة.  
بس الحكاية دى مش جديده على فكره.. الجديد بس هو جبروت الناس في السخرية من القرآن.. زمان كانت الناس أكثر تدينا..  
وأكثر "تعريضا".  
الحادثة القديمة كانت سنة 762 هـ  
يعنى في أيام السلطان حزلقوم.. السلطان قماري.. السلطان بدر الدين أبو المعالى..  
الناصر حسن..  
ياللا بينا في رحلة سريعة الى ميدان القلعة.. هنقف بره في الميدان ونترفج على المسجد المهيب من بعيد..  
بص فوق.. فوق اوى.. اعلى ما تجيب رقيبك..  
هتشوف مأذنتين.. واحده طويله على الشمال.. وواحدة أقصر منها على اليمين.  
الناصر حسن كان مقر يبني 4 مآذن مش مأذنتين زى ما انت شايف دلوقتي.. المسجد اتكلف كتير أوى في وقت البلد فيه كانت بتنطحن من  
الطاعون الأسود.. السلطان قاعد في سرياقوس بعيد عن القلق.. والعمال شغالين.. والموت كل يوم بيحصد الاف الأرواح.  
صحن الجامع لوحده متكلف 100 الف درهم.. السلطان زهق من كتر ما صرف.. حتى انه مره فضفض للطواشي مقبل الشامي وقاله "لولا ان  
يقال ملك مصر عجز عن إتمام بناء بناه.. لترك بناء هذا الجامع من كثرة ما صُرف عليه".  
بس أهو.. السلطان حس بمسئوليته عن إتمام البناء علشان يمتص البطالة ويفرج هموم الناس الى كل يوم بيموت منهم الاف.. وبرضه لما يعمل  
عاصمة اداريه جديده.. هيبقي حط اسمه جمب اسم ابوه وجده يعني.. هو مش اقل منهم.  
فضل البناء شغال لحد يوم السبت 16 ربيع الثاني سنة 762 هـ. في اليوم ده قامت رياح قوية جدا غطت وجه القاهرة بالتراب.. ووقعت المأذنة  
الثالثة الى كانت فوق باب الدخول.. سقطت المأذنة الحجرية الضخمة على مكتب السبيل.. علشان يموت تحتها 300 طفل من الأيتام الى كان  
السلطان حسن آويهم في المسجد وبيعلمهم ويصرف عليهم.. مفلتش من الكارثة دى الا 6 أطفال بالعدد زى ما ذكر المقريري في الخطط.  
300 طفل... يا الطاف الله.. هو أساسا المسجد كان فيه اد ايه؟  
المفروض انهم كانوا 500 طفل.. مات منهم 60% تحت المأذنة..  
طبيعي ان السلطان يلغي فكرة المأذنة.. أساسا هو بيكح تراب علشان يكمل بناء المسجد.. مش هيدفع فلوس تاني أكيد علشان يبني مأذنة بدل  
الى وقعت فوق العيال.. مأذنتين كفاية وتبارك الله فيما رزق.. و300 يتيم مش العدد الى هو يعني.  
علشان كده لحد النهارده بنقول ان مسجد السلطان حسن تحفة معمارية.. للأسف لم تكتمل.  
ويمكن ده سرها الكبير.. انها لم تكتمل..  
بس الناس كان لها رأى تاني..  
نقدر نقسم الناس وقت الحادث ده الى قسمين..  
العامة.. ودول تشاءمو من سقوط المأذنة واعتبروه نذير شؤم لزوال ملك السلطان المحبوب.. الى قال عنه المقريري "ولم يكن قبله ولا بعده

في الدولة التركية مثلة".

المعرضين.. وكان على رأسهم الشيخ بهاء الدين أبو حامد السبكي..  
الراجل ده كان جبار يا جماعة.. في وسط قلب الحادث الأليم وقلوب الناس بتنزف الم ودم.. طلع بالقصيدة دى:  
أبشر فسعدك يا سلطان مصر \*\*\* أتى بشيره بمقال سار كالمثل  
إن المنارة لم تسقط لمنقصة \*\*\* لكن لسر خفي قد تبين لي  
من تحتها قرئ القرآن فاستمعت \*\*\* فالوجد في الحال أداها إلى الميل  
لو أنزل الله قرآنا على جبل \*\*\* تصدعت رأسه من شدة الوجيل  
تلك الحجارة لم تنقض بل هبطت \*\*\* من خشية الله لا للضعف والخلل  
وغاب سلطانها فاستوحشت \*\*\* ورمت بنفسها لجوي في القلب مشتعل  
فالحمد لله خط العين قد زال \*\*\* بما قد كان قدره الرحمن في الأزل  
لا يعترى اليؤس بعد اليوم مدرسة \*\*\* شيدت بنيانها للعلم والعمل  
ودمت حتى ترى الدنيا بها امتلأت \*\*\* علماً فليس بمصر غير مشغول  
يا دين النبي..

الحجارة غاب سلطانها فاستوحشت "اتخنقت يعني واتضايقت" وراحت راميه نفسها على العيال علشان القلب اشتكى من قلة الهشتكه.. الى الله المشتكى يا ولاد الكلب..

انتو بتجيبوا المهارات دی منين!!

طبيب وال 300 عيل الى ماتوا؟ موقف الحجارة منهم ايه حضرتك؟ وحشوها برضه؟

بس، خلینی اقولکوا حاجہ..

تعرفوا ايه حصل بعد انهيار المأذنة ب 33 يوم بالضبط؟

بلغ الناصر حسن ان أميرة يلغا العمرى الخاصكي ببدير حاجه علشان يخلص منه.. قصة القلق بينهم طويلة.. نهايتها بس ان يلغا العمري تمكن من السلطان وتواترت اخبار عن موت السلطان بتأثير التعذيب او انه اتخنق واترمى في البحر وفي قصة تالته بتقول انه اتخرط بالسيف وفضل مكان دفنه مجهول لحد النهارده.

ياللا.. خلي الحجارة بقى تتعود تعيش من غير السلطان علشان يبقى يوحشها كويس.

نفسی اعرف پس عملوا ۱۰ فی ابن الالباسة بتاع القصيدة ده..

انا لو مكان يلبغا العمرى ده كنت اجيبه و

اه والله.

الصورة من أرشيف مكتبة الكونجرس.. المصور اليهودي بيتر بيرجاييم.. بين سنة 1860 و1880م





عمره وللا حماتك الى ربنا هداها معاك وللا ال 3000 جنية الى جوك من حيث لا تحتسب بسبب بركة حنة سيدى أحمد.  
وادی دقنى لو حد كذبك وللا قالك ايه الفشر الى انت بتقوله ده يا عم.  
وبعد 10 وللا 20 سنة.. طبيعى جدا يسموا المقام.. مقام الحناوى..  
وطبيعى جدا مع الوقت الشائعات تنتشر.. والخرافات تتحول الى حقائق.. وقوافل "الآنسات" تعدى هنا وتحنى المقام وتحنى وهى بتتمنى ابن  
الحلال الى هيبجى برجمها من السنة الناس الى مبرحمش.  
ويا ويله يا سواد ليله الى يكذب اى حاجه تتعلق بالدين في مصر.. حتى لو رفضها العقل والمنطق والدين نفسه.  
جرب بنفسك علشان تتأكد من كلام ابن رشد لما قال..  
"اذا اردت ان تتحكم في جاهل.. عليك ان تغلف كل باطل بغلاف ديني"  
عافينا يا رب من آفة كل زمان.  
الجهل.

## حجاج الخصري

عمرك فكرت ان جملة عارضه تقراها بالصدفة.. ممكن يكون وراها تاريخ طويل أوى ممكن تقعد تذاكر فيه سنين؟

بص معايا كده الجبرتي بيقول ايه في احداث سنة 1232 هـ

"ولم يؤخذ في هذه بجرم فعله يوجب شنقه بل قتل مظلوماً لحقد سابق وزجراً لغيره".

لفت نظرك حاجه؟

واحد اتشقق ظلم بشهادة المؤرخ.. مش كده؟

يا ترى مين ده اللى شنقه يخلي مؤرخ يخاطر بحياته وهو بيكتب الكلام ده علشان؟

الحكاية شكلها واعر وقديم.. بدايتها مش حكاية الشنق دى.. بدايتها الحقيقة ابعده من كده..

الحكاية بدأت مع خروج آخر كلاب الفرنسيين من مصر.

.....

مصر في الوقت ده كانت خاضعة للحكم العثماني.. لما الفرنسيين دخلوا اسكندرية.. السلطان العثماني وخليفة المسلمين بعث فرقة عساكر  
علشان تدافع وتحمي الأملاك.. حاجه كده بنسبها بالبلدي "برو عتب".. 4000 عسكري لا ليهم لزمه ولا قدروا يقفوا قصاد نابليون  
وجيشه.. تخليص ذمه مش أكثر.. الفضل الأول والأخير في خروج الفرنسيين من مصر يرجع للمصريين أنفسهم.. لا عثمانلي ولا مملوكي ولا  
إنجليزي.. الأزهر والفتوات والمجاورين هما كلمة السر.. المصريين اللى دمهم سال انهار ومات ربعهم في حرب الثلاث سنوات مع نابليون  
وعصابته هما أبطال الحركة وأصحاب التحرير.. بس للأسف مكانش عندهم الأيمان الكافي بنفسهم علشان يقفوا لبتاع إسطنبول ويقولوله  
شكرا لحد كده.. كفانا منك ومن حكامك الهفأ.

خرج الناس للشارع تحتفل ويقولوا "الله أكبر.. انتصر السلطان"..

سلطان!!

سلطان يا ولاد ال..

لو أخط نفسي مكان عمر مكرم.. اروح واخذ شومة وانزل ادور فيهم الضرب كلهم..

بقي بعد ده كله.. سلطان!!

من حسن الحظ ان عمر مكرم كان فاهم ان الشعب ده لسه مش جاهز يحكم نفسه بنفسه.. لسه البلد فيها امراء ولسه فيها ناس بتتخاف  
على الكرسي ولسه الأحزاب مش جاهزة ببرنامج حكم ولا الأخوان عندهم دستور.

والى خايب يتعزل.. والى عبيط عسكر الارناؤوط يقوموا عليه.. كبير الارناؤوط يمस्क ودراة اليمين يقتله في الخباثة.. فترة كده كلها قلق  
لحد ما طلع على الكرسي أحمد خورشيد باشا.

خورشيد باشا مكانش سهل.. راجل عنده خطة وبرنامج وعسكر.. ايده تقبله في الذبح وعارف كل ابليس مخي ابن اخته فين.. العنطرة التركي  
معا جايه آخرها وفيلم ما أنتم الا عبيد احساناتنا ده مش عاوز يخلص ابد.. محمد على مستخبي في الذرة وبيراقب.. الشارع بيغلي والباشا  
خورشيد مصمم يمشي في سكة الضرائب والاهانات لحد آخرها.

لحد ما حصل يوم ان عسكر فرقة الدلاة "المجانين" هجموا على أهالي مصر القديمة ودورا فيهم الضرب والسرقة ونهب البيوت وانتهاك الحرمات.. كالعادة مات شوية.. وكل ده علشان الضرائب.. هيجوا على الناس ذكريات أيام الفرنسيين الله لا يعودها.

غضب الناس وخرجوا للشارع.. هاجوا وماجوا وثاروا واجتمعوا في بيت القاضي ولسانهم وقلوبهم على كلمة واحدة بس..

يا رب يا متجلي.. أهلك العثماني..

لازم يرحل لازم يرحل..

ارحل يعني امشي.. يا عثمانلي.. ياللى مبتفهمشى..

يوم 13 مايو سنة 1805م كان يوم مشهود في تاريخ مصر..

اليوم ده كان شهادة ميلاد بطل حكاية النهارده..

حجاج الخصري..

عمر مكرم كان هو الزعيم الرسمي للثورة.. نقيب الأشراف.. كريم من أصل كريم.. جدد وشجاع وتاريخه يشهد من أيام بك الكبير.. وحجاج الخصري كان دراعه اليمين..

عمر مكرم يتفاوض ويثور ويقطع الشوارع ويقف لعسكر خورشيد باشا.. وحجاج الخصري يلم الناس ويشترى سلاح وينظم الصفوف وينط على العساكر بليل او من حيث لا يتوقعوا الهجوم..

حجاج لا درس عسكرية ولا انتظم في جيش ولا عمره شال سلاح.. ده حيا لله بيع خيار وطماطم في السوق.. حتى لو كان كبير طايفة الخصرية نفسهم..

برضى خصري..

أصل الحكاية ملهاش علاقة بالمهنة.. دى جينات في الدم.. انا اعرف واحد رتبة كبيرة طلع عظم لأرواح الى ماتوا وتاني يوم كان بيقتل صحابهم على الكورنيش قصاد بيت المسيح الدجال.

حجاج الخصري مش بس كان بيورد سلاح للناس.. ده سمع ان الباشا المحبوس في قلعته طلب معونة من فرقة عسكر الجمالة.. والفرقة ام ستين جمل اتحركت من حي المظفر ورايحه على القلعة تنجد المحتاس.. حجاج لم رجالته واتحرك في التو واللحظة علشان يقطع الطريق على الفرقة.. قتل منهم الى قدر عليه وشتت الباقي هربان من غير سلاح.

محمد على الى كان تحت ايد 4000 عسكري أرناؤوطي بسلاحهم.. مقدرش يعمل الى عمله حجاج برجالته ونبايته.. او هو كان يقدر بس كان بيوفر صحته ليوم الحسم.. بدل ما يطأش مع حجاج.. ضمه لفرقته وعمله ريس على رجالته.. يعنى حجاج بين يوم وليله اتحول من مجنونته يا قوطه الى الصول حجاج أبو 3 شرائط.

وبعدين؟

انكسر خورشيد باشا قصاد صمود المصريين.. حجاج قدر ينزله من القلعة قفاه يقمر عيش.. عمر مكرم قالها كلمة.. هو محمد على يعنى هو محمد على.. وفي الخلفية كان واقف حجاج بنبوته ورجالته يأمنوا على الكلام ويتوعدوا اى حد يقول حاجه ثانية.

وبعت السلطان الفرمان.. امرنا وامرنا مطاع بتولية محمد على امر أيلة مصر.. بس انكسف يقول نزولاً على رغبة المصريين..

مش مهم.. طظ فيه..

المهم ان الى قعد على الكرسي قعد بأمر المصريين.. لأول مره من شلوح سنين ملوش عدد.. ويمكن لآخر مره..

وزى العريس في الخطوبة.. محمد على لبس الكل العمه وهو بيوعدهم بالعدل والحسني والحكم المشترك.. نو موور ضرائب يا رجاله.. القضاء ليكو والسياسة ليا.. فلوسكوا ليكو والكرسي ليا.. مصر ليكو والقلعة ليا.... انا خدامكم وخدام خدامكم.. امشوا ورايا واوعدكم تخلصوا من الجوووووووع "بصوت الأسد سكار" ..

شهر والتاني.. حول والتاني.. والباشا بيكبر وجيشة بيشد..

كرشه بيكبر والحيل اتهد..

مصر بتكبر.. ليه هو.. مش لأي حد..

يبقي لازم وقفه.. ولو حكمت الأمور.. وقفه وقفشه كمان..

عمر مكرم كمل في شغل السياسة.. حجاج الخضري راجل ميفهمش سياسة.. خد بعضه وراح على خصم محمد على علشان يقدمله فروض الطاعة والولاء.. وزى ما تألش خورشيد.. يتألش أبو طوسون..

مين بقي الخصم ده؟

محمد بك الألفي..

الألفي!! جاسوس الانجليز!!

أخص يا حجاج.. آخرتها كده!!

لا لا استني.. ماهو حجاج لما عرف الزبالة دى عن الألفي.. سابه ورجع تانى للمحروسة.. حجاج مش خاين.. حجاج عاوزها نظيفه.. مش ذنبه انه ميعرفش دواخل كل واحد.

حجاج لما نزل الميدان.. الرميلة يعنى.. كان عاوز يشيل خورشيد باشا مبارك ونظامه كله..

حجاج مكانش عميل ولا عايزها فوضي ولا هو مستعد يتعاون مع ناس كل همها الكرسي وبس..

حجاج لما رفض الباشا ولما رفض الألفي.. كان عاوز يقول انا مش اخوان ولا فلول..

انا حجاج الخضري وبس..

من غير أي تصنيف..

عمر مكرم والمشايخ اتوسطوا لحجاج علشان الباشا يصفح عنه ويسمحله يرجع القاهرة.. حاكم سيرة الألفي في الوقت ده كانت بتسبب ارتكازيا لأفندينا.. وعلى عكس المتوقع محمد على غفر لحجاج خطيئته في التعاون مع الألفي وسمحله يرجع القاهرة علشان يعيش ويشغل من تانى.. مش بس كده.. ده كمان عمله حرس شرف يروح وييجي معاه منين ما يروح.

بقي حجاج بيه الخضري..

شوف افندينا وصياعته..

قالك انا مش هكسب عدو في حرب العصابات عارفي وعارف عساكري ولا هخسر المشايخ لما انفضلهم.. انا اجيب الجدد ده تحت عيني واعمله حرس شرف كمان.. والحرس يراقبه ويكتفه لو لازم الأمر.. خد بالك يا حجاج.. انت هترجع خضري وبس.. مفيش شقاوة تاني خالص..

- مفهوم يا حجاج؟
- مفهوم يا افندينا

وعاش حجاج خضري وبس.. شيخ الطايفة الي يحدد الأسعار ويفصل بين التجار.. محمد علي قدر يكسر شوكته زى ما كسر شوكة كل ما قال بم في البلد دي..

مفيش حد في البلد دي كان اصبع من محمد علي في الوقت ده..

وعلشان هو صايع ومعدوش وزن للحياة.. وز المحتسب بتاعة "مصطفى الكاشف كرد" انه يقبض على حجاج الخضري يوم 31 يوليو 1817م ويسحبه من قفاه على المشنقة.. كده.. من غير اى تهمة ولا جريمة.

او هي جريمة قديمة الكل نسيها الا ابن الابالسة أبو عيون زرق..

لو فيوم من الأيام نزلت شارع الجمالية من ناحية باب النصر.. هتقابلك حارة المبيضة على شمالك.. على ناصية الحارة هتلاقي سبيل قديم أوى..

افتكر ان عند السبيل ده بالظبط اتعلق حجاج الخضري.. البطل الشجاع ضخم الجثة موفور القوة كريم الاخلاق.. من رقبتة لمدة 24 ساعة من غير ما يعمل اى جريمة بأوامر الباشا كأعلان عن مصر الجديدة.

مصر بتاعة محمد علي الى مش بيهمة حد.

واللى كنا فيوم نور عينيه.



## الله حي.. عباس "الثالث" جاي

وقال الراوي في حكاوي القهاوي.. بعد ان أكل كثيراً من الفتة والعكاوي.. كان يا ما كان يا سعد يا اكرام.. يا سادتي يا كرام.. ما يحلى الكلام الا بذكر النبي عليه الصلاة والسلام.

في يوم اسود من الهباب.. قامت شلة من الصبيح الاصحاب.. بتشمير الكسون والجلباب.. ثم توجهوا الى قصر عالي الأبواب.. يسكن خلفه ملك كان يوما مهاب.. له من الاسماء فاروق.. ومن الصحبة كثير من العلوق.. عاد من لندره مخنوق.. الى كرسي اشبه بالخازوق.. ليحكم البلاد على كيفه.. ويصنع ما جال بطيفه.. يطارد النسوان ويهمل العيان.. يجامل الأكابر الاعيان.. بفلوس الشعب الغلبان.. لا يهتمه دستور مكتوب.. ولا جد عظيم يسكن في القلوب.. جاءه التحذير مرتين من الجيش.. التزم والا في المنفى هتعيش.. لحد ما نظرك يبقى شيش بيش.. وأملك في التوريث يرسى على مفيش.

ولأن فاروق كان مغرور.. لم يخضع لنصيحة ولا دستور.. أهمل كلام الباشا النحاس.. وركز مع شلة القمار الانجاس.. حلاق وصحفي وكهربائي.. وكمان تلاته من اصاغر الناس.. صحبه لا تليق بملك.. خلوه في الاخر اراجوز بالمزبلك.. لما الجيش ساب مكانه وقام.. سابوه رفقاء السوء محتاس.. مطارد مكروه من الناس.. خرج من المحروسة على المحروسة.. عريان بالفالنة واللباس.. الى إيطاليا ساب وراه تاريخ.. اتزور بكثير من المهانة والتوبيخ.. كتب عن تاريخه الارذال.. بأسلوب الكيد والعيال.. فتارة ينعتوه بالحرامي.. وتارة يسبوا مقامه السامي.. وتارة يحملوه البلاوي.. كأنه على الشركان ناوي.. فمحو تاريخ من سبقوه.. واكلا مال البلد في كرشهم وسرقوه.. شوهوا العلوية بسوء الكلام.. وهذا شأن الاصاغر اللثام.. من العسكر الجعان الغير تمام.

ودار التاريخ دورته من جديد.. ليخرج جيل سديد.. يقرأ بذاكرة من حديد.. استخرج من الكتب ما خفي.. وعلم من الحقائق ما كفى.. فأدرك انه لا شر من ملك لعوب الا عسكر طروب.. يرى مصر كالبقرة الحلوب.. ويركب فوق رؤوسنا غير مرغوب.. وكلهم يستحقون الرجم بالطوب.

وتوته توته.. فرغت الحدودة.

بس الأمور مكانتش زى ما العسكر ضحكوا علينا..

جيل كامل نشأ على مفاسد الاسرة العلوية.. مره يقولوا لصوص.. ومرة يقولوا بتوع حريم.. مره يبقوا مسئولين عن كل مساوئ البشر ومره يبقوا السبب في ضياع فلسطين.. مره يبقوا هما السبب في الاحتلال الانجليزي.. ومره يبقوا صهاينة افاقين.. ومفيش كتاب واحد جرؤ انه يكتب عن محاسن الاسرة الى حكمت مصر لأكثر من 140 سنة.. اوقات فيهم كانت مصر جنة واوقات تانية كانت جهنم.. الى هو الامر الطبيعي يعنى في دورة حياة البشر والدول العادية.. افتقرت الكتابات والتأريخ الى اى نوع من أنواع الحيادية.. فأصبح ما قبل 52 اسمه العهد البائد الذي ينبغي محوه بالاستيكة العسكرية التي لا ترحم.. انطلق الكاب في محو ووراثة كل إنجازات التاج.

واحنا بنتفرج.

مع الوقت قدرنا نكتشف حقائق عن الاسرة العلوية.. منهم الى تبرعت بمصاغها كله للمجهود الحربي.. ومنهم الى تبرعت بقصرها علشان يبقى جامعة فؤاد الأول "القاهرة حاليا".. منهم الى عمل جولات في أوروبا لدعم الجيش المصري.. ومنهم الى تبرع بنص أمواله للفقراء.. لو الكتب انكرت.. ذاكرة الناس عمرها ما نسيت ابدا.

تحكى ذاكرة الناس والتأريخ الاجتماعي ان الخديو عباس حلمي الثاني كان راجل محبوب.. هو اه ابن الخديو توفيق.. وتوفيق راجل هفأ وعبيط وجاب الانجليز لحد باب بيتنا.. الا ان سبحان الله ابنه حابه تانية خالص غيره.. كان راجل مصري وطني تماما.. كره الانجليز ووشوشهم الحمراء.. عرف من بدري انهم مش اكثر من شوية لصوص هيسرقونا زى ما سرقوا الهند.. قوم الراجل مكذبش خير.. وقف في وشهم وقفة راجل جدع.. دى مش بلدكوا يا كلاب علشان تجيبولى اللبني يقرفني ويعدل على كلامي.. معركة سياسية ورا الثانية.. وكل مره يلسعهم على قفاهم ويصرخ ويقول انا الخديو يا بقر.. ايفات.. نحن عباس حلمي الثاني.. خديو مصر وحفيد خديو عظيم اسمه إسماعيل وحفيد حفيد والى أعظم اسمه محمد على باشا الكبير.

بس الانجليز جلودهم تخينه اوى.. مسكتوش على الكلام ده ولا أثرت فيهم دخلة عاشور الناجي دى.. مؤامراتهم الوسخة استمرت ضد الخديو لحد ما خلعه بدون اى اعتبار للباب "الهفأ" العالي.. خلعوا الرجل المجدع وجابوا مكانه راجل ملوش ملامح.. شنب وطلعله بنى ادم قرر في يوم وليله انه يقلب مصر من خديوية الى سلطنة ويسمى نفسه السلطان حسين كامل.

المصريين شعب عاطفي.. مينساش الى يحبه ويحترمه.. بقت العيال تمشى في الشوارع وتغنى:

الله حي.. عباس جاى

ضرب البمبة.. في راس العمدة.. وهو جاى

ياريت نمشيها في "رأس" العمدة علشان الثانية مينفعش تتقال.

طبعاً مفهوم ان العمدة هو المعتمد البريطاني في مصر اللورد اللبني.. الشعب يا حرام كان ممنى نفسه ان عباس هيرجع تانى ويرحمهم من الانجليز وعمايلهم الهباب.. بس إسماعيل صديقي كان رئيس وزراء ابن حرام.. قدر يقنع الخديو المنفي في إسطنبول انه يبطل زن على العرش في مقابل 30 ألف جنيه مصري.

الراجل موقفه سيء.. خصوصاً انه أعلن دعمه للعثمانيين الى خسروا الحرب الأولى بالفعل.. دولة الخلافة كلها بتقول للعالم باى باى دلوقتى.. مفيش قصاده الا انه يقبل العرض اللعين ويعيش باقي حياته في سويسرا لحد سنة 44.. بعدها يقابل رب كريم علشان يرجع مصر في تابوت ويندفن جنب ابوه في قبة افندينا في العفيفي "امام منشية ناصر بالقاهرة".

كام سنة عدوا وتقوم الهوجة.. تطفش الاسرة العلوية كلها من مصر يا مولاي كما خلقتني.. الى حصل في مصر كان مجرد تغيير في مالِك اقبال الخزن.. بدل ما الاراضي والفلوس كانت في ايد الباشوات ولاد الباشوات.. بقت في ايد الطباط ولاد الاغوات.. والثعلب فات فات في ديله سبع لفات.

بس الحكاية لسه مخلصتش على فكره..

في زيارة قريه الى واحة سيوة.. كان مقرر في برنامج الزيارة فندق غريب الشكل والمحتوي اسمه فندق تازيري.. موجود في منطقته بكر من مناطق واحة سيوة الأكثر بكاره.. منطقته اسمها جبل جعفر.. جعفر مين وعمل ايه.. مش مهم.. الكلام ده هيبقى له وقته.. المهم هنا هو فندق تازيري والي حواليه.

بعد ما زيارة الفندق خلصت وفي طريق الخروج من الفندق.. تشاور المرشدة السياحية المصاحبة لينا على مزرعة على شمال الطريق وانت راجع.. قصاد الفندق بالظبط وتسألنا:

- تعرفوا مزرعة مين دى يا حلوين؟
- مين يا ست الكل؟
- اخر امراء اسرة محمد على.. اسمه عباس حلمي

الله!!

عباس حلمي..

مش عباس حلمي ده الى جه بعد توفيق.. ده الى بنى الكوبري الواصل بين الروضة والجيزة.. الكوبري الى عدوية كان متعود يتحرش بالبت بتاعته فوقيه وهو بيقول على كوبري عباس.. ماشيه وماشيه الناس.. ماشيه تبص عليكى.. يا فروته وانا ناس.

عباس حلمي مين الى أمير ياللى تنشكي.. ده كان اخر خديو لمصر يا وليه.. مش نبطل فتاوي بقي!!!

بس خمسة كده..

المزرعة فعلا تبدو مزرعة امير.. واضح من بعض النقوش الملكية المنتشرة فيها.. كمان في على الباب الرئيسي في أثر للوحة مزروعة حديثاً.. لما سألت عنها قالتلى المرشدة السيوية ان ده كان شعار الملكية.. صاحب المزرعة علقه.. والبوليس شاله.. على أساس يعنى ان مصر بقت جمهورية وكده.. ارفع رأسك يا أخي بقي والحاجات الحلوة دى.

طيب ناخذ حباية نعناع تعطر الفم وتروق الدم وتنعش الذاكرة؟؟ مين عباس ده بقي؟؟

يا الله..

ده يبقى الأمير عباس حلمي الثالث.. ابن الأمير محمد عبد المنعم.. وحفيد الخديو عباس حلمي الثاني.

يا حلاوة يا ولاد.. ده متسمى على اسم جده.. بس دوکها كان الثاني.. يبقى المنطقي ان ده يبقى الثالث.. صح كده. الأمير عبد المنعم ده اللى بقي وصى على اخر ملوك مصر.. أحمد فؤاد الثاني.. ده طبعا بعد ما العسكر خلعوا أبوه.. بتحكيلنا كتب التاريخ اد ايه الراجل ده كان مهذب ومحترم وبعيد عن صراع العروش ده خالص.. الناس كانت بتحبه لان أراضيه كان بيسترزق منها الفلاحين.. وهو مكانش مقصر.. الذبائح مستمرة والعطايا تبذل للفقراء مع كل زيارة.. مش زى ما جه في الفيلم يعنى ان افندينا عاوز يضرب الرئيس عبد الواحد بالكرباج.

وتستمر المرشدة في الكلام عن الأمير عباس حلمي الثالث.. الراجل خير جدا وپیرعي مهرجان سنوي للحمير في واحة سيوه.. الحمار هو وسيلة المواصلات الأولي هناك.. علشان الراجل يشجع الناس انها تهتم بالحمير.. راح جاى منظم الليلة دى كلها على حسابه الشخصي.. ملك جمال الحمير ياخذ هو وصاحبه 20 ألف جنيه.. أسرع حمار ياخذ هو وصاحبه كمان 20 ألف.. والالاف دى كلها من جيب البرنس عباس.

أمير وابن ذوات.. لكنه متواضع..

البلد طرده شر طرده وسرقت فلوسه وفلوس اهله.. الا انه ما زال متواصل مع الناس ويزور الواحة كل سنه وحريص على إقامة المهرجان في موعده.

ونرجع نسأل.. هو الناس بتحبهم ليه؟؟

شفت بقي يا صاحبي الفرق بين البرنس وبين اللواء؟؟

البرنس ما زال متواصل معاك وبيحترمك.. معترف انه غلط.. معترف ان التاريخ مش هيرجع لورا من تانى..

س لسه محتفظ بتاريخه وتاريخك مع بعض وبيحترمك..

اما اللواء...

وللا بلاش.. خلينا نربي العيال.

لو في يوم رجلحك خدتك في زيارة الى مقابر الأسرة العلوية الموجودة في منطقة العفيفي الواقعة على طريق الأوتوستراد "قبة أفندينا".. ولقت نظرك انها نظيفة اوى ومرتب كده وحالتها حلوه كده غير حالة حوش الباشا بتاع الامام الشافعي.. ساعتها اعرف ان البرنس عباس حلمي الثالث هو اللى متولي المقابر دى بالرعاية وبيصرف عليها وعلى الناس القائمة على خدمتها وحراستها من جيبه الخاص.. وزارة الأوقاف والاثار ف بلدك متعرفش اى بتنجان عن الأماكن دى.. انت لو سألت مفتش اثار عجوز وشعره ابيض عن اللى مدفونين تحت قبة أفندينا.. مش بعيد يقولك صافيناز واسماعيل يس.

طيب البرنس بيعمل كده ليه؟؟

لأن ده اخر ما تبقي من تراث الأسرة العلوية.. مقابر صحيح.. بس نموذج محترم اوى في الفن والعمارة "المصرية" اللى تخلصت من الطراز العثماني الموجود في حوش الباشا وبقي ليها سمات خاصه بيها هي.

صحيح يا جدعان.. ولاد الأصول غير.



محمد على باشا    ابراهيم باشا    الخديو اسماعيل    الخديو توفيق    عباس حلمى الثانى    الأمير عبد المنعم    عباس حلمى الثالث





انهم حيوانات

في كاس العالم 1962م، إنجلترا كانت بتلاعب الارجنتين في الدور الأول.. ويبدو كده ان الجماعة بتتوع الارجنتين اتغابوا على الانجليز في الماتش.. فطلع ألف رامزي مدرب الانجليز وقتها وقال عنهم "انهم حيوانات".. أمريكا الجنوبية خدت الكلمة على صدرها وقامت على الانجليز تهزئ وشتمية ومهيدوش الا لما اعتذر رامزي عنها رسميا بعد 10 سنين.

احفظوا الكلمة دي كوسر.. انهم حيوانات.

نرجع بالزمن لورا شوية كمان.. سنة 1789م اصبحت سنة فارقة في تاريخ أوروبا لما قامت فيها الثورة الفرنسية.. الفرنسييس -يا سبحان الله- أصبحو الملهم لشعوب العالم المنهكة بحكم الاباطرة والقيصرة والملوك والاقطاعيين.

طيب.. نسيب أوروبا على جنب دلوقتي ونقطع تذكرة ديزل "راج-جاي" على افريقيا.. هننزل سيدي جابر بتاع ناميبيا.. في نفس السنة اتولدت بنبت اسمها سارتجي بارتمان في قبيلة بدائية اسمها خوى خوى.. قبيلة غلبانة وفحاله عايشين على الري.. منين ما الدنيا يبقي فيها اكل الخرفان يشدوا الرجال ويروحوا.. من ناميبيا مشيو بجذا خط ساحل المحيط لحد ما ستقر بهم المقام في كيب تاون "جنوب افريقيا".. وهناك بدأت الحدودة.

افريقيا كانت مرتع لصيغ أوروبا علشان يسرقوا كل ما فيها بقسوة ووحشية.. المشهورين هما إنجلترا وفرنسا.. لكن البرتغال وهولندا وبلجيكا عملوا في افريقيا فطاع لو انكتب فيها مجلدات مش هتكفي.. خطف الأطفال والابادة الجماعية وسرقة الموارد وحاجه نيله.. كيفينا نعرف ان ليوبولد الثاني ملك بلجيكا مثلا قتل اكثر من 10 مليون انسان في الكونغو وابدأ شعب كامل "حرفيا" علشان يأسس امبراطورية هناك.. رجاله افريقيا السود كانوا للشغل وحریمهم كانوا للشغل والمتعة.. الى يتعب يموت.. الى يعيا يموت.. الى تخلف ممكن تموت وهي بتخلف وبالمرة يدفنوا معاها ابنها "حي" علشان مش طالبة صدام ومفیش مرضعات.. الأيضاني من دول ييجي يشتغل شوية في افريقيا ولما يحب يرجع بلدهم.. يسحب 100 و1000 و200 عبد في ايده و1000 ولا 2000 كيلو ذهب ويمون المركب ويعتمد.

في الظروف الجميلة دى.. اتولدت البنت الى اسمها سارتي.. كانت واحده من الاف العبيد.. بس بظروف خاصة شوية. سارتي انها اتولدت بمؤخرة كبيرة بشكل ملفت.. حد هيقول وماله ماهو التخن من تحت ده من علامات الجمال عند العرب مثلاً. اه ماشى.. سارتي مكانتش تخينه من تحت بس.. لا.. حجم المؤخرة مع الفخذين تجاوز الحجم الكبير الى الحجم شديد الضخامة.. خرج بره نطاق الجمال الى نطاق التشوه فعلياً.

سارتجي كانت عايشه في بلدهم مع ابوها وجوزها من غير قلق.. من الواضح ان قبيلتهم تميزت بـكبر حجم المؤخرات.. هي بس كانت اوفر حيتين.. خلفت 3 عيال محدش منهم عاش.. كان عندها امل تخلف تاني.. مشوهة وفقيرة بس عايشه وتبشتغل خدمات في بيت السيد الهولندي.. ارض ربنا تساع الكا، علم، فكه.

السيد الهولندي صاحب المزرعة كان له صديق جراح انجليزي اسمه ويليام دانلوب.. لفت نظرة شكل ساريجي المشوه.. أقنعها تروح معاه لندن يعمل عليها شوية أبحاث وبالمرة تشتغل هناك.. لمبم بقي.. الساعة بخمسة جنيه والحسابه بتحسب.. البنات صدقت وسافرت معاه.. هو يعمل أبحاثه علم، نصها التحدث،... وهي تشتغل وتسترزق.

اوعى تكون رميت تذكرة الديزل الى جينا بيها ناميبيا من شوية.. هنرجع بيها تاني دلوقتي لأوروبا.. التذاكر كانت في عربية 3 كرسى 45 و46.. انا هقعد جنب الشباك يا معلم في الكرسي الفردي.

ووصلنا رمسيس بتاع لندن.. قشطه.. تعالى بقي نشوف ساريجي فين وهتشتغل ايه؟  
ساريجي اشتغلت في سيرك بيكاديلي.. مش مدربة ولا عاملة نظافة.. لا.. اشتغلت حيوان.  
ركز معااا.

اشتغلت حيوان مش مدربة حيوان..  
 زى ما بقولك كده.. اشتغلت حيوان.. حيوان الناس تتفرج عليه وترميله اكل وميه.. كانت بتتخط في اقفاص الحيوانات المفتorse وتتعامل زيهم..  
 تتعرض على الناس عارية تماما علشان الناس تتفرج على تكوينها العجيب.. تاخذ أوامر بالكرباج من مدربي الاسود جون الحلو او تشارلز كوته..  
 سارتجى.. اااااا هوووووووب.. اقفى باللا وايدك فوق..

نومة العازب يا سارتي.. هووووووب..  
افتحي بقلك يا سارتي..

[illegible]

وفي الآخر يرمولها شلن او شلنين.. حازه كده اللى هي يا دوب تعرف تاكل بيهم قبل ما تنام في الاقفاص مع الحيوانات استعدادا ليوم جديد تمثل فيه دور انسان الغاب المفترس.. تنتظط قصاد الناس على المسرح.. الناس تصرخ فيها ارجعي الغابة يا متوحشة.. وهكذا.

مدير السيرك لقي الموضوع واكل مع الزبائن.. راح مزود فقرة كمان.. ادفع زيادة شوية وتقدر تلمس مؤخرتها الكبيرة بأيدك او بخشبه.. بصباك او بكف ايدك.. بفيلوسك تحسس او تفحص أو تضربها على المؤخرة المستففة.. ولو الموضوع لعب معاك.. ادفع التذكرة الكبيرة للكايتن.. واقل

[goo.gl/BZEMcp](http://goo.gl/BZEMcp)

عارف لما تبقى الظروف كلها بتجبرك انك تبقى وغد دنيء فتقوم سايب ده كله وتقرر تعيش نظيف اليد عفيف الاخلاق حسن السير والسلوك؟  
اهى دى باختصار سيرة صاحب المسجد ده..

هو مسجد محندق في مكان حيوي.. ميدان الرميـلة.. قلب القاهرة ومعقل كل الاحداث العظيمة.. الشاهد الحى على عظمة الممالك ودمويتهم.. الشاهد الى ضرب كف على كف من كهن النسوان ونفسنتهم.. الشاهد الى ذرف الدموع من قسوة أفندينا وهو بيدبح بلطجية عصره علشان يعمل دولة عظيمة سرقها منه بعد كده بلطجية محدش قادر عليهم لحد النهارده.

هتلاقه على جمب في ميدان القلعة.. هو متبهدل كده لأنه متصنف أثر.. وانت عارف طبعا حال الآثار عندنا.. انصحك بشدة انك تدخل تكتشفه من جوا علشان تبصم بالعشرة ان الى بنى المسجد ده هو الى كان حلواني.

مسجد ومدرسة جوهر اللالا..

قبل ما الاسم يقلب في دماغك على صوت الأسطى عمارة بتاع درب شكмба وهو بيقول "صيتي من القلعة.. من القلعة.. لسويقة اللالا.. لا لا لا" وتفتكر ان سويقة اللالا دى لها اى صلة بالمسجد او صاحبة.. احب اقولك لا.. سويقة اللالا خدت اسمها من الست صفية اللالا.. بينما المسجد بتاعنا ده خد اسمه من صاحبة.. الأمير جوهر الجلباني.. هو كان لالا برضه.. بس ده في عصر ودى في عصر تانى والسويقة أساسا مش هنا.

كلمة "لالا" بالفارسي معناها مربي.. يقال انها اصل كلمة "دادة" الى تطورت حاليا وأصبحت "ناني".. بس انا معرفش حد عايش من أيام ما كانوا بيقولوا على المربية لالا علشان يفتينا ان كان الاكابر وقتها لساهم اتعوج وهما بيقولوا على اللالا دادة وللا جرين برجر.. المهم ان لالا تعنى مربي.

جوهر كان عبد حبشي اشتراه الأمير عمر بن بهادر من مكة واهداه الى جوز اخته الأمير احمد بن جلبان.. ومن هنا اصبح اسمه جوهر الجلباني على اسم سيده.. ولما مات الأمير احمد دخل جوهر في ممالك السلطان برسباي.. وبدأت الحكاية.

برسباي لما لقي اخلاقه نظيفة عينه خازندار المحروسة.. وزير المالية يعنى.. ودى كانت وظيفة بتتقسم على 3 افراد في نفس الوقت "واحد للملابس والثاني للمجوهرات والثالث للفلوس" علشان الثلاثة يراقبوا بعض ومحدش فيهم يسرق.. بس الى كان بيحصل ان الثلاثة بيتفقوا مع بعض ويسرقوا البلد بينما السلطان مشغول بتأمين نفسه من محاولات الاغتيال اليومية.

جوهر كان شديد.. الموظف الى يغيب من غير سبب يتخصله يومين.. الموظف الى يشتغل في الأوقاف مشتغلش حاجه غيرها.. اى حد هيقدم السي بتاعه عند جوهر لازم يبقى عارف ان فلوسه هتبقى عرضه للمساءلة في اى وقت.. في الوقت الى الامراء فيه كانوا بيتنافسوا على تكديس الأموال.. هو كان بيسابق الزمن علشان يكسب حسنات.

اشتهر جوهر بالأمانة والنظام والتدين.. كان بيقرا القرآن بالقراءات السبعة.. ده غير ان شكله كان وسيم وريحته طيبة.. رحيم بالفقراء وطيب مع الغلبة.. كثير كان بيتوسط للناس عند السلطان.. وكثير كان بيصرف فلوسه "القليلة" على اوقاف خصصها لمساعدة فقراء مكة.. ولما الدنيا نزلت في نظره اوى.. قرر يعمل دار للأيتام.. دور في الأراضي يمين وشمال ملقاش الا حته ارض 178 متر في قلب القاهرة.. اشتراها وبني عليها المسجد ده وهو الى كان قادر ياخذ اتخنها عزبه وللا اقطاع في اى مكان في مصر.. بس الدكتور على جمعه مقدرش يقنعه انه ممكن يبني مسجد بفلوس تجارة المخدرات او انه عادى ممكن يفتح كبارية ملحق بيه زاوية للصلاة.. مكانش في ايامهم المشايخ المتحضرة دى.

جوهر بنى المسجد للأيتام.. كان عاملهم مصروف يومي من فلوسه.. واللى يبلغ منهم مبلغ الرجال يخرجهم من المسجد ويكلفه بتعليم ايتام جداد.. نوع من أنواع رد الجميل يعنى.. كان شديد في تربية العيال والحفاظ عليهم.. عينه كانت مفنجله على الموظفين لاحسن حد فيهم عينه تزوغ كده وللا كده على عيل من العيال.. اعتبر العيال امانه من ربنا واحسن في حفظها للدرجة الى خلت الأشرف برسباي شخصيا يثق فيه ويسلمه ابنه علشان يربيه بأخلاقه.. ومن يومها اصبح جوهر اللالا.. مربي أبناء السلاطين.

خلينا من وصف الجامع وحلاوته.. مش هنجيب جديد ولا هتنبهر بالوصف اد ما هتنبهر بالرؤية.. كمان الكلام عن مسجد جميل في حرم مسجد السلطان حسن يعتبر قلة ادب.. خلينا نركز في روح المكان.



جواهر اللالا شهد اكبر مرجيحه حصلت في تاريخ مصر.. حاجه كده لو اتعملت في فيلم هندي.. تسقط.

بعد المعجزة الى عملها فرج بن برقوق هديت مصر شوية تحت حكم الخليفة العباسي أبو الفضل العباس المستعين بالله.. 6 شهور كده المؤيد شيخ ضبط فيهم الأمور ونط هو على الكرسي علشان نرجع من تاني لحكم العسكر.. المؤيد شيخ كان مجنون.. قتل بأيد ابنه إبراهيم الى كان اصالح واحد يمسه الحكم بعده.. علشان كده لما مات مكانش متاح من أولاده الا ابنه الرضيع احمد.. المماليك حطوه على كرسي العرش وهو بيقول واء.. المؤيد وهو بيموت وصى اقوى امراؤه – سيف الدين ططر- على ابنه ومراته..

جميل..

ططر عمل ايه؟؟

حفظ الأمانة طبعاً.. ساب الواد على العرش بتاع 5 دقائق كده وراح متجوز امه "سعادات" وبعدين خلعه وقعد مكانه على العرش وهوب راح مطلق امه ورمهاها هي وابنها في الشارع.

ونعم الوصاية..

طيب.. ططر قعد اد ايه في الحكم؟

95 يوم بعدهم سلم نمر..

طيب مين يمسه بعده؟

ابنه محمد.. الى كان عنده 11 سنة.. عيل لسه ورور.. كان طبيعي ان الظاهر ططر قبل ما يموت يوصى اقوى الامراء على ابنه ومراته برضه.. تمام كده زى ما كان هو نفسه وصى على ابن ومرات المؤيد شيخ.

طيب مين كان الوصي هنا؟؟

الأمير سيف الدين برسباي..

وزى ما الظاهر ططر قلب ابن المؤيد شيخ من الحكم.. برسباي هو كمان قلب ناصر الدين محمد ابن ططر من الحكم وقعد مكانه..

وبعد برسباي.. حصل ايه؟

مسك مكانه ابنه طبعاً.. مين احسن من كده تربيته؟؟ يوسف بن برسباي كان عنده 14 سنة.. حافظ القرآن ومتر في مدرسة الأمير جواهر اللالا انترناشونال سكوول الدولية للغات.. وعلشان قلب برسباي يطمئن.. وصى اقوى الامراء – سيف الدين جقمق – على ابنه من بعده.. يخلي باله منه يعنى ويساعده في أمور الحكم وكده..

يا سلام.. والنبي ايه!!

انت بتهزر يا حاج؟؟

هو مين في الدولة دى -بما فيهم انت شخصياً- فرق معاه حنة الوصية دى؟

وكان المتوقع.. الأمير سيف الدين جقمق استكتر الكرسي على جمال الدين يوسف ابن برسباي وراح جاى مشقلبه وقعد مكانه..

هتعمل فيها ناصح وتقول ان الظاهر جقمق وهو بيموت ساب الحكم بعده لابنه عثمان الى كان عيل صغير ووصى عليه اقوى الأمراء – سيف الدين اينال- الى صبر كام شهر وراح جاى قاله من على الكرسي وبقي هو سلطان هو كمان..

لا يا اسطى.. الشئ منك.. مش مراجيح هي.. دى بلد لها قانون.. شهور ايه الى قعدها المنصور عثمان في الحكم.. سيف الدين اينال سابه على العرش 43 يوم بحالهم قبل ما يقرر يركبه المرجيحة ويبقى هو السلطان.

امال انت فاكر ايه "بصوت بدريه طلبة".

مين بقى معجبوش الكلام بتاع جقمق ده؟

جواهر اللالا.. راجل حنبلي وعازيز الأمور تمشى شرعية وكده.. جقمق زيه زى اى سلطان خلقه ضيق.. قبض على جواهر ورماءه في الحبس وأمر بتعذيبه علشان يطالع فلوسه المستخبه.. جواهر يحلف انه محيلتوش غير مرتبه.. وجقمق مش مصدق.. ولا حتى مصدق ان التقلصات الى على وش جواهر دى سببها القولون العصبي.. ويشاء السميع العليم ان جواهر اللالا يصيبه الصرع كمان وهو في السجن ويموت في الستين من عمره بتأثير نوبة تشنج قوية مفهمش أمناء الشرطة بتوع جقمق انها مرض حقيقي مش تمثيل.

مات الراجل الجنتل الى قال عنه ابن تغرى انه "كان عفيفاً ديناً عاقلاً سيوساً مديراً فاضلاً".. مات وسابلنا تحفه معمارية وذكرى طيبة تجبرك على الترحم عليه والنظر الى حياته بنظرة حاملة على أمل ان ربنا يرزقنا بلالا تانى الأيام دى يقتل السيبي ويريحنا من وشه.

سؤال على جمب بقى..

عارف انت سيف الدين اينال بعد ما قلب عثمان ابن جقمق من على الكرسي حصل معاه ايه؟

حط ابنه احمد مكانه وهو لسه عايش.. وعلشان يضمن الكرسي لابنه ويحميه من ملاعيب الامراء.. قام مرقى الأمير سيف الدين خشقدم وخلاه اتابك العسكر ووصاه على ابنه.. اه.. ماهو الى مربى قرد عارف لعبه.

مش سهل اينال علفكره..

بس يا سيدى.. خلصت حكاية من حكايات المحرو.....

انت بتبصلى كده ليه؟؟

مستنى تعرف حصل ايه مع ابن اينال؟؟

قصداك ان الأمير سيف الدين خشقدم قلب ابن اينال من على الكرسي وقعد مكانه يعنى؟

طيب وهو ايه الجديد؟

زى ما ططر عمل.. اتعمل فيه..

زى ما برسباي عمل.. اتعمل فيه..

زى ما جقمق عمل.. اتعمل فيه..

زى ما اينال عمل.. اتعمل فيه..

جمعية ودائره يابا..

يعنى في امل ان حق مرسي يرجع يوما؟؟

قول يارب.

## ان المذيعين لأنجاس مناكيد

بعد حمد الله والثناء عليه والدعاء على مارك صاحب الفيس بوك بما يكره.. تنشأ الدول العظمى بالسيوف على ايدين ملوك عظام ببسبيو سابوا وراهم مآثر وبطولات عظيمة يورثها عيال سيس بيعيشوا على حس اهااليهم فترة من الاستقرار.. الاستقرار مع السيس بينتج عنه عيال هفاً تورث كل حاحه على الجاهز وتبقى ايامهم ايام أفول تعيش فيه الدولة مرحلة مرعية من التخطيط لحد ما يورث الحال في النهاية عيال شمال من بتوع الانقلابات فتكون نهاية مأساوية للدولة لا تليق أبداً بالبدايات القوية بتاعة الملوك العظام.

الدولة العباسية مكنتش بعيد عن كل ده للأسف..

طبيعي جدا لما تقرا مقال بيتكلم عن "طشة الملوخية" او "يوم ان ولدت مصر" او "اغمز بعينيك يا سيسي" او تلاقى شاعر هفاً زى ابن سكرة الهاشمي كتب وهو بيلقح على آل طالب..

ان الخلافة مذ قامت ومذ بدأت \*\*\* موسومة بفتى من آل عباس

إذا انقضى عمر ذا قام ذا خلفا \*\*\* فلاحت الشمس وامتدت على الناس

فقل لمن يرتجئها غيرهم سفها \*\*\* لو شئت روجت كرب الظن باليأس

يبقى لازم تتوقع ان الملك ده كله لازم هيزول قريب لأنة ملك – في الوقت ده - قام على التعريض مش العدالة.. لما الحاكم يستمد امجاده من السنة الشعراء واوبرينات اختراعه وبايعناه او اغاني زى تسلم الايادى اكيد هيفوق في يوم على خازوق يخترق مؤخرته علشان بعدها يقعد يندب ويولول على ملك ضايع وللا خيانة الى استأمنهم او اى شكل من اشكال العويل الى مالى التراث بتاعنا.. يمر الزمن وتموت الشخصيات ولا يتبقى في ذاكرة العوام الا المخازى والسقطات الى بتفضل مع غصة في الحلق مهما حاول ترزية التاريخ تجميلها او الدوران حوالها او تلبس الاحداث باللباس الدينى علشان يستدروا عطف الناس ويبتزوا مشاعرهم بمواقف خايبه لا هترجع الى راح ولا ليها اى تأثير الا مصمصه الشفافيف.

بداية من الخليفة العباسي العاشر – المتوكل على الله – بدأت فترة صعود الترك في الدولة العباسية.. يمكن علشان امه "شجاع" كانت تركية.. يمكن علشان الترك اثبتوا كفاءة في الحروب.. يمكن لأن الحكم والخلافة والسياسة مكانوش في دماغه قصاصد ليالى الهوى والموى والشرب والفرفشة مع 4000 جارية زى الصواريخ اللهم اوعدنا.. يمكن علشان مكانش مركز في حال الناس وكانت حياته كلها كبرى زى واحد صاحبنا..

كل ده جابز..

الى يهمنى هنا هو الفترة من 320 الى 360 هجرى..

فترة حكم الأخشيد في مصر..

كثير من الناس لما يسمع كلمة اخشيد علطول ينط في دماغه كافور الاخشيدى.. ليك الحق يا فندم لأنه اشهرهم بالرغم انه بيولوجيا لم يكن اخشيدى ولا عباسى ولا عربى من الأصل.. هو بس كان في خدمتهم ونط على الكرسي كوصى على العرش وبعدين بقى هو العرش لحد ما الدولة الى طلعت بسرعة وقعت بسرعة بينما اصاحبنا العباسيين قاعدين في بغداد بياكلوا سمك مسقوف ويغنوا قولى احبك بتاعة الخليفة الكاظم بالله..

سيرة ابن طولون وابن الاخشيد تحسها نسخة من بعضها.. زى ما كان ابن طولون تركى.. محمد ابن طعج كان تركى.. وزى ما ابن طولون كان والى عباسى على مصر وطمع فيها ليه ولعياله كذلك محمد بن طعج خد مصر مكافأة من الخليفة العباسى وطمع برضه فيها ليه ولعياله.. وزى ما ابن طولون كان شديد واسس دولة سابها لعيل دلوع ضيع البلد بعد ما فلس الخزينة علشان يجوز بنته كمان محمد بن طعج كان شديد في الحكم وقدر يرمى حفيد ابن طولون في الباسكت وينط على الكرسي مكانه علشان يستفرد بحكم مصر..

هو الناس دى مكانش وراها غير مصر وللا ايه!!!

مصر كانت حدوتة يا مون بيه.. شايف انت الدولة العباسية المهولة دى كلها؟ مصر الى كانت بتصرف عليها.. الخراج بتاع مصر كان 2000 الف دينار في السنة.. يعنى 2 مليون دينار ذهب زى ما حكي المقريزى في الخطط.. بيقولك ان من كتر فلوس مصر كان الولا بيعملوا بيها كبرى بين اوض النوم والحمامات في القصور.. حتى ان الشاعر الاحنف السيسى قال في مدح واحد من كبارى المحروسة..

وان كنت لا بد بانيا فعليك بكوبرى \*\*\* فلوس ومصالح من حيث لا تدري

فلا الشعب واع لما تفعله \*\*\* وان وعى.. فخذ فلوسك على سويسرا واطلع اجرى

لما مات محمد بن طغج الاخشيدي طلع على العرش مكانه ابنه انوجور.. عيل عنده 14 سنة معرفش حاجه عن اى حاجه فى وجود رجل الدولة القوى المسيطر على كل شيء والى عارف منين يودى على فين ومعاه مفاتيح كل الابواب فى مصر.. ابو المسك كافور الليثى السورى.. الى خد لقبه "الاخشيدي" من سيده محمد بن طغج الى اشتراه بعد كده.. لقب الاخشيدي نفسه كان لقب فارسي معناه الذكى او النبيه.. استخدمه ملوك فرغانه "فى اوزباكستان حاليا" للاشارة الى اقواهم واعظمهم نفوذا وصاحب اكبر كمية اراضى فيهم.. والخليفة منحه لمحمد بن طغج جدره كده علشان كان واد كفاءة.

فى قصة صعود كافور من العبودية للملك حواديت تستلزم الانتباه..

كافور اتباع لتاجر زيوت فى مصر ب 18 دينار.. كان قصير وشكله وحش.. عبد حبشى اسود مخصى شفته مخرومة.. رجله مشووه وبطىء الحركة.. حاجه كده زى عرفه مشاوير.. لما تشوفه من اول مره متصورش ابدأ ان واحد زى ده ممكن تستنفع منه فى اى شيء الا المجهود البدنى.. وهو ده بالظبط الى استخدمه فيه تاجر الزيوت.. كافور فضل يشيل ويحط فى صفايح الزيت ويكنس ويمسح المعصرة لحد ما زهق التاجر من بطء حركته وشكله الدميم فباعه الى واحد بتاع كتب وعلم اسمه ابن عباس الكاتب.. وعنده عرف كافور ان الطريق لكلية الشرطة مش هيكون ابدأ عن طريق الشغل البدنى فى المعصرة.. اتعلم كافور القراءة والكتابة وبدأت تظهر مواهبه وذكاؤه.. صاحبنا ابن عباس الكاتب قالك عبد زى ده يسوى ثقله ذهب لو بعته هديه لى يقدر يستنفع بيه.. الى هو محمد بن طغج طبعا.. وفى قصر محمد بن طغج اصبح كافور مسئول عن تعليم الامراء ويظهر كده انه كان "مصطفى بكري" شوية زياده.. لأن كل ما ابن طغج يرشحه لمنصب.. كان كافور يرفض بحجة رغبته فى البقاء فى خدمة مولاه..

كافور كان عنده حلم.. فى الوقت الى باقى العبيد كان حلمهم يتباعوا لطباخ علشان ياكلوا براحتهم.. هو كان بيحلم بحكم مصر.. هياحكم ازاى وهدومه غرقانه زيت وعرق من اثر الشغل؟؟

محدث عارف..

كافور اخيرا قبل يبقى ظابط فى الجيش عند ابن طغج.. كافور كبر وبقي له حملات عسكرية فى الشام والحجاز وكمات بقى مبعوث ابن طغج للخليفة فى بغداد.. يعنى اتعلم الحرب والسياسة كمان بغض النظر انه كان مخصى.. يمكن دى اكثر حاجه نفعتة لأنه كان رايى النسوان من دماغه تماما فعرف يتفرغ لشغله.. ماهو يا ابني الدنيا كده.. الى يمشى ورا النسوان عمره ما يفلح ابدأ.

فى بيت محمد بن طغج اتعلم كافور اصول الصنعة.. نقدر نقول انه اترى تربية عوالم.. محمد بن طغج نفسه مسك حكم مصر بنصبايه من اخراج حسن الامام.. ايامها كان محمد بن طغج ماسك حكم الشام ومصر فيها والى عباسى اسمه تكين الخزرى.. لما مات تكين الخزرى الخليفة حط مكانه ابنه محمد.. قوم الرسالة دى تقع فى ايد محمد بن طغج الى شطب اسم تكين وحط مكانه طغج.. وبكده بقت الرسالة بأسم محمد بن طغج بدل محمد بن تكين.. تفرق ايه يعنى للو من ابوللو؟؟

طبعا عساكر محمد بن تكين معجبههمش الكلام ده واعتصموا فى خليج رابعة.. الامر بعد كده متروك لخيالك علشان تتصور اتعمل معاهم ايه.

فى دولة محمد بن طغج كافور كان الكل فى الكل.. لما مات محمد بن طغج طلع مكانه ابنه انوجور تحت وصاية كافور حسب وصية الاب.. انوجور كان مجرد اسم بلا اى تأثير.. كافور هو الى كان ماسك كل شيء وهو الى كان بيصرف للواد وامه ال 400 الف دينار.. مرتبهم السنوى.

انوجور معجبوش الحال فهج على الشام.. هتفتكر بقى انه هناك رتب الجند وعمل قلق علشان يستعيد الحكم من كافور.. اقولك ان هو كان ناوى يعمل كده اه بس امه عقلته لأنها كانت عارفة انه مش اد كافور.. انوجور انقطعت اخباره فى الشام وكل الى عرفناه عنه انه مات مسموم وعمره 30 سنة.. وبكده ينتقل الحكم لى بعده فى الطابور من بيت الاخشيدي.. اخوه الصغير على.. وبرضه كافور كان الوصى عليه وحبيه فى قصره ميعملش حاجه الا الصلاة واللعب مع النسوان.. على كمان مات صغير ومسموم زى اخوه.. واصبحت السكة فاضية لكافور علشان يبقى هو الوالى.. خلاص عيال الاخشيدي خلصوا والخليفة مفرده فى بغداد ومش حمل والى جديد وانقلابات وحرب ووجع قلب كام سنة هيقف فيهم اكيد خراج مصر.. فقالك ياللا.. الخيرة فيما اختاره الله.. كافور كافور وامرنا لله.. ويقال برضه على استحياء كده ان كافور مش برىء من موت العيال دى.. شخصيا اتوقع انه اه له يد فى موت العيال دى.. ماهو مش معقول يعنى الاتنين يموتوا مسمومين بنفس الطريقة واحد فى الشام والتانى فى مصر..

رسميا كافور قعد في الحكم سنتين.. من سنة 355 الى 357 هجرى.. لكن الفعلى انه كان مسيطر على كل شيء من وقت وفاة محمد بن طغج سنة 334 هجرى.. يعنى 23 سنة مصر تحت حكم عبد حبشى مخصى اهيل زى ما رسملنا المتنبى صورته كده..

طيب هو كافور فعلا كان اهيل ويستاهل الكبراج زى ما وصفه المتنبى وللا المتنبى كان بيهيد شأنه شأن كل رجال الاعلام في كل العصور؟  
تعالوا نشوف..

ملحقناش نخلص من البلوك الاولانى علشان ينزل البلوك التانى علطول ومن غير سبب.. البوست الى اعترضوا عليه رجع واعتذروا عن مسحه.. بس البلوك فضل شغال.. اشوفكم بعد 30 يوم ان شاء الله.. هبقى موجود على MEWE ان شاء الله وبحاول ادعيس في التليجرام اهو.

بالنسبة لحكاية كافور.. فده الجزء التانى.. الجزء الأول نزل امبارح على الصفحة هنا قبل البلوك علطول.. هتلاقوا اللينك بتاعه في اخر الكلام.  
ونرجع بقى لحكاية كافور.. كنا بنقول ايه؟؟

اه.. قلنا ان المتنبى كان شاعر شديد محدش ينكر.. فصيح ومتمكن من اللغة والالفاظ والكلمات ملعبه ولو كان في عصر الجاهلية كان بقى من شعراء المعلقات اكيد.. المتنبى كان بياكل عيش من شعر المديح ومسح الجوخ والتطويل لسيف الدولة الحمداني في حلب.. لكن حصل ان سيف الدولة زهق منه ومبقاش ينهيه بكلمات التطويل والتعريض بتاعته ورضى ان واحد من الشعراء المغمورين في بلاطه اسمه ابن خلوية يكب على المتنبى دواية الجبر ويضربه بالسيف في وشه قصاده وهو ساكت.. خدها المتنبى على كرامته وساب قصر سيف الدولة وهج على مصر بعد ما عرف ان فيها حاكم له في الليلة بتاعة الشعر والادب دى.. فبدأ يمدح كافور.. المتنبى عمل الى هو بيعرف يعمل.. التعريض والتطويل والتملق.. عندك مثلا اول ما وصل المتنبى لمصر كان لسه ضاربها زلزال عمله الاخوان طبعاً.. المتنبى لقاها فرصه يواسى المصريين ويعرض للحاكم في نفس الوقت فعمل عقد مع قناة صدى البلد وبدأ يقدم برنامج ياكل فيه دماغ الناس بالكذب قال مره فيه..

ما زلزلت مصر من كيد اريد بها \*\* ولكنها رقصت من عدلكم طرباً

- رقصت من عدلكم طرباً؟؟
- ايوه..
- يعنى ده مش زلزال نتج عن تحرك طبقات القشرة الأرضية؟؟
- تَوَّ تَوَّ.. دى رقصت من عدلكم طرباً

طيب هو المتنبى كان يعرف كافور؟

ابدا..

اتعامل معاه قبل كده؟؟ اشتغلوا سوا مثلاً؟؟ درسوا مع بعض في الازهر؟؟ اتربوا في حدايق القبة سوا؟؟

ابدا..

امال ليه المتنبى قال كده؟؟ التعريض علم له اصول.. اقله يعرف حاجه عن الى هيمسحله جوخ وميدخلش بصدرة كده.. المفروض ان المتنبى راجل محترف يعنى مش تلميذ.. هو مكانش بيلعب في بلاط سيف الدولة يعنى..

كافور وقتها في مصر كانت سمعته كويسه جدا.. كان ماشى بالعدل بين الناس.. بيطعم الجعان ويكسى العريان ويقدم اهل العلم مش اهل الكلام.. كان بيصرف على حملات الحج وعمل اوقاف كتير يصرف منها على ترتيبات الحج واطعام الفقراء.. بنى مستشفى كبير اتعرف باسم مارستان كافور كان اكبر من مارستان ابن طولون وكان فيه ادوات طبية تسوى 3000 دينار.. عمر مساجد كتير من بينهم مسجد عمرو بن العاص.. كان بيصرف على اهل العلم ومن ضمنهم كمثال أبو بكر محمد بن أحمد بن سهل الرملي النابلسي الى قال "لو كان معي عشرة أسهم رميت الروم بسهم ورميت بني عبيد بتسعة" وقتله المعز لدين الله الفاطمي "الشيبي" لما سمع الكلام ده.. كافور عمل جنائين واسطبلات خيل وحفر للناس خلجان ميه علشان يسيطر على الفيضان ويضمن تدفق المية لو النيل قل عقله.. كان بيخرج من بيته كل يوم 1700 رطل لحمه وفراخ بالاضافة الى 13000 وجبة للفقراء قايم على توبيخهم وتجهيزهم غلمانة وعبيده ال 4000.. كافور عمل اسيلة مية في كل مكان وكان عنده خزان ميه كبير في بيته بيطلع منه كل يوم 50 قربة يفرقهم لله.. كافور هو الى ابتدع فكرة موظفين الحكومة الميرى ودول غير

عسكر الجيش وكانت مرتباتهم في ايامه 500 الف دينار في السنة.. يعنى بحسبه بسيطة كده مصر كان بيطلع منها قرب ال 3 مليون دينار كل سنة قبل اى مصاريف ما بين خراج ومرتبات ومصرف ابن الاخشيده.. يبقى حال الدولة كان عامل ازاى؟

كافور لم ينكر اصله ابدا ولا عاش الدور انه ابن ذوات لما مسك الحكم.. حصل وهو صغير ان اصابه جرب.. فطرده سيده بياح الزيت علشان قرف من شكله الى هو اساسا وحش.. صاع كافور في الاسواق يشحت اكله من الناس الى كانت بتنفّر منه مرتين.. مرة علشان شكله الوحش ومره علشان الجرب.. مره من المرات مد ايده لطباخ في السوق بيشتحت منه اكل.. الطبّاخ ضربه بمغرفة الاكل السخنة على ايده.. ويبدو انها كانت ضربة غشيمة لأن كافور وقع بعدها مغمى عليه وفضل مرمى على الارض لحد ما رق لحاله واحد غلبان زيه.. خده وعالجه لحد ما خف وفضل كافور شايه الجميله دى طول عمره وسأل عليه لما بقى حاكم وعرف ان الراجل مات وساب بنتين الكبيرة فيهم على وش جواز.. قام كافور مجهزها من ماله الخاص ب 4000 دينار اتكتبوا في القايمه طبعاً على العريس العبيط.. وفضلت حكاية مغرفة الطبّاخ في ذهن كافور.. كل ما يحس في نفسه بكبر يفكر علطول المغرفة.. حاجه كده زى موقف الشيخ الشعراوي لما مسح حمامات مسجد سيدنا الحسين وهو من هو علشان يجبر نفسه على التواضع.

لما مات كافور لقوا في خزنة 700 الف دينار.. ساب وراه بساتين ودواب وجواهر بما قيمته 600 الف دينار.. يعنى 600 مليون بالصلاة على النبي زى ما قال ابن خلكان في وفيات الاعيان واكد على كلامه موفق الدين بن عثمان في مرشد الزوار الى قبور الابرار واعاد الكلام تانى ابن الزيات الانصارى في كتاب الكواكب السيارة الصادر سنة 810 هجرى.

فكان طبيعى ان المتنبى لما ييجى يلاقى حاكم زى ده.. يروح نازل علطول برقصت من عدلكم طربا.. محدش اكيد هيكره حاكم زى ده قال عنه الفاطميين "لن نستطيع فتح مصر قبل زوال الحجر الأسود" في اشارة لياسه من دخول مصر طول ما كافور موجود..

ومع ذلك فضلت قصيدة المتنبى في هجاء كافور "بتاعة عيد بأى حال عدت يا عيد" اشهر من سيرة كافور وخصوصا البيت النجس بتاع:

لا تشتري العبد الا والعصا معه \*\*\* ان العبيد لانجاس مناكيد

ايه الى عمله كافور يخلّى واحد زى المتنبى يتنمر عليه ويذمه بأقصى ذم تقيل على نفس اى عبد وهو صفة العبودية نفسها؟

طيب ايه الى عمله المتنبى نفسه يخلّى الناس تفتكر كلامه عن كافور وينسوا افعال كافور نفسه الى كان بيكسيهم ويطعمهم ويحميهم؟

لما مات كافور اندفن في القرافة الشرقية في المقطم.. المتنبى استغل موته وكتب على قبة القبر..

ما بال قبرك يا كافور منفردا \*\*\* بالصحيح المرت بعد العسكر اللجب

يدوس قبرك أفناء الرجال وقد \*\*\* كانت أسود الثرى تخشاك من كئيب

مش بس كده.. ده راح على ظهر القبة وكتب..

أنظر إلى غير الأيام ما صنعت \*\*\* أفنت أناسا بها كانوا وما فنيت

دنياهم ضحكك أيام دولتهم \*\*\* حتى إذا فنيت ناحت لهم وبكت

يا ستار يارب.. ايه الغل ده كله!!

كافور مكانش يخيل.. هو كان بيصرف على المتنبى في حدود معرفته ان المتنبى له طموحات اكتر من الفلوس.. ظهر كده لما المتنبى استعجله علشان يوليه اقطاع في مصر يحكمه.. ماهى اصلها كانت عزبة ابوهم بيفرقوها على بعض حسب مزاجهم.. كافور رفض وقاله " إذا كنت في حال الفقر سمت نفسك إلى النبوة فمن يطيقك إذا أصبحت ولاية وصار لك أتباع؟"

وهنا فاض الكيل بالمتنبى وعرف ان كافور مكش من القرع بتاع رقصت من عدلكم طربا وراح نازل علطول بأن العبيد انجاس مناكيد قبل ما يسب مصر كلها ويهيج على عضد الدولة البويهى "الشيعى" علشان يرقص قصادة رقصه التعريض الاخيرة بشتيمته في كافور واهل السنة.. عضد الدولة كان راجل زى كل الرجالة.. خد مزاجه من شعر المتنبى وبعدين رماه في الصحراء بعد ما سلط عليه قبيلة اعراب يقتلوه شر قتله وهو عمال يغرد:

والخيل والليل والبيداء تعرفنى \*\*\* والسيف والرمح والقرطاس والقلم.



خيل وليل وبيداء وسيف ورمح وفي الآخر مخدش في ايديهم غلوه.. يعنى حتى في دى كمان طلع اونطجى..

طيب كافور كان له تعابين كتير في الشام والحجاز.. المتنبى مكانش بعيد عنه يعنى.. ليه مقتلوش جزاء طولة لسانه؟؟

طيب لما هو كافور وحش ولازم نشتره والعصا معه.. ايه الى خلاك سبت سيدك الاولانى وجريت عليه؟؟

طيب تفسر بأيه ان كافور مات سنة 357 والفاطمييين دخلوا مصر سنة 358 هجري من غير ضربة سيف واحده.. الى هما يعنى لو كانوا واقفين على الباب مستنيين يمكن كانوا خدوا وقت اطول من كده.

تقلبها يمين.. تقلبها شمال.. مش هتلاقى غير ان المتنبى كان راجل افاق منافق متملق.. استغل موهبته الشعرية وان عنده متابعين على الفيس بوك علشان يشوه صورة الراجل الطيب كافور.

قلب في التاريخ يمين وشمال كمان مش هتلاقى للمتنبى الاشوية كلام بينما عاشت مصر في ايام كافور 20 سنة سعادة..

قلب في التاريخ تانى.. هتلاقى الف مظلوم زى كافور وبهاء الدين الاسدى وهارون الرشيد.. ناس افاضل مشكلتهم انهم وقعوا مع طبالين ورقاصين الاعلام الى للأسف كلامهم بيوصل لعدد كبير من الناس علشان شكله حلو بينما فيه السم الزعاف.

قلب في التاريخ وهتعرف ان العقل الجمعى جاهل غبى ظالم سهل تسيطر عليه لما تقوله ان شقة حسن مالك كان فيها وفيها وللا اى حد مش موافق على تصرفات البلطجية يبقى اخوان وعازي يهد الدولة..

قلب في التاريخ وانت هتعرف ان المتنبى لو كان انصف كان قال..

لا تستمع للاعلاميين الا والعصا معك \*\*\* ان الاعلاميين لانجاس مناكيد

ولا تحزن لحادث ابن اديب فإنه \*\*\* حرض على قتل الابرياء في رابعة يوم العيد

وافرح بطرد ابن بسيونى فقد رمى \*\*\* اسيادة الصعايدة بكلمات ينافق بها سيده

وليس هناك من يعتبر.

بومبي – المدينة الملعونة(1)

(+18)

.....

تحذير هام..

الحلقات دى غير مناسبة للمرحلة العمرية الاقل من 18 سنة

.....

خلاص.. الأجازة بلج..

نشتغل بقي.

من يوم عرض الحلقتين بتوع بومبي فى خواطر 10 فى رمضان سنة 2014 وانا بفكر فى زيارة البلد دى.

بلد كاملة تندفن اكر من 1500 سنة كاملة تحت الارض.. تفضل محتفظة بحالتها وقت الانفجار البركاني.. تفضل مبانيها وشوارعها ورسوماتها وتماثيلها زى ما هى مدفونة ومحدث عارف عنها حاجه.. تتحنط جثث سكانها بشكل غير مباشر على اوضاع حياتهم العادية وقت وقوع الكارثة.. مدينة كاملة تعداد سكانها 13 الف نسمة تتحول من مدينة شديدة الثراء والبهجة الى اثر بعد عين وانقاض فى غمضة عين.. والسبب.. انفجار بركاني.

ازاى الكلام ده؟

النظرة الأولى لكل ما وجدوه فى بومبي تدليك الاحساس ان ده انتقام الهى لا محالة.. تحس ان الكارثة سابت المدينة او سابت اثار من المدينة علشان نعرف الى حصلهم.. الأدلة الموجودة كانت من الوفرة بحيث ان الاركيولوجيين قدروا يبنوا موديل كامل بالجرافيك يوضح الشكل الكامل لمباني البلد والحياة فيها قبل الانفجار.. تحس ان الانفجار حصل علشان يمحي الناس بس ويحافظ على المباني والرسوم والتماثيل.. تحس ان الانفجار جه علشان هدف وحيد.. حققه وخلص.

موجود مع البوست ده صورتين وفيديو..

الصورة الاولى جرافيك.. صورة تخيلية للشارع الرئيسى فى بومبي وقت انفجار البركان..

الصورة الثانية هى ما تبقى حاليا او ما تم العثور عليه بالحفريات من الشارع ده.. تقدر تشوف وتقارن بين الاثنين وتختيل.

الفديو عبارة عن فيلم قصر مدته 20 دقيقة بيحكى عن الانفجار وبس.. مش فيلم كامل عن بومبي.. انما هو فيلم جه مع الكتاب الى جيبته من هناك بيشرح ازاى الانفجار حصل.

سؤال منطقي للتفكير والبحث..

بركان انفجر وطلعت منه سحابة دخان وصل ارتفاعها 30 كيلومتر فى الفضاء وبعدين سالت منه انهار من الالف.. ازاى يموت البشر بس ويسيب المباني؟ مع العلم ان الانفجار البركاني يصاحبه زلزال فى العادة.. يعنى بركان وزلزال فى نفس الوقت.

وقت عرض حلقات خواطر 10 مكانش عندى عيال وكان السفر أسهل من دلوقتى.. سافرت بعدها بالفعل على ايطاليا.. بس الوقت كان أضيق من انى اتحرك من روما الى نابولى.. كمان كنت ممنوع من مروح ايطاليا.. اترعى عليا يمين الخلع ان رحت لوحدى.. حرمانا المصون مواليدي ليبيا وزياره ايطاليا بالنسبالها مسألة حياة او موت.. ويبدو انى وعدتها بزيارة ايطاليا ايام الخطوبة.. مش عارف انا كمية الوعود الى عمال انفذها دى وعدتها امتى.. دى الخطوبة كلها كانت 6 شهور وانا بقالى 7 سنين بنفذ فى وعود بيتقالى انى وعدتها ايام المحروقة الخطوبة.

ما علينا.. المهم انى بعد 5 سنين.. نفذت وعدى بزيارة ايطاليا..

ورحنا بومبي..

أحمد الشقيرى بالنسبى مصدر ثقة.. كمان هو عرض فى الحلقتين بتوع "الا المجاهرين" ادلة لا تقبل الشك بخصوص مدى الانحلال والانحراف الجنسي الى كانت عليه مدينة بومبي قبل ما تندفن تحت رماد بركان فيزوفىوس سنة 79م.. هو فى الحلقة قال صراحة ان مش من حقنا نقول ان ده انتقام الهى او لأ طالما ربنا سبحانه وتعالى لم يصرح بكده مباشرة فى القرآن الكريم وطالما ان الرسول عليه الصلاة والسلام لم يذكر اى شيء بخصوص الناس دى.. الانكار مش لانتقام ربنا.. انتقام الله عزوجل من الفجره حصل بالفعل فى سدوم وعمورية ومداين صالح مثلا.. دول اه.. نقول ده انتقام ربنا.. انما بومبي لم تذكر فى التاريخ اطلاقا.. ولا فى اى كتاب من الكتب المقدسة ولا فى رسائل تلاميذ السيد المسيح.. بالرغم من معاصرة بومبي لميلاد المسيح ونهايته.. لكن الكتب فيما يخصها.. بيضاء من غير سوء.. ده كلام احمد الشقيرى رغم ان المنطق فى الحلقة كلها وطريقة العرض تقول انه عاوز يوصلنا ان الى حصل ده انتقام ربنا منهم علشان كانوا فسقة ومجاهرين بالذنوب.. لا اعتقد ان الكلام ده صحيح والا كان حصل نفس الكلام مع مدن تانية موجوده حاليا وقائمة.. الى شفته فى سان فرانسيسكو يستلزم 3 انتقامات الهية ورا بعض ان كان معيار الانتقام الالهى هو مدى فساد الدول.

أحمد الشقيرى عرض الحلقات من منطلق ان بومبي كانت مدينة جنسية صرفه.. مدينة قائمة على الجنس وعائشة فى الجنس وبتاكل من الجنس وبتلعب جنس وبتحارب بالجنس وبتتاجر بالجنس.. والدليل هو كم الرسوم المهولة الى عليها صور اباحية تصور صور يومية من حياة أهل بومبي او أدوات المائدة بتاعتهم او حلى الستات مثلا او الارقام او اى تفصيلة.. كل تفصيلة منهم تحمل رسالة جنسية بشكل او بآخر.. افراط فى الجنس والدعاية ليه و"التبرك" بيه بطريقة ملفتة.. حاجه كده تخليك تتخيل ان البومبيين من اول ما بيصحو لحد ما بيناموا وهما قاعدين يلعبوا عريس وعروسة.. وجود اكر من 40 نادى لممارسة الدعارة فى مدينة تعدادها 13 الف اول عن آخر – حسب ما قال أحمد الشقيرى – لازم هيخليك تفكر وتتساءل..

لما السيكو سيكو كان كده.. امال الناس دى كانت بتشتغل امتى؟؟

وتمائيل المحاريين دول بيعملوا ايه هنا؟ الجماعة المحاريين دول مش بيبقى عندهم وقت للكلام ده وكمان ميادين بطولاتهم فى السهول المفتوحة وعلى الشواطىء وفى البحار.. مش فى اوض النوم ابدأ.

وبعدين يحاربوا مين وليه وامتى وهما بيقضوا ثلاث ارباع اليوم فى الحمام؟؟

اثر الثراء الفاحش فى المدينة دى.. جابوا منين الفلوس دى كلها.. هل كل ده كان دخل التجارة المحرمة؟

على أساس مثلا ان الامبراطورية الرومانية كلها مكانش فيها ستات الا فى البلد دى فكل الناس كانت بتشد الرجال من كل مكان علشان تروح هناك تلعب احيه وترجع تانى بلادها للشغل؟؟

طيب السوق والمعبد والمسرح والمخبز ودكاكين الحداده بيعملوا هنا ايه لما كلها قائمة على تجارة الجسد؟؟

والسؤال الأهم..

لما هى مدينة ابiche كده.. امال ليه فى حمامات رجالى وحمامات حريمى!!!

بالمنطق الى فهمناه من حلقة الشقيرى.. كله سايح على كله ومحدث عارف مين مرات مين.. نساؤهم خلقت للركوب بغض النظر عن ماهية وشخصية الفارس.. الانطباع الى وصلنى بعد ما شفت الحلقات دى ان ممكن العيل من دول ابوه بيعته يجيب بنص جنبة روماني عيش.. فالواد وهو رايح الفرن يشقط جارية ياخذها ورا المعبد وبعدين يروح يجيب العيش وهو راجع فى السكة يحط قفص العيش على الارض ويشقط واحدة تانية ورا المعبد التانى.. ولما ابوه يقوله اتأخرت ليه يا هباب البرك الرومانية.. الواد يقوله معلش بابا.. كان فى ايدي حنة شغل بخلص عليها.

أحمد الشقيرى عرض مقتطفات واقتباسات من كلمات الدكتور توماس ماكجين.. صاحب كتاب اقتصاد الدعارة ايام الرومان.. لما قال ان السكس متغلغل فى حياتهم من اول كوبايات الشرب لحد عواميد الاضاءة فى الشوارع..

مش بس كده.. شفتنا كمان تصوير من مكان فى البلد دى اسمه لوبينارا جراندى.. اقدم بيت دعارة معروف فى تاريخ البشرية.. كلمة لوبينارا بالرومانى تعنى مكان اباحي او مكان كل شيء فيه متاح ومباح.. جراندى تعنى الكبير.. يعنى نقدر نفهم ان اسم البيت بالرومانى يعنى بيت

الدعارة الكبير.. في اشارة الى وجود بيوت ثانية اقل منه مثلاً.. وده نفس الشيء الى تم ذكره في الفيلم الوثائقي "الجنس في العالم القديم".. هتلاقوا الفيلم كامل في اللينك ده.. مدته 43 دقيقة.

<https://www.dailymotion.com/video/x3uh1q7>

جميل.. لحد كده الانطباع الى واصل عن يومي يتطابق مع الموجود في الفيلم الوثائقي وما ذكره أحمد الشقيري.. ومتطابق كمان مع ما تم كشفه من اثار المدينة الملعونة -مبدئياً- سنة 1748م.

وقالك بقي يا سيدى ان من هول ما كشفوه.. قرر الملك فرانسيس الأول ملك نابولى سنة 1819م انه يلم كل ده ويحتفظ بيه في اوضة سرية في متحف نابولى الاسطوري.. والاوضة دى ما زالت موجوده لحد النهارده واسمها "الكابينة السرية".. ولحد فترة قريبة مكنتش مفتوحة للزيارة كمان.

كل الأدلة لحد دلوقتى تقول ان بومبي كانت "Sin City" زيتها زى لاس فيجاس وسان فرانسيسكو وبانجوك وباريس والمنامة ويروت. بس زى ما بقول دايماً.. الرؤية تختلف تماماً عن السمع.. لما رحت وشفت بنفسى.. اكتشفت ان الحقيقة غير كده خالص..

الغرفة السرية موجودة فعلاً في متحف نابولى.. دخلتها وشفت كل الى فيها.. الاثار موجودة وفيها اسراف في الجنس فعلاً.. الكوابيات والاطباق وحلقان الستات وتفصيل ثانية كتير فيها رموز جنسية.. الارقام مثلاً عبارة عن بشر بتعمل الحاجات دى.. بحيث ان راجل وست يبقى كده ده رقم 2.. 2 رجالة وست او اتنين ستات وراجل او 3 رجالة او 3 ستات يبقى ده رقم 3.. وهكذا.

شيء مفتح فعلاً..

ومشيت من اول بومبي لحد اخرها.. خدت البلد كلها قياسية رايح جاى اكثر من مرة علشان اشوف واتفرج على الى كانوا يوماً ما بيلعبوا بالفلوس والستات لعب..

ايه ده!!!!

ده الكلام مش كده خالص..

بومبى – المدينة الملعونة(2)

(+18)

.....

تحذير هام..

الحلقات دى غير مناسبة للمرحلة العمرية الاقل من 18 سنة

.....

وقفنا فين في الكلام عن بومبي؟

احنا اصلاً مقلناش حاجه عن البلد.. كل ما كتبت كان الانطباع الى وصلنى من حلقات خواطر 10 "الا المجاهرين" الى كان عملها احمد الشقيري في رمضان 2014.. الانطباع الى وصل بأنها أول مدينة على الأرض عرفت معنى كلمة خلاعة.. مدينة كلها جنس في جنس.. كله سايح على كله ومنعرفش مين بيعمل ايه في مين ومع مين امتى وفين وازاى.

طيب.. غير موضوع السيكو سيكو ده.. بومبى كان بتعمل ايه في الدنيا؟

لو جينا الموضوع من اوله هنلاقى بومبي كانت مدينة عادية جداً ملهاش اى ذكر في التاريخ لا اليونانى ولا الرومانى.. مجرد مدينة شبه مهجورة موجودة في سفح بركان المفروض انه خامد.. 1500 متر بس هي المسافة بين اول الجبل البركاني والمدينة.. ومش ثابت ان كان البركان ده ثار في مرحلة ما قبل الميلاد او لأ.. بس المتعارف عليه ان التربة في المنطقة دى خصبة جداً والزراعة ممتازة.. اذن ده دليل قوى ان البركان ده ثار هناك يوماً ما ولم يدون هذا اليوم في التاريخ.. ما هو ثورات البراكين اد ما فيها خراب في لحظتها.. انما كلها خير بعد كده لما الالافا بتبرد.

من 6 قرون قبل الميلاد المنطقة دى كلها كانت تحت النفوذ اليونانى.. سكانها ناس فلاحين وصيادين.. بدأت هجرات الناس ليها من القرن الخامس قبل الميلاد.. زى قبائل السمنيين مثلا الى كانت عايشة فى الجبال المحيطة.. بدأت القبائل دى تنزل من الجبل وتعيش جمب مصادر الزراعة السهلة والميناء وبدأت تتشكل ملامح مدينة بومبي.

زراعة وميناء ومطر بالهبل.. يعنى مقومات الثروة ببساطة.. من القرن الخامس قبل الميلاد لحد سنة 91 قبل الميلاد بومبي بدأت تتعرف وتكتسب سمعة كويسة جدا من تجارة الخمور والحري والعبيد.. بدأت افواج الباحثين عن الثراء تشد الرحال الى بومبي على السمع والسمعة.. تجار العبيد وخصوصا الجوارى كانوا بيستلقطوا الى يقع من الحروب المقدونية ويجروا بيهم علشان يبيعوهم لاصحاب الثروات فى بومبي.

فضل الحال على كده لحد ما الرومان قرروا يضموها للامبراطورية الى كانت يوما ما لا تغيب عنها الشمس سنة 91.. ويبدو ان الرومان لما دخلوها جابوها الارض وبنوها من اول وجديد لأن كل الى تم العثور عليه فى بومبي كان رومانى الطابع اللهم الا بيت واحد بس لقوا فيه لوحات كتير ورسوم بتصور حروب الاسكندر مع داريوس ملك الفرس.

عندكو فى الصور مثلا صورة تمثل البيت الرومانى التقليدى.. ده موجود منه كتير اوى فى بومبي حاليا.. كل البيوت نفس الشكل.. منطقة استقبال ضيوف كبيره.. الى هى الصالة مثلا.. واوض محيطه بالصالة.. ومطبخ فى اخر البيت موجود فيه فرن لزوم الخبز.. ولسة الفرن موجود وتقدر تميزه بسهولة.. لكن طبعاً من غير حطب.

من المشى والتجول فى بومبي تقدر تلمس بكل سهولة انها كانت مدينة عامرة مزدهره فيها تجارة وعلم وفنون مختلفة..  
خد عندك مثلا..

البلد كلها كانت متخططه شوارع طولية وعرضية.. الشوارع مرصوفة بالحجر.. الرصف حاليا يقول انه من 2000 سنه كان متساوى.. مناسب لحركة عربيات ماشية على عجل.. مش بس الخيل.

وهتلاقوا فى نص الشارع زى ما يكون فى 3 احجار بارزه جدا لفوق.. زى ما يكونوا بقايا عمدان مثلا..

الحقيقة انهم مش بقايا عمدان.. الحجارة دى معموله كده بقصد.. لما موسم المطر بيجي والسيول بتكثر.. الشوارع دى كانت بتغرق.. علشان كده عملوا الحجارة دى فى مستوى اعلى من مستوى المية الى بتغرق الشوارع.. فالناس تعرف تعدى من فوقها.. نفس الفكرة الى بنعملها فى شوارعنا العشوائية لما المجارى تضرب.. تلاقى الناس عمالة تنطط فوق الحجارة الغير منتظمة زى الاراجوزات علشان تعدى من ناحية الى ناحية تانية فى الشوارع الغرقانة..

اهو ده كان نفس الكلام فى بومبي برضه.. بس وقت موسم المطر بس.. وهتلاقوا كمان ان الحجارة دى على فى نص الشارع.. يعنى مش موجوده فى تقاطع ولا حاجه علشان متعطش حركة المرور.

ابيار الميه او ما نسميه احنا الاسبله كانت منتشرة بكثرة فى البلد.. كل شارع فيه سبيل.. وفوق كل سبيل هنلاقى شكل وش عليه انفعال معين.. غضبان.. مندهش.. فرحان.. بيضحك.. مكش.. وهكذا.

طب الوش ده لزومه ايه؟؟

ده بديل الترفيم.. علامة مميزة للبير.. علشان تقول مثلا لمديرك وانت متأخر على الشغل انا موجود اهو عند البير الى عليه وش بيتف عليك.

طب دى ادلة على وجود حضارة وعلم اهو فى تخطيط البيوت والشوارع.. خصوصا لما تلاقى كل مسافة معينة احجار الرصيف مخرومة.. الخرم ده مش لعبة ولا معمول منظر.. ده علشان تربط فية الحصان لما تحب تقف قصاد محل من المحلات المنتشرة بكثرة ملفته فى كل شارع.. يعنى نقدر نقول ان قانون البلد كان بيلزم اى حد يقف يشتري حاجه او يدخل محل علشان ياكل او يقضى مصلحة انه يربط حصانه فى المكان المخصص.. والا ياخذ مخالفة صف تانى.

ده مش كده وبس.. كل مسافة هتلاقى نص عمود مجوف جواه اسود تماما..

يطلع ايه ده بقى؟؟

يكونش عمود نور مثلا؟؟

ايوه.. بالظبط.. اثار الزيت فى تجويف العمود يقول ان اهل بومبي عرفوا ضاءة الشوارع عن طريق الزيت.. يعنى كانت فى حياة ليليه فى بومبي مش بس التجارة والسيكو سيكو فى النهار.

وايه كمان؟؟

في الصور هنلاقي صورة محل تجارى واقف فيه راجل وست بيشتروا وبياع يبييع.. صورت الصور دى من الكتاب قبل الجرافيك وبعده.. الصورة الملونة تبقى النموذج التخيلي الى اتعمل بناء على ما وجد من اثار موجوده في الصورة القديمة.. هتلاقوا 3 صور ورا بعض.. الصورة التخيلية.. وصورة ايدى وانا بقلب الصفحة.. وصورة المكان حاليا..

تجارة اهي.. تجارة مزدهرة كمان.. والا نفسر بأيه وجود اكثر من 300 محل تجارى في مدينة اقصى تعداد ليها كان 20 الف؟؟ المنطق يقول ان الرجل كانت كتير اوى على البلد دى.. زوار كتير من اكثر من مكان.. ويأكد المنطق ده وجود 8 مداخل للبلد في مساحة 3 كيلو اول عن اخر.. ده غالبا لتسهيل حركة المرور للزوار. طيب.. ادى كده علم وتخطيط.. وتجارة..

فين الفنون بقي؟؟

اول مداخل بومبي من على اليمين خالص هيدخلك على المسرح علطول.. مسرح روماني البناء والشكل والفنون.. مسرح كبير يساع في حدود 5000 مشاهد.. بس مكانش مسرح للالعاب الرومانية الدموية.. انما كانوا بيعرضوا فيه مسرحيات سوفوكليس وفرجيل.. ونقدر نشوف اوض الممثلين واماكن التدريب في ساحه واسعة ورا المسرح علطول.

طيب في دليل على ان دى كانت اوض الممثلين وان المساحة الى عاملة زى الملعب دى مكانتش تدريب للعبيد على القتال مثلا؟ اه طبعاً.. الصور والرسوم على الحيطان فيها كل حاجه.. كمان مكتوب بالرومانى على مدخل المكان ده انه ده المسرح الكبير.. مما يعنى انه كان في مسارح اخرى اصغر..

وده الى هتشوفه لما تكمل مشى في البلد.. هتلاق مسرح واتنين وثلاثة.. تحت خشبة العرض فيهم لقوا احواض يرجع انها كانت بتتملى ميه وبيترش ميه منها اثناء العرض المسرحى.. يعنى العروض المسرحية في ايام بومبي الزاهرة كانت كلها فانتازيا ومؤثرات.. مش بعيد كمان يكون فيها مؤثرات ضوئية.

بومبي كانت مدينة بيضاوية محيطها 3 كيلو.. من اول ما تدخل من المدخل الرسمى الى جنب المسرح لحد ما توصل لوسط البلد.. مفيش اى دليل على اى حياة جنسية منحرفة اطلاقاً.. كلها شوارع عادية فيها بيوت ومحلات ومسارح.. وخد بقى دى كمان.. حمامات عمومية..

هتقولى امسك.. ماهو الحمام ده اكيد كان بيحصل فيه الى بالى بالك..

اقولك ازاي وهي اصلا حمامات رجالى لوحدها.. وحريمى لوحدها.. وده واضح جدا من الرسوم الموجودة على الاسقف والحيطان.. حمامات رجالة فيها رسوم رجالة قالعة الصنادل الرومانى المميزه وقاعده مأنتخه في المية بتشرب حاجه "القعدة دى حلم حياتى بعد السرير الشبك المربوط بين التختين".. وفي خدم شايل صوانى وحاجات كده.. مفيش اى رسمة لأى مزز اطلاقاً ولا اى رسمة لأى شكل او وضع جنسى مغل.. كمان حمامات الستات معزولة وشبابيكها عالية لضمان الخصوصية.. علشان العيال العفاريت الى زى حمزه ابني اكيد كانوا هيقفوا يبصوا على الستات وهي بتستحمى من خرم الشباك.

طيب ماهو يمكن دى حمامات السادة.. والعبيد بقى موضوع تانى..

يمكن.. نصبر شوية وهنشوف.

خلينا بس نكمل مشى..

الزيارة كانت الساعة 3:30.. في عز نقرة الحر.. كنا راجعين يومها من يوم طويل جدا بدأ الساعة 6 صباحا من مدينة بوسيتانو ثم ساحل امالفي والقرى المحيطة بيه وبعدين زيارة بومبي.. اساسا وصلنا بومبي واحنا بنموت من كمية المشى المهولة الى مشيناها طول النهار في شوارع طالعة بزاويا مرعبة.. ركبي اتكسرت من المشى وحياة فوق كتفى وحمزه مأنتخ في العربية.. العيال كانت بتنام في الاوتوبيس بين كل مدينة والتانية ويصحوا يطلعوا ميتين ابونا انا وامهم في الطريق لحد ما وصلنا بومبي واحنا بنموت بينما العيال كانت يادوب لسه صاحية من النوم.. مش محتاج اقول طبعاً ان حمزه دخل بومبي وعمل عمالة لدرجة انى حسيت ان الاموات هيقوموا من مقابرهم يتفوا علينا بالرومانى ويموتوا تانى.. او يطلعنا من تحت الارض هياكل عظمية ماسكة سيوف علشان تموتنا زى فيلم جيسون والهة الحرب كده.

البلد منظمه.. ونظيفة.. الجماعة الطلاينة بيعرفوا يحافظوا على الاثار كويس اوى.. المشوار من اول البلد لحد وسط البلد اخد في حدود ساعة ونص.. طبعاً نفقت للمرشد والجروب تماماً لأنهم كانوا بيحروا زى الى لسعهم عقرب ومشيت مع نفسى استكشف واقرا وادور. لحد ما وصلت وسط البلد..

ولقيت ايه بقي؟؟؟

(يتبع)

بومى - المدينة الملعونة (3)

(+18)

.....

تحذير هام..

الحلقات دى غير مناسبة للمرحلة العمرية الاقل من 18 سنة

.....

وقفنا فين؟

كنت قلت انى دخلت بومى من المدخل الشرقى.. البوابة رقم 5.. بورتا دى سارنو المجاورة للمسرح الكبير مباشرة.. هتلاقوا مع الصور صورة خريطة للبلد.. الصورة دى هاى ريزوليوشن.. يعنى ممكن تعملوا زووم اكتر من مره وهتلاقوها واضحة مفيش مشاكل.

زى ما قلت فى اول حلقة ان بومى لها 8 مداخل.. اولهم من الناحية اليمين اسمه بورتا دى مارينا.. واضح من الاسم انها بوابة الميناء.. او بوابة القادمين من الميناء.. بومى كانت ميناء كبير ومركز تجاري ضخم.. طبيعى تكون دى البوابة الرئيسية.. وطبيعى جدا يكون قريب منها مركز كل حاجة مهمة فى البلد.. المفروض كنا ندخل منهم.. بس علشان تغير خطوط المواصلات حاليا بعد 2000 سنة من تدمير بومى بالبركان.. دخلنا من البوابة الى كان مفروض نخرج منها وخرجنا من البوابة الرئيسية..

مفيش حاجة بتفضل على حالها..

بورتا دى مارينا مقسومة قسمين.. قسم للمشاه.. وقسم للحيوانات والعربات والبضائع.. قسم المشاة مهيب الحقيقة.. مدخل يليق بمدينة فاحشة الثراء.. يقابلك فى مدخلها تمثال كبير جدا لشخص روماني قديم.. تقدر تميز شكله الروماني بسهولة من شكل مناخيره.. المنخار الروماني فى التماثيل والصور دايمًا ظاهر مستقيم ومعقوف من فوق.. فى صورة مع الصور فيها شكل المنخار الروماني التقليدى.

المهم.. لو دخلت من المدخل الشرقى ومشيت لحد وسط البلد او دخلت من بورتا دى مارينا هيقابلك علطول الجزء الحيوي فى بومى الرومانية القديمة.. والجزء الحيوى ده يقولنا بكل وضوح المدينة دى كانت ايه وبتعمل ايه وعايشة على ايه وشكل اليوم فيها عامل ازاي.

سألت سؤال قبل كده..

هو بومى كانت غرقانة فى الجنس فعلا زى ما كتبوا عنها؟؟ التجارة والفنون مكانش ليهم مكان خالص فى البلد دى؟؟

طيب الدين.. ايه؟؟

محدث فى البلد دى خالص كان بيقول أحد ولا حتى لبيك يا ابوللو؟

محدث فكر يركع لجوبيتر ولا يدبح حاجة عند الطاهرة ديانا ولا يندر ندر لو ابنة نجح فى الثانوية الروماني انه يولع شمعة عن الست ايزيس؟

معقول يا ناس كلهم كانوا ملاحيد كده!!

مش معقول طبعاً.. الانسان بدون الدين لا يساوى التراب الى بيدوس عليه.. لما الانسان ضل طريقة وانحرف عن الطريق المستقيم فى التعرف على رب الكون.. اخترع لنفسه الهة يتقرب اليها ويعبدها ويطلب منها امنيات ويخاف عقابها.. ايمان الانسان بقوى غير مرئية خارقة فائقة القدرة جزء أساسى من تكوين العقل البشرى بداية من سيدنا آدم لحد ما تقوم الساعة.

وهو ده بالظبط الى شفته فى بومى..



زى ما فى محلات بالهبل.. وحمامات ونوادى صحية زى الرز.. زى ما فى مسارح وبيوت كبيرة وأسواق.. فى كمان معابد..

لا وايه.. معابد معابد يعنى مش اى كلام.. معابد من ام عمدان عالية ومساحات واسعة وتمائيل الالهة وحاجة اخر هيبه..

ولكل اله معبد.. الامر الى يقول انهم كانوا على درجة مقبولة من التدين.. حتى وان انحرف المنطق واتجهوا لعبادة الاصنام بدل فكرة الاله الواحد.. نلاحظ هنا ان بركان فيزوفوس انفجر ودمر بومبي سنة 79 بعد ميلاد السيد المسيح.. يعنى لسه مكانش القديس بطرس بدأ دعوة التبشيرية فى أوروبا.. يعنى الوثنية كانت الديانة الرسمية المسيطرة على كل المنطقة دى بما فيها الامبراطورية الرومانية.

الهة الرومان غير آلهة الاغريق.. بس هى نفس الفكرة.. كبير الالهة الفلاقي ومراثة صاحبة المكائد.. اله الحرب واله الزراعة والخصوبة.. اله الجمال والفتنة واله البحر.. نفس الفكر والصفات لكل اله رغم اختلاف الاسماء.

يعنى الاغريق عندهم زيوس.. الرومان عندهم جوبيتر..

الاغريق عندهم هيرا.. الرومان عندهم جونو..

الاغريق عندها آريس.. الرومان عندهم مارس..

الاغريق عندهم افروديت.. الرومان عندهم فينوس..

وهكذا..

تدخل بقى بومبي.. بعد البوابة علطول على اليمين هيقابلك معبد فينوس.. المعبد ده اتدمر فى الزلزال الاولانى الى ضرب بومبي سنة 62م.. نفس الزلزال الى كان حذرهم بعده نيرون وطلب منهم يسيبوا البلد لأنها مش آمنة.. المعبد ده رغم انه اتدمر.. لكنه فى الاساس لم يكتمل.. كان المفترض انه يكون اكبر معابد بومبي.. لكن الحفريات الى لقوها هناك لقوا فيها مواد بناء ورسومات وتصميمات لشكل المعبد لا تتفق مع المبني الى لقوه فى الحفر.. الامر الى يقول ان المعبد ده وقت تدميره لم يكن مكتمل.

فى وش المدخل مباشرة.. هتلاقى معبد ابوللو.. من شكلة ومكانه والتمثال قصاده هتعرف علطول ان ده يخص ابوللو..

ابوللو هو الاله الوحيد الى له نفس الاسم والوظيفة عند الاغريق والرومان.. كان رامى الأسهم.. اله النور والشفاء والموسيقى والحق.. دايمًا قصاد اى معبد لأبوللو تمثال حد بيرعى سهم..

فاكرين اللقطة بتاعة فيلم تروى لما براد بيت دخل شط طرواده لوحده واخترف صفوف الطرواديين لوحدة لحد ما وصل فوق خالص للمعبد.. وعند المعبد كان فى واحد من رجالته قاله يا مولاي.. ابوللو مش راضى عن كم القتل ده كله.. راح براد بيت لافف حوالين نفسه ومطير رقبة التمثال الذهبى بسيفة..

فاكرين التمثال ده؟؟

مش كان تمثال حد قاعد وماسه قوس وسهم؟؟

اهو نفس التمثال ده موجود فى بومبي.. بس بدل ما ابوللو قاعد.. قصاد معبد بومبي كان واقف.. بنفس القوس والسهم.

معبد ابوللو بعد اعمال الجرافيك والوصول لشكل تخيلي الى ما كان عليه "زى ما هو موجود فى الصور" يبدو عليه الفخامة والعظمة.. معبد كامل من الرخام يحتوى على 48 عمود بارتفاع 6 متر.. عرض واجهة المعبد 6 عمدان وطول ضلعة 10 عمدان.. يعنى مستطيل الشكل.. المسافة من الارض لأعلى نقطة فيه كانت 9 متر.. فى مدخل المعبد سلم يتكون من 12 درجة بعدد شهور السنة الرومانية.

بالمناسبة.. اسماء الشهور الرومانية هى نفس اسماء الشهور المستخدمة حاليًا فى التقويم الميلادى.. عندك مثلاً شهر يوليو اتسمى نسبة الى يوليوس قيصر.. وشهر اغسطس اتسمى نسبة الى اغسطس قيصر علشان انتصر فيه انتصارات عظيمة.. وكان 30 يوم فخلاله 31 يوم علشان يبقى زيه زى يوليوس قيصر بالظبط ومحدث احسن من حد.

قصاد معبد ابوللو فى تمثالين برونز.. واحد لأبوللو وهو بيرعى سهم.. والتانى لديانا.. الهة الصيد والقمر والولادة والحيوانات.

على يمين معبد ابوللو فى مبنى – او اثار مبنى- كبير جدا.. طول ضلعة فى حدود 55 متر وعرضه 25 متر.. مقسوم الى 3 اقسام كل قسم دورين.. يبدو من شكلة انه كان مبنى حكومى.. برلمان مثلاً.

ده يبقى البازيليكا.. قلب المدينة النابض..

البازيليكا حاليا مصطلح يطلق على بعض الكنائس.. بس ده مش الوضع ايام الرومان.. البازيليكا الرومانية دى دار العدالة ووضع القوانين والفصل فى المنازعات والشكاوى وحفظ الامن ومعاهم كمان سوق تحديد الاسعار والبيع والشراء.. الى هو بنسمية الايام دى البورصة.

يعنى البازيليكا الرومانية نقدر نعتبرها خليط من المحكمة والبورصة والبرلمان وقسم البوليس.. كل ده فى مكان واحد.

المتبقى من بازيليك بومبي حاليا انصاف عمدان وبعض الرسومات على الحوائط بتوضح معاملات تجارية او جلسة فض منازعات او مجموعة من الشيوخ قاعدين بيتكلموا وهما لابسين الزى الرومانى المميز.. غالبا دول بتوع السياسة.. اصل شكلهم كده ملهمش لزمة فى الحياة.

لما نكمل مشى كمان واستكشاف لمنطقة وسط البلد هنلاق اثار لمبنى قديم يبدو كمعبد.. الجميل هناك ان جمب كل اثر حاطين معلومات عنه وصوره الافتراضية بعد شغل الجرافيك.. فمش هتلاق نفسك تاية او نسيت الاسماء.. الزيارة كانت تصوير اكثر منها رؤية.. النظرة الخاطفة تكفى ولما نروح نبقى نفلى فى الصور براحتنا..

اهو المعبد ده يبقى معبد حوالية شوية قلق..

ليه بقى؟؟

المعبد ده بناه اغسطس العظيم.. فى جزء منه متبقى عليه لوحة تمثل انتصارات اغسطس فى جبال الالب وعليها كمان تاج الزيتون الخاص بيه.. ومكتوب بالرومانى القديم ان ده محمية عبقرية اغسطس.. ويعتقد ان فى داخله كان موجود تمثال لأغسطس بحجم كبير.. بينما على أحد الجدران فى رسم لبروفال جاني لوش الامبراطور فسبازيان.. العسكرى الفذ والسياسى الماهر.. قاهر اليهود ومؤسس مدينة نابلس الفلسطينية.. خادم نيرون المطيع ورجل الدولة الى طلع العرش وهو عنده 60 سنة..

بس فسبازيان زى ما كان له مميزات.. كان برضه عنده مرض طفاسة الحكام وعينهم الفارغة.. برغم انجازاته الكبيرة.. الا انه طمع فى المعبد بتاع اغسطس فى بومبي.. وقرر انه يرشط عليه غصم واقتدار.. وبقي اسم المعبد حاليا معبد فسبازيان.. الى هو عبقرية اغسطس.

قصاد البازيليكا الناحية الثانية بعرض الساحة فى اثار معبد صغير.. يمكن مساحته تيجى ربع مساحة معبد ابوللو.. اسمه معبد فورتونا اغسطس.. شكله كده انه كان معبد شعبي للطبقة الوسطى والدنيا من الناس.. مش زى المعابد الثانية لا شكلا ولا مساحة.. نفس المعمار اه بالعمدان الكورنثية ذات التيجان والنقوش والتفاصيل.. لكن المساحة تقول انه مكانش زيهم.

اللينك ده فى تاريخ المعبد وحفرياته وتفاصيله وصورة من سنة 2005 لحد النهارده.. لينك يستحق المشاهدة.

<https://www.pompeiiinpictures.com/pomp.../R7/7%2004%2001.htm>

خلصت المعابد كده وللا لسه فى تانى؟؟

لا يا راجل.. انت مستعجل ليه.. ده لسه اهم معبد.. بالنسبالنا طبعا..

هو معبد صبغسطس ومحمد فى ركن الساحة الواسعة دى.. كان قصاده تمثال لمزه صاروخية متناسقة القوام والشكل.. منفوخة على 28 بالظبط.. مفياش ولا ربع غلطة.. الشكل الكامل المثالى للست كما ينبغى ان تكون مع اختلاف العصور والحضارات والازمنة والاديان.. اتفق كل الاعراق من سنة 90 مليون قبل الميلاد لحد النهارده ان الشكل ده يترجم فى كل اللغات الى كلمة واحدة..

المزه..

ترجمة الاسم بالاغريقية تعنى العرش.. لما الاسكندر الاكبر وصل مصر خد الست دى مخصص من بين كل الالهة المصرية وقرر يدمجها مع الهة اليونان.. ومن اليونان سنة 100 قبل الميلاد تسلفت الى ارباب الرومان.. والاتنين تقبلوها بسهولة جدا واصبح لها مكانة ومنزلة لأنها اصبحت آله الامومة والخصوبة.. الاله المزه..

دى يا سيدى تبقى ايزيس..

ايڤيس المصرية.. زوجة الاله اوزير (او اوزوريس).. الاسطورة الخالدة الى درسناها في الابتدائي.. اسطورة تخطت مصر ووصلت لأوروبا.. عاشت في أوروبا أكثر من مصر شأنها شأن كل من هرب من مصر او تم تهريبه.. يشاء الاله الواحد ان كل ما كان منشأه مصر يكتبه النجاح والخلود في كل مكان في الدنيا.. الا مصر.

حاجه توجع القلب.

طيب.. كل الحاجات دي موجوده فين؟؟

في الساحة الرئيسية للبلد الموجوده في وش بورتو دي مارينا.. في صورة الخريطة هتلاقوا دايره سوداء حوالين المنطقة دي كلها.. المنطقة دي اسمها فوريوم.. كلمة فوريوم مش كلمة روماني ولا متعلقة بمدينة بومبي.. فوريوم تعني المنتدى.. او بلغتنا الحالية وسط البلد.. هتلاق فوريوم روما وفوريوم اسطنبول.. وحاليا فوريوم القاهرة الى هو التحرير بقصر النيل بشارع شريف.

من الخريطة هتشوفوا ان البلد كان فيها أكثر من فوريوم متوزعين بين الجزء الجنوبي الشرقي والجنوبي والغربي كله.. بينما الربع الشمالي الشرقي يظهر في الخريطة كأنه فاضي.. هو مش فاضي ولا حاجة.. دي كانت مساكن الناس.. البيوت والفلل والقصور والحاجات العليوى دي.. ليهم مقال مفصل لوحدهم برضه.

موجود مع الموضوع بتاع النهارده الصور الافتراضية لكل معبد وصورة الحالية.. كمان موجود 5 فيديوهات قصيرة جدا لكل مكان تم ذكره في المقال "بعد شغل الجرافيك طبعاً".. يعني.. اهو نحاول نتخيل بومبي كانت عاملة ازاي من 2000 سنة.

ملحوظة بقي..

من اول ما دخلنا من الباب الشرقي في اول مقال لحد ما وصلنا وسط البلد.. ومن ساعة ما خدتكوا من باب المارينا ولفينا سوا في وسط البلد.. خبطنا في صورة سيكو سيكو او تمثال ابيح او بيت من بيوت قلة الادب؟؟

لا؟

الله.. امال الصور الى موجوده في متحف نابولي دي جت منين.. وسمعة البلد المهيبة دي طلعت من ايه!!

ده كمية الناس والمشايخ الى بتقول ان ده انتقام من ربنا تجاوز عدد المسلمين انفسهم.. ده مفيش موقع ولا مقال ولا منتدى ولا صفحة تيجي سيرة بومبي الا وكل واحد يحضر نفسه علشان السيكو سيكو.. ده انا نفسي في بداية المقال كاتب انه..(+18)

هو ايه بقي.. معقول الناس متغفلة للدرجة دي؟؟

معقول ومش معقول.. القصة لسه مخلصتش..

ناخد لفة الاول في بيوت وقصور بومبي.. وبعدين نطلع على شارع الهرم البومبي نشوف حكاية ايه

(يتبع)

بومبي – المدينة الملعونة(4)

(+18)

.....

تحذير هام..

الحلقات دي غير مناسبة للمرحلة العمرية الاقل من 18 سنة

.....

أمر على الديار ديار بومبي \*\*\* اقبل ذا الجدار وذا الجدارا

وما حب الديار شغفن قلبي \*\*\* ولكنه حب التاريخ والأثارا

"من معلقة الشاعر قيسوس ماركوس الملوحوس في رثاء حبيبة ليلي البومبية بعد ما البركان فرقع في وشها هي وجوزها الخامس"

قلنا ايه بقى في موضوع تلك البومبي؟؟

دخلنا من المدخل الشرقى.. عدينا على المسرح.. شفنا المحلات والشوارع.. قدرنا نستنتج من لغة الاثار الموجودة انه يوما ما في تلك المدينة كان هناك قانون وتجارة وفنون وعمارته وناس عايشه في بحبوحه وفضل ونعمه من رب كل زمان ومكان.. ولما كملنا مشى في البلد شفنا وسط البلد والمعابد والمحكمة والسوق.. قدرنا كمان نفهم ان المجتمع البومبي كان مجتمع غير ملحد.. مجتمع يعرف الدين والآلهة.. مكانوش ملتزمين صحيح.. بس وجود المعابد ونسبتها "كعدد" الى اجمالى عدد السكان يقولنا ان اهل بومبي كانوا شعب متدين بطبعة زى ناس كده اعرفهم ومش عاوز اقول اساميههم.

قلنا ان البلد كلها مساحتها 3 كيلومتر.. يعنى من وسط البلد ممكن بسهولة نرجع تانى نروح لمنطقة المساكن القريبة من المسرح الكبير.. ربع ساعة مشى في عز الحر بالعيال مش ازمة.. يكفى بس انك تقولهم مين هيسبق بابا؟؟ وهتلاقيهم طلعلوا يجروا لحد ما يخرقوا حاجز الزمكان.. مش بعيد كمان توقفهم بالعافية قرب حدود اليونان.

طيب لقيت ايه لما وصلت منطقة المساكن؟؟

شقق وعمارات مثلا؟؟

لا..

لقت بيوت.. بيوت بمعنى كلمة بيوت.. البيت هو مساحة كبيرة يسكنها ويملكها أسرة واحدة.. له جنينة ومدخل خاص ومكان لتخزين الاكل ومكان للعبيد.. هتلاقى فيه ساحة كبيرة للهيصة والافراح والليالى الملاح.. وهتلاقى فيه اكثر من غرفة نوم لصاحب البيت.. غالبا كده كان بيتنقل بينهم حسب المناخ من الجوارى.. ده طبعا غير مراته.. يعنى النهاردة في الاوضة البحرية مع الجارية الطويلة.. بكره في الاوضة القبلىة مع الجارية الحيشية.. بعده في الاوضة الواسعة مع الجارية القوقازية.. او ممكن يأيل شوية مع جارية جاييهاله واحد من الحبايب هدية.. واجب مجدعه واخلقيات معادتش موجوده للأسف من صاحب لصاحبه..

والنبى يا جدعان حد يرجعنى لعصر الرومان ده.. انا من جوايا حاسس انى رومانى.. اخلاقى رومانية وشكلى رومانى.. حتى كرشى رومانى.. وفيما كمان شبه من يوليوس قيصر وهو بيموت.

في المجتمع البومبي كان في عبيد وعمال.. وبعدين طبقة التجار الاغنياء.. ثم الاغنياء اوى.. ثم فاحشى الثراء.. الناس دى مكانش عندهم طبقة وسطى بالمعنى المفهوم حاليا.. كان في عبيد يشوفوا طلبات الاسياد.. عمال (موظفين) تشتغل في تجارة الاسياد والمؤسسات الحكومية.. والاسياد نفسهم بقى..

طيب في ادله على الكلام ده؟ ادلة اثرية يعنى مش بس الكتب؟؟

اه في..

كل بيت في بومبي معروف مين صاحبة ومميز بعلامة.. عارف كده لما تروح الارياف في مصر ويقولك ده بيت ولاد ابو اسماعين وده بيت جماعة الشوحات واللى هناك ده يبقى بيت الطحاوية..

اهو بومبي كانت كده.. كل بيت معروف مين صاحبة ومعروف تاريخه تحديدا.. مفيش منطقة مساكن جماعية تقول ان هنا كان في كثافة سكانية وبالتالى دى مساكن الطبقة المتوسطة.. لا.. كله بيوت من بتاعة بومبي هايټس.. هناخد 3 بيوت من هناك كمثال على الكلام ده..

.....

بيت فاون (او بيت فاونو)..

البيت ده اتبنى سنة 80 قبل الميلاد.. في ادلة انه اعيد بناؤه تانى بعد زلزال 62م.. فضل عمران بالسكان لحد البركان الكبير سنة 79م ما جاب داغه.. الرماد البركاني لما غطى البلد كلها حافظ على البيت من الدمار.. المرشد كان كل شوية يقولنا شكرا للبركان.. شكرا للبركان.. بقيت اقول في نفسى يا رب ابعتلنا بركان من دول علشان رماده يغطى حد معين واحفاد احفادنا يلاقوه متحنط بعد 1000 سنة علشان يبطل يغلى علينا الاسعار.. تكون مصر وقتها بقت اد الدنيا فعلا.

البيت ده اتسمى على اسم التمثال البرونز الموجود في مدخل البيت.. ده تمثال الكائن فاون.. حسب الميثولوجيا الرومانية.. فاون ده المفروض انه كائن نصف انسان ونصف معزه وهو المسئول عن الخمر والحاجات دى.. بس التمثال هنا من غير نص المعزه ده.. التمثال ده كوي.. التمثال الاصلى موجود في متحف نابولى الوطنى.. والنسخة الهاى كوي بتتباع ب 1600 يورو عليهم وعلى دماغ ابوهم.

جوا البيت في اثار من علامات تحمل اسم عيلة ساتريا وعلامات تانية تحمل اسم عيلة كاسيوس.. المرشد قالنا ان ده دليل ان في حد من اسرة كاسيوس كان متجوز من بيت ساتريا وقاعد معاهم.. بس مقالش القايمة الحقيقة كانت بكام.

بيت فاون هو أشهر واكبر بيت في بومبي.. ليه بقى؟؟

كم اللوحات الى لقوها جوا البيت تقول بوضوح جدا ان اهل البيت ده كانوا من عيلة ساويرس يا اما كانوا شغالين مقاولين مع الجيش الرومانى.. لوحات قديمة من العصر الهلنستى.. لوحات تانية موزاييك.. تماثيل رخام وبرونز.. لوحات بتمثل طيور وحيوانات ولوحه واحده بس ابيحة بتمثل صاحب البيت وهو بيصلح الكهرباء مع واحده من الجوارى.. التنوع فى اللوحات ده يقول ان اللوحات دى من كذا عصر وان صاحب البيت كان مهتم بالفنون ومهتم بجمع اللوحات.. مما يعنى انه كان كثير الحركة وصاحب نفوذ علشان يستحوذ على لوحة أصلية تمثل المعركة الأخيرة بين الاسكندر الاكبر وبين داريوش الثالث ملك الفرس مثلا.. اللوحة دى من اهميتها معروضة فى متحف نابولى فى قسم خاص بيها.. ومعروض جميعها لوحة تانية كوى منها بس بعد ما كملوا منها الجزء الناقص ومعها كمان لوحات اصغر عبارة عن اجزاء من اللوحة الأصلية بس متكبره.. كأنك عامل زووم على جزء معين وعاملة لوحة لوحده.

لوحة مهمة لمعركة مهمة بتجسد شخصيات مهمة لقوها فى بيت مهم يعبر عن فترة مهمة جدا فى تاريخ هذا الكوكب.

اغلب اللوحات موزاييك.. مساحة البيت 3000 متر.. تصميم البيت هندسيا ممتاز جدا من حيث الاضاءة والتهوية.. كمان وجود حمام خاص فى البيت يدى دليل كمان على ان اهل البيت ده كانوا اغنياء فعلا.. ولما نقول حمام مش معناها كنيف ولا مؤاخذه.. حمام ده الى هو زى البيسين والجاكوزى كده.. حاجه زى الى بتحلم بيها كل يوم بعد ما مراتك تقولك عاوزين مصروف الشهر.

بيت فاون اكتشفوه سنة 1830 وقت ما كان المعهد الاركيولوجى الالمانى بيفحفر هناك هو كمان.

طيب.. بعد بيت فاون ده.. فى بيوت تانى مشهورة كده؟؟

ااااا.. عندك مثلا بيت الشاعر المأساوى.. او الشاعر الكئيب..

.....

اه والله هو اسمه كده.. بيت الشاعر الكئيب..

البيت ده فى نفس شهرة بيت فاون وان لم يكن فى مثل حجمة.. شهرته كلها بسبب كم اللوحات السليمة الى لقوها جواه.. مش بس سليمة.. دى كمان متنوعة جدا وبتغطى كذا عصر وكذا نمط رسم.. أشهرهم لوحة اخيل وهو بينقذ بيرسيوس من خيمة اجاممنون.. فاكرين فيلم تروى لما براد بيت راح لوحده خد بيرسيوس من وسط رجالة اجاممنون ولبسهم كلهم طرح؟

اهو الحدوتة دى مرسومة بالجبس "المصيص" على جدار كامل فى بيت الشاعر الكئيب فى بومبي.

فى طبعاً لوحات تانية أشهر من دى.. لكن عندنا احنا اخيل أشهر من زيوس وهيرا ونبتون.. كل دول لهم لوحات بالجبس والموزاييك فى البيت ده.. وجود لوحات الجبس دى فى حد ذاته غريب جدا.. النوع ده بيسموه الفريسكو.. والفريسكو ده مظهرش الا فى لوحات عصر النهضة بتاعة دوناتيلو ورفاييل ودافنشى.. المفروض ان ايام بومبي وما قبلها كان العنصر المسيطر هو الموزاييك..

يبقى ازاى بقى بيت اتردم سنة 79م.. نلاقى فيه لوحات موديل 1500؟

اسرار الكوكب ده قصاها كثر علشان تكتشف.

بيت الشاعر الكئيب اكتشفه الاثرى الايطالى انطونيو بينوتشى سنة 1824 فى الحفريات.. مفيش ادلة على سكانية ولا اى بيانات عنهم.. بس يرجح انهم راحوا مع الى راحوا فى البركان.

.....

طيب نسيب بيت الجدع الكئيب ده ونطلع على بيت تانى؟؟

بيت فيتى "بتشديد التاء" مثلا..

بيت فيتى له طراز معمارى خاص بيه.. يسمى طراز الدوموس.. ده طراز خاص بالعبيد الى قدروا يتحرروا يا اما بشكل قانونى عن طريق شراء انفسهم او عن طريق الحرب لما اسيادهم تموت او حتى عن طريق الهرب الى بلد تانية محدش يعرفهم فيها.

البيت خد اسمه من ملاكه.. اوليوس فيتوس كونفيا و اوليوس فيتوس ريستيتيوتس.. الاتنين كانوا من الاوجاستيلوس "رتبة كهنوتية رومانية لأعضاء مجلس الشيوخ".. اغلب الظن ان اوليوس فيتوس دى مرتبه او لقب.. وان اصحاب البيت اسهم كونفيا و ريستيتيوتس.. ده تخمينى الشخصى وقد يكون هبد.. انتظر حد من بتوع التاريخ الرومانى يصحلى ان كنت غلطان.

بيت فيتى خد شهرته من حاجتين..

اولا.. انه بيت عبيد محررين..

ثانيا.. من لوحات الفريسكو الموجوده بكثرة في البيت..

من اشهر اللوحات دى "بالنسبالنا" لوحة بتمثل اخيل وهو في جزيرة سكيروس.. ما هو اصل اخيل قبل ما يروح حرب طواده.. امه خافت عليه علشان كانت عارفه انه هيموت هناك.. فخذته خبته في جزيرة سكيروس علشان زيوس ميعترش فيه.. بس على مين.. الواد غفلها وهرب مع اوديسيوس علشان يلاقى مصيرة المحتوم.

لازم با جماعة نقرأ الميثولوجيا الاغريقية وبعدها الميثولوجيا الرومانية علشان نقدر نستوعب عظمة المدينة الى اسمها بومبى دى.. ان شاء الله اخلص الكتب الى جبتها من المعرض بتاع 2018 وبعدهم كتب معرض 2019 وابدا علطول في الميثولوجيا الاغريقية.

من اللوحات المشهورة برضه في البيت ده لوحة موت بنثيوس.. ده كان ملك ثيبس او طيبة بالنطق بتاعنا.. قتلته امه وهى سكرانه.. الشاعر اليونانى يوربيدس كان سجل القصة دى في مسرحية اسمها الباكوسيات.. كنت سمعت المسرحية دى مره في الراديو زمان وانا سهران بلبل.. الاذاعة قدمتها بصوت سميحة ايوب وسعد اردش والناس بتوع المسرح القومى دول.

بالمناسبة..

زمان.. كان عندنا مسرح قومى محترم مملوك للدولة.. كانت تذكرته رخيصة جدا وبيقدم الروايات العالمية.. كان ممكن جدا تلاقى روايات زى فاوست أو اوديب بتتعرض في مصر.. كنت حضرت فيه مسرحية اسمها الملك هو الملك.. لك ان تتخيل مسرحية من تأليف سعد الله ونوس وبطولة صلاح السعدنى وفايزه كمال وعلى حسنين.. ومش كده وبس.. لا ده كمان غنى فيها محمد منير كلمات احمد فؤاد نجم.. على عليه.

صباحي كانوا بيقولوا عليا مجنون علشان مش بروح معاهم فرايدايز في الويك اند علشان نشقظ مزز وكنت بفضل عليه المسرح القومى.. انا كمان كنت بقول عليهم عبط.. مزز ايه دى الى تساوى سهرة في حضرة ماكبث مثلا؟؟

حاليا الملك لير شغالة "بطولة يحيى الفخرانى".. الملك لير يا ناس.. شكسبير.. وما ادراك ما شكسبير.

بس للأسف كل تراث المسرح ده متسجلش وضاع في الوبا مع غزو مسرح عادل امام وثلاثي اضواء المسرح.. سقطت الثقافة والروائع العالمية قصاص الكوميديا بالضرية القاضية.. زمان كان الفن الحقيقي هو المسرح.. ومن المسرح خرج كل الى اصبخوا نجوم في الاربعينات والخمسينات وما بعدها.. فرقة الريحاني وفرقة جورج ابيض وعلى الكسار ومسرح يوسف وهبى كان بيقدم حاجات عظيمة جدا.. بعد انقلاب 52 كل ده اصبحت تحت سيطرة الجيش ولمعت اسماء جديده زى سميحة ايوب وسعد اردش وتوفيق الدقن وعلى حسنين وعائده عبد العزيز واحمد عبد الحليم.. المسرح القومى المصرى كان بيقدم عروضه في دول كتير في العالم.. وكانت خشبته بتستضيف عروض مسرحية وبالية عالمي زى بحيرة البجع وكسارة البندق.. فرقة البولشوى كانت بايته عندنا في مصر قبل ما الاتحاد السوفيتي يقع وتسرح البنات الروس علشان تيجي مصر برضه بس علشان المره دى تشتغل في الدعارة والسياحة الاى كلام.

ولأن المسرح القومى مملوك للدولة.. رسيت في الاخر على بلح.. لدرجة ان سعيد صالح اتسجن 3 مرات بتهم مضروبة.. السبب الحقيقي كان لسانه القالت خصوصا في النكت والتلقيح على صلى الله عليهم وسلم.

معلش سامحوني.. انا من الجيل القديم بتاع برنامج حياي وبانوراما فرنسية ونادى السينما.. الايام اللطيفة حاليا بالنسبالنا عاملة زى واحد كان متعود يتغدى كل يوم طاجن مسبك.. وفجأه مبقاش يلاقى قصاده الا السوتيه..

ما علينا.. خلينا في بومبى..

في اخر الصور هتلاقوا 3 فيديوهات قصيره جدا تمثل الشكل التخيلي لكل بيت تم ذكره فوق..

خلصت بيوت بومبى على كده وللا في تانى؟؟

لا طبعاً.. في تانى بالهيل.. واشهرهم "عندنا برضه" بيت لوبينارا جراندى.. البيت الى كل ركن فيه بيقول ان الى كان بيحصل هنا موبقات تكفى ان يوم القيامه يقول 3 مرات..

البيت الى....

(يتبع)

بومبى – المدينة الملعونة(5)

(+18)

.....  
تحذير هام..

الحلقات دى غير مناسبة للمرحلة العمرية الاقل من 18 سنة

.....  
معذرة مش هقدر الصور الأصلية.. اخر واحد خد منى نسخة على الخاص محجوز فى العناية المركزة دلوقتى من هول ما شاف.. السلسلة كلها عليها تحذير انها +18.. الحلقة ده لوحدها +45.

حسب ما شفت فى الصور وحسب ما عرض احمد الشقيرى فى الحلقة بتاعته وحسب ما هيطلعلك على جوجل لو كتبت فى السيرش كلمة بومبى.. دى بلد كلها سكس فى سكس.

اغراق وافراط فى الجنس بصورة مذهلة ومرعبة وزياده.. حتى لو افترضنا ان المية الى كانوا ببشربوها مختلطة بالفياجرا ومختلف انواع المنشطات.. ولو افترضنا ان ستاتهم كانت صواريخ ورجالهم كانت ثيران عايشة للتخصيب.. برضه مكانش هيبقى المنظر كده.. طيب..

نحاول نبص للموضوع بنظرة ثانية..

فى منطقة معينة كانت اثار الموضوع ده موجوده.. منطقة تبدو وكأنها شارع الهرم البومبى.. من مدخل الشارع لحد آخره تحس انك وقعت فى فيلم ابيج.. تحس وانت ماشى فى الشارع انك شامم برفان من بتوع فيكتوريا سيكريس.. تحس انك هتلاقى نادى الجندى واقفالك على الناصية وهى بتقولك تعالى.. تعالى مقولكشى.. وقصاها الناحية الثانية سميرة صديقة الطلبة ومنيرة العامشة وهما ببشردوا فى الزباين بالعافية علشان يدخلوا معاهم اوضه متر فى متر مفيهاش الا سرير ونور احمر.. لزوم الشىء.

على الارض لقيت علامات.. زى ما تكون علامات ترقيم واشارات.. قريت شوية اشوف فيه ايه لقيت العلامة على شكل عضو ذكرى مكتمل الانتصاب وببشاور ناحية بيت معين.. تمشى لحد البيت ده تكتشف ان الجماعة دول شرفاء ومش ببغشوا.. الاشارة دى معناها ان ده بيت هتلاقى فيه كل ما تتمنى.

اشارات يمين وشمال.. بيوت من دور واحد على الصفيين.. لما تدخل البيت من دول هتلاقى اوض كثير.. اوض بس.. بخلاف كل بيوت بومبى.. البيت ده مش معمول الا لهدف واحد بس تحققة الغرف ذات السرير الواحد.. انتشاراها بكثرة يقول انك ممكن تبقى ماشى فى الشارع وتترنق فى "...." فتروح داخل بيت من دول تدفع المعلوم وتصلح الكهرباء مع صاروخ من الى جوا.. وتروح واخذ بعضك وماشى.. بيوت مفيهاش حمامات ولا مطابخ ولا اماكن تخزين اى شىء.. اوضه بسرير وشكرا.

لما تضرب عينك يمين وشمال فى المكان هتحمس ان اصحاب البيوت دى صنايعية اجادوا الصنعة وادوا الشغل حقة.. الرموز والاشكال الجنسية مالبة المكان بصورة رهيبة.. عندك مثلا ارقام الاوض.. عبارة عن اجسام ذات مفاتن عارية.. راجل وست بيضعصوا فى بعض يبقى ده رقم 2.. قيس على كده فى كل الارقام..

مش بس الجنس بين البشر.. ده كمان وصلوا لمرحلة الجنس بين البشر والحيوانات.. شفت تمثال مشهور فى المتحف عبارة عن راجل ببظبط معزه.. النسخة الأصلية وقت زيارتى كانت فى لوس انجلوس.. التمثال لوحده محتاج تقف قصاده شوية.. مش علشان تتفرج على مشهد سيكو سيكو.. ده طبعاً مشهد مقرف جدا.. انما علشان تشوف كمية المشاعر والحميمية بين البنى آدم "الى نصه التحتانى معزه" والمعزه الكاملة الى هو عافئها من دقنها ويعاملها معاملة عفت الشريينى.

يا ترى ايه المقصود بالتمثال بمشاعرة دى؟؟

ماهو المزب بالهبل اهو.. حيوانات ايه بقى!!

على الحيطان صور كل انواع واشكال الممارسات الجنسية المختلفة بين البشر.. الى بالرضا واللى بالمغنى والطرب.. اغتصاب بالقوة موجود.. قهر واجبار تلاقى.. لو بصيت من اى اتجاه عينك هتخبط فى صورة من اياهم.. صورة تشعل المشاعر الى ممكن تكون هديت بعد علاقة كاملة او بسبب اعتياد المناظر دى.. القصد انك طول ما انت فى البيت ده.. لازم تكون شغال ومتعطش ابدًا.



صور كبيرة كاملة واضحة جدا تبدو فيها اجسام النساء مثالية بشدة.. المشاعر على الوجوه المرسومة تقول ان الى يحصل عندهم ده لا كان عيب ولا حرام.. بالعكس.. الناس شكلها مبسوط وسعيد جدا.. العيون كلها عرفان وامتنان والاجسام شديدة.. الرجالة بالقوام المثالي الخالي من اى كروش وبروزات والنساء كاملة الاستدارة والانوثة.. هياتمات في نفسهم كده.

بس كله كوم بقى والبيت الى في نص الشارع ده كوم لوحده..

لوبينارا جراندى.. خمسة باب.. الاسم متحرف من اللاتينى.. معناه المكان المباح فيه كل شيء.. البيت عبارة عن دورين.. الدور الى تحت فيه 5 اوض مفرده بسرير.. الدور الى فوق في قاعات واسعة كلها بتبص على بعض.. لما تحاول تقرا المكان وتاريخه من المرسوم على الحيطان هتلاقى مثلا صورة فيها ازواج واقفين في النص.. كل زوج عبارة عن راجل وست وحوالين الازواج دول دايره كبيره زى ما تكون بتشجع..

ايه ده!!! اوليمبياد!!!

الله يخرب بيوتكوا.. عاملين ماتش سيكو سيكو!!!

طب والمكسب والخسارة فيها يبقوا ازاي ولا مؤاخذه؟؟

الى يموت المزه الى تحت ايده يبقى كده هو الى كسب مثلا؟؟

صور كتير زى كده بتمثل انشطة الحياة المختلفة بعامل مشترك يجمع بينهم كلهم وهو السكس..

صور اسر كاملة عارية تماما.. الرجل ومراته واطفاله.. الاعضاء كلها منتصبه والاجسام في حالة استعداد للمارسات الجنسية.. طيب الاب والام ماشى.. انما العيل الصغير ده ازاي يا كفره!!

عيل ميكملش 8 سنين.. يعنى كويس اوى انه بيعرف يعمل بي بي.. مطلعينه في الصور كده ازاي بس؟؟ ايه القصد هنا؟؟

في بومى كان خروج الشاب من طور العذرية الى طور الذكورة حدث يستحق الاحتفال.. عذرية البنات ملهاش اى ذكر.. غالبا البنت من دول بتتولد وتفقد عذريتها تاني يوم.. الشاب هو مربوط الفرس.. في صورة بتمثل مراهق صغير ماسك بنت وحواليه ناس كتير بتحتفل بيه علشان خلاص كبر وبقي بيعرف.. وكأنهم بيضريوا نار في صباحيته مثلا..

شفت صورة جايه منظر كامل لراجل ماشى في الشارع.. ماشى وبس على كده.. ماشى عادى جدا لا هو بيرقص مثلا ولا في خلفية الصورة اى شيء ملفت.. مجرد انه ماشى.. بس علشان هو في بومى.. فهو ماشى وعضوه الذكرى في كامل انتصابه.. مش ناقص غير انه يصطاد بيه عصافير..

ايه العلاقة بين انه ماشى وبين الحالة الغريبة الى هو فيها دى؟؟

مش عارف.

لوبينارا جراندى هو اقدم بيت دعارة معروف على سطح الكوكب.. كل ما فيه وداخله يصرخ بالجنس.. مفيش معلومات عن مالكة.. لكن في معلومات مستفيضة عن الى كان يحصل جوا.. الصور بتقول كل شيء.. طب وربنا كنت قرفان المس الحيطان من كتر ما الواحد اتخيل ومن كتر الصور فاضحة.. انا كنت فاكر ان المعروض في الكابينة السرية في متحف نابولى هو كل شيء.. اتارى الى على حيطان البلد العن والعن.

الموضوع ده محتاج دراسة وبحث..

اشترت من نابولى كتاب صغير حجمة 250 صفحة.. كتاب مركز بيعرض بومى وتاريخها بالصور والجرافيك التخيلي لشكل البيوت قبل وبعد البركان.. ده الكتاب الى بصور منه كل مره.. الكتاب ده لا يحتوى الا على نص صفحة بس تتعلق بالجنس في بومى.. نص صفحة بتتلكم عن لوبينارا جراندى وسط 250 صفحة.. ومش كل الجنس كمان.. مفيش اى ذكر عن اى ممارسات في الحياة العادية او ذكر لبيوت دعارة تانية الا ده.. لو فرضنا ان كل نص صفحة = معلومة.. يبقى الكتاب الوثائقي ادانى 499 معلومة عن بومى في مقابل معلومة واحدة بس عن الجنس في بومى..

شايفين النسبة عاملة ازاي؟

امال ايه سر شهرة البلد دى وجنونهم بالجنس بالطريقة دى.. نسيت اقولكوا حاجه كمان مهمه اوى..

على باب كل بيت من بيوت بومبي في رمز جنسى "ذكورى" موجود بنفس الشكل والطريقة.. فوق الباب مطرح ما بنحط احنا ارقام الشقق دلوقتى في عضو ذكرى كامل الانتصاب بالخصيتين..

ده اكيد دليل على شيء ما..

كمان ملحوظة..

الرومان مكانوش بيهتموا بالطهارة حسب ماهو موجود في صورهم وتمائيلهم.. كمان مكانوش بيهتموا بحجم العضو خالص.. يعنى تلاقى التمثال من دول طول بعرض يمثل راجل عضلاته هتفرتك الترنج.. وتبص تحت تلاقى على رأى هانى رمزى.. 2 سنكى.. على العكس تماما من اى صور تنتمى للمدرسة الاباحية الى بتبالغ جدا في اظهار الاحجام.. اوقات ممكن تشوف صور تلاقى فيها الراجل طولها متر ونص وتحت تلاقى متر و 60 سنكى.. مبالغات طبعاً.. ولكنها مبالغات تحمل رسالة ما..

تماثيل وصور الذكور في بومبى كانت من المدرسة الاباحية الحديثة.. الاعضاء فيها كبيرة جدا جدا.. اجسام النساء مثالية بدون مبالغات في الاحجام او المنحنيات.. بينما الرجاله لأ..

كمان دخل الجنس ورموزه في كل تفاصيل حياتهم.. حلقان الستات.. الاساور.. الشمعدانات.. المباخر.. اطباق الاكل.. الكوبيات.. اى شيء منحوت لازم تلاقى فيه رمز جنسى.. اى صورة على الحيطان لازم تلاقى فيها وضع جنسى سواء كان البيت عادة او دعارة.. المكان الوحيد الخالى من اى ايعاءات جنسية هو المعابد وبس.. الجنس موجود ومتوفر بكثرة في بومبى زى ما الصور بتقول ولكن الكتب فيها اقل القليل عن الحكاية دى.. حتى لما عملوا فيلم سينما يحمل اسم المدينة.. مكانش فيه ولا حتى بوسة.. انا شفت الفيلم وقلت اكيد الفيلم ده مناظر مناظر.. 3 بقميص النوم و 2 ملط "بصوت محمد هنىدى".. طلع في الاخر فيلم شبة حربي.

ايه الاحباط ده!!

ماهو لازم تفسير.. الواحد مخه هيش..

ولقيت التفسير في الزيارة الثانية لمتحف نابولى.. أجمل حاجه في متحف نابولى انه بيفتح من الساعة 9.. بعد زيارة بومبى المرهقة هأخذ العيال وامهم الكهم سمك على البحر وأسهرهم لحد الساعة 3 او 4 الفجر يلعبوا ويتنططوا في الجنية لحد ما استنفذ من جتتهم اخر كالورى طاقة.. علشان يروحوا كهم ينكفوا على وشهم وانا اصحى بدرى اروح المتحف مع نفسى وارجع قبل ما يصحوا.. ماهو انا لازم اعرف حدوة بومبى دى ولا هولع في بومبى والمتحف وتماثيل السيكو سيكو الى هناك دى.

ولقيت طلبى في المتحف..

باحث اثرى ومتخصص في تاريخ بومبى بيشغل مرشد سياحى ودليل.. رفايل انطونيو.. رجل ايطالى الشكل والصوت والهوى.. ايطالى بقوه.. قدمته نفسى بصفتى دكتور في كلية الآثار جامعة عين شمس.. قعدنا مع بعض قعدة الزملاء الباحثين المتخصصين الى بيضحكوا على جهل العامة.. وقعد يحكىلى بقى..

الجنس في بومبى كان مبارك ومحتفى بيه لأنه نشاط يحمل رمزيه اكتر منه شهوة.. بخلاف انه وسيلة للانجاب.. هما تعاملوا معاه باعتباره مسبب السعادة والخير في الحياة.. وسيلة لجلب الحظ السعيد والتفاؤل.. العضو الذكري في بومبى كان تميمة حظ.. ايقونة الخصوبة والخير.. مجرد رمز بيتفاءلوا بيه ويجلب لهم الحظ السعيد

فاكرين فيلم لعبة الست لما نجيب الريحاني كان معاه تعريفه مصدية بتجيب الحظ.. لما اهداها لتحية كاريوكا الدنيا فتحت فوشها ولما رمتله التعريفه على الارض النحس ركبها؟

عارف لما يبقى عندك شيء معين بتتفاءل بيه؟؟

عارفين تأثير الخرزة الزرقاء وحدوة الحصان والخمسه وخميسه والحاجات دى عند المؤمنين بيها؟؟

اهوكل التماثيل دى في بومبى تم اختصارها في رمز واحد بس..

العضو الذكرى..

ولهم منطق على فكره..

هو ده المسئول عن الانجاب.. هو ده اللى يبسط الكل.. هو ده اللى بيخلي الست تجرى ورا الرجل وتخدمه وتدله.. هو ده مصدر الخير والرخاء الى احنا عايشين فيه كيوميين.. يبقى طبيعى جدا نتبارك بيه ونتفائل بانتصابه.. ماهو الانتصاب ده دليل على القوة والصحة وقرب وقوع حدث ما.. والحدث ده طالما جنسى.. يبقى خير وبركه.. علشان كده الناس معلقاه على البيوت.. ده علامه على اننا اسره سعيده.. ابعد يا شيطان ابعد يا شيطان.. امشى يا حفريت.. رجالتنا اهم زى الحصنة..

وجود صورة العضو الذكرى المنتصب على اطباق الاكل معناه بالهناء والشفاء.. لما الست تلبس حلقان على نفس الشكل معناها انها ست سعيده فى حياتها وراجلها شغال من اليمين والشمال.. وكل ما كبر حجم الحلق فده يعنى انه شغال اوى.. شغال جدا.. شغال خالص.. حته نفسنة حريمى كده.. زى ما عندنا تلاقى واحده ست قايمه الفجر تنشر بوكسرات جوزها على اول حبل غسيل فى البلكونة.. وفى الغالب بتبقى غاسلة الغيارات النظيفة كمان علشان تفرس ستات المنطقة وتقولهم بالمستخى كده ان ليلة امبارح جوزى منيمينش يا نسوان يا غجر.. والدليل اهو.. 6 بوكسرات مغسولين يا عوجه منك لها.. بينما الحقيقة انه فشر ونشر والعشاء خبيزه.. او زى ما قال عادل امام فى النوم فى العسل..

سيادة المدير.. حضرتك لا عرفت ليلة امبارح.. ولا الليلة الى قبلها.

بيان اكثر الكلام ده فى تمثال شفته.. تمثال بيمثل جرسون شايلى صينية اكل.. يبدو حجم عضو التمثال الذكرى مربع وهو شايلى الاكل ورايح يوديه للزباين.. طيب ده راجل فى شغله.. ايه العلاقة بين صينية الاكل والحاجات؟

التمثال يرمز الى ان الاكل طازه وحلو.. والدليل منتصب قصادك اهو.. زى ما تعمل اكل مثلا وتزينه بالخضار مختلف الالوان او ورق الفويل أو رص المعالق والشوك وحركات التقديم دى.. كل ده ماهو الا مشهيات لفتح النفس.. اهو البعداء بتوع بومبى بقى مكانش عندهم حاجة بتفتح نفسهم الا العضور الذكرى المنتصب.

بالتالى وجود 41 بيت معد للممارسات الجنسية السريعة فى بلد مساحتها 3 كيلو ويسكنها 20 الف انسان يعتبر طبيعى.. قول العدد ده نصه رجالة "وده رقم مبالغ فيه".. يبقى كل بيت بيخدم 250 راجل.. على 24 ساعة.. يبقى كل ساعة البيت من دول المفروض انه يقدم خدماته ل 10 افراد.. علشان كده البيت الواحد بيكون فيه اكثر من اوضه.

هو الناس دى كانت عايشه علشان كده وبس يعنى!!

مش بالظبط.. بس الفعل ده بالنسباليهم كان زى توكلنا على الله كده.. لما تيجى تاكل مش بتقول بسم الله الرحمن الرحيم؟

اهما كانوا برضوا بيقولوا بسم الله الرحمن الرحيم.. البسملة بتاعتهم كانت ممارسة الجنس لأنه فيه جلب للرزق والحظ والخير.. يعنى ممكن تلاقى تاجر بدل ما يستفتح ويرش ميه ويشغل قرآن فى المحل بتاعة.. يروح جايب جاريتين ومظبطهم.. واتوكلنا على اللى بياكلنا..

منطق غريب ومغلوط طبعا بدون الدخول فى اى مجادلات او مهاترات.. لكنها حياتهم وافكارهم بنقلها زى ما شفتها بالظبط.. وعلى فكره.. المرشد مكانش بيهيد ولا حاجة لأنه ورانى كتب بتتكلم عن الموضوع ده.. اشتريت منها طبعا ومنها تأكدت من كلامه.. الكلام ده كمان موجود فى فيلم وثائقي عمله الدكتور.. "Andrew Wallace-Hadrill" المؤرخ والباحث فى التاريخ الرومانى القديم فى الكلية الكلاسيكية - جامعة كامبردج.. والدكتور "Thomas A.J. McGinn" استاذ الدراسات الكلاسيكية فى جامعة ميتشجان.. يعنى الكلام علمى له اصول واباحث وما انا الا واحد شد انتباهه الموضوع ده وقرر البحث والفحرة فى محاولة لأحياء الامجاد البومبية.

بس بغض النظر على الكلام والتفسير والكتب.. الصور والتمائيل ابلغ دليل.. التفاسير دى كلها عبارة عن محاولات لفهم لغة الآثار.. شيء صعب جدا انك تشوف صور بالمنظر ده وتتجاهل الغريزة علشان تطلع الحقيقة من بين الالوان.. او اقرب تصور ليها على الاقل.

خلصت زيارتى لبومبى.. مشينا من هناك على المغرب.. المرشد والجروب اللى كنت معاه كانوا مبسوطين جدا من اسألتي الكثير عن البلد وتاريخها ورمزية كل حاجة فيها.. المرشد قالى انه مش كل يوم ولا حتى كل سنة يقابل حد مهتم كده وعنده كل هذا الكم من الفضول بخصوص التاريخ.. شكرنى جدا لأنى ساعدته بأستلتي علشان يطلع كل اللى عنده.. الناس كمان شكرونى جدا لأنى ساعدت فى توضيح حاجات كثير عن طريق الربط بين الاحداث او الاسئلة الكثير.. الحمد لله.. كنت فاكرهم هيرمونى من اعلى جبل فى البلد لأنى قاطعت الراجل كثير.. بس اهو.. الرخامة بتبقى حلوة فى بعض الاحوال.

العيال اتبسطوا جدا بالزيارة لأن البلد كان فيها مساحات كبيرة للعب والجري.. روجت وانا دماغى عاملة زى الموتور البخارى اللى بيغلى من كم اللى شفته.. كل الجروب مروحين مبسوطين الا مراقى.. مفيش فى دماغها الا حاجة واحدة بس.. ازاي تمنعنى من محاولات احياء المجد البومبى وكيفية وأد فكرة امتلاك الجوارى وما ملكت اليمين دى فى مهدها.. ولا يهمنى.. انا بس اجوز البت بنتى وبعدين هخريها.. والنبي لاخلربها.. وربنا لاوريكوا يا ستات مصر.

بس ثانيه كده..

لقيت فى شنطة مراقى اازاه عليها صورة مجمله من ناحية وصورة تعبان من ناحية ثانية ومكتوب عليها فيلينو..

هو ممكن دى تكون.....

يا نهار اسوددددد!!!!

## الجارية نوتيل

لسنين طويلة فضلنا مقتنعين ان "البياض نص الجمال" .. رغم اختلاف أذواق الرجال الى اتفقت على انه إذا انطفأ النور فكلهن سواء والبيضاء زى السمرء.. كله جاي طالما شغاله وبتخلف. مع الوقت أدرك الناس مدى الظلم البين في تفضيل البيض.. ولو كان الجمال هو البياض مكانش نص ستات الكوكب لقوا رجالة من الأساس.. الجمال شيء نسبي له ألف معيار.. ومن هذا المنطلق انتشر مثل شعبي تاني كنا بنقوله واحنا صغيرين.. الأسود حنة شوكلاتة والأبيض بربور على الحيط.. نوع من أنواع الترضية لأصحاب البشرة السمرء "بصوت الكابتن ميمي الشريبي" .. بينما على النقيض تقف البيضاء واقفه في نفسها.. هي مش بربور على الحيط ولا حاجه والدليل اهو طوابير الرجالة الى هتموت عليها والمحاولات المضنية من السمرءات علشان ينقلبوا

بس الوضع ده كله بقي حضرتك اتعكس تماما مع جاريه.. جاريه واحده بس.. سمرء حالكه سواد البشرة.. مش جميله ومعهدهاش اى مهارات اللهم الا المغني.. جارية واحده بس قدرت تلف عقول 3 سلاطين ووزير. جارية اسمها اتفاق.

.....

الأحداث دى كلها حصلت في الفترة بين سنة 1342م الى سنة 1351م. بعد موت الناصر محمد بن قلاوون وبداية حرب التقطيع بين عياله الثمانية.. الى زى ما قلنا قبل كده كلهم قعدوا على العرش.. وكلهم فرتكوا بعض. بعد موت الناصر قلاوون حل مكانه المنصور سيف الدين ابو بكر وبغدين الأشرف علاء الدين كجك وبعدهم الناصر شهاب الدين أحمد.. الثالثة على بعض مكملوش سنتين على العرش علشان يبجي بعدهم اول أبطال قصتنا النهارده الصالح عماد الدين إسماعيل الى قعد على العرش وهو يادوب 16 سنه بعد خلع أخوه الناصر شهاب الصالح إسماعيل بدأ ملكه بدايه كوبسة.. بيقول عنه ابن تغرى بردى باختصار "كان سلطانا ساكنا عاقلا قليل الشر كثير الخير هينا لينا بشوشا.. وكان شكلا حسنا حلو الوجه أبيض بصفرة وعلى خده شامة.. ولم يكن في أبناء الناصر خير منه.. وكان محبا للرعية على مشقة كانت في أيامه من كثرة التجاريد الى قتال أخيه الملك الناصر بالكرك وشغفه بالجواني السود وافراطه في محبة اتفاق العوادة" مين بقي اتفاق العوادة دى؟

انا حبيب بس ناخذ بالناس من تفصييلة صغيرة.. لما ابن تغرى والمقريزي وابن حجر العسقلاني يذكروا في تأريخهم جارية بالاسم والصفة دى.. فده لا يعنى الا حاجتين: -انها كانت مميزة جدا وصاحبة مكانه غير مسبوقه -ان صفتها "السود" كانت واضحة أوى بزيادة طيب نشوف ابن حجر العسقلاني في الدرر الكامنة في أعيان المائة الثامنة قال عنها ايه؟ قالك يا سيدي ان في بلبيس "شرقية" كان في ست من أهل الحظ والطرب اسمها ضامنة المغني.. كانت وظيفتها تربية البنات الصغيرة على الهوى والمي والطبل والشخالب.. تجيب الجارية من دول عيلة صغيرة مقشفه وشعرها عامل زى السلك.. تحميمها وتظفها وتعلمها وتظبطها.. وبعدين تطلقها في السوق وهي ورزقها. ورزقها ممكن يبقى أمير.. وزير.. داوادر.. سلطان حتى.. دى ارزاق محدش يعرفها.. المهم ان ضامنة المغني دى كانت بتكسب حلو من الشغلانه دى وفتحها ببيت ناس كثير حوالها من ضمنهم عواد.. موسيقار يعنى.. اسمه على العجمي. على العجمي كان الذراع الأيمن لضامنة المغني.. هي تعلم البت الأنوثة وهو يعلمها الطرب والمغني.. هي تعلم البت المحن.. وهو يعلم البت المقامات وأميطلع وامي تنزل بالعرب والحليات علشان تشعل قلب المستمع الى في أغلب الأحوال كان بيخر من اول كوبليه بتقول فيه يا ليل يا عين.

وده بالظبط الى حصل مع اتفاق.. اشترتها ضامنة المغني باقل من 400 درهم.. وسلمتها لعل العجمي علشان يزنجفها. ويبدو كده ان اتفاق كانت موهوبة.. برعت في لعب العود والغنى والمحن الى الدرجة الى لفتت نظر الكل وأولهم ضامنة المغني.. الى شافت ان الشوكلاتة مكانها فوق.. خدتها على قصر السلطان.. اتفاق تعزف وتغنى.. والسلطان يبص على مفاتها وصوتها يضرب في ودنه ومخه ويعمله

وقبل ما تخلص قعدة السمر كانت ضامنة المغني قابضة التمن.. والصالح إسماعيل هيمان في بحور العشق.. اختص نفسه بالجارية اتفاق وقربها منه حتى انها أصبحت محظيته.. بتاعته هو لوحده.. وفيوم من الأيام معرفش يمكسك نفسك.. حملت اتفاق وولدت طفل ذكر وبقت ام الواد.. ام الواد يعنى مش جاريه تاني.. يعنى السلطان يموت من هنا وتبقى حره من هنا وابنها يدخل في الليلة بتاعة صراع العروش.. بعد ما كانت جارية متاحة لأي حد.. بقي عندها فرصه انها تبقى فيوم "أم السلطان".

.....

الدنيا مضحكتش كثير لاتفاق أيام الصالح إسماعيل.. هو يا دوب بنالها بيت تمه 80 ألف درهم وشوية عبايات على طرح على جلاليب مطرزين ومطعمين بالجواهر واللؤلؤ غير شوية جوارى وعبيد كده يا دوب يشوفوا شغل البيت. مرض الصالح إسماعيل ومات.. مسك مكانه سلطان كان كرية اوى على الناس اسمه الكامل سيف الدين شعبان.. قال عنه ابن تغرى "كان من أشرف الملوك ظلما وعسفا وفسقا.. وفي أيامه خربت بلاد كثيرة لشغفه باللهو وعكوفه على معاقره الخمر وسماع الأغاني وبيع الاقطاعات بالبذل"

البذل الى هو الرشوة يعني. خد عندك الحقة دى توريك الكامل شعبان كان بيفكر ازاى.. الكامل شعبان كان متجوز بنت أمير الأمراء "بكتمر الساقى".. ده كان رجل له شنه ورنه كبار اوى أيام الناصر قلاوون.. سمع شعبان ان مراته بنت الأكابر لها اخت أحلى منها.. حاول يخطبها لنفسه بس أمها رفضت لأنه لا يصح الجمع بين اختين.. اخت مراته كانت متجوزه 3 من عيال السلطان قلاوون برضه.. واحد مات وسابها عذراء والثاني مكملش شهرين على العرش واتخلع والتالت يبقى الصالح إسماعيل الى مات بالمرض وهو اقل من 20 سنه. طيب يعمل ايه الكامل شعبان علشان يطول المزه الى حكوا كثير عن جمالها دى؟ راح جاى مطلق اختها وكتب عليها ودخل بيها في نفس اليوم.. علشان تنقلب الحزينة الى عروسة والتمن كانت جوازة اختها. اسفخص عليك راجل.. هو في حد يبص لحريم اخوه!!! ايه القرف ده!!

ده مش كده وبس سعادتك.. الحب الحقيقي في حياة الكامل شعبان لا كانوا مراتاته ولاد الأصول ولا ال 500 جاريه الى مالين القلعة.. دى كانت واحدة واحده حالكة سواد البشرة وتعرف تلعب على العود وأول حرف من اسمها.. اتفاق!!!

مرات اى نعم.. هي بعينها؟

.....

اول ما اتسلطن الكامل شعبان.. جرى على اتفاق وكتب عليها وقتي.. اتاربه كان حاطط عينه عليها من فترة وساكنت.. الواد اتجوز 2 من نسوان

والدنيا ضحكت اوى في أيام الكامل شعبان لاتفاق. بقى عندها بيت ما شاء الله يحكوا ويتحاكوا عنه.. لبست من الذهب والجواهر ما كان شديد الندرة.. تمن الطرحة الواحدة من الاف الطرح الموجودة في خزنة ملابسها كان بيوصل ل 1000 درهم.. أصبحت ذات قرار وهيبة هي وخدامها.. حتى ان أمراء المماليك كانوا بيلجأوا الى اى طواشي من بتوع اتفاق علشان يتوسطلهم عن الست.. والست تتوسط عند السلطان.. والسلطان في دنيا تانية خالص اسمها لم الضرائب والفلوس والفساد والجري ورا النسوان.. فكان طبيعي أن الامراء تنقلب عليه بسبب اخلاقيات السيئه وبسبب أزمات اقتصادية كثير عصرت مصر

مصر وفقرت وغار في داهية الكامل شعبان وجه مكانه اخوه الى اتولد في أيام الحج المبروكة.. المظفر حاجى. مكانش سنه كبير هو كمان لما قعد على العرش.. يادوب 16 سنه هو راخر.. وده يدينا فكره عامه وتصور عن مين الى فعلا كان بيدير شئون البلاد فى الفترة دى.. امراء بقول آخر.. قادة الجيوش.. العسكر..

اول حاجه عملها المظفر حاجى لما مسك انه امر بنزول ام السلطان شعبان وكل الحريم والجوارى من القلعة ويغوروا في داهية وتتصادر املاكهم وفلوسهم.. عاوزين نمشى عدل علشان رينا يباركلنا في الملك والحكم.. تفاعل الامراء والناس خير.. يبدو ان الراجل ده فعلا راجل محترم.. خصوصا انه كان شجاع وقلبه ميت. بس الفرحة مدامتش كثير.. اتارى المظفر حاجى هو راخر عينه كانت على الجارية اتفاق.. طلعه القصر واتجوزها في السر.. والى كسبته في أيام الصالح إسماعيل والكامل شعبان.. كسبت اده 10 مرات في أيام المظفر حاجى الى ساب البلد تضرب تقلب وركز في حاجات تانية خالص.

تخيل يا مؤمن انها قعدت تغنيله فيوم لحد ما اتسطل وراح جاى فارش تحت رجلها 60 حقة حرير أطلس "أغلي أنواع الحرير وقتها" وغطاها

الراجل هيطلق من جنبابه يا حرام.. بس عنده حق يا جدعان.. هو مكاش في حريم في البلد غير الولية دى علشان 3 سلاطين اخوات يربلوا عليها  
كده!!

الحكاية.....

ونزلت اتفاق من القلعة لابسه عبايه تمنها 10 الاف دينار.. بس السلطان كان جدد ومسايهاش تتبهدل.. خدله بيت مع جواربها وامرلها نفقه شهريه يا دوب 7000 دينار ومعاهم عبد على العواد علشان تستمر لبالي الانس والفرشة بعيد عن القلعة وبعيد عن عيون الأمراء الى فرسهم المظفر حاجي بزياده وبديل ما كان بيهيص مع الحريم بس.. بقى بيهيص مع الحمام والصبيع.. بني غية حمام كبيرة صرف عليها فلوس البلد ولم الاضبيش البلد وبقوا يلعبوا تحطيط كل يوم قصاد عيون الأمراء الى هتولع من الغيظ من السلطان العيل وعمايه. نهاية حاجي كانت متوقعه طبعاً.. قبل ما يكمل العشرين هو كمان كان الأمراء جايين رقبته علشان يحطوا مكانه سلطان تاني عيل هو كمان.. اول أيامه كان اسمه السلطان قماري.. وبعد كده بقى اسمه بدر الدين أبو المعالي الحسن.. المشهور عندنا باسم السلطان الناصر حسن.. صاحب اهم تحفه معماريه اسلاميه موجوده حالياً في ميدان القلعة. الناصر حسن مكائش له في السود.. هو الوحيد الى مبصش على الولية دى.. كان مغرم بالحريم اه.. بس الحريم التاني الأبيض الى زى القشطة.. اتفاق وشلتها راحت عليهم خلاص وفضلت عايشه مع نفسها بعيد عن تركة المظفر الكبيرة الى فرتكها الامراء واولهم السلطان نفسه.

طيب..	اتفاق	بقي	حصلها	ايه؟						
الولية دى متطلعش خسارانه ابداء.. لقت ان لعبة السلاطين دى مش تمام ومفيش سلطان بيعمر.. راحت رامية الهلب على الوزير موفق الدين هبة الله بن السعيد إبراهيم.. ده كان من كبار كتاب الناصر محمد بن قلاوون وبقي وزير أيام الصالح صلاح الدين صالح.. وكان برضه من اهل الحظ والفرفشة.. يعنى مفتاحه سهل اوى مع اتفاق اللى قدرت تلف عقله لحد ما خصصلها مرتب سنوي قدره 700 ألف درهم.										
يا	قوة	الله..	اكثر	من	50	ألف	درهم	في	الشهر!!	
يهدك	وليه..	دى	تكلفة	تجهيز	الجيش	المتوسط	كانت	40	ألف	درهم..
بتعمل	ايه	بالفلوس	دى	كلها!!						

المهم ان الوزير موفق جرى عليه الى جرى على الكل في الوقت ده.. وشايه ونميمه واغتتيال وتقطيع.. مات موفق وساب اتفاق بفلوسها وجواربها.. كانت عظمتها كبرت بقى ومبقاش فيها اى طمع.. عاشت لوحدها لحد ما ماتت في سلطنة الناصر حسن الثانية.

عارفين	الشاهد	من	الحكاية	دى	ايه؟			
ان البلد	دى	من	قديم الأزل	مسيطر عليها	أصحاب السيوف.. ومبيفلحش فيها	الا	الطبالين	والرقاصين.

مصدق؟؟

طبيب	اقرأ	الكتب	دي
- السلوك	لمعرفة	دول	"المقريزي"
- النجوم	في	ملوك	تغري
- الدرر	في	المائة	العسقلاني
- المختار المصون من أعلام القرون	اعيان	الثامنة	ابن حجر
"ابن عقيل موسى"			



## جاني بك الاشرفي

طريقتين ملهمش تالت علشان توصل لكرسى من الكراسى السبعة الكبيرة فى دولة المماليك..  
يا اما تكون بتاع سيف وحرب ودماغك سم وصحتك حلوة وملكش فى السجائر علشان تعرف تركز فى الخناق والقتل والديح والحاجات دى.. قوم لما يطلع سلطان مش عاجبك تروح حاطط عليه ومطيره وقاعد مكانه..  
يا اما تكون شديد الاخلاص والوفاء لواحد من الامراء الى دماغه سم وصحته حلوه وملوش فى السجائر ويبيعرف يتخانق علشان لما ييجى سلطان مش على كيفه يروح حاطط عليه وقاعد مكانه..  
وفى الحالتين الفلوس بتيجى بعد ما توصل للمنصب مش قبل.. تتميز مصر ان رحلة الصعود بتكون مليانة كفاح وفقر.. بينما القمة بتبقى حلوة ومريحة كده وكلها مكاسب..  
اهو الطريقة الثانية دى هى قصة حياة جاني بك الأشرفي باختصار..  
عارفين الأشرف برسباى طبعاً..

ده كان راجل مجدع وشديد وبتاع حرب وقلق.. عمل شغل عالى اوى مع بتوع قبرص ورودس.. علم عليهم علامات جامدة تقول ان كان راجل مش بتاع كلام.. كمان ظهر فى وقت مكانش فى على الساحة حد تأمل منه انه يكون قلاوون جديد ولا برقوق جديد.. بعد المؤيد شيخ ما قتل ابنه مصر بقت عاملة زى بنت هربت من بيت اهلها ولقطتها ايدى الذئاب.. كل ايد تاكل منها حته وبعدين ترميها فى الشارع..  
رحلة صعود برسباى مكانتش سهلة.. داق مرار السجن وخاض مؤامرات مهولة علشان يقدر يقعد على العرش اخيراً سنة 825 هـ.. 16 سنة من عمر مصر عرفت فيهم الاستقرار والجيش القوى قبل ما يموت برسباى وتدخل مصر نفق مظلم تانى لمدة 30 سنة تفوق منه مع آخر السلاطين العظام -الأشرف قايتباى- وبموته تنتهى الليلة كلها وترفع السلطنة المصرية راية الاستسلام قصاص ضربات الزمن المتوالية ونبدأ من ساعتها عصر الهفأ المستمر بفضل العسكر لحد النهارده..  
برسباى وهو امير اشترى طفل صغير استوسم فيه حسن الاخلاق والنباهة.. رياه فى بيته وسط اولاده لحد ما كبر.. كان اسمه "جاني".. ولما برسباى اتسلطن وخد لقب الاشرف.. جاني اخد لقبه من سيده وبقي اسمه جاني الاشرفي..  
جاني الاشرفي ده حدوته فى الوفاء يا فندم..

لما اتسجن برسباى فى الشام فى اثناء رحلة صعوده لكرسى الحكم.. كل من كانوا حواليه ومستفيدين منه اتفوضوا.. كل واحد شاف مصلحته على اعتبار ان سجون المماليك زى سجن العقرب كده.. وان واى.. رايح بس مفياش راجع.. قليلين اوى الى فلتوا من الجحيم ده وخرجوا بشر زى ما دخلوا.. علشان كده كل واحد قالك الفاتحة على روح برسباى.. شكرا لحد كده..  
ما عدا جاني بك..

الجدع وقتها كان سنة اقل من 15 سنة.. هو مش بس فضل جمب برسباى فى محنته.. لا.. ده اصر انه يتسجن معاه علشان يخدمه جوا السجن.. حاجه كده معملهاش عيال برسباى نفسهم.. ولاء ووفاء نادر جدا سواء فى عصر دولة المماليك او فى اى عصر تانى.. علشان كده كان طبيعى جدا ان برسباى لما يركب الكرسى يكون اول واحد يفكر فيه هو جاني بك الى اترقى من مجرد مملوك الى امير عشرة وبعدين امير طبلخانه وبعدين خازن دار لحد ما بقى دوا دار السلطنة كلها.. وزير الخارجية يعنى.. تالت اهم راس فى السلطنة بعد السلطان والنائب.. طيب هل استغل جاني بك المنصب علشان يخطط لشيء ما خصوصا انه كان دوا دار السلطنة وهو عنده 20 سنة بس؟؟  
مفياش دليل على كده.. رغم ان الى كتبوا سيرته قالوا انه كان "عظيم دولة برسباى" وكانت الناس والامراء بتلجأ ليه علشان يخلص لهم امورهم ويحل مشاكلهم ويمشى المراكب الى وقفها موظفين مجمع التحرير.. اسمه لوحده كان كفاية علشان يحل اى مشكلة.. كترت سيرته على الالسنه ومعاه الالسنه الخبيثة الى بتقول انه خلاص.. قرب يقلب الكرسى بالسلطان اهو..  
لكن برسباى مصدقش وفضل جاني بك فى مكانته فى دولة برسباى لحد ما المرض ركب.. مرض غريب مجهول محدش قدر يشخصه.. قعد فى بيته يتعالج ويتمرض لحد ما يقوم ويشد حيله.. السلطان معجبوش الحكاية دى.. قالك الراجل مسابنيش فى السجن.. اسببه فى مرضه!!

ليه.. هو انا سيسى اوى كده؟؟

وامر برسباى ان جاني بك يتنقل للقلعة ويتعالج ويتمرض تحت اشراف السلطان شخصيا وبالذكارة بتوعه..  
اتحسن جاني بك شوية لكنه انتكس تانى فى فترة قليلة.. محدش كتير فى المرض علشان يودع دنيتا سنة 831 هـ وهو عنده 25 سنة بس..  
اندفن فى المسجد الى بناه فى المغربلين وحزن عليه السلطان حزن عظيم جدا لدرجة انه امر بنقل رفاته من مسجده الى القرافة السلطانية الى بناها لنفسه شخصيا.. علشان يبقى رفيقه فى الآخرة زى ما كان رفيقه فى الدنيا..

قبة جاني بك الأشرف في ما زالت موجودة.. صامدة.. شاهدة على وفاء مملوك ووفاء سلطان.. تحس ان القبة عاززة تقولك ان كنت شفت من الدنيا ندالة بشر.. ففي الدنيا برضه بشر وولف.. بشر عاشت وماتت بالوفاء.  
ان شاء الله لما السيسي يموت هنبقى نعمله قبة زي دى بس مش فى القاهرة..  
فى تل ابيب.

## كيلو شقير لو سمحت

a غالباً لما حد يفكر يكتب وصف للصورة دى هيقول إن دى قبة فى خانقاه فرج بن برقوق فى القرافة اتدفن فيها الظاهر برقوق ورجال آخرين وتاريخ الصورة والى صورها وشكرا ، لكن الحقيقة إن الصورة دى لها أوجه أخرى مثيرة فمثلاً كثير من الصور المتصورة جوه القبة دى دايمًا تلاقى فيها شخص او اتنين واقفين ، هل دول موديل طالب منهم المصور يقفوا عشان يخلوا الصورة لها روح ؟ ولا كانوا موجودين صدفة !

الحكاية إن قبة برقوق كانت مقصد لعوام المصريين لطلب التداوى من الرمد ، وكانت الفكرة الاسطورية إن الشخص الى عينه بتوجعه يصب الماء على شاهد قبر السلطان برقوق وبعد ما الماء يغسل الشاهد ويتجمع فى طبق ولا حلة او ما شابه ياخذها الشخص المريض ويغسل وشه وإن شاء الله عينه ترجع سليمة وزى الفل ، طبعاً الحكاية دى تقولك إن المصريين كانوا بيعانوا ازاي من امراض العيون علماء الحملة الفرنسية قالوا ان المصريين دايمًا عندهم مشاكل فى العيون ، كلوت بك عراب المنظومة الطبية فى عصر محمد على أكد نفس الحكاية المصريين والرمد متلازمين ، يمكن الاجيال الكبيرة نسبياً خاصة فى الريف شافت القصة دى كثير وياما فى ناس فقدت بصرها جزئياً وكليا بسبب المشاكل دى ، يبقى لجوء المصريين لبرقوق ما هو إلا استجابة شعبية لتحدى كبير هو امراض العيون !

طبيب ليه المصريين اختاروا برقوق بالتحديد مش حد تانى ؟

الحقيقة إن حكاية معرفة اصل الاساطير من اكثر الحاجات الشيقة فى الدنيا فى الحالة بتاعت التبرك ببرقوق ، هنلاقى إن الدهشة هتصيبنا لما نحلل ونفكك الاسطورة ، لو روحنا للمصادر الى بتوصف شكل برقوق هنلاقيهم بيقولوا إن برقوق كان عنده عين جاحظة كده ، بس طبعاً مكش فيه مجال للتندر او التمر عليه وحد يقول إن عينه زى البرقوقة ، لأن الرجل لما هزم اعداءه ومنافسيه وقعت هييته فى قلوب الناس لدرجة إن مبقاش حد يجزؤ يقول على البرقوق برقوق وتوافقوا كده فى صمت إنهم يقولوا عليه شقير !

يعنى بدل ما تقول للراجل اوزنلى 2 كيلو برقوق لو سمحت !

تقوله اوزن اتنين كيلو شقير خلى ربنا يسترها !

اختيار برقوق للتبرك والرغبة فى شفاء العيون المريضة ربما يكون نابع إن فى شخص كان مصاب بعيب فى عينه ولكنه قهر اعداءه وبقي سلطان مهيب ! فالرغبة إن المريض يشفى ويستأنف حياته أسوة ببرقوق السلطان !

اما بقى لو رجعت للزمن كام ألف سنة وفتحت كتب الميثولوجيا المصرية القديمة هتلاقى الكلام عن اسطورة ايزيس وازوريس ، اثنا الصراع بين حورس وعمه الشرير ست اتخلعت عين حورس والتقطها غزال ابيض وبلعها ، ولكن بعدين تم استعادتها من بطن الغزال ورجعت العين لمكانها ، وبقت رمز مهم فى مصر القديمة تحت اسم اوجات او زى ما هى معروفة بعين حورس وطبعاً بتستعمل كتميمة فى بطولات كثير او تصاميم كثير جداً !

طبيب ايه الربط بين اسطورة عين حورس وعين برقوق ؟

يبدو إن اسطورة حورس وعينه كانت رمز للتجدد والحماية والحياة وإن ده استمر فى وجدان المصريين رغم مرور السنين لكنهم لما فكروا ينتجوا الاساطير من جديد انتجوها من واقعهم لأن صلتهم بماضيهم البعيد كانت ضعفت جدا ، لكن برقوق بعينه السقيمة حارب وانتصر واستقر امره ، وحورس رجعت عينه وحارب وانتصر على عمه الشرير !

فالاسطورة مش خرافة بالمرة دى قصة بتقولك إن علاقة المصريين بأجدادهم القدامى اختفت من الظاهر المرئى المحسوس وانتقلت للباطن والوجدان والاساطير الى بيعتنقها المصريين للآن تشهد!



## القميص يا يحيى

بيحصل ساعات انك تبدأ تقرأ في شيء فتلاق نفسك اتكعبلت في شيء تانى او صفحة سلمتك لصفحة والانتين سلموك لكتاب علشان في الآخر تلاق عندك قصة تانية خالص غير اللي كانت في دماغك الأول.

اهو انا كنت بدعبس في تاريخ وطقوس الاحتفالات المصرية علشان اعرف هل سبق قبل كده مثلا ان المصريين "او فئة منهم" احتفلوا بعيد او مناسبة ما بشكل اباحي جماعى زى ما حصل في النادى اياه كده من كام يوم وللا الحركة القارة دى من طفليات العصر البلحاوي الحالى وهينتهى السلوك ده ان شاء الله بنفاز امر الله وعدله في ان انبوبة قصر الاتحادية تفرقع وتقضى على كل من فيه مره واحده كده زى ما حصل مع قوم عاد مثلا ونخلص للابد من ايام قاحلة شفنا فيها العجب من قصص وفتاوى وانهايمار رموز وترحم على قوادين وتقديس القرون وحاجات ما انزل الله بها في الأرض من سلطان.

قوم يا سيدى في السكة كده اتكعبلت في 3 حكايات مختلفة..

الحكاية الأولى حكاها ابن اياس عن احتفال المصريين بعيد الشهيد.. وده شخص قيل انه كان من بنى اسرائيل مفضلش من أثره الا صوباع محتفظين بيه في كنيسة كبيرة على النيل في شبرا.. الصوباع موجود في صندوق خشب وكل سنة الرهبان يطلعوه يوم 8 من شهر بشنس ويغسلوه في النيل في مكان محدد.. قالوا ان النيل مش بيفيض ولا بيوفي الا لما يتغسل فيه صوباع الشهيد في نفس الموعد من كل سنة.. حاجه كده زى اسطورة عروس النيل اللي محصلتش ابد ايام المصريين القدماء.. بدأت طقوس الاحتفال بالاحتفاء بصوباع الشهيد واقامة الصلوات والقداسات على ارواح الشهداء في مصر.. ومع الوقت تطور الاحتفال الى خيم تتنصب على النيل قبل موعد الاحتفال بأيام وبراميل خمور ملهاش اول من آخر تتفتح في اليوم ده وما يصاحبها من طقوس مجون وفسق ودلع وحاجه فل اوى لحد ما قيل ان يوم الشهيد ده بيتصرف فيه 3000 دينار على الخمرة بس ولحد ما اشتهرت شبرا ان كل خراجها من الزراعة والتجارة وكل اراضيها موقوفة على زراعة العنب بس لزوم الاحتفال باليوم ده.. وفضل الاحتفال والمعتقد ده شغالين لحد ما جه الامير صرغتمش في سلطنة الناصر حسن الثانية وهدم كنيسة شبرا وخذ الصندوق الخشب بالصوباع بالرهبان بكله كله وحرق كل ده ورماهيم في النيل مرة واحده.. قالك ياللا.. خلى النيل يولع مش بس يزيد.. وللعجب العجاب زاد النيل في السنة دى فعلا.. بس مع الوقت الناس نسيت الموضوع والاحتفال كله لأن النيل كالعاده عمل مع المصريين شوية حركات قارعة من بتاعته.

ومفضلش من الحكاية ولا الصوباع ولا سيرة الشهيد الا ان ازاي المصريين قلبوا احتفال ديني في الاساس الى خمره وهى وىء وترتر وشخايل.

الحكاية الثانية حكاها عمنا الجبرتي عن ست خلفت عيل ودانة طويلة ومناخيرة نازلة لقدام بشكل ملفت وانياه خارجة بره بقه رغم ان ابوه كان راجل حليوه.. وبسبب شكل العيل الغريب بقت الناس تتفرج عليه في الحارات والبيوت.. الى هو بقى مسخه يعنى يضحك عليها الناس.. كملنى بقى عن التنمر ونفسية الواد والحاجات دى.. اقولك ان الواد نفسه طلع عليه سمعه انه "بتاع ربنا".. زى دأب المصريين في وصف كل طفل مش طبيعى او من ذوى الاحتياجات الخاصة في الارياف.. لو حد من الفلاحين يوما ما قالك عن ابنك انه بتاع ربنا.. اوعى تفرح.. ده يقصد انه اهيل علفكره.. امسك في زماره رقبته علطول وخليه يقول انا سوسن وقتي.

طيب السؤال المهم.. هو الواد طلع كده ليه رغم ان ابوه حليوه وامه كانت مزه؟؟

قالك يا سيدى ان امه وهى حامل فيه شافت فيل وعجبها.. قوم شكل الفيل طلع في وش الواد.. سبحان الله.. افتكرت ايام حمل مراتي في ابني وطلباتها الغريبة جدا في اوقات اكثر غرابية من الليل البهيم البارد.. وخضوعى للطلبات دى مجبرا لأحسن الواد يطلع في وشه فراولايه مثلا.. الغريب في مصر ان الخرافات بيبقى عليها ادلة اكثر من الحقائق.. ازاي.. متسألنيش.

اما الحكاية الثالثة حكاها الجبرتي برضه.. كانت عن امير من امراء محمد بك ابو الذهب.. كان اسمه يوسف بك الكبير.. كان دراعه اليمين وجوز اخته وكده يعنى.. الراجل ده كان غريب الاطوار جدا.. شوية يبقى خير ويفرق دبايح على الفقراء ويعمل ليالى ذكر وحركات.. وشوية يقبض على الناس ويطير رقابهم من غير تفسير ولا تهم.. جه في يوم اشترى المساحة الى قصاد مسجد خاير بك كلها بشوارعها وحواربها وبيوتها.. الى يوافق يبيع البيت خير وبركة.. والى ميوافقش يلاقى نفسه لابس تهمة تكدير الأمن العام علشان نشر حاجات مش تمام على الفيس بوك.. وبدأ يوسف بك يبنى بيت عظيم جدا.. وكل ما يبنى حته.. يغير رأيه ويهددها وبينها بشكل افخم.. حتى انه كان عايز يهد مسجد خاير بك نفسه علشان يعمل مكانه بوابه عظيمة لبيته.. كان ايه هدفه من البيت ده؟؟

ولا حد عارف.

ايام يوسف بك انتشرت اقاويل كثير عن شيخ طاعن في السن عايش في سمنود "غريبة".. راجل مبروك من اهل الحظوة والخطوة قالوا انه بيقدر يكلم الجن ويخليهم يظهرها للناس في العلم.. يعرف كمان في علم الحروف وبيقدر يحرك الجماد ويرجع الحبيب ويفك الاعمال وسره باتع اوى.. كان اسمه الشيخ احمد صادومة.

الشيخ صادومة ده كان على صلة بأكابر المماليك والمشايخ زى حسن بك الجداوى والشيخ حسن الكفراوى.. الى هو يعنى راجل واصل وسمعته عند الناس حامياه من اى قلق.

قوم في يوم خميس من اياهم يوسف بك مروح بيته ودماغه مونونه حبتين.. دخل البيت وشاف واحده من جوارية بتعمل حركات كده.. قام الراجل راح عندها وقالها النور مولع وانا مولع يا جميل.. وهوب الدانس اشتغل وبقت ليلة حمراء مقفلهاش الا منظر وشم غريب اوى في مكان لامؤاخذه عند الجارية.. الراجل اتخص واتقفل ومسك البت من قفاها.. مين يا بنت الحرام الى رسمك الرسم ده.. راحت البت اعترفت وقالتله الشيخ صادومة.. بغض النظر ان الشيخ صادومة كشف جسم البت يعنى.. بس الجبرتي محكاش عن شكل الرسم نفسه كان عامل ازاي.. اعتقد مكان وجوده هو الى استفز يوسف بك مش حاجه تانية.

ونزل الأمير يوسف بك وقبض على الشيخ صادومة.. الراجل المسن بتاع العفاريات.. وامر بقتله والقائه في النيل.. ياللا.. خلى العفاريات تنقذه بقي.. وخذ بيته كله لحسابه.. وهو بيفتش البيت لقي ايه بقي؟؟

كم مهول من الاثار الجنسية والتماثيل مختلفة الصنع للاعضاء الذكرية.. اشى قطيفة واشى حجر واشى خشب.. حاجه كده زى اثار مدينة بومبي بتاعة ايطاليا.. كل ده في بيت الراجل بتاع ربنا.. الامير جمع كل ده وبقي يتندر بيه على المشايخ اجمالاً.. وكل ما يقعدوا في مكان.. يقولك اتفرج يا عم على المشايخ وحركاتها.. تعميم مخل طبعاً.. بس الواحد مقدر صدمة الراجل في اماكن جاريته الاثيرة الحساسة.

وهي دى يا سيدى الحادثة الى استوحى منها احمد مراد روايته الفيل الأزرق.. شيل بس شيرين رضا علشان دمها واقف وحط مكانها الشيخ صادومة وحكاية القميص علشان السسبنس وكده.

طيب هل كان الوشم عند الجارية بيستحضر عفريت بقي وكده؟؟

مش عارف والله.. بس الى اعرفه ان حكاوى العفاريات دى كلها هيد وهري واى كلام.. والا حضرتك كنا حضرنا عفريت يلبس السيسى وخلصنا كلنا.. وللا هي العفاريات ملهاش الا في النسوان بس؟

طيب وقميص المأمون الموجود فعلاً في المتحف الاسلامي؟؟

اه.. ده حكاية تانية بقي علشان موضوعه موضوع.

(يتبع)

## ابو الفقراء والمساكين



سنة 662هـ.. في ايام حكم السلطان الظاهر ركن الدين بيبرس.. حصلت في مصر مجاعة من ضمن الاف المجاعات الى عدت على مصر في تاريخها الطويل..

في شهر ربيع الثاني تحديدا..

بيحكى المقريزى في السلوك ان الاسعار ولعت.. اردب القمح وصل 105 درهم و اردب الشعير وصل 70 درهم.. 3 ارطال العيش كانوا بدرهم و رطل اللحم كان بدرهم وتلت.. والاسعار في اسكندرية كانت اغلى من القاهرة كمان.. منعرفش دلالة الارقام دى ايه وهل هى كده غالبيه فعل وللا لأ.. بس السطر الى بعد الكلام ده علطول في كتاب المقريزى يقول انها فعلا كانت اسعار فوق طاقة الناس..

"ثم اشتد الحال بالناس حتى اكلوا ورق اللفت والكرنب ونحوه وخرجوا الى الريف فأكلوا عروق الفول الأخضر."

باعنباره المسئول عن الرعاية حاول بيبرس يتصرف ويفرض تسعيه اجباريه على التجار تراعى الفقراء.. بس اى انسان يفتكر انه ممكن يغلب تاجر يبقى واهم.. الاسعار غليت زياده وعدد الفقراء تضاعف لدرجة ان السلطان الغى التسعيه وقرر ياخذ اجراء تانى فوري يتابعه "بنفسه" علشان يتغلب على المجاعة دى.

جمع السلطان الامراء اصحاب الاراضى والزمهم ببيعوا كل يوم 500 اردب قمح بسعر مخفض لصالح الفقراء.. ويراعى ان كل واحد يشتري الكمية لى تكفيه وبس علشان الناس الى بتحب تخزين.. بس الامور متحسنتش كثير وفضل عدد الفقراء فى الطالع.

قام السلطان مغير الاستراتيجية تانى وامر بجمع اسماء الفقراء في مصر.. السلطان فتح خزنته هو الشخصية علشان يتكفل بالاف منهم وقال "والله لو كانت عندى غله تكفى هذا العالم لفرقتها".. وخذ الاف تانية حطهم في عهدة ابنه الملك السعيد محمد بركة خان.. ولما فضل لسه في فقراء في البلد امر المسئول عن ديوان الجيش انه يخصص لكل امير من امراء الجيش مجموعة من الفقراء يتكفل بيهم.. كل امير على حسب قدرته.

باقي الفقراء جمعهم السلطان على ابواب القلعة وجمع التجار الكبار والامراء واغنياء البلد وقسم الفقراء عليهم كل واحد بحسب قدرته.. والى القاهرة صارم الدين المسعودى مثلا بيبرس حط في عهده 100 فقير.. الوالى قاله انه فعلا متكفل ب 100 فقير من قبل ما السلطان يقول.. السلطان قاله "ذلك فعلته ابتداء من نفسك.. وهذه المائه خذها لأجلى."

بعد كده وقف السلطان يخطب في الامراء والاغنياء وقالهم "هؤلاء المساكين قد جمعناهم اليوم وانقضى نصف النهار.. فادفعوا لكل منهم نصف درهم يتقوت به خبزاً.. ومن غد يتقرر الحال."

عارف الناس عملت ايه لما لقت السلطان بيعمل كده؟

الكلام لسه للمقريزى.. بيقول ان الناس فتحت المخازن وفقرت الصدقات.. فانحط السعر 20 درهم وقلت الفقراء.. واستمر الحال الى شهر رمضان حتى انحل "قل" السعر في يوم واحد 40 درهم للاردب.

وانتهت الازمة على خير.

واخذ بالك من رد فعل السلطان؟

واخذ بالك كمان من "سرعة" رد فعل السلطان؟

المفروض ان السلطان ملوش حاجه عند الامراء والاغنياء طالما بيأدوا الزكاة.. ده الكلام الرسمى.. بس من الكتب كمان عرفنا ان الحاكم مسئول مسئولية مباشرة عن احوال الناس الى بيحكمهم للدرجة الى تخليه يخاف احسن ربنا يسأله عن بغله اتكعبلت او تأذت في مملكته على بعد الاف الاميال من مقر حكمه.

كل سلطان من الممالك كان له لقب.. لقبوا بيبرس بأبو الفقراء والمساكين.. اعتقد دلوقتى عرفنا ليه.. الناس كانت بتحب السلطان بيبرس.. مش علشان كان المؤسس الحقيقى للسلطنة العظيمة ولا ان السلطنة وصلت في عصره الى اقصى اتساع ممكن.. مش علشان كان فارس شجاع لا يشق له غبار انقذ جيش المسلمين "والاسلام نفسه" في عين جالوت ولا علشان كان مربى الرعب لبوهيموند السادس امير انطاكيا.. الفرسان كثير والامور دى بتتنسى من ذاكرة الناس لما السلطان بيموت ..

الناس حبت السلطان لأنه كان رحيم بالفقراء.. كان مدرك ان موقعه كسلطان مسئولية مش ميزه.



رغم ان من قديم الازل هيفضل في فقراء واغنياء وان تفاوت الثروة بين البشر تعتبر سنة من سنن الانسان في الارض وربنا مطلع على الفقراء والاغنياء وشايف حالهم وكل الكلام الخايب ده.

دائما وابدا السلطان في ايده الحل.. لو شاء.

يعنى السلطان بيبرس مثلا لو عرف ان الامير محمد المرشدى البندقدارى عمل فرح لبنته ست الملوك كفه 188 مليون درهم في بلد يتضور جوعا.. فكرك كان هيسكت؟؟

يعنى انت عاوز السلطان ياخذ فلوس من الاغنياء الى اشتغلوا وكسيوها بعرقهم ويفرقها على الفقراء مثلا!!

لا طبعا.. الى بيعمل كده هما السلاطين الرجاله بس.

واللى عندنا مش راجل.



## ان المذيعين لأنجاس مناكيد

وحكى الراوى بعد ان انتهى من البلوك رقم 10 مليون فقال..

بعد حمد الله والثناء عليه والدعاء على مارك بما يكره.. تنشأ الدول العظمى بالسيوف على ايدين ملوك عظام بيسيوبو سابوا وراهم مآثر وبطولات عظيمة يورثها عيال سيس بيعيشوا على حس اهلهم فترة من الاستقرار.. الاستقرار مع السيس بينتج عنه عيال هفاً تورث كل حاجه على الجاهز وتبقى ايامهم ايام أفول تعيش فيه الدولة مرحلة مربعة من التخبط لحد ما يورث الحال فى النهاية عيال شمال من بتوع الانقلابات فتكون نهاية مأساوية للدولة لا تليق أبدا بالبدايات القوية بتاعة الملوك العظام.

الدولة العباسية مكنتش بعيد عن كل ده للأسف..

طبيعى جدا لما تقرا مقال بيتكلم عن "طشة الملوخية" او "يوم ان ولدت مصر" او "اغمز بعينيك يا سيسي" او تلاقى شاعر هفاً زى ابن سكرة الهاشمي كتب وهو بيلقح على آل طالب..

ان الخلافة مذ قامت ومذ بدأت \*\*\* موسومة بفتى من آل عباس

إذا انقضى عمر ذا قام ذا خلفا \*\*\* فلاحت الشمس وامتدت على الناس

فقل لمن يرتجئها غيرهم سفها \*\*\* لو شئت روجت كرب الظن باليأس

يبقى لازم تتوقع ان الملك ده كله لازم هيزول قريب لأنه ملك – فى الوقت ده - قام على التعريض مش العدالة.. لما الحاكم يستمد امجاده من السنة الشعراء واوبريتات اختراعه وبايعناه او اغانى زى تسلم الايدى اكيد هيفوق فى يوم على خازوق يخترق مؤخرته علشان بعدها يقعد يندب ويولول على ملك ضايع وللا خيانة الى استأمنهم او اى شكل من اشكال العويل الى مالى التراث بتاعنا ..يمر الزمن وتموت الشخصيات ولا يتبقى فى ذاكرة العوام الا المخازى والسقطات الى بتفضل مع غصة فى الحلق مهما حاول ترزية التاريخ تجميلها او الدوران حوالها او تلبس الاحداث باللباس الدينى علشان يستدروا عطف الناس ويبتزوا مشاعرهم بمواقف خايبه لا هترجع الى راح ولا ليها اى تأثير الا مصمصه الشفايف.

بداية من الخليفة العباسي العاشر – المتوكل على الله – بدأت فترة صعود الترك فى الدولة العباسية.. يمكن علشان امه "شجاع" كانت تركية.. يمكن علشان الترك اثبتوا كفاءة فى الحروب.. يمكن لأن الحكم والخلافة والسياسة مكنوش فى دماغه قصاد لبالى الهىء والمىء والشرب والفرقة مع 4000 جارية زى الصواريخ اللهم اوعدنا.. يمكن علشان مكنش مركز فى حال الناس وكانت حياته كلها كبرى زى واحد صاحبنا ..

كل ده جاز ..

الى يهمنى هنا هو الفترة من 320 الى 360 هجرى..

فترة حكم الأخشيد فى مصر..

كثير من الناس لما يسمع كلمة اخشيد علطول ينط فى دماغه كافور الاخشيدى.. ليك الحق يا فندم لأنه اشهرهم بالرغم انه بيولوجيا لم يكن اخشيدى ولا عباسى ولا عربى من الأصل.. هو بس كان فى خدمتهم ونط على الكرسي كوصى على العرش وبعدين بقى هو العرش لحد ما الدولة الى طلعت بسرعة وقعت بسرعة بينما اصاحبنا العباسيين قاعدين فى بغداد بياكلوا سمك مسقوف وبيغنوا قولى احبك بتاعة الخليفة الكاظم بالله.

سيرة ابن طولون وابن الاخشيد تحسها نسخة من بعضها.. زى ما كان ابن طولون تركى.. محمد ابن طغج كان تركى.. وزى ما ابن طولون كان والى عباسى على مصر وطمع فيها ليه ولعياله كذلك محمد بن طغج خد مصر مكافأة من الخليفة العباسى وطمع برضه فيها ليه ولعياله.. وزى ما ابن طولون كان شديد واسس دولة سابها لعليل دلوع ضيع البلد بعد ما فلس الخزينة علشان يجوز بنته كمان محمد بن طغج كان شديد فى الحكم وقدر يرمى حفيد ابن طولون فى الباسكت وينط على الكرسي مكانه علشان يستفرد بحكم مصر..

هو الناس دى مكانش وراها غير مصر وللا ايه!!!

مصر كانت حدوتة يا مون بيه.. شايف انت الدولة العباسية المهولة دى كلها؟؟ مصر الى كانت بتصرف عليها.. الخراج بتاع مصر كان 2000 الف دينار فى السنة.. يعنى 2 مليون دينار ذهب زى ما حكى المقرئى فى الخطط.. بيقولك ان من كتر فلوس مصر كان الولا بيعملوا بيها كبارى بين اوض النوم والحمامات فى القصور.. حتى ان الشاعر الاحنف السيسى قال فى مدح واحد من كبارى المحروسة..

وان كنت لا بد بانيا فعليك بكوبرى \*\*\* فلوس ومصالح من حيث لا تدري

فلا الشعب واع لما تفعله \*\*\* وان وعى.. فخد فلوسك على سويسرا واطلع اجرى

لما مات محمد بن طغج الاخشىدى طلع على العرش مكانه ابنه انوجور.. عيل عنده 14 سنة ميعرفش حاجه عن اى حاجه فى وجود رجل الدولة القوى المسيطر على كل شىء واللى عارف منين يودى على فين ومعاه مفتاح كل الابواب فى مصر.. ابو المسك كافور اللبى السورى.. الى خد لقبه "الاخشيد" من سيده محمد بن طغج الى اشتراه بعد كده.. لقب الاخشىد نفسه كان لقب فارسى معناه الذكى او النبى.. استخدمه ملوك فرغانه "فى اوزباكستان حاليا" للاشارة الى اقوامهم واعظمهم نفوذا وصاحب اكبر كمية اراضى فيهم.. والخليفة منحه لمحمد بن طغج جده عنه كده علشان كان واد كفاءة.

فى قصة صعود كافور من العبودية للملك حواديت تستلزم الانتباه..

كافور اتباع لتاجر زيوت فى مصر ب 18 دينار.. كان قصير وشكله وحش.. عبد حبشى اسود مخصى شفته مخرومة.. رجله مشوّه وبطىء الحركة.. حاجه كده زى عرفه مشاوير.. لما تشوفه من اول مره متتصورش ابدأ ان واحد زى ده ممكن تستنفع منه فى اى شىء الا المجهود البدنى.. وهو ده بالظبط الى استخدمه فيه تاجر الزيوت.. كافور فضل يشيل ويحط فى صفايح الزيت ويكنس ويمسح المعصرة لحد ما زهق التاجر من بطء حركته وشكله الدميم فباعه الى واحد بتاع كتب وعلم اسمه ابن عباس الكاتب.. وعنده عرف كافور ان الطريق للكلية الشرطة مش هيكون ابدأ عن طريق الشغل البدنى فى المعصرة.. اتعلم كافور القراءة والكتابة وبدأت تظهر مواهبه وذكاؤه.. صاحبنا ابن عباس الكاتب قالك عبد زى ده يسوى ثقله ذهب لو بعته هديه لى يقدر يستنفع بيه.. الى هو محمد بن طغج طبعاً.. وفى قصر محمد بن طغج اصبح كافور مسئول عن تعليم الامراء ويظهر كده انه كان "مصطفى بكرى" شوية زياده.. لأن كل ما ابن طغج يرشحه لمنصب.. كان كافور يرفض بحجة رغبته فى البقاء فى خدمة مولاه..

كافور كان عنده حلم.. فى الوقت الى باقى العبيد كان حلمهم يتباعوا لطباخ علشان ياكلوا براحتهم.. هو كان بيحلم بحكم مصر.. هيجكم ازاى وهدومه غرقانه زيت وعرق من اثر الشغل؟؟

محدث عارف..

كافور اخيرا قبل يبقى ظابط فى الجيش عند ابن طغج.. كافور كبر وبقي له حملات عسكرية فى الشام والحجاز وكمان بقى مبعوث ابن طغج للخليفة فى بغداد.. يعنى اتعلم الحرب والسياسة كمان بغض النظر انه كان مخصى.. يمكن دى اكثر حاجه نفعت له لأنه كان رامى النسوان من دماغه تماما فعرف يتفرغ لشغله.. ماهو يا ابنى الدنيا كده.. الى يمشى ورا النسوان عمره ما يفلح ابدأ.

فى بيت محمد بن طغج اتعلم كافور اصول الصنعة.. نقدر نقول انه اترى تربية عوالم.. محمد بن طغج نفسه مسك حكم مصر بنصبايه من اخراج حسن الامام.. ايامها كان محمد بن طغج ماسك حكم الشام ومصر فيها والى عباسى اسمه تكين الخزرى.. لما مات تكين الخزرى الخليفة حط مكانه ابنه محمد.. قوم الرسالة دى تقع فى ايد محمد بن طغج الى شطب اسم تكين وحط مكانه طغج.. وبكده بقت الرسالة بأسم محمد بن طغج بدل محمد بن تكين.. تفرق ايه يعنى للو من ابوللو؟؟

طبعاً عساكر محمد بن تكين معجبههمش الكلام ده واعتصموا فى خليج رابعة.. الامر بعد كده متروك لخيالك علشان تتصور اتعمل معاهم ايه.

فى دولة محمد بن طغج كافور كان الكل فى الكل.. لما مات محمد بن طغج طلع مكانه ابنه انوجور تحت وصاية كافور حسب وصية الاب.. انوجور كان مجرد اسم بلا اى تأثير.. كافور هو الى كان ماسك كل شىء وهو الى كان بيصرف للواد وامه ال 400 الف دينار.. مرتبهم السنوى.

انوجور معجبوش الحال فهج على الشام.. هتفتكر بقى انه هناك رتب الجند وعمل قلق علشان يستعيد الحكم من كافور.. اقولك ان هو كان ناوى يعمل كده اه بس امه عقلته لأنها كانت عارفه انه مش اد كافور.. انوجور انقطعت اخباره فى الشام وكل الى عرفناه عنه انه مات



مسموم وعمره 30 سنة.. وبكده ينتقل الحكم لى بعده فى الطابور من بيت الاخشيد.. اخوه الصغير على.. ويرضه كافور كان الوصى عليه وحبسه فى قصره ميعملش حاجه الا الصلاة واللعب مع النسوان.. على كمان مات صغير ومسموم زى اخوه.. واصبحت السكة فاضية لكافور علشان يبقى هو الوالى.. خلاص عيال الاخشيد خلصوا والخليفة مفرهد فى بغداد ومش حمل والى جديد وانقلابات وحرب ووجع قلب كام سنة هيقف فيهم اكيد خراج مصر.. فقالك ياللا.. الخيرة فيما اختاره الله.. كافور كافور وامرنا لله.. ويقال برضه على استحياء كده ان كافور مش برىء من موت العيال دى.. شخصيا اتوقع انه اه له يد فى موت العيال دى.. ماهو مش معقول يعنى الاتنين يموتوا مسمومين بنفس الطريقة واحد فى الشام والتانى فى مصر..

رسميا كافور قعد فى الحكم سنتين.. من سنة 355 الى 357 هجرى.. لكن الفعلى انه كان مسيطر على كل شيء من وقت وفاة محمد بن طغج سنة 334 هجرى.. يعنى 23 سنة مصر تحت حكم عبد حبشى مخصى اهيل زى ما رسملنا المتنبى صورته كده..

طيب هو كافور فعلا كان اهيل ويستاهل الكرياج زى ما وصفه المتنبى وللا المتنبى كان بيهيد شأنه شأن كل رجال الاعلام فى كل العصور؟  
تعالوا نشوف..

ملحقناش نخلص من البلوك الاولانى علشان ينزل البلوك التانى علطول ومن غير سبب.. البوست الى اعترضوا عليه رجع واعتذروا عن مسحه.. بس البلوك فضل شغال.. اشوفكم بعد 30 يوم ان شاء الله.. هبقى موجود على MEWE ان شاء الله ويحاول ادعيس فى التليجرام اهو.  
بالنسبة لحكاية كافور.. فده الجزء التانى.. الجزء الأول نزل امبارح على الصفحة هنا قبل البلوك علطول.. هتلاقوا اللينك بتاعه فى اخر الكلام.

ونرجع بقى لحكاية كافور.. كنا بنقول ايه؟؟

اه.. قلنا ان المتنبى كان شاعر شديد محدش ينكر.. فصيح ومتمكن من اللغة والالفاظ والكلمات ملعبه ولو كان فى عصر الجاهلية كان بقى من شعراء المعلقات اكيد.. المتنبى كان بياكل عيش من شعر المديح ومسح الجوخ والتطويل لسيف الدولة الحمداني فى حلب.. لكن حصل ان سيف الدولة زهق منه ومبقاش ينبره بكلمات التطويل والتعريض بتاعته ورضى ان واحد من الشعراء المغمورين فى بلاطه اسمه ابن خلوية يكب على المتنبى دواية الحبر ويضربه بالسيف فى وشه قصاده وهو ساكت.. خدها المتنبى على كرامته وساب قصر سيف الدولة وهج على مصر بعد ما عرف ان فيها حاكم له فى الليلة بتاعة الشعر والادب دى.. فبدأ يمدح كافور.. المتنبى عمل الى هو بيعرف بعمله.. التعريض والتطويل والتملق.. عندك مثلا اول ما وصل المتنبى لمصر كان لسه ضاربها زلزال عمله الاخوان طبعاً.. المتنبى لقاها فرصه يواسى المصريين ويعرض للحاكم فى نفس الوقت فعمل عقد مع قناة صدى البلد وبدأ يقدم برنامج ياكل فيه دماغ الناس بالكذب قال مره فيه ..  
ما زلزلت مصر من كيد اريد بها \*\* ولكنها رقصت من عدلكم طرباً  
-رقصت من عدلكم طرباً؟  
-ايوه..

-يعنى ده مش زلزال نتج عن تحرك طبقات القشرة الأرضية؟؟

-تؤ تؤ.. دى رقصت من عدلكم طرباً

طيب هو المتنبى كان يعرف كافور؟

ابدا..

اتعامل معاه قبل كده؟؟ اشتغلوا سوا مثلاً؟؟ درسوا مع بعض فى الازهر؟؟ اتربوا فى حدايق القبة سوا؟؟

ابدا..

امال ليه المتنبى قال كده؟؟ التعريض علم له اصول.. اقله يعرف حاجه عن الى هيمسحله جوخ وميدخلش بصدرة كده.. المفروض ان المتنبى راجل محترف يعنى مش تلميذ.. هو مكانش بيلعب فى بلاط سيف الدولة يعنى..  
كافور وقتها فى مصر كانت سمعته كويسه جداً.. كان ماشى بالعدل بين الناس.. بيطعم الجعان ويكسى العريان ويقدم اهل العلم مش اهل الكلام.. كان بيصرف على حملات الحج وعمل اوقاف كثير يصرف منها على ترتيبات الحج واطعام الفقراء.. بنى مستشفى كبير اتعرف باسم مارستان كافور كان اكبر من مارستان ابن طولون وكان فيه ادوات طبية تسوى 3000 دينار.. عمر مساجد كثير من بينهم مسجد عمرو بن العاص.. كان بيصرف على اهل العلم ومن ضمنهم كمثل أبو بكر محمد بن أحمد بن سهل الرملي النابلسي الى قال "لو كان معي عشرة أسهم رميت الروم يسهم ورميت بني عبيد بتسعة" وقتله المعز لدين الله الفاطمي "الشييعي" لما سمع الكلام ده.. كافور عمل جنائين واسطبلات خيل وحفر للناس خلجان ميه علشان يسيطر على

الفيضان ويضمن تدفق المية لو النيل قل عقله.. كان بيخرج من بيته كل يوم 1700 رطل لحمه وفراخ بالاضافة الى 13000 وجبة للفقراء قايم على توظيفهم وتجهيزهم غلمانة وعبيده ال 4000.. كافور عمل اسبلة مية في كل مكان وكان عنده خزان ميه كبير في بيته بيطلع منه كل يوم 50 قربة يفرقهم لله.. كافور هو الى ابتدع فكرة موظفين الحكومة الميرى ودول غير عسكر الجيش وكانت مرتباتهم في ايامه 500 الف دينار في السنة.. يعنى بحسبه بسيطة كده مصر كان بيطلع منها قرب ال 3 مليون دينار كل سنة قبل اى مصاريف ما بين خراج ومرتبات ومصرف ابن الاخشيد.. يبقى حال الدولة كان عامل ازاي؟؟

كافور لم ينكر اصله ابدا ولا عاش الدور انه ابن ذوات لما مسك الحكم.. حصل وهو صغير ان اصابه جرب.. فطرده سيده بياح الزيت علشان قرف من شكله الى هو اساسا وحش.. صاع كافور في الاسواق يشحت اكله من الناس الى كانت بتنفّر منه مرتين.. مرة علشان شكله الوحش ومرة علشان الجرب.. مره من المرات مد ايده لطباخ في السوق ببشحت منه اكل.. الطباخ ضربه بمغرفة الاكل السخنة على ايده.. ويبدو انها كانت ضربة غشيمة لأن كافور وقع بعدها مغمى عليه وفضل مرعى على الارض لحد ما رق لحاله واحد غلبان زيه.. خده وعالجه لحد ما خف وفضل كافور شايله الجميله دى طول عمره وسأل عليه لما بقى حاكم وعرف ان الراجل مات وساب بنتين الكبيره فيهم على وش جواز.. قام كافور مجهزها من ماله الخاص ب 4000 دينار اتكتبوا في القايمه طبعا على العريس العبيط.. وفضلت حكاية مغرفة الطباخ في ذهن كافور.. كل ما يحس في نفسه بكبر يفتكر علطول المغرفة.. حازه كده زى موقف الشيخ الشعراوى لما مسح حمامات مسجد سيدنا الحسين وهو من هو علشان يجبر نفسه على التواضع.

لما مات كافور لقوا في خزنة 700 الف دينار.. ساب وراه بساتين ودواب وجواهر بما قيمته 600 الف دينار.. يعنى 600 مليون بالصلاة على النبى زى ما قال ابن خلكان في وفيات الاعيان واكد على كلامه موفق الدين بن عثمان في مرشد الزوار الى قبور الابرار واعاد الكلام تانى ابن الزيات الانصارى في كتاب الكواكب السيارة الصادر سنة 810 هجرى.

فكان طبيعى ان المتنبي لما ييجى يلاقى حاكم زى ده.. يروح نازل علطول برقصت من عدلكم طربا.. محدش اكيد هيكره حاكم زى ده قال عنه الفاطميين "الن نستطيع فتح مصر قبل زوال الحجر الأسود" في اشارة لياسهم من دخول مصر طول ما كافور موجود..

ومع ذلك فضلت قصيدة المتنبي في هجاء كافور "بتاعة عيد بأى حال عدت يا عيد" اشهر من سيرة كافور وخصوصا البيت النجس بتاع:

لا تشتري العبد الا والعصا معه \*\*\* ان العبيد لانجاس منكيد  
ايه الى عمله كافور يخلى واحد زى المتنبي يتنمر عليه ويذمه بأقصى ذم تقيل على نفس اى عبد وهو صفة العبودية نفسها؟؟  
طيب ايه الى عمله المتنبي نفسه يخلى الناس تفتكر كلامه عن كافور وينسوا افعال كافور نفسه الى كان بيكسيهم ويطعمهم ويحميهم؟؟

لما مات كافور اندفن في القرافة الشرقية في المقطم.. المتنبي استغل موته وكتب على قبة القبر..  
ما بال قبرك يا كافور منفردا \*\*\* بالصصح المرت بعد العسكر اللجب  
يدوس قبرك أفناء الرجال وقد \*\*\* كانت أسود الثرى تخشاك من كذب  
مش بس كده.. ده راح على ظهر القبة وكتب..

أنظر إلى غير الأيام ما صنعت \*\*\* أفنت أناسا بها كانوا وما فنيت  
دنياهم ضحكت أيام دولتهم \*\*\* حتى إذا فنيت ناحت لهم وبكت  
يا ستار يارب.. ايه الغل ده كله!!

كافور مكانش بخيل.. هو كان بيصرف على المتنبي في حدود معرفته ان المتنبي له طموحات اكثر من الفلوس.. ظهر كده لما المتنبي استعجله علشان يوليه اقطاع في مصر يحكمه.. ماهى اصلها كانت عزبة ابوهم بيفرقوها على بعض حسب مزاجهم..  
كافور رفض وقاله "إذا كنت في حال الفقر سمت نفسك إلى النبوة فمن يطيقك إذا أصبت ولاية وصار لك أتباع؟"  
وهنا فاض الكيل بالمتنبي وعرف ان كافور مكش من القرع بتاع رقصت من عدلكم طربا وراح نازل علطول بأن العبيد انجاس منكيد قبل ما يسب مصر كلها ويهج على عضد الدولة البويهى "الشيعة" علشان يرقص قصادة رقصة التعريض الاخيرة بشتمته في كافور واهل السنة.. عضد الدولة كان راجل زى كل الرجالة.. خد مزاجه من شعر المتنبي وبعدين رماه في الصحراء بعد ما سلط عليه قبيلة اعراب يقتلوه شر قتله وهو عمال يغرد:  
والخيل والبلل والبيداء تعرفنى \*\*\* والسيف والرمح والقرطاس والقلم.

خيل وليل وبيداء وسيف ورمح وفي الآخر مخدش في ايديهم غلوه.. يعنى حتى في دى كمان طلع اونطجى..  
طيب كافور كان له تعابين كثير في الشام والحجاز.. المتنبي مكانش بعيد عنه يعنى.. ليه مقتلوش جزاء طولة لسانه؟؟  
طيب لما هو كافور وحش وللازم نشتره والعصا معه.. ايه الى خلاك سبت سيدك الاولانى وجريت عليه؟؟

طيب تفسر بأيه ان كافور مات سنة 357 والفاطمييين دخلوا مصر سنة 358 هجري من غير ضربة سيف واحده.. الى هما يعنى لو كانوا واقفين على الباب مستنيين يمكن كانوا خدوا وقت اطول من كده.

تقلبها يمين.. تقلبها شمال.. مش هتلاقى غير ان المتبنى كان راجل افاق منافق متملق.. استغل موهبته الشعرية وان عنده متابعين على الفيس بوك علشان يشوه صورة الراجل الطيب كافور.

قلب فى التاريخ يمين وشمال كمان مش هتلاقى للمتبنى الا شوية كلام بينما عاشت مصر فى ايام كافور 20 سنة سعادة..

قلب فى التاريخ تانى.. هتلاقى الف مظلوم زى كافور وبهاء الدين الاسدى وهارون الرشيد.. ناس افاضل مشكلتهم انهم وقعوا مع طبالين ورقاصين الاعلام الى للأسف كلامهم بيوصل لعدد كبير من الناس علشان شكله حلو بينما فيه السم الزعاف.

قلب فى التاريخ وحتعرف ان العقل الجمعى جاهل غبى ظالم سهل تسيطر عليه لما تقوله ان شقة حسن مالك كان فيها وفيها وللا اى حد مش موافق على تصرفات البلطجية يبقى اخوان وعائز يهد الدولة..

قلب فى التاريخ وانت حتعرف ان المتبنى لو كان انصف كان قال..

لا تستمع للاعلاميين الا والعصا معك \*\*\* ان الاعلاميين لانجاس مناكيد

ولا تحزن لحادث ابن اديب فأنه \*\*\* حرض على قتل الابرياء فى رابعة يوم العيد

وافرح بطرد ابن بسيونى فقد رعى \*\*\* اسيادة الصعايدة بكلمات ينافق بها سيده

وليس هناك من يعتبر.

الجزء الأول اهو

## صفقة خاسرة

شعور غير عادى من التعاطف مع رغبة عارمة في بكاء حار هتجتاج نفسك وانت واقف في المكان ده.. ساكن القبر مش قريبك ولا بينك وبينه دم.. يمكن كمان دى تكون اول مره تسمع فيها اسمه.. بس غصب عنك.. هتعبط.. وغصب عنك هتسأل بدهشة كبيرة.. ليه كده يا جلاله السلطان!! حد يعمل فى ابنه كده!!

ابنك البكري.. ولى عهدك.. ايدك ورجلك الشمال واليمين بعد ما شعرك شاب والجسد انهكتته الحروب والمسئوليات والدولة كبرت والحدود وسعت وشملت العرب والعجم والأفلاق والجريج والاناضول.. بعد ما مسئوليات الحكم بقت تهد جبل وبقيت رجل بره ورجل جوا.. بعد ما ربيته وكبرته على انه وريثك.. تقوم بأيدك انت.. تقتله!!!

غصب عنك هتضرب اخماس فى اسداس وانت بتقرأ الفاتحة للأمير مصطفى فى المقابر المرادية فى بورصا "تركيا".. وهتسأل وتحط نفسك مكان ابوه..

لو انا عايش عمري بجهز لأبني.. أبنيه وابنيه واحوشله واعلمه.. عايش بجهزه ليوم معلوم شمسي فيه راح تغيب علشان شمسو هو تطلع تنور دولة الملك المترامية الأطراف.. هل هقدر فيوم اخنقه بأيدي؟؟ الولد غلط؟؟

طب ما يغلط.. ايه المشكلة.. ماهو الى هيتعك فيها.. انا خلاص ماشى وسايهاله.. صدقت اشاعات انه ناوى يخلعنى من الحكم؟؟ وفى حد برضه يصدق اشاعات على ابنه!!!

حتى لو طمع فى الحكم مكاني.. ما يطمع.. هيجرى ايه لو الواد استعجل شويه.. ما انا كده كده ساييله كل حاجه.. ده لو سلمنا ان كلام الأفاعى مروجى الشائعات صحيح وان الولد رتب علشان يتقلب على ابوه..

ما بالك بقى لو الولد مظلوم وكان بيرتب علشان يرفع راية ابوه فوق العصيانين؟؟

ما بالك لو ابنك جايبلك علبة مقفولة فيها هدية ليك.. وانت علشان تأمن نفسك ضربته بالنار قتلتة علشان خايف ان العلبة يكون فيها قنبلة..

كلمنى كده عن عذاب الضمير؟

تشيع الاناضول كان بعبع العثمانيين.. من قراءاتي فى التاريخ العثماني لحد دلوقتى أقدر أقول ان الدولة المهيبة خربت بسببين أساسيين..

-الصدر الأعظم

-الانكشاريه

أوقات بيكون الصدر الأعظم أعظم فعلا.. رجل ذو حكمه وخبره وشخصيه قوية توجه السلطان للصالح بدل ما تغرقه.. لكن المصيبة لو كان زى رستم باشا كده..

الإنكشارية كانت فرقة رعب صحيح.. مجرد ذكر اسمهم كان كفيل بالقضاء على معنويات العدو قبل الحرب.. خيولهم غاصت كتير فى دم الأعداء وحسموا معارك كتير كان ممكن تفضل شغاله ليوم الدين..

بس ايه الموقف بقى لو الإنكشارية انقلبوا عليك؟

سنة 1522م. إبراهيم باشا الفرنجي بقى الصدر الأعظم.. كان راجل بحق وحقيق وصديق العمر بالنسبة للسلطان القوي الى بيحكم 6 مليون كم مربع تحت رايه آل عثمان.. سليمان القانوني بدأ اول مراحل جنون العظمة بإعدام صاحبه ووزيره إبراهيم باشا سنة 1536م. سليمان باشا الخادم كان سياسى داهيه.. قدر يحافظ على رقبته سليمه وهو صدر أعظم بعد إبراهيم باشا فى وجود حرباء فى القصر بتحرجم علشان تسيطر على كل شىء وسلطان بيقول انه ظل الله فى الأرض.

حياة القصور زبالة اوى.. امراء بتخطط لبعض.. نسوان فاضية مفيش وراها غير اللت والعجن.. خصبان عماله تنقل الاخبار مقابل شوية فلوس.. اكل مسموم ونوم قلقان مضطرب.. كل حاكم بييجي برجالته.. يعنى مفيش اى استقرار لأى حد.. حاجه تقصف العمر بجذ.

تسألني بقي ازاي واحد كرواتي زى رستم باشا قدر يترقى من سايس خيول الى عسكري إنكشاري الى بكربك سنجق وبعدين



يسبب حياة العسكرية دى كلها ويتعين في القصر ويترقى فيه الى درجة جوز بنت السلطان "مهرماه" من مراته الأثيرة روكسلانا.. اقولك معرفش..

الجواز قسمة ونصيب.

الأكيد انه كان شديد الذكاء.. والأكيد كمان انه كان ذئب.. والأكيد انه اتفق مع حماته على توضيب فخ محترم لولي العهد الأمير مصطفى علشان يطيره من ولاية العهد ويحطوا مكانه اخوه سليم الثاني الى كان مقضيها هلس وعريده في الشمال فوق بعيد عن عيون ابوه وقصره الرخم ومستوليات الحكم.

بس ازاى هنطير الأمير مصطفى وهو سمعته زى البرلنت.. مقاتل محبوب من الجيش وقائد عسكري ناجح.. رجل علم ودين وبتاع ربنا.. متجوز ومستقيم ولا له في الشرب ولا المسخرة.. وفوق كل ده.. الناس واهل العلم والجيش بيحبوه؟ الى حكوا الحكاية قالولنا ان أشاعه قدره عن اتفاق الأمير مصطفى مع الصفويين ضد ابوه وصلت للقصر.. السلطان اتجنن لدرجة انه صدق كل الادلة المزيفة الى قدموها له.. صدق ان ال 30 ألف عسكري الى ابنه مصطفى مجهزهم لحرب الصفويين هياخداهم ويحاربهم بيه وهو عنده بدل الجيش 10 اقل جيش فيهم اكر من 30 ألف. السلطان صدق الكذب لدرجة انه امر العساكر بقتل ابنه بعد محاكمة هزليه.. العساكر ملهاش الا الطاعة.. خنقوا الأمير بخيط حرير.. الوسيلة المفضلة لقتل النبلاء في زمن العثمانيين.. مش بعيد كمان يكونوا خنقوه ونفذوا الحكم قصاد ابوه. بقى الايد الى ربت.. هي الأيد الى تخنق!!!

وعلشان ايه!!!

يا حفيظ يا رب..

بيحكى ابن اياس في النجوم الزاهرة ان السلطان المملوكي المؤيد شيخ بعد ما قتل ابنه "الصارمي إبراهيم" مقامتلوش قومه بعدها.. فضل يعانى من عذاب ضميره واشتد عليه المرض علشان يموت بعد ابنه الى هو قتله بأيده بشهور قليلة.. وكالعادة.. القتل كان حسن السمعة مستقيم الأخلاق مقاتل فذ وشجاع.. بينما صاحب الوشاية كان قذر ونمام وخباص.. وكالعادة خسرت البلد مشروع حاكم كويس علشان تدخل في دوامة تنتهى بحاكم طفس.

بقى فقدنا التمييز للدرجة دى؟؟

علشان الكرسي.. نقتل عيالنا!!

هنروح فين من صاحب الأمر لما يسأل ليه عملتوا كده وانا قلت انه حرام؟؟

فعلا.. صفقة خاسره .

## تعالى مقولكشى

بالصدفة مر عليا فيلم "سمعته" بدون تركيز.. فيلم اسمه "عندما يقع الإنسان في مستنقع أفكاره فينتهي به الأمر إلى المهزلة" .. واحد من أفلام المنتشر بقوة بيومي فؤاد مع ناس المفروض انها بتعمل كوميدى.. ما علينا من رأيي الشخصي في الكوميديا بتاعتهم.. دى اذواق.. انما لفت نظري تعامل الفيلم مع سفر واحد من ابطاله "احمد فتحي" علشان ينظم الى تنظيم الدولة.. الفيلم قدم الصورة السينمائية للإرهابي الى لازم يكون مسلم ملتحي جاهل ومش بيفكر الا في الستات.. اول ما وصل بطل القصة الى معسكر تنظيم الدولة الى اميره بالمناسبة كان سوابق في مصر.. قالوله هنجوزك 4 ستات.

ووقفت هنا شوية علشان ضرب في دماغي فلاش كده من فيلم الناصر صلاح الدين بتاع يوسف شاهين.. الفيلم الى نقدته تاريخيا فتح عيون ملايين على ان الى بنشوفه على الشاشة دى ما هو الا بزيميط لا علاقة له بالتاريخ ولا في بينه وبين الماضي بتاعنا اى صلة.. على اد ما الأفلام دى دمرت وعى أجيال سابقة.. على اد ما اصبح لها الفضل في إعطاء الفرصة لأهل التاريخ انهم يتكلموا ويرفعوا أصواتهم بالاعتراض على المهازل دى.. وبالتالي فتحت الباب لملايين – مع انتشار السوشيال ميديا – انهم يقرأوا ويكتبوا ويعرفوا الى مش عارف حقائق الأمور وما كان بالفعل بعيدا عن رؤية المخرج الى قلبت المسلم مسيحي والمجرم بطل والبطل خمورجي دموي وكل العك الى احنا عارفينه ده.. المشهد الى ضرب في دماغي من فيلم يوسف شاهين كان مشهد الكباريه الى كان قاعد فيه الملك فيليب أغسطس مع محمود المليجي وهما بيخططوا للحصول على اى مكاسب يبرروا بيها الضرائب الى فرضوها علشان الحملة الفاشلة بينما زكى طليمات قاعد يراقبهم من بعيد.. وفي محور المشهد راقصة عربية بتقدم على انغام الموسيقى كل أنواع الخدمات لأى حد يدفع الثمن.

طيب.. هو فعلا الكلام ده كان موجود عندنا؟؟

الكباريهات والممز وتعالى مقولكشى كان منتشر عندنا فعلا والصليبيين تعاملوا معاه وللا دى كانت اخلاقيات الصليبيين الى جابوها معاهم وهما جايين؟

جهد النكاح وفرق نسوان الترفيه دى.. هل هي فعلا اختراع داعشي؟؟

تعالوا نشوف..

نفتح مع بعض كتاب "الفتح القسي في الفتح القدسي" للمؤرخ ابو عبد الله محمد بن محمد بن حامد صفى الدين المعروف بالعماد الأصفهاني.. الراجل ده اتولد سنة 1125م. في أصفهان.. عينه الملك العادل نور الدين زنكي أستاذ ومشرف عام على المدرسة النورية الشافعية في دمشق وقعد في المنصب ده فترة طويلة لحد ما المدرسة نفسها اتسمت بالمدرسة العمادية على اسمه.. وبعد وفاة نور الدين زنكي عينه السلطان صلاح الدين مساعد للقاضي الفاضل في دار الانشاء.. القاضي الفاضل ده كان الرجل الثاني في دولة صلاح الدين.. دراعه اليمين ومستشاره الأمين ونائبه في الحكم او الغياب ورفيقه في الحل والترحال.. قال عنه صلاح الدين وهو بيعترف بفضله "لا تظنوا أني ملكت البلاد بسيوفاكم، بل بقلم الفاضل".. من هنا نفهم حقيقة منصب مؤرخنا العماد الاصفهاني وموقعه في الدولة علشان نقدر نميز ان كان كلامه حقيقي وللا نقل وللا هيد وتأليف.. بالإضافة الى انه ولد زى ما قلنا سنة 1125م. ومات سنة 1201م. يعنى وقت معركة حطين سنة 1187م وتحرير بيت المقدس كان العماد الاصفهاني يبلغ من العمر 62 سنة وبishtغل الدراع اليمين للرجل الثاني في الدولة واهم راس بعد السلطان.. والا هم من ده كله انه كان ملازم للسلطان صلاح الدين.. منين ما يروح.. يروح معاه.. يعنى كان عايش وواعى وشايف بعينه كل الى كتبه في المقطع الجاى ده..

بيقول العماد الاصفهاني في فصل "ذكر حال نساء الفرنج":

"وصلت في مركب ثلاثمائة امرأة إفرنجية مستحسنة، متحلية بشبابها وحسنها متزينة.. قد اجتمعن من الجزائر وانتدبن للجزائر.. واغترين لإسعاف الغرباء وتأهين لإسعاد الأشقياء وترافدن على الإرفاق والأفراد وتلهين على السفاح والسفاد.. من كل زانية نازية.. زاهية هازية.. عاطية متعاطية.. حاطية خاطية.. متغنية متغنية.. متبرزة متبرجة.. نارية ملتبهة.. متنقشة متخضبة.. نائمة شائقة.. فائقة رائقة.. رائقة فاتقة.. راقعة خارقة.. مارقة راقمة.. قاسرة سارقة.. فارجة فاجرة.. فائقة فاترة.. مشتة متشبهة.. ملهاة متلهية.. متفندة متفتية.. ناشية منتشية.. متشوقة متسوقة.. مقترحة محترقة.. متحبة متعشقة.. حمراء مرعاء نجلاء كحلاء عجزاء هيفاء غناء لفاء زرقاء ورقاء متخرقة خرقاء.. تسحب غفارتها وتسحر بنضارتنا نظارتنا.. تتثنى كأنها غصن وتتجلى كأنها حصن.. تميز كأنها قضيب وتزيف وعلى لبثها صليب.. وهي بائعة شكرها بشكرها باغية كسرهما في سكرها.

فوصلن وقد سبلن أنفسهن وقدمن للتبذل أصونهن وأنفسهن.. وذكرن أنهن قصدن بخروجهن تسبيل فزوجهن وأنهن لا يمتنعن من الغربان.. ورأين أنهن لا يتقربن بأفضل من هذا القربان وتفردن بما ضربنه من الخيم والقباب وانضمت إليهن أترابهن من الحسان الشواب.. وفتحن أبواب الملاذ وسبلن ما بين الأفخاذ وبحن بالإباحة ورحن إلى الراحة وأزحن علة السماحة ونفقن سوق الفسوق ولفقن رتوق الفتوق وتفجرن بينابيع الفجور وتحجرن بنزو الفحول منهن على الحجور.. وعرضن الإمتاع بالمتاع ودعون الوقاح إلى الوقاع.. وركبن الصدور على الأعجاز وسمحن بالسلعة لذوي الاعواز.. ودمن على تقريب خلاخلهن من الإفراط ورمن فرشهن على بساط النشاط وتهدفن للسهام وتحللن للحرام وتعرضن للطعان وتضرعن للأخذان.. ومددن الرواق وحللن حين عقدن النطاق.. وصرن مضارب للأوتاد واستدعين النصول منهن إلى الأغمد وسوين أراضيهن للغراس واستنهضن الحراب إلى التراس.. واستنفرن المحاريث إلى الحرث ومكن المناقير من البحث وأذن للرؤوس في دخول الدهاليز وجرين تحت راكبيهن على ضرب المهاميز.. وقرين الأشطان من الركايا وفوقن النبال في اعجاس الحنايا وقطعن التكم وطبعن السكك وضممن الأطيار في أوكار الأوراك وجمعن قرون كباش النطاح في الشباك.. ورفعن الحجر عن المصون وترفعن عن ستر المكنون ولفقن الساق بالساق، وشفين غليل العشاق.. وكثرن الضباب في الوجار وأطلعن الأشرار على الأسرار وطرقن إلى الأودية والسيول إلى الأودية والجداول إلى الغدران، والمناصل إلى الأجفان والسبائك إلى البواتق والزنانير إلى المناطق والاحطاب إلى التنانير وذوي الإجمام إلى المطامير والصبائر إلى الدنانير والأعناق إلى البطون والأقذاء إلى العيون.. وتشاجرن على الأشجار وتساقطن على الثمار وزعن أن هذه قرية ما فوقها قرية.. لاسيما فيمن اجتمعت عنده غربة وعزبة.. وسقين الخمر وطلبن بعين الوزر الأجر.. وتسامع أهل عسكرنا بهذه القضية وعجبوا كيف اعبدوا بترك النخوة والحمية"

امن بالله؟؟

انا تعبت من وصف العماد الاصفهاني للمزدي.. ايه ده يا جدع.. هو في كده؟

بس مش معقول هنصدق العماد الاصفهاني يعني ونكذب الأستاذ محمد الباز.. لا طبعاً.. الاخوان هما اللي اخترعوا جهاد النكاح ده في اعتصام رابعة..

اه.. امال ايه.. خليك ناصح كده واوعى حد يضحك عليك.

الكتاب في اول تعليق.

## الخائن يخونه الله

"أحقر الناس هم أولئك الذين ساعدوني على احتلال اوطانهم" ..

الجملة دى منسوبة بالخطأ لهتلر.. من ساعة من الفيس بوك طلع واحنا بقينا نقرأ كم مهول من مقولات منسوبة لناس عمرها ما قالتها ولا يعرفوا عنها حاجه.. ولا احنا كمان نعرف ان كانت مقولات اتقالت فعلا في يوم من الأيام وللا حد من عشاق اللايكات الفها علشان الأى كلام.. بس عموما.. خلينا نتفق مع روح الكلام بغض النظر عن قائله.. الناس دى احقر الناس فعلا..

في سنة 1517م مصر كانت في صحوة الموت.. كانت عاملة زى مريض سرطان وقلب وكبد وكلى وسكر اكتشفوا مؤخرا انه مصاب بالإيدز فرقد في السرير ينتظر النهاية.. وقبل الموت بساعة قدر يقوم يروح الحمام لوحده فيما بسميه الأطباء بصحوة الموت.. صحوة الموت في مصر كان اسمها طومان باي.. طومان باي كان محاط بالخونة من كل اتجاه.. صلاح عيسى تتبع سيرتهم في كتابه الرائع "رجال مرج دابق" اعتمادا على روايات المؤرخين المعاصرين للأحداث زى ابن اياس وابن زنبيل الرمال.

عارف حصل ايه لمجموعة الخونة دى؟

(\*) خاير بك.. اشهر الخونة واشدهم تأثيرا.. كان والي حلب.. بدأ خيانتة لمصر بشحن الناس ضد حكم المماليك والاتفاق مع مجموعات من المرتزقة علشان تطلع في الشوارع تهتف للسلطان العثماني.. ولما وصلت جيوش العثمانيين انسحب بعساكره من الميسرة وساب الطريق مفتوح لقلب جيش الغوري الى لما شاف كسرة جيشه قصاد سليم الأول بعد ما كان منتصر وقع ميت من فوق حصانه علشان يتشتت الجيش ويتحول الى شرادم متفرقة تحت قيادة طومان باي الى صمم على المقاومة من مصر.. خاير بك كمل مشوره في الخيانة من قلب القاهرة لحد ما طومان باي اتهمز وقبض العثمانيين عليه.. سليم كان مستخسره في القتل.. لكن خاير بك مسك ودانه زن وفضل يقوله "لن يطيعك الناس مالم يروا بأعينهم هلاك طومان باي" .. ولأن الزن على الودان امر من السحر.. امر سليم الأول بشنق طومان باي على باب زويلة يوم شم النسيم.. وباقي القصة المعروف.. الى ممكن ميكونش معروف من باقي القصة ان لقب خاين بك الى فضل لازق فيه لحد ما مات اطلقه عليه سيده الجديد وولى نعمته سليم الأول.. رغم ان خاير بك بنى جامع جميل جدا في باب الوزير يصلح بيه المصريين.. الا ان الناس رفضت تصلي في المسجد ده ورفضوا انهم يترحموا عليه بعد ما مات.. رغم انه كان بيوزع فلوس على الناس في مرضه الاخير.. الا انهم كانوا لما بيعدوا على المسجد بيتفوا عليه.. على صاحب المسجد طبعاً مش المسجد نفسه.. مات خاير بك بعد ما حقق كل الى نفسه فيه.. لكن فضلت سيرته في مصر انه خاين.. ويقال انه في أيام دفنه الأولى كانت الناس بتسمع صراخ مرعب خارج من قبره في ظلام الليل.. بس اعتقد انها هبده مش اكر.

(\*) حسن بن مرعي.. شيخ عربان البحيرة الى أمن طومان باي على حياته وحلف له على المصحف 7 مرات انه هيردله الجميل ومش هيخونه أبدا قبل ما يخونه فعلا ويسلمه الى العثمانيين علشان يشنقوه وهو يقبض مكافأته.. يشاء القدر ان خاير بك بقلب عليه بعد كده ويبقى دمه حلال لأى حد يقابله رغم انه خد مندبل الأمان من السلطان سليم.. اتبهدل حسن بن مرعي في سجون خاير بك لحد ما قدر يهرب بعد ما نسيوه شهور في السجن.. لما اتعرف انه رجع البحيرة بعثله كاشف الغريبة الأمير اينال السيفي دعوة للزيارة.. ولما راح حسن بن مرعي مع ابن اخوه "شكر" شريكة في خيانة طومان باي.. قبض عليهم اينال السيفي وطير رقابهم وبعثها للقاهرة علشان تتعلق على باب النصر وسط زغاريد الستات وشماتة الناس وهى بتهتف "الخائن يخونه الله" .. ومن سخرية القدر ان راس حسن بن مرعي تروح القاهرة على ظهر حصان طومان باي.

(\*) ناصر الدين محمد بن الحنش.. كان سنجق صيدا.. تمن خيانتة للغوري كانت ضم بيروت لصيدا تحت حكمه.. بس يشاء القدر انه بعد 3 شهور بس من توليه الحكم انقلب عليه سليم الأول وبعثله نائب دمشق – صديقه الانتميم- علشان يجيب راسة في كيس لما افكر انه ممكن يخرج بالولاية من تحت عباية سليم.

(\*) جان بردي الغزالي.. كان نائب حماة ورفيق خاير بك في مشوار الخيانة.. خاير بك كان عامل حسم للعثمانيين في مرج دابق بينما جان بردي الغزالي كان عامل الحسم في الريدانية.. مفيش دليل صريح على كده.. لكن المعاصرين اعتبروا ولايته على دمشق أيام سليم الأول انها مكافأة على دوره في اضعاف جيش طومان باي.. جان بردي مقعدش كثير في الحكم.. حاول ينقلب على سليمان الأول ويرجع حكم المماليك من تاني في الشام.. لكن سليمان كان اشد من ابوه الحقيقة.. بعد معارك عنيفة قرب دمشق مع الانكشارية خسر جان بردي فيها 10 الاف مملوك من جيشه.. هرب الغزالي مع خادمه الأمين "على باي" وهما متنكرين في زى الدراويش.. ولما طال الوقت بيهم في الصحراء من غير هدف.. استأذن على باي سيده انه يروح يجيب اكل ويرجع.. راح على باي ورجع بس من غير أكل.. رجع معاه عساكر عثمانيين طالبين راس

الغزالي الى لما شاف النهاية قربت عمل فيها متصوف عبيط وبقي يهفلط بأى كلام.. بس على باي مدالوش فرصة.. طير رقبتة بسيفه وراح بيها على اياس باشا قائد الانكشارية علشان يقبض تمن خيانتة لسيدة ويبقى امير سنجق.

(\*) الزيني بركات.. الرجل الغامض الى محدش يعرفه اصل ولا فصل والى كان من اهم أسباب خراب البلد أيام الغوري.. الراجل ده فضل محتفظ بمنصبه كمحتسب للقاهرة في أيام الغوري وایام طومان باي وبداية عصر العثمانيين في مصر علشان مفاتيح البلد كلها كانت في ايده.. حاول الزيني بركات بعد كده انه يستميل امراء المماليك الى فضلوا احياء بعد الريدانية لصالح سليم الأول.. وبينما كان الزيني بركات يحاول اقناع اينال السيفي كاشف الغريبة انه ينضم للمعسكر العثماني.. اذ فجأة اينال السيفي يطلق سيفه ويقول "اخرس يا ابن الكلب" ويطير رقبتة.

(\*) زكريا بن راضي.. حبيب العادي.. كبير البصاين الى حول حياة المصريين لجحيم.. دخل في صراع غير المنتهي مع الزيني بركات على حساب المصريين.. قتله واحد من مماليكه بخنجر في ظهره لما حاول يهرب من قصره وقت دخول العثمانيين.

(\*) إبراهيم السمرقندي.. كان واحد من ناس كثير ملهاش لزمه وأصبحت ذات شأن في زمن الغوري.. بسبب معرفته باللغة التركية قدر يتواصل مع سليم الأول ويعقد معاه اتفاق على تحييد او استمالة قبائل العربان في صفة علشان تبقي شوكة في ظهر جيش طومان باي.. في اثناء محاولاته لاستمالة قبائل العربان نجح واحد من الاعراب ان ينفرد بيه بعيد عن حراسه ويقطع رقبتة ويروح بيها للسلطان طومان باي والدم لسه بينقط منها على لحيته.. وكان تمن راسه 1000 دينار.

سبحان الله.. كل الى اشترك في الخيانة يا اما اتخان من اقرب معاونيه يا اما اتقتل على غفلة.. بدون الدخول في معضلة الحكم العثماني لمصر وكان فتح وللا احتلال وخلافة وللا استعمار.. الخيانة هي الخيانة.. لما تدى لحد وعد بالأمان وبعدها تخلف وعدك.. مش هيبقي اسمك الا خاين.

جت في بالي كل الحكايات دى وانا بتفرج على فيديو مسخره بيتكلم عن توفيق عكاشة وازاى تدهور بيه الحال لدرجة انه بيع عفش بيته لأنه "حرفيا" مش معاه فلوس يشتري سجائر.. اللهم لك الحمد.. لو كان حصل حاجه غير كده كانت الناس هتفتن في دينها وايمانها.. هي ده المكان الطبيعية للخونة والاكلين على كل الموائد.. مجرد مناديل يسمح بيها الطغاة مؤخراتهم وفي الاخر يرموها في المكان الى يستحقوه..

اقرب صندوق زبالة.

## المعزة المباركة

لو محببتش الأمير عبد الرحمن كتخدا علشان عمارة الجامع الأزهر والسبيل بتاع شارع المعز.. يبقى أكيد هتحيه علشان الحكاية دى.. حكي الجبرتي ان جماعة من المسلمين كانوا اسرى في بلاد الافرنج "فرنسا غالبا" سنة 1173 هـ الى هي سنة 1760 م. مقالش تفاصيل عنهم ولا كانوا محبوسين ليه.. انما حكي انهم في حبسهم كانوا بيسهروا الليل يدعوا ربنا ويتوسلوا علشان ربنا يخلصهم من الأسر.. وفي ليلة زادت توسلاتهم ونذروا ذبح معزة كانت معاهم لله عند مقام السيدة نفيسة لو ربنا فرجها عليهم.. ويبدو ان في اليوم ده صوتهم كان عالي شوية وأزعج حارس السجن.. قام الحارس دخل شاط فيهم وخذ منهم المعزة علشان يدبحها في بيته.. لكنه لما روح ونام شاف في منامه رؤيا مرعبة بخصوص المعزة.. فقام من النوم مفزوع واطلق الاسرى ورجعهم المعزة واداهم فلوس لزوم الطريق كمان.. رجع الأسرى على مصر ومعاهم المعزة وباتوا في حضن مقام السيدة نفيسة علشان يوفوا النذر.. لكنهم صحبوا الصبح على صوت المعزة واقفة فوق مأذنة الجامع بتنصح الناس.. قوم اصحاب المعزة عرفوا انها معزة مباركة وتراجعوا عن فكرة دبحها.. لقط منهم الخيط خادم المقام "كان اسمه عبد اللطيف".. راح واخذ المعزة على حجره ومصدرها للناس وبدأ يجود في الحكاوي عنها.. مره يقول انه سمع صوت السيدة نفيسة من القبر بتوصيه عليها.. ومره يقول انها بتجيب العرسان وبتحمل النسوان.. ورص بقى تحت الهري ده كل الخرافات اللي سمعنا عنها قبل اختراع الكاميرات والكهرباء ده.

الناس سمعت بقصة المعزة وبقت تيجي تزورها من كل مكان.. هنا ادرك عبد اللطيف انه وقع على كنز.. فبدأ يقول للناس انها مش بتاكل الا قلب اللوز والفسق وشمش بتشرب الامية الورد المكررة بالسكر.. الناس جابت الاكل للمعزة بالقناطير والستات بقت تهاديه بالمجوهرات والذهب وافخر انواع المطرقات والحرائر وعمنا عبد اللطيف كان هايص.. كله من خير المعزة المباركة.

وصل خبر المعزة للأمير عبد الرحمن كتخدا "صاحب السبيل الرائع في وسط شارع المعز حاليا".. وده كان راجل ملوش في الهبد.. قام الأمير دعا عبد اللطيف خادم المقام ومعزته لبيته علشان يشم ريحة البركة هو كمان.. ركب عبد اللطيف بغلته وخذ الطريق وسط الطبول والاعلام والرايات وناس بالهيل ماشيه حواليه تزفه هو والمعزة لحد بيت الأمير.. ولما وصل استأذنه الأمير عبد الرحمن كتخدا انه ياخذ المعزة لجناح الحريم علشان ربنا يهديهم وتحل عليهم البركة هما كان "او ربنا ياخدهم ببركة المعزة علشان النسوان حواراتها كترت".. دخلت المعزة البيت وبديل ما تدخل جناح الحريم دخلت على المطبخ.. وهناك انهالت عليها سكاكين الجزار الى كان الامير موصيه عليها وصاية خصوصي.. شوية وامتدت السفارة ونزلت اطباق الفتة قصاد عبد اللطيف خادم المقام الى تعامل مع الفتة بمنتهى القسوة والأمير جمبه يشجعه.. ماهو ضيفه بقي.. كان بياكله بايده ويلح عليه بالزيادة في الاكل وعبد اللطيف عمال يلغ ويستحسن الطبخ وكرم الضيافة.. بعد ما خلصوا الاكل وشربوا القهوة استأذن عبد اللطيف انه يمشي وطلب المعزة من الأمير.. فالأمير قاله المعزة في بطنك يا نصاب.. وامر بضربه علقه محترمة وتجريسه.. وانه زى ما جاله بزفه والمعزة على حجره.. يخرج من عنده مضبوط وجلد المعزة على راسه بدل العمة علشان يبقو عبرة لكل نصاب.

الجبرتي اتولد سنة 1753 م. يعني وقت الحادثة دى كان طفل عنده 7 سنين.. مكانش لسه بدأ مشواره في التدوين.. لما كبر شاف ابيات شعر بتتكلم عن الواقعة دى وافترق القصة فقرر يسجلها.. الجبرتي لم يؤكد او ينفي بركات المعزة.. هو بس نقل الحكاية زى ما سمعها بالضبط..

بنبت رسول الله طيبة الثنا \*\*\* نفيسة لذ تطفر بما شئت من عز

ورم من جداها كل خير فأنها \*\*\* لطلابها يا صاح انفع من كنز

ومن أعجب الأشياء تيس أراد ان \*\*\* يضل الوري في حبيها منه بالعز

فعاجلها من نور الله قلبه \*\*\* بذبح واضحي التيس من أجلها مخزي

واخذ بالك التيس هنا الى هو مين؟؟

عبد اللطيف خادم المقام طبعاً..

طيب هو الجبرتي حكي الحكاية دى ليه؟؟ هل كان قصده يعدد مناقب الأمير عبد الرحمن كتخدا وتغليبه العقل على الهيد وللا كان قصده مجرد نقل واقعة مشهورة اتكلمت عنها الناس؟

مش عارف.. لكن علشان بحب الجبرتي وكتابات هاهنا القصيدة دى على المحمل العلمي واقولك ان عمنا الجبرتي من 250 سنة كان بيحذر الناس من انها تمشي ورا الهبد والأى كلام.. مكانش يعرف ان في ناس هتيجي بعد كده تقف قصاد قبر واحد ميت وتقول مدد يا سيدى فلان.. متخليش جوزي يتجوز عليها..

كان المش عارف ايه نفع نفسه.

طيب هو الكلام عن عبد الرحمن كتخدا خلص لحد كده؟؟

ابدأ.. ده احنا يا دوب بنقول بسم الله الرحمن الرحيم.

يتبع..

#زيارة\_الجامع\_الأزهر

## بتروف

وانا قاعد بكيس الفيشار مستني حد من الاتنين يسترجل وينزل على الثاني بهجمة غباوة من بتوع عاشور الناجي فيروح الثاني رادد عليه بهجمة أكثر قوة وغباوة من بتوع حميدو الفارس.. قوم الاتنين يخلصوا على بعض ونخلص منهم سوا.. اذ فجأة جت على بالي الحكاية دى..

حكاية الرجل الذى انقذ كوكب الأرض..

الحكاية دى جد مش هبده من هبدات نبيل فاروق ولا حدوة اونطا من حواديت هوليوود.. الرجل الى هنجكي عنه ده فعليا انقذ الكوكب كله من الفناء التام.. الله يسامحه بقى.

احفظوا معايا الاسم ده كويس علشان نادرا لما هنقرأ عن راجل زيه.. ستانيسلاف بيتروف "Stanislav Petrov".. مقدم سابق في قوات الدفاع الجوي السوفيتية.. ومش اى مقدم.. ده كان الضابط المسئول عن أهم محطات الإنذار المبكر في الاتحاد السوفيتي.. محطة أوكا.

أيه الحكاية بقى؟؟

هنرجع مع بعض ليوم 1 سبتمبر 1983.. السنة دى كانت تانى اسخن سنة في تاريخ الحرب الباردة بين الروس والامريكان بعد سنة 1962 بتاعة ازمة صواريخ كوبا.. في اليوم ده طلعت طائرة بوينج مدنية تبع الخطوط الجوية الكورية الجنوبية من مطار كينيدي في نيويورك في طريقها الى مطار سيول في كوريا.. نزلت الطائرة ترانزيت في الاسكا علشان تزود بنزين وبعدها طلعت كملت الرحلة على سيول.. بعد 35 دقيقة من إقلاعها من مطار انكوريج في الاسكا وبسبب خطأ في أجهزة الملاحة انحرفت الطائرة عن مسارها المفترض ودخلت المجال الجوي السوفيتي فوق جزيرة كامشاتكا.. ولجل حظها الذكر دى مكنتش اول مرة طيارات امريكاني تدخل تلعب في المجال الجوي السوفيتي وبعدها تقول يا فكيك.. في الوقت ده ريجان مكانش عنده حاجه يعملها في حياته الا انه يصحى يشتم الشيوعية وينام يشتم الشيوعيين.. العلاقات بين موسكو وواشنطن كانت متوترة جدا في أيامه لأن في اخبار اتسربت للسوفييت ان كل الى بيعمله ريجان ده ما هو الا ارهاصات ما قبل الضربة النووية.. في الأجواء المسمومة دى خرج للدنيا فيلم روكي الجزء الرابع.. بتاع ايفان دراجو لى ذاكرته كويسه.

طيب.. عملوا ايه السوفييت مع الطائرة دى لما شافوها على الرادار؟

بعثوا وراها 3 مقالات.. 2 ميج-23 وواحدة سوخوى-15.. حاولت المقاتلات الثلاثة تعمل اتصال مرئي مع كابتن الطائرة.. لكن بسبب الظروف الجوية فشل الاتصال.. قام طيار السوخوي ضرب عليهم 200 طلقة تحذيرية زى الأوامر ما بتقول.. كابتن الطائرة البوينج خاف من الطلق وراح طالع بطيارته لفوق شوية علشان يتفادى الضرب.. قوم طيارين الميج فهموا انه كده يبرواغ وراح واحد منهم مصلي على كارس ماركس وراح مديله صاروخين جو-جو-عنب من طراز K8 شلوحوا الطائرة في غمضة عين.. تحت في القاعدة كان الجنرال اناتولى كورنوف قائد قاعدة سوكل الجوية قاعد يراقب شغل رجالته وهو بيغني اوبريت اول ضربة جوية فتحت باب النووية للموسيقار عماروف شريغوفيسكى.. الأوامر كانت واضحة.. الطائرة دى لازم تقع حتى لو كانت مدنية.. مش لعبة هي.

مات في الحادثة دى 269 راكب كان من ضمنهم نائب الكونجرس الامريكاني لورانس ماكدونالد.. علشان يتصاعد التوتر بين الامريكان والسوفييت لأعلى مستوى من وقت ازمة خليج الخنازير خصوصا ان السوفييت انكروا الحادثة في الأول وبعدها دفنوا كل المعلومات الخاصة بالموضوع ده وتعمدوا تعطيل عمليات البحث والإنقاذ والتقصي بتاعة الهيئة الدولية للطيران المدني وبعدين قالوا دى كانت طائرة تجسس مش طائرة ركاب وباقي الشغل بقى بتاع اعلام السيسى دى.. هسيب الموضوع لخيالك علشان تتصور ريجان زاط في الموضوع ده ازاي وكم التصريحات العدائية بين الطرفين.. وقتها يوري اندروبوف كان سكرتير عام الحزب الشيوعي.. ده ملحش بقعد كتير لأنه كان مصاب بالفشل الكلوي.. الاتحاد كان ماشى وقتها بسياسة رئيسة السابق بريجينيف.. وده زيه زى ستالين كده.. شيوعي بقوه.

بعد 3 أسابيع من الحادثة الكوبيا دى.. وبالتحديد يوم 26 سبتمبر صاحبنا ستانيسلاف بيتروف كان عنده شفت شغل مسائي في مركز قيادة قاعدة أوكا بتاعة الإنذار المبكر.. وبينما كان يجرع الفودكا وينفث دخان سيجارته الروسية ذات الرائحة النفاذة.. اذا فجأة يظهر على شاشة الرادار قصاده ان في صاروخ انضرب من أمريكا وجاى في طريقة الى روسيا.. الرجل فرك عينيه وبص في الرادار كويس لأحسن يكون ده تأثير منقوع البراطيش الى ببشره.. لكن الرادار قاله ان في كمان صاروخ طلع وراه اهو.. وبعد دقيقتين بقوا 3.. وبعد 5 دقائق بالظبط قدروا يعدوا 5 صواريخ أمريكاني بتتحرك على الرادار في اتجاه روسيا.

يا سنة سوخه يا ولاد!!



خد عندك بقي الحلويات دى.. مركز أوكا بتاع الإنذار المبكر عنده الإمكانية انه يضرب نووي.. عنده زرار احمر زى اللى عند ريجان وزى اللى على مكتب اندرويوف.. زرار متصل بقواعد اطلاق الصواريخ النووية في الاتحاد وواصل مع الغواصات السوفيتية اللى سارحه تصطاد سمك في المحيط حوالين أمريكا.. واكثر من كده كمان.. الأوامر واضحة جدا.. اول ما تشك.. دوس علطول من غير ما ترجع للقيادة ولا حاجه.

الظباط في مركز أوكا كان عسكريين محترفين.. الجو اتكهرب وبدأ كل واحد فيهم ياخذ موقعه حسب البروتوكول المتفق عليه في الحرب النووية.. الوحيد اللى كان متأني شوية وطلب فحص بيانات الرادار بدقة كان بتروف.. البيانات مش واضحة والقرار مش سهل.. الفترة بين الإنذار والقرار كانوا 15 ثانية قال عنهم بتروف بعد كده "لخمسة عشرة ثانية كنا في حالة صدمة.. لقد كنا بحاجة أن نفهم ماذا بعد".

انت متصور الموقف؟

بتروف كان الظابط الوحيد في المركز اللى اتعلم تعليم مدني قبل ما يدخل الجيش.. الباقي كلهم عسكريين محترفين.. البروتوكول بيقول انه لازم يبلغ القيادة فوراً مع اول انذار.. بس هو عارف القيادة هتقول ايه وعارف تبعات القرار اللى هيتاخد.. دى حرب مفهش هزار.. في الجو المتوتر ده زرار هينضغط من هنا وزرار هينضغط من هناك وبعد دقائق نروح كلنا باى.. تبقى دى النهاية المناسبة للكوكب المجانين ده.

بتروف كان عارف ان نظام الإنذار ده لسه متركب جديد وفي مشاكل.. كمان في نقطة منطقية لفتت نظره واثرت على قراره..

هو الامريكان لو هيهاجموا روسيا.. هيهاجموها ب 5 صواريخ بس؟؟ معقول؟؟

كده كأنهم تسللوا من ورا واحد فتوة قاعد مش واخذ باله وبذل ما يطعنوه في قلبه بالخنجر ويقتلوه.. قاموا لاسعيه بالالم على قفاه.

المنطقي ان الهجوم الأمريكي يكون كاسح بمئات الصواريخ علشان هي فرصة واحدة مفيش غيرها.. المنطق يقول ان ال 5 صواريخ دول مش هيدمروا روسيا الى بعدهم هتضرب أمريكا بشلوح من الصواريخ النووية.. الرجل واقف قصاص خيارين ولاد تيت.. يا اما يضرب ويتحمل مسئولية فناء الكوكب لو كان الإنذار كاذب.. يا اما يصبر ويتحمل مسئولية موت ملايين الروس لو الإنذار حقيقي.. قلب بتروف مكانش مستريح للإنذار ده وفي 15 ثانية بالظبط خد القرار الرهيب..

احنا مش هنضرب وهنستنى شوية..

23 دقيقة عدوا بعد الإنذار ومفيش حاجه حصلت.. بتروف كان عنده حق.. كشفت التحقيقات بعد كده أن القمر الصناعي الروسي رصد ضوء الشمس المنعكس على بعض السحب على أنه محركات صواريخ باليستية عابرة للقارات.. خطأ تكنولوجي يعنى في القمر الصناعي كان هيدفع تمنه الكوكب كله.. مفيش أسوأ من أخطاء العسكريين الا أخطاء المهندسين على فكرة.

بس يا سيدى.. ونجا العالم من الفناء بسبب هذا الظابط السوفيتي الحكيم.

طيب السوفييت عملوا ايه مع بتروف؟

نفخوه هو واللى جابهوه.. اول الكلام سرحوه من الخدمة.. بعدها اتحاكم بتهمة الخيانة العظمي واتجرد من رتبته وكل نياشينه واتحرم من مكافئة نهاية الخدمة ومن معاش واتحكم عليه بالصمت التام وتحديد اقامته في بلد صغيرة جمب موسكو.. حطوا في بقه فردة شبشب علشان يسكت للابد لأنهم كانوا شايفين انه عار على الجيش والتكنولوجيا السوفيتية انها تقع في الغلطتين دول.. الخطأ التكنولوجي بتاع القمر الصناعي.. وخطأ بتروف في تجاوز القيادة.

في التحقيق قال بتروف "كانت لدي كل البيانات التي ترجح أن هجوما صاروخيا ينفذ الآن.. وإذا أرسلت هذه التقارير إلى مجموعة القادة فلم يكن لأحد منهم أن يناقش الأمر.. كل ما كنت سأفعله هو التقاط سماعة الهاتف والتحدث إلى القيادات العليا على الخط المباشر.. لكني لم أتحرك وأحسست كما لو كنت أجلس في إناء للقلي"

بتروف قبل الحادث ده كان ظابط غير عادى معاه وسام خدمة الوطن من الدرجة الثالثة و ميدالية اليوبيل "5 مرات" وسام مخضرم قوات الاتحاد السوفيتي المسلحة وميدالية الخدمة عديمة الشوائب من الرتبة الثانية.. كل ده اتسحب منه في ثانية واتحول الى متهم بالخيانة العظمي.. رغم اعتراف الاتحاد والكوكب بعد كده انه انقذ الكوكب من الدمار وقدم للإنسانية خدمة عظيمة.. لكن "عسكريا" الرجل ده عمل كارته..

يهذكوا يا بعدا.. كنتوا عايزينه يعمل ايه يعنى!!

شفت الدماغ الميري يا صاحبي؟

دماغ بقر بعيد عنك.. الأوامر تنتفذ حتى لو كانت ايه.. مخالفة أوامر القيادة عندهم اقوى واشد من مخالفة أوامر ربنا نفسه.. علشان كده لما تلاقى الناس بتصرخ من حكم العسكر متبقاش تستغرب.. الوحيد اللى كان متعلم في كلية مدنية في مركز انذار البطيخ ده كان بتروف.. تخيل انت لو كان بتروف خد إجازة يومها لأى سبب وللا كان واحد من العسكريين اللى في المركز هو اللى مسئول عن القرار وقتها.. كان ايه اللى حصل؟

طبعاً مش محتاج اقولك الأمريكان والأمم المتحدة عملوا ايه مع بتروف.. شغل كيد النسوان بتاع ريجان ده كان هيودينا في الكازوزة اقسام بالله.. هما الروس والشيوعية زفت صحيح.. بس الامريكان العن مهم الف مرة.. واحنا اللى واقفين في النص ندفع تمن هزار البوابين ده.

بتروف مات في مايو 2017.. لك ان تتخيل انه مات من غير ما حد يعرف.. يوم 19 مايو اتصل بيه صديقه الكاتب السياسي الألماني كارل شوماخر علشان عيد ميلاده.. فرد عليه ابنه ديمتري وقاله بابا تعيش انت.. وانتشر الخبر من شوماخر الى وسائل الاعلام علشان يعرف الكوكب "بالصدفة" ان الرجل اللى انقذه مات.. الرفيق بوتين مكلفش خاطره يطلع بيان نعي وللا يعمل عزاء محترم ولا حتى يقرأ الفاتحة للراجل اللى مات ده.. في عرف روسيا لحد النهارده ان بتروف خائن.

مبتين ام العساكر والله..

في فيلم وثائقي "مترجم" انتجته الدنمارك سنة 2012 عن الحكاية دى اشترك فيه بتروف نفسه ومعاه كيفن كوستنر علشان الكلبوبات برضه يبقالهم نصيب في المحن.. الفيلم اسمه "The man who saved the world".. مش قادر احط اللينك بتاعه علشان مارك قافش.. هسيبلوكوا في التعليقات شوية مقالات عن بتروف وحادث الطائرة الكورية.. لى يحب يزود.

مقال عن وفاة بتروف في ال BBC - 2017

<https://www.bbc.com/news/world-europe-41314948>

مقال عن وفاة بتروف في نيويورك تايمز - 2017

<https://www.nytimes.com/2017/09/18/world/europe/stanislav-petrov-nuclear-war-dead.html>

مقال عن بتروف – فاينانشيال تايمز - 2015

<https://www.ft.com/content/00bec262-f89c-11e4-be00-00144feab7de>

حادث الطائرة الكورية من موقع history.com

<https://www.history.com/this-day-in-history/korean-airlines-flight-shot-down-by-soviet-union>

حادث الطائرة الكورية من موقع Britannica.com

<https://www.britannica.com/event/Korean-Air-Lines-flight-007>

<https://aml.egybest.biz/movie/the-man-who-saved-the-world-2014>

## دنشواي بشرطة

مفيش حد ميعرفش الى حصل في دنشواي..

عساكر انجليز وقفت ترتاح في السكة بين القاهرة واسكندرية.. حبوا يتسلوا فخرجوا يصطادوا حمام باستهتار.. الحمام ده مش سبيل ولا هو سارج لوحده كده في ملكوت الله.. ده حمام بيربيه الفلاحين.. يعنى مملوك لناس مش سمك في بحر.. يعنى لما تصطاد حمامة منهم يبقى كأنك سرقت صاحبها بالظبط.

امام المسجد حاول يحذر العساكر من خطورة ضرب النار وسط اكوام الغلة والتبن في موسم الحصاد لأن الحمام بينزل على الأرض وسط الناس علشان يلقط حبوب.. يعنى ممكن حد يتصاب بالغلط.. وده الى حصل فعلا.. رصاصة طاشت من عسكري منهم وجت في الست ام صابر زوجة مؤذن القرية.. وقعت الست ميتة والنار مسكت في كوم تبن ومنه الى اكوام تانية.. المؤذن المسكين شاف بعينه مراته بتموت واقتصاد القرية الى بيعيشوا عليه طول السنة بيولع برصاص الانجليز فطلع يجرى وهو بيصرخ "الخواجة قتل المره وحرقت الجرن".. اتجمع الأهالي على صوته وطلعوا يجروا ورا العساكر.

وصل الخبر الى عمدة القرية فبعث غفر من عنده علشان يحموا العساكر من بطش الناس.. واخذ بالك انت.. يحموا العساكر.. بس علشان العساكر متعرفش عربي لما الغفر قربوا منهم افتكروهم ناوين شر.. راحوا ضاربينهم بالنار وقتلوا واحد منهم.. الأهالي هاجت زياده وقاموا على العساكر بالعصيان.. ومع ذلك ضرب الغفر نار على الأهالي علشان يفرقوهم ويحموا العساكر منهم.. عسكري منهم جرى 8 كيلو في حر الصيف فخد ضربة شمس ومات.. بينما عسكري تاني جري لحد الكتيبة بتاعته علشان يستنجد بزمايله.. طلع العساكر ينجدوه فلقوا جثة العسكري الى مات من ضربة الشمس مرمية على الأرض وحواليها الأهالي.. الأهالي كانت بتحاول تسقيه ميه علشان تنقذ حياته رغم الى عمله فيهم.. العساكر شافوا من بعيد شافوا شاب منحى على جثة العسكري.. راحوا ضاربين نار.. الفلاحين خافوا وجربوا.. الانجليز جربوا وراهم لحد ما جابوا واحد منهم كان مستخفى في طاحونة وقتلوه شر قتله.. وهو الى كان عايز يسقى العسكري الى كان بيموت من ضربة الشمس.

الباقى معروف ومش هنحكي فيه.. بس انا كلى ثقة ان 99% من المصريين معلوماته عن الحادث ده هو كل ما درسه في خامسة ابتدائي.. بقول كده بكل ثقة لأن لو حد قرأ تفاصيل الحادث زى ما وردت في كتاب الإسلام في التاريخ بتاع "برنارد لويس" او كتاب "الممر المضطرب: تاريخ عام للقرن العشرين" بتاع مايكل اداس وبيتر ستيرنز الأساتذة في علم التاريخ في جامعات إنجلترا وامريكا او لو استعنا بشهادات الكتاب الانجليز المعاصرين للحادث زى برنارد شو مثلا.. كنا بمنتهى السهولة رفعنا قضايا على إنجلترا يكسبها اى طالب في كلية الحقوق وكنا صرفنا على حس الحادث ده لوحده كم تعويضات يخرجننا من ازماتنا الاقتصادية كلها بمنتهى السهولة.. الى عملوه فينا الانجليز حسب الى هما كتبوه في تأريخهم وطرمخ عليه المؤرخين بتوعنا.. يعجز العقل عن تصويره والله.

سيبك شوية من الخط الأساسي للحادث ده وبص معايا كده في تفصيلة صغيرة..

عمدة القرية امر الغفر يحموا عساكر الانجليز مش المصريين.. الغفر والعمدة دول يقبوا ممثلين السلطة الرسمية في البلد.. السلطة الرسمية الى عايشه تاكل وتشرب من عرق الفلاحين الى هما خرجوا علشان يحموا الى قتلهم في بلدهم وعلى ارضهم بدون اى ذنب ولا اى تصرف عملوه.. ناس ماشيه في الشارع وبتعزق في الغيط.. فجأة يلاقوا الرصاص انفتح عليهم بالشكل ده.

ومع ذلك السلطة الرسمية الى مكتوب في الدستور انها في خدمة الشعب.. حمت الى قتل الشعب.

وكأن الجبرتي كان بيتنبأ بدنشواي لما حكي الموقف ده في احداث يناير سنة 1819م.

وقتها الباشا كان في اسكندرية بيتابع اعمال حفر ترعة المحمودية الى قربت تخلص.. الترعة المظلومة تاريخيا في احداثها وضحاياها الى فاق عددهم عدد ضحايا قناة السويس.. في نفس الوقت خرج من اسكندرية واحد من الاكابر الانجليز في طريقه الى طنطا علشان يتابع تجارته الى مكانش يعرف يعمل 1 على الف منها في بلده.. في الطريق وقف السيد الإنجليزي في قرية تبع كفر الزيات اسمها كفر حشاد.. عجبته منظر الغيطان الخضراء والحمام الى طائر فوقها في سلام فقدته البلد من ساعة ما شافت وشوشهم الحمراء الكثيرة.. سحب الخواجة بندقيته وجرب يصطاد حمامة.. الرصاص طاش وأصاب بعض الفلاحين.. شافه واحد أرناؤوطي من جماعة محمد على فراح ناحيته وكان معاه نبوت.. الأرناؤوطي قال للخواجة "انت مش خايف حد من الفلاحين يضريك على دماغك كده" وراح مشاور على راس الخواجة بالنبوت الى في ايده.. فالخواجة افكره هيضريه.. راح ببساطة مطلع البندقية ونشه عيارين جاب اجله.

الفلاحين خرجت مذعورة على صوت الرصاص وقبضوا على السيد الإنجليزي.. دفنوا الأرنأؤوطي وبعدها سيجوا الخواجة على القاهرة علشان الكتخدا "محمد لآظ اوغلي باشا" يقرر في امره.. وعند مجلس الكتخدا اجتمع الأرنأؤوط وعملوا دوشه.. عاوزين يقتلوا الخواجة زى ما قتل صاحبهم.. راس براس.. هو ده العدل..

الكتخدا لآظ اوغلي باشا.. العقل المدبر والمشرع العام على تنفيذ مذبة المماليك وصاحب فكرة الشرطة السرية "امن الدولة حاليا" بجلالة قدرة ووحشيته قالك لا.. مينفعش نقتله كده.. لازم نتأني شويه.. احنا نبعت نجيب القنصل بتاعه وهو يتصرف معاه بالقانون..

يا سلام!!!

هو ممسوك بحشيش!!!

ده قاتل.. ممسوك بسلاح الجريمة.. وانت عايز تجيب القنصل الأجنبي بتاعه علشان يحكم عليه بالقانون بتاعه.. في ارض انت بتحكمها!!

ده اسمه ايه ده!!

الأرنأؤوط معجبهمش كلام لآظ باشا.. اتجمعوا كلهم على قلب رجل واحد وقالوله "لو لم تأمر بقتله في الحال نزلنا الى حارة الافرنج ونهبتها وقتلنا كل من بها".

الأرنأؤوط خلوا ظهر الكتخدا للحيط.. مبقاش قصاده الا انه بسيلهم الخواجة يعملوا فيه ما بدالهم.. الأرنأؤوط "المنفذين الأساسيين لمذبة المماليك" خدوا الخواجة على ميدان الرميطة.. اكبر ميادين القاهرة.. وهناك قطعوا راسه قصاد الناس.. وكأنهم بيقولوا لكل بمنتهى الوضوح ان اللى له ظهر مينضربش على بطنه.

في الحادثتين القاتل والسبب واحد.. انجليزي بيصطاد حمام.. بس شتان الفرق بين القتل الأرنأؤوطي والقتل المصري.

هي الست ام ريچيني قالت ايه؟؟

"قتلوه.. كما لو كان مصرياً"

الدم المصري طول عمره رخيص يا صاحبي..

ولا يزال.

## دنيا ملهاش امان

الى انت شايغه في الصورة ده اكبر دليل على صحة كلام الأسد سكار وهو ماسك الفار في الجزء الأول من الأسد الملك لما قال بحسرة "دنيا ملهاش امان"

صحيح.. ملهاش امان خالص.. زى ما طلعتك بسرعة.. سهل اوى انها في 5 شهور بس تنزل بيك على جدور رقبتك علشان تبقي بين ليلة وضحاها اثر بعد عين.. مجرد اسم الناس تفتكره وهي تمصص شفايفها وتبتستعجب من حال الدنيا.. ويا ريت حتى بيفضل اسمك زى ما هو.. الدنيا زى ما تكون بتننقم منك.. محدش فاكرا الأمير قوصون خالص.. انما يعرفوا الأمير قيسون.

الحكاية بدأت لما الناصر محمد بن قلاوون سمع عن قان كبير من قانات المغول في بخاري اسمه ازبك بن طقطاي.. ده يا سيدى يبقى حفيد حفيد حفيد جنكيز خان.. ازبك كان راجل قوى شجاع مليح الصورة.. حكم بلاده بالعدل 30 سنة كان يميل فيهم للفقراء ونصرة المحتاج.. ازبك لما حكم تحول الى الإسلام وزهد في الدنيا وحسنت سيرته حتى ان اغلب رعيته اسلم على حسه.

راجل زى ده شاف الناصر محمد انه نسب مثالي.. مش محتاجين نتكلم طبعاً عن شجاعة المغول وقوتهم.. الناصر محمد خطب بنته "خوند".. الى وصلت اسكندرية في موكب محترم واتعملها في القلعة حفلة استقبال استمرت 3 أيام بلباليهم.. اتجوزها الناصر محمد وبعد فترة اتغير خاطره عليها لما شك في نسبها.. فراح مطلقها وجوزها للسليدار بتاعه.. الأمير سيف الدين منكلى بُغا.

خوند بنت أزيك وهي جايه مصر كان معاها حاشيه.. من ضمنهم كان شاب طويل مليح الصورة عمره 18 سنة اسمه قوصون.. قوصون مكانش مملوك يباع ويشترى.. والدليل على كده انه جه مصر معاها بضاعته الخاصة ورأس ماله بغرض التجارة.. بيحكي المقريري في السلوك ان قيمة ما يحمله قوصون كان 500 درهم.

نزل قوصون يبيع بضاعته في الأسواق.. ومن الأسواق الى داخل القلعة.. ومن داخل القلعة الى الاسطبل السلطاني.. وهناك شافه السلطان الناصر واعجب بيه فاشترى كل الى معاها واشتراه هو شخصيا علشان يبقى من جملة مماليكه ب 8000 درهم قبضهم عنه اخوه صوصون.

قوصون كان في حاجه غريبة.. كل الى شافه حبه واستجده.. من اول التجار في السوق مروراً بالاشواقية والعمال في القلعة لحد السلطان نفسه.. الناصر محمد مكانش له في الخشن والاكان الواحد ظن الظنون.. في حاجه مش طبيعية في المملوك ده علشان الناصر محمد يستأمنه على السقاية بتاعته هو شخصيا ويحطه في عهدة الأمير بكتمر الساقى يساعده ويتعلم منه ويستعد لورثه.. وحصل فعلاً ان بكتمر لما مات امر الناصر محمد بواحدة من الخزن بتاعته هدية لقوصون.. وكان فيها 600 الف دينار.

قوصون بيبترقي بسرعة اوى في دولة الناصر محمد.. من مجرد مساعد للأمير بكتمر الساقى الى امير عشرة وبعدين امير طبلخانة وبعدين امير مية مقدم الف وبعدين اتابك السلطان نفسه.. من كتر اعجاب السلطان بقوصون سمحله انه يجيب اهله كلهم من بلده.. شاف السلطان واحده من اخوات قوصون وعجبته فقرّر يتجوزها.. وقرر كمان انه يجوز واحدة من بناته للأمير قوصون وعملهم فرح كبير اوى في القلعة كانت الامراء بتيجي فيه بالأمر "او بالتعريض" علشان تنقط الأمير قوصون وتعمل الواجب.. التقادم او نقطة الأمير قوصون في يوم فرحه بس كانت 50 الف دينار ذهب يا مؤمن..

مين اد قوصون في البلد دلوقتى؟

جوز بنت السلطان ونسيبه في نفس الوقت.. وصل لأعلى المناصب الحكومية.. ولو على الفلوس.. خد عندك..

لو رسمت خط وهمى يبدأ من ميدان عبد المنعم رياض ويضم المتحف المصري وميدان التحرير والجامعة الأمريكية والمجمع وجامعة الدول وعمر مكرم والنيل هيلتون وينتهى عند رمسيس هيلتون.. فدي حضرتك هتبقى الزرية بتاعة بهائم الأمير قوصون.

خد بالك.. الزرية مش الاسطبل..

بينما الجزء من عبد المنعم رياض لحد باب اللوق مروراً بالإسعاف ومعروف وميدان رمسيس وشارع الجمهورية والليلى دى كلها.. ده كان واحد من حداثق او بساتين الأمير قوصون.. الى عنده زيه واكبر منه في كل مدينة من مدن المحروسة.

قوصون مكانش بس فاحش الثراء.. قوصون زى ما يكون كان عاوز يقول للناس كل يوم انا الكبير في البلد دى يا عرر.. انا الكل في الكل.. انا نائب السلطان ونسيبه وجوز بنته.. حد له شوق في حاجه؟؟

سفرة الغداء بتاعة قوصون كان ببندبح عليها 50 خروف كل يوم.. ياكل الى ياكله والباقي للفقراء.. كل شهر كان بيطلع 30 الف درهم لله.. وكل سنة مع عيد الأضحى كان ببندبح الف راس غنم في كل بلد له فيها ممتلكات.. القاهرة بس هي الى كان ببندبح فيها 300 بقرة في العيد فوق ال 1000 راس غنم.. اسم قوصون كان كفاية يحل اى مشكلة او يدى قوة لمملوك من بتوعه.. حاجه كده زى منوفى الأيام دى.. يكفى ان الناس تعرف ان المملوك ده "قوصوني".. وبس.. خلاص كده.. يا اخى ده حتى لما حب بينى جامع.. مختارش مكان فاضي رايق كده علشان يعمره.. لا.. ده راح على بيت الأمير جمال الدين آقوش "قتال السباع" الموصلي.. وده كان واحد من اكبر الامراء ايامها.. ومن نسل الأمير جمال الدين آقوش الشمسي.. البطل الى قتل كتيغا في عين جالوت.. ده الجامع الى نعرفه النهارده باسم جامع قيسون.. واللى الفرنسيين هدموا مآذنه بالمدافع لما دنسوا مصر زى ما حكى الجبرتي..

اما الحديث عن الوكالة.. فده شرحه يطول.. قوصون كان له خان "مول يعنى" عظيم جدا الناس بتبيع وتشتري فيه كل حاجه لحسابه هو.. على باب الخان كانت البوابة الى انت شايها في الصورة دى.. لو ركزت شوية في العتبة هتلاقي حجر عليه كتابه فرعونية.. دى كانت عادة منتشرة ايامهم.. مكانوش بيهدوا المعابد المصرية القديمة صحيح.. انما كان منتشر جدا استخدام الحجارة زى ما هي كده في إعادة البناء.. هتلاقوا أعمدة رخام رومانية الطراز في مسجد المؤيد شيخ وهتلاقوا احجار عليها نقوش مصرية قديمة في الجامع الأزرق وجامع خاير بك.

طبيعي ان الامراء الثلاثة الكبار – قوصون وبشتك وصرغتمش – يقطعوا في بعض أيام الناصر محمد.. قوصون قضى على بشتك بالضربة القاضية بعد كده.. بينما صرغتمش كان لسه مستخفى في الذرة.. كان له يد صحيح في اسقاط وقتل قوصون بعد كده.. بس على المتداري ومن غير ما يظهر في الصورة.. صرغتمش ده راخر حكايته حكاية.

لما حس الناصر محمد بقرب الأجل جاب قوصون ووصاه على ولاده.. امر السلطان بالحكم من بعده لابنه سيف الدين أبو بكر.. هو مكانش اكبر الأولاد ولا احقهم بالولاية.. بس دى رغبة الاب.. لما مات الناصر محمد اتسلطن سيف الدين أبو بكر واتسمى المنصور على اسم جده. المنصور أبو بكر كان شاب عشريني.. يعنى مش عيل صغير.. يعنى مش هيمشي على دماغ حد.. يعنى الهيلمان بتاع قوصون مهدد خصوصا ان كل سلطان كان بيمسك كان بيتعمد انه يقصقص ريش الحرس القديم.. بس قوصون كان ذكي وفاهم اللعبة.. اتعدى بالمنصور أبو بكر وانقلب عليه وحبسه في قوص مع اثنين من اخواته قبل ما المنصور أبو بكر يتعشى بيه.. قوصون حط مكانه اخوه الأصغر منه علاء الدين.. علاء الدين كان عنده 6 سنين وقت ما اتحط على العرش علشان كده سموه "كجك".. وده لفظ تركي معناه صغير.

وهسيب خيالك بقي يتوقع عمل ايه قوصون في دولة يحكمها سلطان عمره 6 سنين وله نائب زى قوصون كده..

الى يعمله قوصون في مصر ده معجبش الأمير شهاب الدين احمد بن الناصر محمد.. الى كان وقتها حاكم الكرك.. بعد كثير من القلق والحروب بينه وبين قوصون والمواليين ليه قدر قوصون ينتصر في البداية.. لكن شهاب الدين احمد وامراؤه قلبوا الشعب على قوصون وحاشيته حتى ان قوصون احتفى بالقلعة ووقف على اسوارها يتفرج على الناس وهى بتنهب املاكه وتهذب الاسطبل بتاعه.

اقرا كده معايا ابن تغري قال ايه عن الحادثة دى في النجوم الزاهرة..

"ثم خرج إليهم الأمير أيدغمش بمماليكه ومن عنده من الأوجاقية ووقفوا جميعا ينتظرون نزول قوصون إليهم فأحس قوصون بهم وقد انتبه فطلب الأمراء المقيمين بالقلعة فأثاه منهم اثنا عشر أميراً منهم جنكلي بن البابا وقياتمر والوزير.. ولبست ممالك قوصون التي كانت عنده بالقلعة وسألته أن ينزل ويدرك إسطبله ويجتمع بمن فيه من ممالكه وكانوا سبعمائة مملوك وكان قوصون يغتر بهم ويقول إيش أبالي بالأمراء وغيرهم.. عندي سبعمائة مملوك ألقى بهم كل من في الأرض.. فلم يوافقهم قوصون على النزول لما سبق في القدم."

"ثم نادى أيدغمش.. معاشر أجناد الحلقة وممالك السلطان والأجناد والبطالين يحضروا ومن ليس له فرس وليس له سلاح يحضر ويأخذ له الفرس والسلاح ويركب معنا ويقا تل قوصون.. فأثاه جماعة كثيرة من أجناد الحلقة والممالك ما بين لابس سلاح وراكب وبين ماش وعلى حمار"

"وأقبلت العامة كالجراد المنتشر لما في نفوسهم من قوصون فنادى لهم أيدغمش.. يا كسابه عليكم باسطبل قوصون انهبوه.. فأحاطوا به وممالك قوصون من أعلاه ترميهم بالنشاب حتى أتلأفوا منهم عدة كثيرة فركب ممالك يلغا البحياوي من أعلى بيت يلغا - والبيت المذكور هو الآن موضع مدرسة السلطان حسن - وكان بيت يلغا يشرف على بيت قوصون فلما طلعا ممالك يلغا البحياوي تسلطوا على ممالك قوصون ورموا عليهم بالنشاب مساعدة للعوام وجرحوا منهم جماعة كثيرة وحالوا بينهم وبين العامة.. فهجمت العامة عند ذلك إسطبل قوصون ونهبوا زردخاناته وحواصله وأمواله وكسروا باب قصره بالفؤوس بعد مكابدة شديدة وطلعا إلى القصر ونهبوا ما فيه وقوصون ينظر ذلك من شباك القلعة ويقول.. يا مسلمين ما تحفظون هذا المال.. إما أن يكون لي أو يكون للسلطان.. فقال أيدغمش.. هذا شكرانه للناس والذي عندك فوق من الجوهر والتحف يكفي السلطان"

خذت بالك!!!

الناس واقفه تنهب فلوسه وتدمر شقى عمره.. وهو كل تفكيره ان الفلوس دى يا تكون عنده.. يا تكون عند السلطان..

مفیش مثلا الشعب الجعان.. مفیش الفقراء.. لا..

يا انا.. يا السلطان.

لما لقي مفیش فايدة من المقاومة سلم نفسه.. سبحان الله.. قوصون الساقى الى مكانش بيخرج من بيته الا وسط 300 فارس على صفين على راس كل صف منهم قارع للطبول علشان ينبه الناس ان الكبير معدى فيوسعوا السكة.. دلوقتى خارج متسلسل في عز برد الليل من سجن القلعة مترجل على اسكندرية في حراسة 100 فارس عندهم أوامر مشددة بقتله لو اتشاقى..

لما جه الأمير شهاب الدين احمد من الكرك اتسلكن على مصر واتسمى الناصر شهاب.. وامر بقتل قوصون في زنزانته.. فاختار الأمير ايدغمش مملوك من عنده اسمه شهاب الدين أحمد بن صبح.. دخل على قوصون في عز الليل.. واسكت أنفاسه بالخنق للأبد.

لما مات قوصون طلعا من بيته 400 الف دينار ذهب في أكياس.. وما لا يحصر من المجوهرات والزراکش والاواني المذهبة.. و3 أكياس فصوص جواهر حر ثمنها اكثر من 100 الف دينار.. وكميات مهولة من الحرائر والاصواف والكشمير والسجاد الفاخر شغل شيراز.. بيحكي ابن تغرى ان من كثر الذهب الى اتوفر في ايدين الناس بسبب الى سرقوه من بيت قوصون انخفض سعر الدينار وبقي ب 11 درهم بعد ما كان ب 20.

رحلة سقوط قوصون مكدتش اكثر من 5 شهور.. قوصون جه مصر ب 500 درهم.. ومات وساب كل الى انت قريته ده.. بلد غريبه.. كل خيرها للأجانب من قديم الازل.. كل الى جمعه قوصون راح ومفضلش من اثره الا مسجد يحمل اسمه محرف "قيسون".. ومجرد باب للوكالة الى كانت عنوان على مدى سيطرته على البلد.. باب هتشوفه وانت داخل من باب النصر على ايدك الشمال.

بص على الباب وافتكر عبد الرحمن أبو زهرة وهو بيقول "دنيا ملهاش امان".

قوصون الساقى مات مخنوق.. عقبال قوصون السيبي.



## الست دولت

هل الحراك الثوري السلمي والنموذج الغاندي حلم افلاطوني خيالي والحقيقة ان كل نائر من غير سلاح هو مشروع شهيد؟ اعتقد اه.. التعريف الاكاديمي للقانون هو "حق تحمية القوة".. من غير قوة انت ملكش اى حقوق.. حتى لو كانت شرائع السماء كلها في صفك.. وده الى فهمه تنظيم اليد السوداء في مصر سنة 1919..

الكلام كتير اوى عن تنظيم اليد السوداء.. ممكن نحكى عنه لوحده بعدين.. لكن مبدأيا نقدر نعتبره تنظيم سرى مسلح تبع ثورة 19.. مصر وقتها كانت معسكرين.. معسكر الإنكليز واعوانهم ودول اقلية.. ومعسكر باقي الشعب "الأغلبية".. مصر كانت بلا فلول ولا اخوان ولا سلفيين ولا كفار ولا عسكر.. كنا مصريين وبس.. مصريين زى عبد الرحمن فهمي واحمد ماهر الى قرروا ارهاب اى سياسي مصري يشتغل مع الانكليز.

عدد الضحايا المصريين في الحرب العالمية الأولى كان مربع.. رغم ان الشيخ المراغي قال وقتها ان الحرب دى لا ناقة لنا فيها ولا جمل.. الا ان السلطان حسين كامل المنبسط كليا للإنكليز "السلطة" اطلق أيديهم تماما في استخدام المصريين في حربهم ضد الدولة العثمانية.. والانكليز مخلوش.. استخدموا ولادنا دروع بشرية ضد السلاح العثماني العجوز.. وللأسف دخل الإنكليز القدس بدم ولادنا.. عدد الضحايا المرعب خلى الشارع المصري يغلى ضد الإنكليز واعوانهم.. وخلى الناس تتلم حوالين ثورة 19 وتنظيمها المسئول عن الاغتيالات السياسية.. الفكر العام كان ان اى مصري يقبل الوزارة في ظل الاحتلال.. يبقى خائن علطول ولازم يتقتل..

زى يوسف وهبه باشا ومحمد شفيق باشا مثلا.

يوسف وهبه باشا كان أصله تركي.. بدأ حياته موظف في وزارة المالية وبعدين اشتغل وكيل نيابة في وزارة الحقانية.. يكفيه انه كان عضو في لجنة التحقيق ضد عرابي ورجالته.. بعدها بقي وزير الخارجية في وزارة محمد سعيد باشا الأولى لحد ما اختاروه رئيس للوزارة سنة 1919.

وقع يوسف باشا في حيص ببص.. الناس خيفة تشتغل معاه في الوزارة الا يتقتلوا.. هو كان جلده تخين وفضل يدور ويقلب في طبقة "تحيا مصر" لحد ما قدر يكون وزارة اى كلام كان وزير الأشغال فيها محمد شفيق باشا.. وده حدوته كمان لوحده.. قبل الوزارة 3 مرات قبل كده وتاريخه اسود ومنيل.. عندك مثلا انه مضى اتفاقيه مع الانكليز أطلقت أيديهم في تغيير نظام الري في السودان خدمه لمصالحهم هما وتولع مصر.. ال يعنى مكانش كفاية اتفاقية حكم السودان بتاعة سنة 1910 الى عملها بطرس نيروز غالى والى خلت شاب زى الورد اسمه إبراهيم الورداني "غزال البر" يقتله هو كمان علشان ييجى شفيق باشا هو راخر يفرط في المية..

من زمان والله والمية خط احمر.. بس نقول ايه بقى..

اجتمع تنظيم اليد السوداء ويقرروا اغتيال محمد شفيق باشا.. الشباب بتتسابق علشان تنول شرف قطع رقبة الخائن.. بس الكبار عاقلين.. مينفعش اى حد يعمل الحكاية دى.. في شروط معينه لازم نمشي عليها علشان تبقى العملية نظيفة 100%.. اهم الشروط دى ان الشاب الى هيفرتك راسه بالرصاص ميكونش من اهل القاهرة.

وقع الاختيار على الشاب الميناوي عبد القادر محمد شحاته.. طالب المدرسة الالهامية الثانوية أبو 17 سنه.. فرح الولد بالاختيار.. رقبتي فداكي يا مصر ويحيا الهلال مع الصليب.. الخطة اهي يا أبو عمو.. هترى القنبلة على عربية الوزير وهي معديه في شارع العباسية.. وبأذن الله تنفجر القنبلة وينفجر الوزير.. انت تخرم في الشوارع الجانبية وتهرب لحد ما نشوف هنعمل معاك ايه.

- تمام يا عبد القادر أفندي؟

- تمام يا فهمي أمين أفندي.. الاستقلال التام او الموت الزؤام.

- ربنا معاك ان شاء الله.. سعيدة يا عبد القادر افندي

- سعيدة مبارك يا فهمي افندي

عبد القادر مكديش خبر.. في اليوم الموعد كان مستني وقلبه بيدق من الأثارة.. مفكرش لحظه واحده ممكن يحصله ايه لو اتمسك.. تفكيره اتجمد لما شاف عربية الوزير الخائن.. سَيَّ الله ورعى القنبلة.. القنبلة وقعت على عربية الوزير وفرقت.. الله أكبر.. الى جهنم يا خائن يا بايع بلدك.. لكن عمر الشقي بقي.. الوزير طلع زى القطط بسبع أرواح.. القنبلة انفجرت بس الرجل لسه عايش.. البوليس انطلق في الشوارع زى المجنون يدور على الفاعل.. بوليس مصري بيدور على شاب مصري علشان حاول يقتل مصري بيشتغل مع الانكليز.. كل الاطراف اتأذت.. الا المجرم الحقيقي.. الانكليز.

يقع الولد في ايد البوليس.. والبوليس "كالعادة" ميعرفش ربنا.. انطق يا ولد "طاللاخ".. مين معاك "طاللاخ" "مين زعيمك" "طاللاخ" "حاولت تقتله ليه" "طاللاخ".



بس الى زى دولت دى ميتقالش عليها كده.. دولت كانت من قرية أبو عزيز مركز مطاي في محافظة المنيا.. بنت الحسب والنسب وأكابر القرية من عائلة شادي العريقة ذات الأصول الحجازية المنتهى نسبها إلى السادة الأشراف من آل بيت رسول الله.. المفروض لو حد قال عليها كلمة أهلها يذبحوه مش يذبحوها هي.. بس نقول ايه في العقول..

ماتت الست البريئة من غير اى ذنب.. ماتت فداء الدم الحر والغيرة والجهل برضه.. ماتت -حرفيا- فداء مصر.. مسكين عبد القادر.. ضميره قايم عليه ليل ونهار وهو حاسس انه السبب.. عزاؤه الوحيد ان الحبيبة الكبيرة "مصر" هتكون بخير ان شاء الله.. او هكذا كان يتصور.

صحيح يا جدعان.. الست الجدعة رزق. تصور بقى ان كل مؤرخين ثورة 19 مكتبوش الحكاية دى !! لولا ان مصطفى امين كان عايش جمب بيت الأمه بتاع سعد باشا وسمع الحكاوي دى كلها منه ومن الست صفية مراته.. كان زمان بطولة دولت اتنست ومحدث بيترحم عليها.. زيتها زى حكاية فاطمة سرى مرات ابن هدى شعراوي وام حفيدتها الى فضحت زيف شعارات الست هدى والنسويات والأونطا دى كلها. التلفزيون المصري عمل الحكاية دى شهرة تلفزيونية سنة 1987 بطولة سوسن بدر وممدوح عبد العليم تحت اسم "دولت فهمي التي لم يعرفها احد".. أيام ما كان التلفزيون بيعمل استغفر الله العظيم مسلسلات دينية وتاريخية وحاجات لها قيمة وكده يعنى.

هحطلكوا كل حاجه في التعليقات.. وهتلاقوا المقال ده على قناة تليجرام بتاعتي

<https://t.me/HosniAliveHistory>

حكاوي مصطفى امين لها العجب.. هتلاقوها في الكتب دى..

- شخصيات لا تنسى "جزأين"
- أسرار ثورة 1919 الكتاب الممنوع "جزأين"
- 200 فكرة
- مسائل شخصية

## حفر على الناشف

بعض الكتب لو قرأتها حياتك كلها ستتغير من النقيض للنقيض..  
كياذك هيتقلب ودماغك ونفسيك مش هيرجعوا تاني ابدى ما كانوا قبل القراءة.. بالتعبير البليغ للراحل الحبيب احمد خالد توفيق عن ألم التجربة.. وكأن روحك بحيرة مياه صافية توترت لما وقعت فيها طوبة وبعد شوية المياه هدبت.. لكنها مرجعتش ابدى زى الأول لأن الطوبة لسه جواها.

مش شرط الكتب دى تكون فى السياسة "زى طبائع الاستبداد بتاع الكواكبى" او الفلسفة "زى رأس المال بتاع كارل ماركس" او الدين.. على أساس ان دى المجالات الى فيها أفكار وايدولوجيات ومحتاجه تفكير وفهم.. لا خالص يا معلم.. كتاب تاريخ واحد ممكن يشقلب حياتك للأبد لما تشوف كم القهر والظلم الى وقع على جدك او لما تعرف ان جدتك اغتصبها الى ببضحك فى وشهم رئيسك دلوقتى.. وتنام وتصحى على نفس الظلم واقع عليك بس بمسميات جديدة.. مسميات تناسب العصر.. لما تفر التاريخ كله وتلاقى نفسك فى كل عصر بتنضرب بالكرباج وتاكل من الزبالة ومحصور فى دائرة فقر ومرض مش مسموحلك تخرج منها ابدى.. ولو خرجت.. تتقتل.. هتلاقى نفسك تلقائيا بتقول ليه يا ولاد الكلب.. هو انا مش انسان خلقه ربنا له حقوق زيه زى كل المخلوقات!!!

عندك كتاب زى "السخره فى حفر قناة السويس" للدكتور عبد العزيز محمد الشناوي مثلا.. اعترف ان حياتي بعد ما قرأت الكتاب مش عايزه ترجع ابدى الى كانت عليه قبل كده.. رغم ان الحدث ده عدى عليه اكثر من 160 سنة ورغم انى معرفش حد من جدودي كانوا من ضحايا المشروع ده ولا اسرتي كلها لحد الجد السابع احتكت بالمشروع او المنطقة دى كلها من قريب او من بعيد.. الا انى لما خلصت الكتاب ده حسيت وكأن حد كافيى على وشى على الأرض ومكتف ايدى ورا ضهري ودايس بجزمته على وشى المتمرمغ فى طين الذل.  
قولي ليه علشان اطلع الى جوايا فى الفضفضة معاك بدل ما اطق لوحدي..  
قلتلى ليه..

شوف يا سيدى..

لما محمد سعيد باشا مات حس دليسيبس بالقلق على مشروع القناة.. دليسيبس مكانش مهندس ولا جيولوجى ولا رجل اعمال ولا صاحب اموال ولا عسكري ولا حتى مقال.. الشئ الى يخليك تسأل بمنتهى الشغف لما هو كده.. امال ازاي عمل الاتفاق ده مع سعيد باشا بالشروط المرعبة دى!!!

هسيبك الحته دى تدور فيها بعد ما ارميلك كعب بيقول ان دليسيبس كان شخصية كولونياله بامتياز.. يعنى مكانش لوحده.. كان وراه فكر استعماري ودولة استعمارية بتسندة علشان مشروع ظاهره التجارة وباطنة الاحتلال.. هرکز معاك دلوقتى فى موقف الخديو إسماعيل من مشروع القناة الى وافق عليه عمه لا سامحه الله..  
اسماعيل لما أستلم الحكم كانت مصر مديونة لبيوت مال أوروبا ب 11 مليون جنية.. إسماعيل قالك انا محبش السلف لأنه تلف ورده خسارة وأعلن ان ضد سياسة الاقتراض وهيبذل قصارى جهده علشان يسدد ديون عمه.. اى والله زى ما بقولك كده.. إسماعيل قال كده.. هنا تحضرني مقولة الاديب عمرو دياب لما قال "كلهم بيقولوا كده فى الأول".. وعارفين ليه طبعا.  
أبو السباع موقوفش عند الكلام ده.. ده قال كمان فى اول اجتماع ليه مع وكلاء الدول الأوروبية أصحاب الديون انه عازم على استكمال مشروع حفر قناة السويس.. بيحكى عبد الرحمن الرافعى فى كتابه "عصر إسماعيل" ان الخديو قال للقنصل الفرنساوي "أنى أشد حماسة لمشروع القنال من مسيو دليسيبس.. وأنى لواثق أن ليس ثمة عمل يفوقه عظمة وفائدة لمصر ولكن قواعده مضطربة وسأسعى إلى ترسيخها".. وبيقول دكتور مصطفى الحفناوي فى كتابه "قناة السويس ومشكلاتها المعاصرة" ان المشروع ده بعد سعيد باشا مكانش هينجح لولا جهود الخديو إسماعيل.  
طيب.. عمل ايه إسماعيل بقى؟

لما قرأ الخديو شروط العقد أصابه الهلع من المزاي الرهيبة الى حصل عليها دليسيبس من محمد سعيد باشا.. وقال بالنص ان عمه الراحل ضحي بمصر وفلاحينها علشان يراضى صاحبه دليسيبس وكان ماشى وراه مغمض العينين وكأنه لم يقرأ العقد.  
جميل.. ايوه كده.. سن سنائك يا أبو توفيق ووريهم الشغل.

حصر الخديو إسماعيل جهوده فى 4 بنود فى العقد لازم تتغير حسب ما حكى بيتر كرابينيس فى كتاب "إسماعيل المفترى عليه.."  
البند الأول بيقول ان الحكومة المصرية ملزمة بتقديم العمالة اللازمة للمشروع بحد ادنى 20 ألف عامل يتغيروا باستمرار علشان الى بيموتوا او يهربوا من الحفر.. وان مصروفات نقلهم من والى موقع العمل وتكاليف معيشتهم وكلهم وعلاجهم تتحملها الحكومة المصرية.. بالبلدى كده دليسيبس له عندنا 20 ألف عامل شغالين.. الى يعطل فيهم نغيرهوله من التوكيل مع ضمان اكله وشربه وعلاجه ان لزم.. ونص البند ان دليسيبس له الحق فى التعويض المالى لو قصرت الحكومة فى تنفيذ الشرط ده.

منطق أبو السباع وحجته في تغيير الشرط ده كانت ان السخرة لا تتفق مع المبادئ الإنسانية الى قامت علشانها الثورة الفرنسية وبعد ما ثار الرأي العام في أوروبا على قياداته بسبب الى بيحصل في مصر.. يعنى إسماعيل - زى عمه - مكانش فارق معاه عشرات الالاف الى ماتوا ودفنواهم في مقابر جماعية بعد الكوليرا ما ضربت فيهم بسبب التلوث وانعدام الرعاية الطبية.. هو اتحرك بس لما لقي الأوروبيين بيتكلموا في الموضوع ده وضغطوا كثير على السلطان العثماني علشان يحرجه معاه.. في الوقت ده سمعه كان بيخطط علشان يشغل نظام الولاية في اسرة محمد على.. وطبعاً رضا السلطان عنده كان من رضا الرب. امسك اعصابك.. احنا لسه في الأول.

البند الثاني الى اعترض عليه إسماعيل كان ملكية شركة القنال لترعة المياه العذبة الموجودة في المنطقة واللى كانت الشركة بتحصل فلوس "حسب تقديرها" من أصحاب الاطيان حوالين الترعة مقابل ري أراضيهم.. في سؤال هنا بي طرح نفسه بمنتهى القوة.. شركة خدت عقد حفر في منطقة ما.. تتملك ترعة "بالمجان" من أملاك البلد وتبيع ميتها للناس ليه؟؟ ايه المبرر يعنى؟ حجة إسماعيل هنا ان قوانين الدولة العثمانية الى مصر كانت تتبع لها في الوقت ده تمنع تملك الأجانب للترع والأراضي. البند الثالث كان ينص على ملكية الشركة لجميع الأراضي الى هى شايفها ضرورية لاستكمال مشروع حفر القناة مع اعفاء الشركة من اى أموال ميري مفروض تندفع عن الأراضي دى.. لا ضرائب ولا مكوس ولا بتنجان.. ولو الشركة استصلحت اى أراضي تانية في المنطقة يبقى الأراضي دى تدخل في ملكية الشركة تلقائياً بنفس الشروط السابقة. حجة إسماعيل هنا كانت نفس حجة البند الثاني.. قوانين الدولة العثمانية الى بتمنع تملك الأجانب للأراضي والترع. البند الرابع كان يقول ان الحكومة المصرية ملزمة بنقل ملكية الأراضي الى تشوف الشركة انها محتاجها في اى وقت من ملاكها الأصليين الى ملكية الشركة.. ببساطة كده يصحى دليسيب الصباح يشوف حته ارض تعجبه فيقرر ان الشركة محتاجها وينتهي دوره على كده.. الحكومة المصرية بقي تتولى الباقي سواء تشتريها من صاحبها او تسرقها منهم او تدخل الأراضي في المنفعة العامة وتدفع تعويضات لأصحابها.. دليسيب بقي ملوش في الهري ده. والحجة الى استخدمها إسماعيل في البند الثاني والثالث نفعت هنا برضه.. قوانين الدولة العثمانية. لو ركزت في البنود دى هتكتشف انها مكانتش محتاجة مجهود في مذاكرة ومراجعة العقد.. دى حاجه تاخذ بالك منها من اول نظرة..

امال لو بعثنا العقد لمرتضى منصور وللا بهاء أبو شقة.. هيطلعوا منه ايه؟؟ ما علينا.. سعيد باشا غلط واهو مات خلاص.. خلينا مع أبو السباع ونشوف هيعمل ايه مع الخواجات.. اكيد هيفرم ديك ابوهم..

ايوه بقي.. وريهم الشغل يا سمعه.. قبل ما تكمل قراءة في الموضوع ده اتأكد كويس ان ضغط دمك مظبوط ويتحمل الصدمات.. الكلام ده لا يصلح للناس الى بتتعصب بسرعة او بتعاني من مشاكل في ضغط الدم.

محور الكلام هو كتاب "السخرة في حفر قناة السويس" للدكتور عبد العزيز محمد الشناوي.. حكينا امبارح عن البنود الأربعة الى حاول الخديو إسماعيل انه يغيرها في عقد حفر قناة السويس الى وقعه عمه سعيد باشا مع دليسيب.. وشفنا كمان انها شروط غير منطقية وغير إنسانية ميرضاش بيها اى انسان عنده بقايا ضمير.. الامر الى يجعل عملية تغييرها سهلة نسبياً.. التفاصيل كلها هنا.

<https://www.facebook.com/BigHamza2015/posts/pfbid0JMZftbkeEjin98ZSF1R1EMPTLkXjs6rVj8LHz6At6iX3DvWiEPWKZPgpx7Zu4trCPI>

أبو السباع بعث نوبار باشا يتفاوض مع الفرنسيين.. نوبار عرض عليهم تخفيض العمالة من 20 الف الى 6 الاف علشان منبهلش الزراعة في البلد.. ما هو كده كده انتو المستفيد الأول من محاصيل مصر.. يعنى زيتكم في دقيقتكم.. وطالب كمان بأجر يومي 2 فرنك فرنسي لكل عامل علشان يقدر يعيش طالما الشركة مش بتوفرله اكل او علاج.. وده كمان طلب منطقي لأن العمالة دى لو هلكت هتأثر على الشغل اكيد.. وطالب كمان نوبار باشا بإلغاء البند بتاع ملكية الشركة للأراضي وفي مقابل كده تتعهد الحكومة باستكمال مشروع ترعة المياه والتزام الحكومة المصرية بتعويض الشركة عن اى نفقات دفعتها وهى بتحفر الترعة دى او اى منشآت عملتها على الأراضي الى خدتها من الناس.. مش متخيل ان دليسيب ممكن يرفض الطلب ده بالذات.. دى أساساً ارض ملوش فيها خدها بشكل غير قانوني.. دلوقتي هيرجعها وهيصرف تعويض عنها.. فلوس من الهواء

اهى.. حاحه كده زى العماير الى هدها السيسى في مدينة نصر علشان يبني مكانها عماير تانية يبيعه للناس الى كانوا ساكنين فيها قبل كده.

رغم عدالة المطالب دى.. الا ان دليسيس رفضها كلها.. وكانت حجتة ان تخفيض عدد العمالة هيزود مدة المشروع من 3 الى 10 سنين وهو مش مستعد يتحمل خسائر ال 7 سنين دول.. ده على أساس انه أساسا دفع حاحه في المشروع من اوله.. بينما باقى البنود الخاصة بتملك الأراضي فقال انها من جوهر الاتفاق ولا يمكن التنازل عنها.. والعقد شريعة المتعاقدين..

ومسكتش دليسيس على كده.. لجأ الى سلاح فرنسا الأقوى على مر العصور..

الاعلام..

دار دليسيس زى عاهرات مولان روج يسخن الدنيا في أوروبا على إسماعيل وحكومته علشان يجبره يلتزم بالعقد.. وإسماعيل كان عامل حساب كبير لأوروبا وصورته فيها خصوصا ان اسمه في الحكم لسه بالقلم الرصاص.. والجدة بتاع إسطنبول ده مش مضمون.. كلمتين وقرشين يخلوه يغير نظام الوراثة في العرش.. وكلمتين تاني يخلوه يرمي إسماعيل بره الليلة كلها..

بس إسماعيل مكانش عضمه طرية برضه..

قالك نلجأ للتحكيم ..

مش مثلا هو ده الى عندنا وهناخذ القناة والى يحصل يحصل ونقلبها حرب ودرمغة على الكل وخراب يا دنيا خراب.. واكيد يعنى إنجلترا هتتدخل علشان تضايق فرنسا وتبوظ المشروع كله.. لا.. احنا هنجيب حكم اجني علشان الحكام المصريين دايم بتجامل الأهلي..

طيب نجيب مين يحكم؟ نجيب مين يحكم؟

بس.. مفيش غيره.. نابليون الثالث.. امبراطور فرنسا..

احيه.. ايه ده!!!

بقى امبراطور فرنسا هيقف ضد مصالح فرنسا في قضية مصر فيها طرف ضد فرنسا!!!!

ايه نوع المخدر الى ممكن تتعاطاه ويوصلك للفكرة دى؟؟

إسماعيل كان عارف ان نابليون الثالث مش هيكون محايد لكونه فرنسي أولا ولكون دليسيس يقرب لمراته الامبراطورة اوجيني ثانيا.. ومع ذلك.. إسماعيل - مش دليسيس - هو الى طلب ان الحكم يبقى نابليون الثالث ..

المفروض ان نابليون الثالث شال لمصر جميلة الأورطة المصرية السودانية الى سندته في حرب المكسيك.. والمفروض كان ان حبال الود كان طويلة اوى بين ابننا إسماعيل باشا الرهوان والفرنسية الى بتمسح التوتا بتاعتها بالمناديل الورق اوجيني.. بس هل كان اسماعيل واثق اوى في نفسه كده لدرجة تخليه يتصور ان اوجيني هتأثر على جوزها وتخليه يحكم ضد مصلحة بلده وضد قريبتها علشان خاطره!!!

ليه.. ده لو بيفطر ويتعشي فياجرا كل يوم.. مكانش هيبقى واثق اوى كده..

اتعرض الملف على نابليون الثالث الى اصدر حكمه كالآتي:

- تخفيض عدد عمال السخرة من 20 ألف الى 6 الاف زى ما طلب إسماعيل.. لكن الخازوق هنا هو ان الحكومة المصرية في مقابل التخفيض ده هتدفع لشركة القناة تعويض قدرة 38 مليون فرنك فرنسي.. علشان تتخيل ضخامة المبلغ.. افتر ان نوبار باشا طلب اجرة 2 فرنك فرنسي يوميا لكل عامل.. يعنى التعويض ده يكفى اجرة 20 الف عامل يوميا لمدة 3 سنين.. يعنى الى وفرناه باليمين صرفنا اضعافه بالشمال.

-يتنازل دليسيبس للحكومة المصرية عن امتياز ترعة المياه العذبة في مقابل تعويض قدرة 16 مليون فرنك فرنسي هتدفعهم الحكومة المصرية. بص يا باشا.. انا سرقت عريبتك ولو عايزها هات 16 مليون فرنك تمنها.

-تحتفظ شركة القناة ب 50 الف فدان من كل الأراضي الى خدتها علشان مشروع القناة.. والباقي ترده للحكومة المصرية.. الباقي ده كان 140 الف فدان هتدفع قصادهم الحكومة المصرية تعويض قيمته 30 مليون فرنك فرنسي.. الأرقام دى ملهاش معني من غير الحسبة الى جايه دى.. الجنيه المصري وقتها كان يساوى 25 فرنك.. يعنى التعويض ده كان يساوى تقريبا 3.5 مليون جنيه مصري "الجنيه كان يساوى 7.2 جرام ذهب".. اجود فدادين الأرض في مصر وقتها كان تمنه 20 جنيه.. يعنى الحكومة المصرية هتسترد من شركة القنال 140 الف فدان وتديها قصادهم تعويض يساوى تمن 175 الف فدان.. الى هو لو كانت الحكومة اشترت منهم الأرض دى كانت التكلفة بقت اقل من التعويض.

نابليون الثالث حكم على مصر بتعويضات قيمتها 84 مليون فرنك فرنسي.. يعنى تقريبا 3.5 مليون جنيه مصري.. رأس مال الشركة كله كان 8 مليون جنيه.. يعنى 4 شروط بس في العقد اتغيروا دفعت الحكومة المصرية قصاد استرداد حقوقها فيهم للشركة ما قيمته 50% من رأس مال الشركة..

يتميز السياسيين المصريين بذكاء غير عادى وقدرة جبارة على التفاوض.. والأدلة التاريخية اهي.. أبو السباع مع الفرنسيين والسادات مع ولاد العم والسيسي مع الاحباش..

دى كانت احكام نابليون الثالث في 6 يوليو سنة 1864م. تحس ان الدكتور عبد العزيز الشناوي كان هيعيط وهو بيكتب الجزء ده في كتابه "السخرة في حفر قناة السويس".

انت اكيد زي مش مصدق الكلام ده.. بس والله زى ما بقولك كده.. ده المكتوب في الكتب.. ده كان حكم نابليون الثالث الى أبو السباع اختاره وارضى حكمه واللى من غير العساكر المصريين والسودانيين في حرب المكسيك كان زمانه خرج من الحرب دى حامل زى ما حكي الأمير عمر طوسون في كتابه "بطولة الأورطة المصرية السودانية في حرب المكسيك".

بيحكي الدكتور مصطفى الحفناوي في كتابه "قناة السويس ومشكلاتها المعاصرة" نقلا عن كتاب اسمه "دليسيبس" أصدره مؤرخ اسمه جورج ادجار بونيه سنة 1951 نقلا عن مذكرات دليسيبس ان نابليون الثالث لما حكم في النزاع مكانش محايد والمسألة عنده كانت مسألة حياة او موت لفرنسا.. هو كان شايف ان شركة القنال دى هي شرف فرنسا الى مش لازم يتنازل عنه ايدا.. وبالتالي كان مستعد يعمل اى حاجه علشان يحمي دليسيبس وشركته.. كمان إنجلترا مكانتش راضية عن المشروع ده لأنه تم بعيد عنها مش إنسانية ولا حاجه.. وكانت بتحاول تدور على طريقة تخرب بيها المشروع بأى شكل.. وده في حد ذاته سبب كفيل انه يتمسك بيه.. بقول آخر.. نابليون الثالث كان رجل وطني لفرنسا.. بس كقاضي وبالنسبالنا.. كان راجل وسخ وافاق.

ورغم كل المسخرة دى.. الا ان إسماعيل وافق على حكم نابليون الثالث.. ده مش بس وافق.. ده عمل احتفالات اسطورية في افتتاح القناة.. مهما تصورت انك عارف تفاصيلها فاللي هحكاهولك في الموضوع الجاى هيحرق دمك للنخاع.

يبقى هنا سؤال مهم اوى..

هما عملوا فينا كده ليه!!

هو احنا مش خلقة ربنا ولنا حقوق زينا زى كل الكائنات!!

ما هي البلد بلدهم وكانوا حاكمينها وعاشين فيها ملوك بعد ما كانوا رعا في الاناضول.. ليه يعملوا كده في البلد الى ليهم فيها قصور افخم من قصور أوروبا الى كانوا منبهرين بيها؟

ليه عملوا كده في الفلاحين الى كانوا شغالين في أراضيهم عبيد؟

ليه مرمطوا البلد وضيعوا اقتصادها كده وكانوا يقدروا يعملوا منها حاجه كبيرة اوى هيستفيدوا هما منها أولا.



ليه الخديو إسماعيل لما سألوه عن القصر اللى بناه مخصوص للإمبراطورة اوجيني "فندق الماريوت حاليا" قالهم اه بنيت قصر.. وهبني قصور كمان.. هو علشاني.. ده علشان مصر.

هو الناس دى بتكرهنا وبتكره مصر كده ليه؟

## ساعات القرض الأخيرة

يوم 27 يونيو سنة 1879م كان أسود يوم في حياة الخديو إسماعيل..

صلى الصبح على شريف باشا واقف قصاده مطاطي راسه وهو بيسلمه ورقه عليها ختم عثماني ملفوفة بخيط حرير احمر.. لما فتحها إسماعيل قرأ فيها التالي..

"إن الصعوبات التي نجمت أخيراً، في أحوال مصر الداخلية والخارجية، بلغت مركزاً عسيراً، وقد ينتج عن استمرارها كما هي خطرٌ لمصر وللدولة العثمانية.. ومن أهم واجبات الحكومة السلطانية إيجاد الوسائل لتقرير الطمأنينة والأمن والرفاهية بين الأهالي، وإنما صدرت القرارات لهذه الغاية عينها. فيما أنه قد ثبت أن بقاءكم في منصب الخديوية لن ينجم عنه سوى مضاعفة الصعوبات الحالية، وزيادتها خطورة، فجلالة مولانا السلطان بناء على تداول مجلس وزرائه، قرر تعيين صاحب السعادة محمد توفيق باشا في منصب الخديوية، وأصدر إرادته الهمايونية بذلك، وقد أبلغ هذا القرار السامي إلى سعاده بإشارة برقية على حدة، وعليه فإني أدعوك إلى التخلي عن شئون الحكم طبقاً لأوامر جلالة السلطان".

في ثبات يحسد عليه قرأ إسماعيل فرمان وطلب من شريف باشا استدعاء الخديو الجديد محمد توفيق باشا من قصر الإسماعيلية "فندق هيلتون حالياً".. طار شريف باشا على القصر وفي جيبه فرمان الثاني بتاع التعيين.. كما جرت العادة ان اول واحد يزف البشري للوالي الجديد بياخذ مكافأة حلوة.. شريف باشا اتفاجئ ان توفيق عارف الخير بالفعل ولقاه على باب القصر بيستعد علشان يروح قصر عابدين.. سلمه فرمان التعيين لعل وعسي يطع منه بأى مصلحة.. فتح توفيق الورقة وقرأ الاتي..

"ان جلالة مولانا السلطان قد أصدر أرائته الهمايونية بتعيينك خديو مصر.. وسوف يرسل اليك فرمان الشاهاني بالكيفية المعتادة.. وقد كلف إسماعيل باشا بتلغراف آخر بالانسحاب من شئون الحكومة.. فيلزمك بناء على ذلك حالما تصل هذه البرقية اليك ان تستدعي جميع العلماء والموفين ووجهاء البلاد واعيانها ومستخدمي الحكومة وتبلغهم مضمون الإرادة الشاهانية الخاصة بتعيينك.. وتباشر شئون الحكم حالا.. فان هذا التعيين السامي العادل مكافأة لكفاءتك.. وسيكون ارتقاءك السدة الخديوية بدء عهد نظام ورقي يسود على القطر الملقاة زمام شئونه إلى حكمتك".

خدت بالك من كلمة "تعيينك" دى..

مجرد موظف في بلاط جلالته.. وسية ورثوها من جدود الجدود يفعل كل منهم فيها ما يشاء.

لما وصل الركاب الى قصر عابدين طلع توفيق عند ابوه.. إسماعيل اول ما شافه قام وقف وخد ايده وباسها وهو بيقوله "ني أسلم على أفندينا".. وبعدين باسه على خده وتمناله حظ افضل من حظه.. وبعد كده انحنى قصاده وسابه ودخل عند الحريم.

يوم 30 يونيو بقي كان حاجه تانية..

الساعة 11 الصبح ركب إسماعيل القطر من القاهرة للإسكندرية وطول الطريق بيفكر في حاجه واحده بس..

يا ترى هقعد فين؟

على رصيف الوداع في طابية كوم الناضورة في اسكندرية وقفت الناس تودع إسماعيل.. كان في نسوان بتعيط.. غالبا دول الجواري وحاشية القصر الى عارفين ان أيام العز خلاص راحت بلا رجعه لأن توفيق أكيد جاي ومعه شلته.. وكان في نسوان تانية بتزغرت.. دول كانوا نسوان إسماعيل صديق المفتش الى ضحي بيه الخديو قبل كده لما الأمور اتأزمت.. جمعية ودائرة.. كل واحد فيهم يتزق.. يروح رامي صاحبه علطول.

15 يوم في عرض البحر على ظهر المحروسة وأبو السباع مش عارف هيروح فين.. كل الأبواب اتسدت في وشه.. محدش انقذه الا امبرتو الأول ملك إيطاليا الى عرض عليه الإقامة في قصر فافورتا الفخم في نابولي اكراما للعلاقة الخاصة جدا بين ابوه فيكتور عمانويل والخديو.. أبو السباع كان نفسه يحتفظ باليخت المحروسة ذكرى.. لكن هيهات.. الأوامر كانت مشددة لقائد اليخت.. ترمى الخديو في نابولي وترجع علطول.. نفس الأوامر الى خدها الأميرالاي جلال علوبه وهو شاليل الملك فاروق على نفس اليخت واريح نفس الوجهة برضه.. وهو هو نفس اليخت المنحوس الى أنصور منه احدهم وهو بيفتتح مشروع ملوش اى تلاتين لزمه.. في نفس الوقت الى كان سايب فيه امه ميته من غير دفن 3 أيام لحد ما اللقطة تخلص.

محدش بيتعلم ابدأ..

في قصر فافورتا الفخم قضى إسماعيل أيامه يتفرج على بركان فيزوفوس ويسترجع الأيام الخوالي.. أيام ما كان بيوزع فلوس القروض يمين وشمال بدون حسيب ولا رقيب.. يفتكر الناس الى كانت بتيجي عنده بهدوم مقطعة ويمشوا من عنده جيوبهم مليانه وكروشهم عمرانهم هدايا وتحف قطع من قوت المصريين علشان يشتريها.. دلوقتي لما بيتصل بحد فيهم.. بيلاقى الرقم المطلوب غير متاح او خارج نطاق الخدمة.

لما قامت هوجة عراي.. استغل إسماعيل الموقف وحب ينط على العرش مكان ابنه.. بعث مراسيل لكل ملوك أوروبا يستعطفهم ويوعدهم انه هينفذ كل طلباتهم لو رجوعه.. مش عارف هينفذ ايه تاني.. ما هو الانبطاح الى كان فيه من الأول هو الى وصله للموقف ده.. ومع كل المراسلات والعياط ده.. محدش عبره برضه.. موقف توفيق كان أكثر صرامة من موقف دول أوروبا.. وكان الجميع اتفق على الخلاص من الخديو السفية.

فلوس إسماعيل بدأت تخلص.. الفلوس الى سفحها من اخواته مصطفى بهجت فاضل وعبد الحليم.. ميقاش قادر على تكاليف المعيشة في أوروبا.. بعد ما كان بينزل في افخم الفنادق وكل الأبواب تتفتح قصاده.. بقي بينزل في اوضة في احقر فنادق أوروبا.. الامر الى خلاه يفتكر ان له أملاك في إسطنبول.. المرة دى وافق السلطان عبد الحميد ان إسماعيل يعيش في قصر ايمرجان.. بس بعيد عنك كانت عيشة ضنك.. معتقل في صورة قصر.. حتى انه مكانش مسموح له انه يتحرك من القصر نفسه.. قفص ذهب والاسم قصر.. حتى لما طلب انه يزور ينابيع المياه المعدنية في مدينة إمس.. رفض السلطان وقاله عند منابع المية في بورصا.. حلوه برضه وتسد.

السنين بتعدى يا أبو السباع ومفيش اى امل في الرجوع..

طيب لما مات توفيق ومسك مكانه ابنه عباس حلمي الثاني.. هل اتغير الوضع؟

ابدا..

بينما كان الخديو الجديد سهران في دار الاوبرا الى عملها جده.. وصلته رسالة ان حالة اسماعيل الصحية خطيرة.. قطع عباس حلمي الحفلة واجتمع مع اعمامه علشان يشوفوا هيعملوا ايه.. اتفقت الأسرة ان الاميرين احمد فؤاد وإبراهيم حلمي يروحوا لابوهم في إسطنبول يشوفوا احواله ايه ويرتبوا إجراءات الجنازة.. بينما تولى الخديو مهمة اقناع مجلس الوزراء بضرورة عودة الخديو المخلوع علشان يموت في مصر.. بس مجلس الوزراء رفض بشده علشان كانوا خايفين من اى ازمة سياسية ممكن تسببها عودة إسماعيل.. مش عارف ازمة ايه بالظبط الى ممكن يسببها راجل بيموت؟

من إسطنبول بعث الأمير أحمد فؤاد برقية للخديو يبلغه ان جده مصاب ب 3 امراض مفيش منها علاج.. الالتهاب الرئوي والاستسقاء وسرطان الأمعاء.. استغل الخديو البرقية دى علشان يقنع مجلس الوزراء انهم يوافقوا على ان الراجل يرجع.. بس مفيش اى فايده.. مجلس الوزراء واخذ أوامر مباشرة وواضحة من الانجليز.. إسماعيل نو.. يبقى نو.

قرر عباس حلمي انه يحط الجميع قصاص الأمر الواقع.. بعث سردار الجيش المصري محمد راتب باشا لإسطنبول في مهمة العودة بالخديو السابق.. لكن موقف السلطان والإنجليز فضل زى ماهو.. رغم ان إسماعيل فعليا راقد في غيبوبة.. يا دوب يفوق ياخذ الدواء ويخطر بأى كلام ويغى عليه تانى.. لكن كان القرار واضح جدا.. إسماعيل لازم يموت بره مصر.

هل دى كانت رسالة مثلاً لعباس حلمي الثاني من الانجليز - اسياذ الموقف وأصحاب القرار - انه لو عصلج معاهم هتبقى دى نهايته.. خصوصاً ان عباس حلمي كان شقي معاهم حبتين؟

غالبا اه.. لأن عباس حلمي الثاني حصل معاه نفس الى حصل مع جده بالظبط.

يوم 17 يناير سنة 1895م فاق إسماعيل جزئياً من غيبوبة قعد فيها 3 أيام كاملة.. ملقاش حواليه الا أولاده أحمد فؤاد وإبراهيم حلمي.. قالهم بصوت كسره المرض..

"اذا مت فادفتوني في مصر.. مقر جدى وابى وموطن امالي واحلامي الذى عشت له وتمنيت سعادته وحرمت على العودة اليه".

ووقع تانى مغمي عليه..

وصلت الاخبار للخديو في مصر فقرره انه يعمل مدفن فخم لجده في مسجد الرفاعي.. 6 أسابيع قضاها إسماعيل بين الحياة والموت والغيبوبة واليقظة.. لا علاج نافع ولا طب شافع.. اذا كان أهله قسوا عليه من افعاله معاهم واذا كان رجال حاشيته تخلوا عنه في محنته لأنه مبقاش ينفع واذا كان اصداقاه الأوروبيين خانوا العيش والملح الى طفحوه أطنان أطنان في قصوره.. فالسرطان كان اقصى من كل دول ولم يرحم الشيخ ابدا في شيخوخته.. فضل ياكل في جسمه حته حته في وقت مكانش في اى علاج كيماوي يسكن الألم.

وفي يوم 2 مارس سنة 1895م وجه السرطان الضربة القاضية للجسد الى عاش في الرفاهية وانتهت أيامه في ذل.. صعدت روح الخديو الى بارئها تشكو ظلم الناس والدنيا بعد 16 سنة قضاها على العرش و16 سنة قضاها في المنفى.. موت إسماعيل حل كل المشاكل الى كان متخوف منها مجلس الوزراء ووافقوا انه يندفن في مصر.. على ظهر اليخت العثماني "توفيق رباني" خرج جثمان الخديو السابق من إسطنبول يوم 3 مارس ووصل الى الإسكندرية يوم 10 مارس.. كان في استقبال اليخت الخديو عباس حلمي الثاني وأمرأ الأسرة العلوية.. خرجت الجنازة من مسجد الرفاعي في مشهد مهيب اشترك فيه كبار رجال الجيش والقناصل والمشايخ والتجار والأعيان وطلبة المدارس.. لسان حال الجميع في الجنازة كان بيقول..

يا ترى يا إسماعيل هتنفعك القصور والكباري وتفرجة قناة السويس والعاصمة الإدارية الجديدة لما ربنا يسألك عن الجوعى من رعاياك الى انت اخدت فلوسهم علشان تهادى بيها ملوك أوروبا وتشتري منهم سلاح مصدى مرعي في المخازن بلا اى أهمية علشان بس يطرمخوا على بلاويك؟

وَتِلْكَ الْأَيَّامُ نَدَاوُلُهَا بَيْنَ النَّاسِ وَلَيَعْلَمَ اللَّهُ الَّذِينَ آمَنُوا وَتَتَّخِذَ مِنْكُمْ شُهَدَاءَ ۗ وَاللَّهُ لَا يُحِبُّ الظَّالِمِينَ.

## عبد مأمور

يا ترى مين فيهم اظلم من الثاني.. السجنان الى ضريك بالكرياج.. وللا القاضي الى امر بسجنك؟

الإعلامي الى بيذبك بكلام كاذب مُملي عليه وللا صاحب التلفزيون السامسونج الى بيملّي الكلام؟

في لحظة صفاء رق قلب السجنان لحال الرجل الشجاع ابن حنبل.. رغم غشم السلطة وغباوتها.. الا ان السجنان حس ان في احتمال ولو 1% ان الامام يكون على حق.. وساعتها هتبقى وقعتته سوده.. حكى أبو بكر المروزي صاحب الأمام ورفيق رحلته ومغسله ومكفنه بعد موته ان السجنان سأل الامام بن حنبل في محاولة خسرانة منه لغسل ايده من كل الأذى الى لحق بالأمام ده وقاله:

- يا أبا عبد الله.. الحديث الذي روى في الظلمة واعوانهم.. هل هو صحيح؟

- نعم صحيح

- فأنا من أعوان الظلمة؟

فرد الامام بقوة العالم رغم معرفته الكاملة بألم الكرياج وقال..

"أعوان الظلمة من يأخذ شعرك ويغسل ثوبك ويصلح طعامك ويبيع ويشترى منك.. فأما انت فمن الظلمة انفسهم"

يا تري بعد نهاية القصة دى بأكثر من 1200 سنة.. ايه الى حصل للسجان؟

بيحكى جمال بدوى في كتابه "مصر من النافذة" قصة مرعبة حصلت أيام حكم محمد على.. جمال بدوي نقل القصة من كتاب عصر محمد على لعبد الرحمن الرافعي الى نقلها بدوره من عجائب الآثار في التراجم والاخبار للجبرتي الى كان معاصر لآخر سنوات الحكم العثماني في مصر والحملة الفرنسية وصعود محمد على للعرش وكفاحه علشان يبني دولة حديثه قويه وطغيانه وجبروته بعد كده لما امتلك كل شيء في ايده وهانت عنده الحياة في مقابل تحقيق أهدافه هو وبس.

الحكاية عن محمد بك الدفتردار.. جوز الأميرة نازلي ثاني اكبر بنات محمد على بعد الأميرة توحيد..

محمد بك الدفتردار كان رجل مثالي تماما لمحمد علي.. كل حاكم بيحب الي شبيهه وتفكيرهم ماشى مع تفكيره علشان يعرفوا يشتغلوا مع بعض.. لو دقت النظر في بطانة محمد على الحاكمة زى محمد لاط اوغلي باشا وإبراهيم باشا ومحمد بك الدفتردار وصالح قوج.. هتلاقيهم كلهم بيفكروا بنفس المنطق.. الدم أولاً.. الرأس الى يجيلك منه الريح اقطعه واستريح.. مفيش اى وازع ديني او انساني يبرركم الدم ده كله، حتى لو كانت النتيجة مشروعات قومية او اعمال تتكتب بحروف من ذهب في تاريخ الدولة – ده اذا حصلت يعنى- اثبت التاريخ ان لعنة الدم بتفضل تلاحق صاحبها في حياته وحتى بعد ما يموت.. الإنجاز بيبدأ كبير ويصغر مع الوقت.. وتيجى بعد كده أجيال متعرفش حاجه عن الإنجاز ده الا اطلال خربه عفا عليها الزمن او سطور في كتب التاريخ بتحكي عنه.. وميفضلش الا لعنة الدم وسيرة سافكه.

محمد بك الدفتردار كان شاطر اوى في تجميع الفلوس.. اى حاجه تجيب فلوس للدولة كانت مسئولية محمد بك.. مش مهم مصدر الفلوس دى منين.. المهم ان خزنة الباشا تتملي دايمًا.. المهم ان الباشا لما يحب يعمل مشروع ميسمعهش كلمة مفيش.. الفلوس دى بقى من جيب الفلاح.. من سرقة الاعيان.. استيلاء على مواريث.. مش مهم.. المال الحرام زى المال الحلال بالظبط.. كله بيتصرف "هكذا يظنون".

وزى ما كان الدفتردار لمحمد على.. كان المعلم غالي أبو طاقية للدفتردار.. رجل آخر شاطر في جمع الفلوس.. وهبه الله موهبة الأرقام والذاكرة الحديدية فوضعها في خدمة الحاكم.. مكانش يعرف طبعًا ان الموهبة دى هتنقلب عليه في الآخر وتتسبب في قتله.. بس لو كان سجان ابن حنبل اتعظ من قصص الاولين وكان المعلم جرجس الجوهري اتعظ من قصة السجنان.. كان المعلم غالي هو كمان اتعظ من الى حصل للمعلم جرجس الجوهري وعرف ان رضا الله وحق الغلبة اهم من رضا الباشا.

محمد بك الدفتردار كان بيطبق العدل بمفهومه هو.. بيعاقب المفسد او الظالم بميزان عدالته لا ميزان عدالة القانون او الشرع.. ما اريكم الا ما أرى.. هناك شخص ما دايمًا ماشى بمبدأ "ففهمناها سليمان" من غير ما ياخذ باله خالص ان سليمان كان نبي يوحى اليه.. بينما هو مجرد شخص هفأ.

اسم محمد بك الدفتردار لوحده كان يكفي علشان الناس تتعرش من الخوف.. مجرد ما تيجي سيرته في الكلام تلاق الناس تلقائيا بسملت وحوقلت او سبت ولعنت "لو لوحدهم".. تمام زى حالنا مع المكسيكي دلوقتى كده مع الفارق انه الدفتردار وولى نعمته بنوا دولة قوية بدم ولادها.. بينما المكسيكي وصحبته بهدموا الدولة الى مبقتش قوية خالص بدم ولادها وافقارهم دلوقتى.

الدفتردار كان بيلف قرى مصر علشان يتأكد ان كله تمام والأمور تحت السيطرة.. كله تمام دى لا تعنى الامن او التعليم او الصحة.. كله تمام تعنى ان كله بيدفع المعلوم في الوقت المطلوب.. وظيفة الدفتردار مكانتش انه يحل مشاكل ومعوقات حياة المصريين.. لا.. هو كان بيحل المشاكل الى ممكن توقف التدفق النقدي الى بيدفعه المصريين.. هما بقى نفسهم حالهم ايه.. مش مهم.. يولعوا.. المهم المعلوم يوصل في معاده.. المهم نبني كوبرى في كل شارع وشبكة طرق تمسك مصر كده.

فلاح بسيط أتقدم لمحمد بك الدفتردار وشكاله ان ناظر القرية خد منه بقرته الوحيدة وذبحها علشان الفلاح اتأخر في دفع الضريبة.. البقرة تسوى 120 قرش والضريبة كانت 60 قرش.. الناظر مفكرش في اى شيء الا ان في 60 قرش لازم الفلاح يدفعهم.. الناظر مفكرش ان البقرة هي كل رأس مال الفلاح الى هيدفع منه الضريبة الجايه والى بعدها.. الناظر ذبح البقرة وقسمها 60 جزء باع كل جزء منهم بقرش صاغ للفلاحين.. وده كان تمن بخس جدا.. وفي النهاية اجرة الجزار كانت رأس البقرة.. الفلاح المسكين حتى مكش حته لحمه من بقرته الى اندبحت قصاد عينه والكرباج بيضوى ظهره.

الدفتردار بعد ما سمع القصة امر بحضور الناظر والجزار.. الجزار واقف مرعوب قصاد الدفتردار.. لما سألته محمد بك ازاي ضميرك سمحلك تذبح بقرة الراجل المسكين وهي كل راس ماله.. رد الجزار وقال "يا مولانا انا عبد مأمور.. لقد فعلت ما امرني به الناظر".

وهنا سكت الدفتردار شوية وبعدها بص للجزار بنظرة نارية وهو بيقول بلهجة مخيفة..

- لو امرتك بذبح هذا الناظر.. هل تفعل؟

ورد الجزار تاني "انا عبد مأمور"

وهنا أتكلم الشيطان على لسان الدفتردار وقال "اذن انا امرك بذبح هذا الوغد"

الجزار من خوفه مستناش تأكيد الامر.. خد السكينة وقام جز رقبة الناظر في التو واللحظة قصاد جموع الفلاحين والموظفين واهل القرية.. بعد الذبح امر الدفتردار الجزار انه يقطع جثة الناظر 60 جزء.. وامر الفلاحين ان كل واحد فيهم يشتري جزء من جثة الناظر بقرشين صاغ.. ولما قبض الفلوس أدى الفلاح صاحب الشكوى 120 قرش ثمن بقرته ومشى من القرية وهو بيضحك ضحكات هستيرية مرعبة وسط دھول الحاضرين.

طيب الجزار كانت أجرته ايه؟

زى ما خد أجرته في الذبح الاولانى راس البقرة.. كانت أجرته في الذبح الثاني راس برضه.. بس المرة دى كانت راس الناظر.

فكرك بعد كده ممكن حد من أهالي القرية او القرى المحيطة الى اكيد هيعرفوا بالحكاية ممكن يفتح بقة بربع كلمة عن الضريبة؟

فكرك هل قدر اويس باشا يفتح بقة مع العسكر تاني بعد مجزرة ضريبة الطلبة؟؟

فكرك حد في مصر الى ثارت على الفرنسيين وعلى الوالي العثماني خورشيد باشا من بعدهم قدر يفتح بقة بعد مذبحه المماليك؟

فكرك حد في مصر دلوقتى يقدر يفتح بقة بعد مجزرة رابعة؟

عرفت ان الدم ده كله مقصود ومش وليد الصدفة ابدأ؟

يبقى لما حد يقولك وانا ذنبى ايه.. انا عبد مأمور.. عارف هتقوله ايه؟

خليها في سرك.

## جرائم لا تموت

الأسبوع الى فات انهيت كتابين تسببوا في رفع ضغط دمي بسبب حماقة الإدارة المصرية على مر العصور.. الكتاب الأول هو السخرة في حفر قناة السويس للدكتور عبد العزيز محمد الشناوي.. والقصة الدامية لحفر قناة السويس وشروط العقد المجحف الى وقعه محمد سعيد باشا مع دليسييس.. والكتاب الثاني هو مصر الحديثة أو مذكرات اللورد كرومر.. الاستعماري البغيض.. اول حاكم بريطاني لمصر في فترة ما بعد الاحتلال العسكري الى بدأت سنة 1882.

ونط في دماغي السؤال المعتاد..

هو معركتنا مع المستعمر المحتل خلصت على كده؟؟

اجدادنا الى استشهدوا والدماء الى سالت انهار والثروات المنهوبة والتاريخ المزيف وعشرات السنين من التخلف والظلام ومشاكل حدودية ملهاش اخر.. كل ده خلاص كده انتهى بمجرد انهم سابوا ارضنا ومشيا؟

مش في حاجه اسمها تعويضات!!!

هو جرائم الحروب تسقط بالتقادم؟؟

دى جرائم دول مش افراد.. طالما الدول باقية يبقى لازم تتحاسب على الى عمله قادتتها في العصور السابقة.. أصابع الاتهام هنا تتجه الى الدولة بكيانها لا لشخصيات محددة.. زى ما عمل أولاد العم مع المانيا.. مع الفارق الكبير بين الى حصل معاهم مره والى حصل معانا الف مره.

على ذكر سيرة التعويضات ظهر قصادي فيلم عمر المختار.. خليني اقولك ان الرئيس الليبي الراحل معمر القذافي هو الوحيد من بين رؤساء وملوك الدول العربية والافريقية الى عانت من الاحتلال الى قدر يجبر المستعمر على الاعتراف بجرائمهم والاعتذار العلني عن سنين الاحتلال ويخليهم يدفعوا تعويضات مادية للمتضررين من الاحتلال وتعويضات أخرى للدولة في صورة مشاريع واستثمارات وتكنولوجيا.

تخيل!!!

القذافي الى دايم وسائل اعلامنا تطلعه اهبل والناس بتضحك عليه.. في صفحة مدفونة من صفحات التاريخ هتلاقى فيها انه ادار معركة شديدة الذكاء ضد حكومة سيلفيو برلسكوني نجح في اخرها انه يحول العدو التاريخي الى صديق مفيد بعد ما اجبرهم على الاعتراف بكل جرائمهم في بلده واجبرهم على دفع التعويضات المناسبة علشان متروحش تضحيات الشهداء الابطال هدر ولا تتحول الى مجرد قصص ومرويات اخرها كتب التاريخ وبس.. مش معنى كده انه كان ملاك.. انما هو في الموقف ده.. اجاد وضحك على الطليان.

والبداية كانت فيلم سينما..

بعد النجاح الساحق لفيلم الرسالة بنسختيه العربية والانجليزية.. لجأ معمر القذافي للمخرج السوري مصطفى العقاد علشان يعمل فيلم زى ده بس عن ليبيا ومجاهديها.. في الأول كان البطل المقترح هو رمضان السويحي.. لكن القذافي غير رأيه بسبب بعض المواقف المختلف عليها تاريخيا بشأنه.. هو مكانش حبيب يثير جدل.. هو كان بيفكر في شخصية مفيش عليها اى خلاف من اى نوع.. كان الهدف هو تركيز الضوء على جهاد ليبيا ضد المستعمر مش محاكمة افراد.. علشان كده وقع اختياره على شخصية عمر بن مختار بن عمر المنفي الهلالي.. المشهور بلقب شيخ المجاهدين وأسد الصحراء..

وخرج الفيلم للنور سنة 1981..

الفيلم لم يتجاوز الحقيقة ولم يخترع احداث او يضيف شخصيات.. المخرج لم يستغل الدراما علشان يخلق شخصيات وهمية او يغسل تاريخ شخصيات اخري قدرة زى ما حصل في أفلام الناصر صلاح الدين وفيلم وا اسلاماه مثلاً.. في بعض التعديلات في سيناريو الفيلم اشرف عليها القذافي بنفسه صحيح.. لكنها تفاصيل فرعية لا تغير ولا تؤثر في الاحداث اطلاقاً.

عندك مثلاً الجملة الأيقونية الى اتقالت في الفيلم على لسان المجاهد عمر المختار.. "نحن لا نستسلم.. ننتصر او نموت"..

الجملة دي مقالهاش المختار ولم تذكر في اى كتاب حكي سيرة المجاهد الشيخ.. هي جملة سينمائية حماسية اضافها القذافي علشان يكمل الجو المهيب للشخصية وقائلها وقضيتهم.

في كتابه "برقه الهادئة" بيحكي الجنرال جراتسياني عن اول لقاء له مع عمر المختار..

"خيل لي أن الذي يقف أمامي رجل ليس كالرجال.. له منظره وهيئته رغم أنه يشعر بمرارة الأسر.. ها هو واقف أمام مكتبي نسأله ويجيب بصوت هادئ وواضح..

- لماذا حاربت بشدة متواصلة الحكومة الفاشية؟
- من أجل ديني ووطني
- ما الذي كان في اعتقادك الوصول إليه؟
- لا شيء إلا طردكم لأنكم مغتصبون.. أما الحرب فهي فرض علينا وما النصر إلا من عند الله.
- بما لك من نفوذ وجه.. في كم يوم يمكنك أن تأمر الثوار بأن يخضعوا لحكمنا ويسلموا أسلحتهم؟
- لا يمكنني أن أعمل أي شيء.. نحن الثوار أقسمنا أن نموت كلنا الواحد بعد الآخر.. ولا نسلم أو نلقي السلاح.

وبيكمل جراتسياني..

"عندما وقف ليتجهياً للانصراف.. كان جبينه وضاء كأن هالة من نور تحيط به.. فارتعش قلبي من جلالته الموقف.. أنا الذي خاض المعارك والحروب العالمية والصحراوية.. ورغم هذا كانت شفتاي ترتعشان ولم أستطع أن أنبس بحرف واحد.. فانتهت المقابلة وأمرت بإرجاعه إلى السجن لتقديمه للمحاكمة في المساء.. لقد خرج من مكتبي كما دخل علي وأنا أنظر إليه بكل إعجاب وتقدير"

ظهر في الفيلم ان المختار سقط بالصدفة وبدون مقاومة.. وده مش صحيح.. المكتوب في الكتب ان المجاهد عمر سقط بسبب وشاية واحد من الخونة ابلغ عن مكان وجوده.. ولما هجم عساكر جراتسياني على المكان اول مره لقوا نظارته بس.. وقال جراتسياني يومها "اليوم عثرنا على نظارته.. غدا نأتي برأسه".. وهو الموقف الى رفض القذافي تسجيله في الفيلم علشان يتفادى تشويه الصورة البطولية الى رسمها للمجاهدين الليبيين.. واستعاض عنه المخرج مصطفى العقاد بمشهد غراب محلق في السماء فوق المختار والمختار بيبصله بقلق.. دى كانت اسقاط على ان المختار سقط بالخيانة.. في كتاب سير الأجداد بين الابتلاء والغبن والتخوين للدكتور فرج عبد العزيز نجم واللى حكاه المجاهد التواتي عبد الجليل المنفي "الى كان شاهد على لحظة أسر عمر المختار" ان الحصار لما اشتد عليهم قتل حصان المختار.. فقدم له ابن اخيه المجاهد حمد محمد المختار حصانه ولما هم المختار بركوب الحصان البديل.. اصابت الحصان طلقة وهجم الأعداء عليه.. شافه واحد من المجندين العرب وهو بيسقط فقال بصوت عالي "سيدي عمر.. سيدي عمر" وهنا انتبه العساكر الى صيدهم الثمين وقبضوا عليه حي بدلا من قتله.. ورد عمر المختار على الخائن الى كشف شخصيته وقاله "عطك الشر وابليك بالزر".. وفي كتاب عمر المختار للطبيب بن ادريس الاشهب قال انه فضل يحارب في الطلاينة لحد ما خلص منه الرصاص وسقط حصانه على ذراعه المجروحة.

حتة كده على جمب..

لما اتقبض على شيخ المجاهدين.. كتبت جريدة بريد برقة العنوان الافتتاحي التالي في صفحتها الأولى..

"حادث آخر في سبيل توطيد سلم البلاد.. القبض على عمر المختار زعيم العصاة في برقه".. وفي الصفحات الداخلية كان في مقال يصحبه صورة مفتي ليبيا "أبو الأسعد" وهو بيستقبل موسوليني ويهديه سيف الإسلام بصفته حاكم متغلب.. وبيعلن ان عمر المختار من خوارج هذا العصر.

رئيس تحرير بريد برقة كان ليبي اسمه عمر فخرى المحيشي.. وده كان من المتعاونين مع الاتراك العثمانيين في ليبيا.. بس لما جم الطلاينة قالك إيطاليا اجدع من تركيا.. ونفض للأتراك واترمى في حضن الطلاينة.

فاكرين مقال جريدة الاهرام بتاع العاصي عراي؟؟

الناس دى رضعت من نفس البقرة رغم انهم اتولدوا من ثيران مختلفة..

مشهد اعدام البطل مش كله حقيقي.. ظهر في الفيلم ان الى لف حبل المشنقة حوالين رقبته كانت العساكر الطليان.. بينما ذكر المؤرخ الليبي محمد الطيب بن ادريس الأشهب في كتابه "عمر المختار" ان الى لف حبل المشنقة حوالين رقبته المجاهد عمر وزق الكرسي الخشب من تحت رجله كان مواطن ليبي سكير.. زنجي ضخم الجثة اسمه عبد السلام اللونجو.. "اللونجو يعني طويل بالإيطالي".. وده كان من المتعاونين



مع المحتل الليبي ومات بعد كده فقير منبوذ سكران في زرائب العبيد قرب بنغازي.. فضل مربي في الزريبة محدش يعرف انه مات لحد ما ريحته طلعت.

وعندك مشهد الطفل وهو بياخد نظارة المجاهد عمر المختار بعد إعدامه.. ده كمان مشهد من بنات أفكار القذافي علشان يوصل بيه نفس الرسالة.. الجهاد مستمر من جيل الى جيل.. وكمان علشان يؤكد المعني الى اضافته للفيلم في رد عمر المختار على رودلفو جراتسياني.. اهو الكلام حصل فعلا اهو.. نتنصر او نموت.. مات المجاهد مشنوق.. لكن الشباب الليبي من بعدهكملوا الجهاد.. والنهاية استقلال ليبيا عن الطلاينة.

الفيلم ده اول مره يتعرض كان في الكويت يوم 4 ابريل سنة 1981.. بعدها اتعرض في أمريكا وبدأ يلف العالم.. طبعا رفض الطلاينة عرضه في أوروبا وحاربوه بكل الطرق.. لكن في أغسطس 2008 اعلن برلسكوني اعتذار إيطاليا عن جرائم الاستعمار في ليبيا واعلن استعداد إيطاليا لدفع مبلغ 5 مليار يورو تعويضات في صورة مشاريع واستثمارات إيطالية في ليبيا بقيمة 200 مليون يورو سنويا لمدة 25 سنة.. وفي يونيو 2009 قام القذافي بزيارة تاريخية لإيطاليا رجع منها بحاجتين..

- جاب معاه كل القطع الاثرية الرومانية الى سرقها الطليان من ليبيا في سنين الاحتلال
- اجبرهم على عرض فيلم عمر المختار.. وفعلا عرضته قناة سكاي سينما الإيطالية للجمهور مدبلج للإيطالي.. في نفس شهر زيارة القذافي.

بس سيبك انت.. عاجبني اوى صوت عبد الفتاح السيسي في اول الفيلم وهو بيقول "سنبسط ظل النخل على الأرض.. ثم بعد ذلك.. سنأخذ علم البلح.. الى النجوووووووووووووووووم"

## حريق المسجد النبوي

تعرفوا ايه الى حصل في المسجد النبوي يوم 13 رمضان سنة 886 هـ؟

سما المدينة كانت رمادي من كتر الغيوم.. في أول الليل حصل رعد شديد وبرق صحيت الناس على صوته ولمعات صواعقه.. مكانش في مطر.. رعد وبرق وبس.

رئيس المؤذنين في المسجد - شمس الدين محمد بن الخطيب - طلع مأذنة المسجد الرئيسية علشان يهلل ويقول دعاء سماع صوت الرعد حسب سنة نبينا عليه الصلاة والسلام.. باقي المؤذنين قلدوه وطلعوا بقية المنابر.. الى مصحيش من اهل المدينة على صوت الرعد صحن على اصوات المؤذنين تبتهل الى الله خوفا من ظاهره طبيعيا عادية من عشرات الظواهر الطبيعية الى كل يوم بتثبت قيومية الله عزوجل على البشر وبثبت للأنسان انه لا شيء.

فجأة ضربت صاعقة المأذنة الرئيسية فلقتها نصين.. مات شمس الدين بن الخطيب في اقل من ثانية.. معرفش بالظبط الصاعقة بيبقى فيها كهرباء ادايه لكنها كانت كفاية علشان تنشق المأذنة وتقع مشتعلة على سقف المسجد وقبة الحجرة النبوية الى بناها المنصور سيف الدين قلاوون سنة 678 هـ.. حجارة المأذنة المشتعلة عملت خروم في سقف المسجد ووقعت في داخله فمسكت النار في السقف والعمدان من الداخل.. مع حركة الهواء ومحاولات الناس الفاشلة لاحتواء الحريق النار ولعت زيادة وبدأت تمسك في الحيطان.. حاول الناس يهدموا باقي السقف وجزء من حيطان المسجد علشان يقطعوا السكة على النار.. بس النار كانت اسرع منهم.. في اقل من ساعة انتشر الدخان الاسود في المسجد وخرجت الناس تجري في فوضى مرعبة.. بسبب التدافع والخوف مات بعض الناس دهساً تحت الاقدام بينما فضل البعض الآخر في المسجد لحماية القبر الشريف.. وللأسف ماتوا مخنوقين بالدخان زى صدر المدرسين محمد بن المسكين وبعض خدام المسجد وامناء خزائن دار الحرم.. بيحكى السمهودى عن الحريق في كتابه "وفاء الوفا في اخبار دار المصطفى..

"عظمت النار حتى صارت كبحر لجى من نار ولها شهيق وزفير والسن تصعد في الجو.. وصار لفحها يؤثر من البعد حتى اثرت في النخلات التي بصحن المسجد"

وصلت اخبار الحريق الى الشريف زين الدين فيصل الجمازى أمير المدينة.. الراجل قام من مكانه مخضوض لأن قبلها بيوم واحد كان زاره واحد من الاعراب وحكاه عن حلم غريب شاف فيه ان السماء فوق المسجد النبوي ملبانه جراد ظهر بعده نار عظيمة.. فأخذ النبي عليه الصلاة والسلام النار وقال: أمسكها عن امتي.

من شدة النار الى كانت ماسكة في السقف الى فوق الحجرة الشريفة.. ذاب رصاص القبة وسقطت على القبة السفلية علشان النار تمسك في عمدان المسجد الى كانت معموله من حجر ابيض قابل للاشتعال.. القبة السفلية سقطت بدون اشتعال وحات الحجرة النبوية من النار.. العمدان تفتت من شدة النار.. ستر رينا ان النار مشيت في عكس اتجاه الحجرة النبوية الشريفة.. 120 عمود من عمدان المسجد وقعوا يومها محروقين ومتفتتين بسبب قوة الحريق لكن الحجرة النبوية الشريفة لم تتأذى.

حاصر الناس النار في 8 اماكن وبدأوا محاولة ازالة الردم الناتج عن الحريق بس مقدروش.. فضل الردم واثار الحريق موجودة لحد ما شافها زوار المسجد في موسم الحج.. الخبر وصل الى جزيرة رودس واهلها من غير المسلمين فأظهروا فرح عظيم وعلقت الزينات ودقت نواقيس الكنائس ابتهاجا بالمصيبة.. لكن في اليوم التالي اصاب الجزيرة زلزال عظيم هدم الكنيسة الكبيرة ودمر البيوت وكان الموتى بالالاف تحت الانقاض.. كان كل الى جاى على اسكندرية من رودس ملوش حكاية الا الخراب الى حل عليهم بسبب الزلزال.. وهو شيء اعتبره السمهودى في وفاء الوفا من الآيات الربانية.

مكانش في وقتها سلطان للمسلمين يقدر يقف للحادث ده الا قايتباى.. لما وصله الخبر اصابه غم عظيم وأمر بوقف كل اعمال البناء والعمارة في مصر وتحويل كل موارد الدولة لإعادة اعمار المسجد النبوي.. ادرك ان المهمة تكليف وتشريف واختبار من الله عزوجل.. كرامة ما بعدها كرامة كان هو اهل لها.. امر السلطان فوراً برحلة الى المدينة تحت رئاسة أمير الحج الامير سنقر الجمالي السيفي مع 20 الف دينار وأكثر من 100 صناعي من خيرة صناعية مصر النجارين والدهانين والنجارين والمرحمين "بتوع الرخام" والحدادين وعدد كبير من الجمال والحميز شابلين المواد الخام المطلوبة.. بعد كده عين السلطان قايتباى الخواجة شمس الدين بن الزمن مسئول عن المشروع كله ويعتله اكثر من 200 جمل و100 حمار و300 عامل من اهل الصنعة.. كل دول خدوا اجرتهن عن الشغل مقدم.. بيقول السمهودى ان قوافل المؤن واحمال الدواب لم تنقطع ابدًا من مصر طول فترة التجديد.

لما بدأوا اعمال الترميم لاحظوا ان جدار الحجرة النبوية الداخلي مشقوق ومائل.. امر السلطان قايتباى بإعادة بناؤه بشكله الحالي وكسا الحجرة كلها بالرخام الصلب من الداخل والشبابيك النحاسية من الخارج.. بلغ أجمالي ما انفقته قايتباى في تجديد وترميم المسجد 120 الف

دينار ذهب في سنتين.. ورغم المشهور عن قايتباى انه كان جشع في جمع الأموال.. الا انه انفق المبلغ الكبير ده على المسجد النبوي بسهولة جدا.. ولم يعتبره قايتباى مال ضايع ابدا.

في سنة 891هـ انهم اكتشفوا تشققات في القبة الى فوق الحجرة الشريفة وميل في المأذنة الرئيسية بسبب استخدام البنائين مواد غير صالحة للبناء والاساس الغير متين.. عزل السلطان قايتباى الخواجة شمس الدين وعين مكانه الشجاعى شاهين الجمالي في وظيفة شاد عمارة المسجد النبوي.. اهل الخبرة قالوا ان ميل المأذنة حصل بسبب ضعف الاساس.. فهدموا القبة والمأذنة وحفروا اساس اعمق لحد ما وصلوا للمية.. بعدها تفننوا في بناء المأذنة الجديدة من الحجر الاسود الصلب حتى اصبحت بشكلها الحالي.. قال عنها السمهودى "لم يُرى قبلها في المدينة الشريفة مثلاً".. اما القبة فعملوها من الحجر والجبس الابيض وكانت قبل كده خشب.. وبني السلطان فوق القبة الصغيرة قبة اكبر من الحجر كساها باللون الازرق.. وبني قبة أصغر فوق محراب سيدنا عثمان كساها باللون الفضي.. فضلت قبة المسجد النبوي الرئيسية زرقاء لحد زمن السلطان عبد الحميد الثاني الى جدد القبة الخارجية وكساها بالأخضر.. ومن يومها لحد النهارده وهى خضراء.. والمدينة المنورة كله خضراء.

اقصر طريق علشان توصل للروضة الشريفة هو انك تدخل من باب السلام.. هتلاقيه مميز بالمأذنة العثمانية المدببة فوقه.. ده الركن الى جدده السلطان عبد المجيد الأول.. هتمشى مع الناس في الرواق الطويل.. على يمينك وشمالك هتلاقى نقوش نباتية جميلة وكتابات بالخط الديواني والثلاث فيها اسماء السلاطين العثمانيين الى جددوا المسجد من أيام السلطان سليمان القانوني.. بعد شوية على شمالك وقبل الحجرة الشريفة ب 10 متر هتلاقى لوحة فيها النص التأسيسي الى كتبه السلطان قايتباى سنة 888 هـ بمناسبة تجديد المسجد بعد الحريق.. لو خرجت من المسجد من باب جبريل او باب البقيع هتلاقيك في اقرب مكان لأجمل مأذن المسجد النبوي الشريف واكثرهم متانة وهيبة.. اقف شوية تحتها علشان تحس بالفخر وانت بتتفرج على المأذنة الوحيدة الى فضلت على حالها من يوم ما اتبنت سنة 888 هـ.

المأذنة الى عملها سلطان مصر.. الأشرف سيف الدين قايتباى ..

لما كانت مصر هي التي بتوزع الرز على العالم.

## نار الحجاز

لو اتصدمت من اللى حكيت هتولك امبارح عن حريق المسجد النبوي.. يبقى خليني اقولك ان ده الحريق الثاني.. الحريق الأول كان أشد في المصاب وأقوي في التأثير خصوصاً انه حصل بعد كارثة طبيعية ذات مغزى مخيف حذرنا منها سيدنا النبي.. وقبل كارثة تاريخية ثانية قال عنها ابن الأثير "لقد بقيت عدة سنين معرضاً عن ذكر هذه الحادثة استعظاما لها كارها لذكرها.. فمن الذى يسهل عليه كتابة نعى الإسلام والمسلمين.. فيا ليت امي لم تلدني.. يا ليتني مت قبل هذا وكنت نسيا منسيا"..

ايه الموضوع بقى؟

الحكاية كلها حصلت اول يوم جمعة في شهر رمضان سنة 654 هـ زى ما ورد في كتاب "مرآة الجنان وعبرة اليقظان في معرفة ما يعتبر من حوادث الزمان" للإمام اليافعي وكتاب "وفاء الوفا بأخبار دار المصطفى" للسمهودي.. الاثنين اتفقوا على نفس الرواية.. الفرق بينهم ان اليافعي اتولد بعد الحادث 50 سنة.. فربما يكون نقل الرواية من الحكايات المتواترة حواليه.. بينما السمهودي نقلها من مخطوط اسمه "عروة الوثيق في النار والحريق" للقبط القسطلاني اللى كان معاصر للأحداث.. مفيش فرق بين الروايتين.. الاثنين مرعبتين ويسيبوا الركب.

بعد انتهاء صلاة تراويح الجمعة الأولى من شهر رمضان سنة 654 هـ.. دخل واحد من خدام المسجد اسمه أبو بكر بن أوحى للمخازن الموجودة في الجهة الشمالية الغربية من المسجد.. كانت العادة في شهر رمضان ان لما العتمة تبدأ.. يخرجوا بعض القناديل اللى بتتور بالزيت من المخازن ويلقوها على المآذن.. الخادم كان شال في ايده قنديل صغير عليه قطعة قماش كتان مبلله بالزيت علشان ينور لنفسه الطريق.. وهو في المخزن حط القنديل اللى في ايده على صندوق من الصناديق الموجودة حواليه.. متعرفش بقى القنديل وقع وللا حصل ايه بالظبط.. المهم ان النار شبطت في الصناديق الخشبية الموجودة.. ومنها الى السجاجيد والخضر والستائر اللى كانت مكدسة في المخازن.. النار كانت شديدة مرعبة قال عنها المؤرخين "وماهي إلا ساعة حتى أتت النار على جميع المسجد وما فيه"

الناس شافت النار مولعة في المسجد فانتشروا في المدينة يصرخوا ويستعيذوا منها.. بعضهم حاول يطفئها بوسائل بدائية زى الرمل والمية.. بس للأسف النار امتدت للسقف وفي طريقها مسكت في القناديل اللى كانت موجودة على العمدان وصحن المسجد.. ودى كانت مليانه زيت.. فبقت وكأنها مساعد للنار انها تمتد اكر واكثر.. النار دمرت المسجد كله عن بكرة ابيه في وقت قليل جداً.. لم يسلم من النار دى الا القبة اللى بناها الخليفة أبو العباس الناصر لدين الله في وسط المسجد علشان يحفظ فيها كنوز الحرم "زى المصحف العثماني ومقتنيات الرسول والصحابة" ودى الكنوز اللى نقلها حاكم المدينة المنورة في العصر العثماني - فخر الدين باشا - سنة 1916م الى إسطنبول علشان يحميها من الانجليز.. ده الحادث المعروف تاريخياً باسم "سفر برك".. كل الآثار دى موجودة حالياً للعرض في متحف الأمانات المقدسة في قصر طوب كاي.. هسيبك في التعليقات مقال كتبتة سابقاً عن سفر برك ومسجد العنبرية وفخر الدين باشا.

لما وصل الخبر الى أمير المدينة الشريف عيسى بن شريحة.. قام الأمير من فوره وبعث رسالة للخليفة العباسي المستعصم بالله يستنجد بيه.. المستعصم مكانش قادر يعمل اى حاجه.. خد بالك اننا بنتكلم عن سنة 654 هـ.

بعد الحادث بأيام قدر الناس يعزلوا مكان للصلاة في المسجد المتهدم المحترق.. مع بداية سنة 655 هـ بدأت اعمال تنظيف مخلفات الحريق.. بس لما وصلوا للقبور الشريفة اصابهم الرعب.. مين يقدر يقرب من الحجرة المدفون فيها سيدنا النبي عليه الصلاة والسلام.. الناس خافت تحرك او تشيل اى شيء لأحسن حاجه تقع على القبر الشريف فتؤذى جسد حبيبنا المصطفى.. واللى زاد وغطى وارعب الناس اكثر.. ان مكان الحريق وفي محيط الحجرة النبوية الشريفة.. انكشف التراب عن جثمان ظهرت منه الساق.. من اول الركبة لحد القدمين.. في اول الامر الناس ارتعبت لأنهم افكروها ساق سيدنا عمر.. لكن واحد من الحضور قال انه يعرف صاحب الساق دى فمن الأرجح انه يكون واحد من ضحايا الحريق.. كمان جسد الخليفة عمر لازم هيكون اتحلل لأنه متوفى من اكر من 600 سنة.

لما المكتوب وصل للخليفة المستعصم.. بعت فلوس وصنایعیه علشان إعادة الاعمار مع حملة الحج العراقية.. حازه كده لحفظ ماء الوجه.. لكن القدر لم يمهله علشان يكتب في تاريخه السيء حدث واحد كويس.. الخليفة والخلافة كانوا في أسوأ أيامهم وآخرها.. حال يلزمه فعلا نهاية زى اللى هتحصل كمان سطرين دى.

يبدو الحادث – رغم قوته – مجرد حريق دمر مبنى.. المبنى في الآخر حجارة يسهل إعادة بناءها تاني حتى لو كانت مسجد الرسول نفسه.. بس الحادث ده بالذات مكانش مجرد حريق.. ده كان مصيبة من اعظم المصائب اللى نزلت على امة الإسلام والمسلمين في تاريخها كله بسبب الحادث اللى حصل قبله.. والحادث اللى حصل بعده.

قبل الحريق ده ب 3 شهور حصل في المدينة المنورة زلزال عظيم اهتزت بسببه الأرض بالمدينة المقدسة 18 مرة في يوم واحد.. مما أدى الى انفجار بركاني في منطقة اسمها "حرة رهط" شمال المدينة.. الانفجار ده أدى الى تدفق انهار من الحمم البركانية في المدينة وطرقاتها.. النار والحمم البركانية أضاءت المدينة وقلبت ليها نهار حتى ان النساء كانت بتغزل في المساء على ضوء النار دى.. والغريب انها كانت نار لا تحرق.. نار بدون حرارة.. ضوء شديد مبهر بس.. الناس محرقتش ولا شجرة من شجر المدينة رغم انها في الأول والأخر حمم بركانية.. لافا يعنى.. لكن مين يقول ان اللافا اقوى من دعوة رسول الله للمدينة واشجارها ونخيلها؟؟ عارف ايه المرعب في كده؟؟

المرعب ان الرسول عليه الصلاة والسلام قال في حديث رواه مسلم " لا تَقُومُ السَّاعَةُ حَتَّى تَخْرُجَ نَارٌ مِنْ أَرْضِ الْحِجَازِ تُضِيُّ لَهَا أَعْنَاقُ الْإِبِلِ بِبُصْرَى.." وبُصْرَى دى مدينة في الشام.. تخيل انت بقى الموقف ده وانت شايف النار دى وتفتكر حديث سيدك النبي.

بعد البركان والنار دى ب 3 شهور.. حصل الحريق.. اللى هو يعنى الناس كانت مستوية على الآخر ومش ناقصة..

بس استني..

لسه المصيبة الكبيرة محصلتش..

المصيبة الكبيرة حصلت بعد حريق المسجد ده بسنتين..

مصيبة كان اسمها هولاكو..

هولاكو دخل بغداد بسنايك خيله سنة 656 هـ (1258م).. وعمل مع المستعصم اللى يستحقه..

وطبعا انت مش منتظرني اقولك تفاصيل دخلة التتار على بغداد كانت عاملة ازاى.. ربما حكيت احداث اليوم ده بس في مقالات منفصلة.

من السياق التاريخي هتفتكر معايا ان في نفس توقيت دخول التتار الى بغداد اتقتل السلطان المعز عز الدين ايبك والسلطانة شجر الدر في مصر.. الشام كان فيها واحد من أسوأ واحط الخونة على مدار التاريخ هو الناصر يوسف "حفيد حفيد السلطان ناصر الدين والدنيا صلاح الدين بن أيوب".. والخوارزميين راحوا بلا رجعة.. يعني بالبلدي كده.. مفيش في المنطقة راجل يُعتمد عليه في إعادة الحياة الى مسجد الحبيب المصطفي..

عارف مين اللى قام بالمهمة دى؟؟

مصر من تاني يا صديقي؟؟

لما الناس في المدينة عرفوا باللي حصل للخليفة المستعصم.. بعثوا مراسيل للبلد الوحيدة اللى عمرها ما كانت معتدية ولا عمرها ردت مستجير ولا خذلت سائل ولا خيبت فيها رجاء.. بغض النظر عن مين بيحكم وبيحكم ازاى.. لكن دايم هتلاقى الإجابة واحدة..

مصر..

وصلت رسائل الاستغاثة للسلطان نور الدين على الصالحي "ابن ايبيك" .. وبعث فعلا فلوس وصنایعيه للمدينة لزوم إعادة الاعمار وكمل المهمة بعده السلطان المظفر سيف الدين قطز والسلطان الظاهر أبو الفقراء والمساكين ركن الدين بيبرس .. انشغالهم بتقطيع جيش هولاء واكل لحوم عساكره احياء لم يشغلهم ابدا عن مهمة إعادة اعمار مسجد الحبيب المقدسة .. وصارت بسببهم سنة في حكام مصر.. كل حاكم يبجي لازم يحط بصمته على المسجد الشريف .. زى المنصور قلاوون وابنه الناصر محمد والاشرف قايتباي من بعدهم .. حتى الغوري يا جدع كان له بصمه في المسجد رغم أيامه السوداء .. ومش بس في عصر المماليك .. مين ينسى موقف وزير الزراعة في وزارة النحاس باشا سنة 47 .. احمد باشا حمزه .. الى نور المسجد كله بالكهرباء بدل الزيت .. وعلى فكرة .. محطة الكهرباء الى عملها لسه موجودة وشغالة لحد يومنا هذا .. محدش قدر ولا هيقدر يمسخها لأنها وقف.

مصر كانت وكانت وكانت .. رغم ان الى مسكوها بعد كده خذلوها وخذلوا الدين وخذلوا أهلها .. الا ان في أهلها خير بيطلع وقت اللزوم.

خير يتزامن ظهوره مع تعليق أجساد الظلمة على المشانق ..

قريب ان شاء الله.

الفترة من 654 هـ الى 656 هـ كانت سنين صعبة اوى على المسلمين .. حصل فيهم 3 احداث ورا بعض اقلهم يتوصف بأنه كارثة ..

نار الحجاز – حريق المسجد النبوي الثاني – سقوط بغداد

حكينا عن حريق المسجد النبوي قبل كده .. وحكينا كمان عن سقوط بغداد المؤلم الى تردد مؤرخين كبار زى ابن الاثير انه يسجله .. ومش فاضل الا حكاية نار الحجاز.

لو بصيت للموضوع ده كحدث جيولوجي او ظاهرة طبيعية عادية من الظواهر الى بتحصل في الكوكب كل يوم .. هتعرف ان سنة 654 هـ (1256م) حصل زلزال قوى في المدينة المنورة أدى الى انفجار بركاني استمرت بسببه سيول الحمم البركانية "اللافا" في شوارع المدينة 3 شهور .. قبل ما تبرد وتتجبر وينتهى كل شيء وتسبب وراها اراضى شديدة الخصوبة وكمية احجار بركانية شديدة الصلابة سماها اهل المنطقة "الحجر الحرّاوى" .. استخدموها بعد كده في البناء .. زى مسجد العنبرية الى بناه السلطان العثماني عبد الحميد الثاني كجزء من محطة قطار السكة الحديد الى كان بيخرج من إسطنبول ويقف في المدينة.

بس كده ..

لكن في تفصيلة صغيرة كده ممكن تخليك تشوف الحدث ده بشكل تاني خالص ..

التفصيلة دى هي حديث سيدنا رسول الله ..

جاء في الصحيحين عن رواية أبو هريرة .. قال رسول الله صلى الله عليه وسلم " لا تقوم الساعة حتى تخرج نار من أرض الحجاز تضيء لها اعناق الأبل بْبُصري" .. بُصرى دى مدينة في الشام .. افكر المعلومة دى كويس.

لم نعهد من كلام سيدنا النبي الا الصدق .. تخيل نفسك نمت وصحيت لقيت نفسك عايش في احداث حكاها الرسول عليه الصلاة والسلام بالتفصيل من اكثر من 600 سنة.

الأدلة الجيولوجية التاريخية على حقيقة الحدث كثير ومتوفرة .. بس خلينا نشوف الناس حكمت الموضوع ده في التاريخ ازاى.

معايا 3 مصادر حكمت عن الحادثة دى ..

المصدر الأول.. كتاب تاريخ المدينة المنورة لأبن فرحون المالكي كتب فيه الآتي:

"فأما ظهور النار فكان آية عظيمة.. فيها تصديق لما في الصحيحين من حديث رواه أبو هريرة.. وقد شرح كثير من الناس أمرها وأرخوا خبرها وبعضهم يزيد على بعض في وصفها.. وسأذكر خلاصة ما قيل في ذلك معتمدا على ما نقله الشيخ الإمام العلامة أبو شامة الدمشقي الشافعي في كتابه ذيل الروضتين في أخبار الدولتين نقله من رسائل وصلت إلى دمشق من المدينة.

فمن ذلك كتاب القاضي شمس الدين سنان بن عبد الوهاب بن نميلة الحسني قاضي المدينة يومئذ الى بعض أصحابه في دمشق.. لما كان ليلة الأربعاء ثالث شهر جمادى الآخرة أحد شهور سنة أربع وخمسين وستمائة حدث في المدينة في الثلث الأخير من الليل زلزلة عظيمة أشفقنا منها.. وباتت باقي تلك الليلة تزلزل.. ثم استمرت تزلزل كل يوم وليلة مقدار عشر مرات.. والله لقد زلزلت مرة ونحن حول الحجرة الشريفة اضطرب لها المنبر حتى إنا سمعنا منه صوتا للحديد الذي فيه.. زلزلة عظيمة إلى أن اضطرب منام المسجد بعضه ببعض وسمع لسقف المسجد صرير عظيم.. ثم بعد ذلك انقطعت الزلازل وانجست من الأرض نار عظيمة كان ابتدؤها مثل مسجد رسول الله.. ثم تزايدت حتى صارت مثل المدينة العظيمة.. وما ظهرت لأهل المدينة إلا ليلة السبت فاشفقوا منها إشفاقا عظيما.. فطلعت إلى الأمير عز الدين منيف بن شيحة وقلت له.. قد أحاط بنا العذاب ارجع إلى الله تعالى.. فأعق كل ممالكه ورد على الناس مظالمهم.. ثم قلت للأمير.. انزل إلى النبي.. فهبط وتبنا في المسجد ليلة الجمعة وليلة السبت ومعنا جميع أهل المدينة.. حتى النساء والصغار.. ولم يبق أحد في النخيل حتى جاء إلى الحرم الشريف.. وبات الناس يتضرعون ويصلون وأحاطوا بالحجرة الشريفة كاشفين رؤوسهم وأقروا بذنوبهم وابتهلوا إلى الله عز وجل واستجاروا بنبيه وأخلصوا إلى الله تعالى وتاب كل من في المدينة."

ويكمل ابن فرحون على لسان القاضي سنان بن عبد الوهاب..

"ثم ظهرت النار لها ألسن تصعد في السماء أكثر من علو ثلاث منائر.. ثم ظهر لها دخان عظيم في السماء ينعقد حتى يصير كالسحاب الأبيض.. وبقيت السماء كالعلقة.. والناس في مثل ضوء القمر وألسنة النار حمر طالعة تظهر في الليل مثل المشاعل.. وأيقن الناس بالهلاك.. وبقيت على حالها تلتهب التهابا عظيما وهي كالجبل العظيم وكالمدينة عرضا يخرج من وسطها مهود وجبال نيران تصعد في السماء ثم تهوي فيها.. ثم تخرج كذلك ثم تعود.. وحسه كالرعد.. وبقيت كذلك أياما ثم سالت سيلا نارا في وادي احيلين.. وتزايد ذلك السيل من النار وسد الطريق ثم طلع إلى الحرة وهو بحر نار يجري إلى أن قطعت وادي الشظاة وسدت طريق الماء.. والحجارة مع النار تتحرك وتسير وهي تأكل الحجارة وتذيبها.. ثم صار يخرج من النار حجارة ترمي بها خلفها وأمامها حتى بنت لها جبلين خلفها وأمامها ولذلك انسد طريق الماء.. ولها صوت عظيم من آخر الليل إلى ضحوة النهار.. ثم انحدر ذلك السيل مع وادي الشظاة حتى حاذى جبل أحد.. وخاف الناس منها خوفا عظيما ووجلّت القلوب.. ثم سكن قتيورها الذي يلي المدينة وطفيت مما يلي العريض بقدرة الله تعالى.. ورجعت تسير في الشرق.. واستمر عظمها وزيادتها في تلك الحرة وهي ترمي بشرر كالقصر وتأكّل الأرض والحجارة."

وقال العلامة أبو شامة الدمشقي الشافعي "وظهر عندنا بدمشق أثر ذلك الكسوف من ضعف نورها على الحيطان.. وكنا حيارى من سبب ذلك إلى أن بلغنا الخبر عن هذه النار.. وكل من ذكر هذه النار يقول في آخر كلامه.. ولا أقدر أشرح وصفها على الكمال"

خدت بالك من كلام أبو شامة؟

قال انهم شافوا اثر ضوء نار الحجاز على حيطان دمشق ..

وسيدنا النبي قال ايه؟

تضيء لها اعناق الأبل ببصري..

طيب.. لحد كده برضه وصف طبيعي لانفجار بركاني شديد.. مفيش حاجه غريبة او تأثير الدهشة.. كون حديث النبي تحقق.. فده شيء مش محل نقاش أصلا.. المثير للدهشة هو الى كتبه المؤرخ جمال الدين المطري في كتابه "تاريخ المدينة الشريفة.."



قال المطري أن عز الدين سنجر حكاه أن أمير المدينة المنورة -منيف بن شيحه- بعته يشوف حكاية النار دى ايه عن قرب.. فلما قرب سنجر منها محسش منها بأى حرارة.. مجرد ضوء شديد.. وكمان لقي النار دى بتاكل الحجارة بس لكن الشجر لأ.. ولما حب يتأكد.. حط سهم في مجرى سيلان النار.. فالنار اكلت نصل السهم "المعدني" لكن السهم نفسه لا.. فراح قالب السهم وحط ديله في النار.. فالنار اكلت الريش الموجود في اخر السهم.. لكن السهم الخشب نفسه.. برضه لأ.

يعنى ايه؟؟ النار دى مش بتاكل الخشب!!!!

طب ازاي؟ وياه الحكاية الغريبة دى؟؟ معجزة جديدة دى من معجزات المدينة وللا ايه!!!!

الحكاية ان سيدنا النبي حرم المدينة المنورة تحريم كامل على كل شر ووباء ودمار..

روى أبو سعيد الخدري عن سيدنا النبي حديث أخرجه مسلم وصححه الألباني في صحيح الجامع.. "اللهم إن إبراهيم حرم مكة فجعلها حراماً، وإن حرمّت المدينة ما بين مأزمتها؛ ألا يُراق فيها دمٌ، ولا يُحملُ فيها سلاحٌ لقتالٍ، ولا يُخبِطُ فيها شجرةٌ إلا لعلفٍ."

في رواية لأبي داود قال رسول الله صلى الله عليه وسلم "لَا يُحْتَلَى خَلَاهَا، وَلَا يُنْفَرُ صَيْدُهَا، وَلَا تُلْتَقَطُ لُقَطُهَا إِلَّا لِمَنْ أَشَادَ بِهَا، وَلَا يَصْلُحُ لِرَجُلٍ أَنْ يَحْمِلَ فِيهَا السَّلَاحَ لِقِتَالٍ، وَلَا يَصْلُحُ أَنْ يُقَطَعَ مِنْهَا شَجَرَةٌ إِلَّا أَنْ يَغْلِفَ رَجُلٌ بَعِيرَهُ" .. رواه مسلم

عن أنس رضي الله عنه عن النبي صلى الله عليه وسلم قال "المدينة حرمٌ من كذا إلى كذا، لا يُقَطَعُ شَجَرُهَا، وَلَا يُحْدَثُ فِيهَا حَدَثٌ، مَنْ أَخْدَثَ حَدَثًا فَعَلَيْهِ لَعْنَةُ اللَّهِ وَالْمَلَائِكَةِ وَالنَّاسِ أَجْمَعِينَ" .. رواه البخاري

في يوم صعب من أيام نهاية الزمان هيظهر الدجال في الأرض.. هيفتن كل الناس ويدخل كل البلاد ويعدى على كل المدن.. الا مكة المكرمة.. والمدينة المنورة..

سيدنا النبي مش بس سابلنا دين ودستور لو مشينا وراه هنكسب الدنيا والآخرة.. لا.. ده كمان سابلنا مدينة آمنة جميلة.. فيها علاج نفسي للقلوب الى اعتبتها الدنيا.. مدينة زيارتها تغسل روحك.. والاحتماء بيها يعصمك من فتنة الدجال.. عليه الصلاة والسلام .

(يتبع)

نكمل قصة نار الحجاز؟؟

كنا بنتكلم عن الفترة من 654 الى 656 هـ.. واد ايه كانت صعبة على المسلمين وازاي حصل فيها 3 أحداث اقل ما فيهم نقدر نسميه كارثة بمنتهى السهولة.. حكينا عن كارثتين فيهم قبل كده.. والمرة دى بنتكلم عن الكارثة الثالثة .. نار الحجاز..

عندنا 3 مصادر رئيسية نقلت القصة دى ..

المصدر الأول: كتاب تاريخ المدينة المنورة لأبن فرحون المالكي.. وده غطيناه في الجزء الاول من الكلام ده..

المصدر الثاني: كتاب تاريخ مكة المشرفة والمسجد الحرام والمدينة الشريفة والقبر الشريف لابن ضياء المكي الحنفي ..

قال ابن ضياء في كتابه الآتي:

"وقصة هذه النازلة على ما نقله ابن أبي شامة والمطري وغيرهما.. وذلك أنه لما كانت الليلة ليلة الأربعاء ثالث جمادى الآخرة سنة أربع وخمسين وستمائة ظهر بالمدينة دوي عظيم ثم زلزل رجفت منها المدينة والحيطان ساعة بعد ساعة.. وكان بين اليوم واللييلة أربعة عشر زلزلة.. واضطرب المنبر إلى أن سمع منه صوت الحديد.. واضطربت قناديل المسجد وسمع لسقف المسجد صرير.. وتمت الزلازل إلى يوم الجمعة ضحى ثم انبجست الأرض بنار عظيمة في واد يقال له: أخيلين بينه وبين المدينة نصف يوم، ثم انبجست من رأسه في الحرة الشرقية من وراء قريظة على طريق الشوارقية بالمقاعد.. ثم ظهر لها دخان عظيم في السماء ينعدق حتى يبقى كالسحاب الأبيض.. وللنار ألسن محمرة صاعدة في الهواء.. وبقي الناس في مثل ضور القمر.. وصارت النار قدر المدينة العظيمة.. وما ظهرت إلا ليلة السبت.. وكان اشتعالها أكثر من ثلاث منائر وهي ترمي بشرر كالقصر.. وشررها

صخر كالجمال، وسال من هذه النار واد يكون مقداره خمسة فراسخ وعرضه أربعة أميال وعمقه قامة ونصف.. وهو يجري على وجه الأرض ويخرج منه أمهاد وحبال يسير على وجه الأرض.. وهو صخر يذوب حتى يصير كاللآك فإذا جمد صار أسود وقبل الجمود لونه أحمر.. وسال منها واد من نار حتى حاذى جبل أحد.. وسالت من أخيلين نار تنحدر مع الوادي إلى الشظاة، والحجارة تسير معها حتى عادت تقارب حرة العريض.. ثم وقعت أياماً تخرج من النار ألسن ترمي بحجارة خلفها وأمامها حتى نبت لها جبل.. ولها كل يوم صوت من آخر النهار ورؤي ضوء هذه النار من مكة ومن ينبع.. ولا يرى الشمس والقمر من يوم ظهور النار إلا كسفين.. قال ابن أبي شامة.. ظهر عندنا بدمشق أثر الكسوف من ضعف نور الشمس على الحيطان، وكلنا حيارى من ذلك ما هو حتى أتى خبر النار"

جمال الدين المطري كان رجل فاضل عارف بالحديث والفقه والتاريخ.. نسب إلى المطرية في مصر.. عاش في المدينة المنورة وتولى نيابة القضاء فيها.. وله كتب في تاريخ المدينة المنورة زي "التعريف بما أنست الهجرة من معالم دار الهجرة" و"تاريخ المدينة الشريفة" إلى ذكر فيه حادث نار الحجاز وكتب عنها الآتي:

"سارت النار من مخرجها الأول إلى جهة الشمال ثلاثة أشهر تدب كدبيب النمل.. تأكل كلما دبت عليه من جبل أو حجر ولا تأكل الشجر.. فتثير كل ما مرت عليه فيصير سداً لا مسلك فيه لإنسان إلى منتهى الحرة من جهة الشمال.. فقطعت في وسط وادي الشظاة إلى جبل وغيره فسدت الوادي المذكور بسد عظيم بالحجر المسبوك بالنار كسد ذي القرنين.. لا يصفه إلا من رآه طولاً وعرضاً وارتفاعاً.. وانقطع وادي الشظاة بسببه وصار السيل منحس خلف السد وهو واد عظيم فيجتمع خلفه المياه حتى يصير بحراً كنييل مصر عند زيادته.. شاهدهته كذلك في شهر رجب من سنة تسع وعشرين وسبع مائة"

ويكمل المطري كلامه بحكاية ثانية حكاها له علم الدين سنجر المغربي.. وده كان من عتقاء الأمير عز الدين منيف بن شيحة أمير المدينة.. وبيقول على لسان علم الدين سنجر:

"أرسلني مولاي الأمير المذكور بعد ظهور النار بأيام ومعى شخص من العرب يسمى خطيب بن منان وقال لنا: اقربا من هذه النار وانظرا هل يقدر أحد على القرب منها؟ فخرجنا إلى أن قربنا منها فلم نجد لها حراً.. فنزلت عن فرسي وسرت إلى أن وصلت إليها وهي تأكل الصخر.. ومددت يدي إليها بسهم فغرق النصل ولم يحترق واحترق الريش"

نار تأكل كل شيء إلا الخشب.. حكينا عن السبب ده في الجزء الأول من الحكاية دى..

خد عندك كمان الى حكاها السمهودى في كتابه وفاء الوفا في اخبار دار المصطفى.. نقلا عن مخطوط قديم للقبط القسطلاني اسمه عروة التوثيق في النار والحريق.. السمهودى بيقول ان الستات في المدينة المنورة كانت بتغزل على ضوء النار دى في ساعات الليل البهيم.. النار من شدة الضوء.. قلبت ليل المدينة نهار.. ولكن زى ما قلنا.. ضوء بس من غير حرارة.. طيب ممكن نقف هنا شوية نفكر في الرواية دى بمنطقية شوية..

هو في بركان بيحدف نار ساقعة يا جدعان!!!

ان كان المؤرخ مجنون.. يبقى المستمع عاقل..

هل ممكن فعلا انفجار البركان يحدف كل كمية الحمم دى - حسب وصف الناس - بس من غير حرارة؟

منطقياً.. هو ده الى لازم يكون حصل فعلاً.. لو راجعت احداث انفجار فيزوفوس "في إيطاليا" مثلاً.. هتلاقى ان البركان في ساعة واحدة بس.. دفن تحته مدينة كاملة وافناها تماماً يا اما بالحرارة في اول الانفجار.. يا اما بالدفن تحت الرماد.. وموجود حالياً اثار جثث متحجرة في مدينة بومبي نفسها شاهد على الكلام ده.. فلو كانت الحمم الى خرجت من بركان المدينة نار لها حرارة فعلاً.. كانت المدينة المنورة كمان اختفت.. خصوصاً ان الروايات عنها بتقول انها استمرت 3 شهور كاملة.. مش بس ساعة واحدة زى بركان فيزوفوس بتاع بومبي..

طيب.. نشوف المصدر الثالث من مصادر الحكاية دى..

كتاب اشرط الساعة للأمام النووي.. قال فيه.. في المطلب الثالث..

"خرجت في زماننا نار بالمدينة سنة أربع وخمسين وست مائة، وكانت نارا عظيمة جداً، من جنب المدينة الشرقي وراء الحرة، تواتر العلم بها عند جميع الشام وسائر البلدان، وأخبرني من حضرها من أهل المدينة.. وقال ابن كثير.. وقد ذكر الشيخ شهاب الدين أبو شامة.. وكان شيخ المحدثين في زمانه وأستاذ المؤرخين في أوانه.. في سنة أربع وخمسين وست مائة في يوم الجمعة خامس

جمادى الآخرة ظهرت نار بأرض المدينة النبوية في بعض تلك الأودية طول أربعة فراسخ وعرض أربعة أميال.. تسيل الصخر حتى يبقى مثل الآنك ثم يصير كالفحم الأسود.. وان ضوؤها كان الناس يسرون عليه بالليل إلى تيماء.. وأنها استمرت شهرا.. وقد ضبط ذلك أهل المدينة وعملوا فيها أشعارا..  
ناخذ بالنأ من حأه ..

مؤرخين الحكاية دى "أبو شامة الدمشقى وابن فرحون والقطب القسطلانى والنووي والمطري" .. كلهم كانوا معاصرين .. ومنهم الى كان عايش فى المدينة المنورة وقت الحادثة .. يعنى حكوا الى شافوه .. مش كتبوا الى سمعوه ..  
هل بعد كده فى اى شك فى اى كلمة "موثقة" قالها سيدنا النبى عليه الصلاة والسلام ؟  
حط نفسك مكان اهل الفترة دى كده ؟؟

السنة دى زلزال مرعب يصحبه بركان مخيف .. مخيف لأنه مش طبيعى .. مخيف لان سيدنا النبى حكالنا عنه قبل ما يحصل ب 600 سنة ..

والسنة الى بعدها يتحرق مسجد الحبيب المصطفى عن بكرة ابيه ..  
والسنة الى بعدها تسقط حاضرة الخلافة الإسلامية سقوط مدوي مهين .. سقوط يموت فيه خليفة المسلمين موته اقل ما يقال عنها انها إهانة ما بعدها إهانة .  
أكفينا الشرىا رب .

## ما عظم وخفى من محاولات نبش قبر المصطفى

### المحاولة الأولى

=====

سيبوا اللي في ايديكوا وتعالوا شوفوا الصورة التي لم يشاهدها الا 0.01% من المسلمين حول العالم ولله الحمد..

0.01%.. يعني مليون مسلم تقريبا..

يا ترى كام واحد فيهم صدق انها فعلا قبر الرسول عليه الصلاة والسلام؟

كام واحد فيهم لم يمنعه حبه لمارك انه يعملها شير وهو مصدق؟؟

ماذا بينهم وبين الله حتى يشوفوا الصورة الى ملهاش اى ثلاثين لزمه دى؟؟

=====

قصتنا مع القبور قديمة.. ومع الهيد اكثر قدما.. احنا عندنا هبادين عمرهم من عمر الكوكب.. لا.. كوكب ايه.. احنا عندنا هيد وهبادين وجدوا قبل المجرة نفسها.. يعني الشمس اتخلقت وظهر بعدها الهيد وبعدين حصل الانفجار العظيم "ده لو كان صحيح يعنى".

لم يبدأ الهيد في تصور شكل قبر الرسول عليه الصلاة والسلام ولن ينتهى بقبور الاولياء الى مالية العالم الاسلامى شرقا وغربا واغلبها فستك.. رأس الحسين مثلا لها 8 مقامات مؤكده بين مصر وسوريا والعراق.. ال البيت مدفونين في كربلاء ومصر في نفس ذات الوقت.. وكيع استاذ الامام الشافعى مدفون جيب تلميذه في القاهرة رغم انه مجاش مصر اساسا.. في عمان (الأردن) هتلاقى قبر سيدنا شعيب وسيدنا موسى وسيدنا هاورن ويوشع بن نون وسيدنا ايوب وانبياء تانية كتير اوى مفيش دليل تاريخى او علمى او دينى واحد يوحد ربنا على صحة وجود اجسادهم الشريفة في الأماكن دى.

بس قبر الحبيب وضعه مختلف..

ده مكان حديث نسبيا.. 1400 سنة مش كتير يعنى علشان نكون متأكدين ان ده المكان الى اندفن فيه.. القصة هنا مش احنا متأكدين من دفنة في بيت السيدة عائشة الموجود في نفس المكان الحالى وللا لأ.. قصتنا هنا هو المقام والتركيبة الى فوق القبر..

التركيبة التي لم يشاهدها الا 0.01% من المسلمين..

معلش بقى.. اشمعنى يعنى ال 0.01% دول؟؟ عندهم واسطة يعنى؟؟

ليهم قرايب امناء شرطة مثلا؟؟

بص كده معايا على شكل التركيبة..

مش ده الشكل العثمانى لتراكيب القبور؟؟

مش ده بالظبط شكل قبر ارطغرل وعثمان الأول ومحمد الفاتح وسليمان القانونى وباقي سلاطين بنى عثمان؟؟

هل في تراكيب قبور بالشكل ده قبل العثمانيين؟؟

طيب هو مين الى جه الأول؟؟ الرسول عليه الصلاة والسلام الى توفي في القرن السابع الميلادى وللا العثمانيين الى ظهوروا في القرن الرابع عشر الميلادى؟

هل ده شكل عمامة الرسول؟؟

متمشيش معاك انها عمة جلال الدين الرومى مثلا؟؟

طيب لو ده قبر النبي.. فين قبر الصحابة الكرام.. الصديق والفاروق رضوان الله عليهم؟؟

الحاج الى الف الصورة دى.. ماذا بينه وبين الله علشان يكون بكل هذا الكم من الغباء الى يخلية ياخذ صورة قبر جلال الدين الرومى الموجود في قونيا في تركيا والمفتوح للزيارة حاليا وينسبه للرسول عليه الصلاة والسلام؟

كل ده من اجل حفنة لايكات؟؟

وماذا عن السيئات؟؟

هيقولك ما هو ممكن يكون الرسول اندفن في قبر عادى وبعد كده العثمانيين بنوا التركيبة دى كنوع من انواع التجديد للقبر الشريف زيه زى المسجد النبوى نفسه.. قبة المسجد الخضراء مثلا مكانتش خضراء يوم ما بناها المنصور قلاوون من الخشب وبعدين عدلها وصلحها ولاده واحفاده لحد ما السلطان قايتباى شالها خالص وبنائها من الاول بالفن والهندسة من الجبس الأبيض.. بعد كده اندهنت بالأزرق لحد ما ظهر فيها تشققات في زمن السلطان عبد الحميد الثانى الى جددها ورممها ودهنها باللون الاخضر الجميل الموجود حاليا.. يا اخى المسجد نفسه مفيهوش مأذنة شبة الثانية.. أجملهم بناها السلطان قايتباى وأشهرهم بناها السلطان عبد المجيد.. لو دخلت جوا المسجد هتلاقى اكثر من منبر أجملهم هدية من السلطان مراد الثالث.. الحجرة النبوية الشريفة نفسها عليها لوحة تأسيسية بتقول ان البناء الموجود حاليا بناه السلطان قايتباى.. بينما واجهة الحجرة عليها لوحة فضة هدية من السلطان احمد الثالث.. كل سلطان حكم بلاد المسلمين كان بيسابق السلاطين التانيين في وضع بصماته على الحرم الشريف.. الكلام ده ايام السلاطين العظام قبل ما النخل يطرح علمانية في تركيا وبلج في مصر.. يعنى وارد تكون التركيبة الى في الصورة دى من اعمال سلطان من العثمانيين حيث انها اقرب لتراكيب قبورهم فعلا.

بس لا.. خلينى اقولك ان الصورة رقم (1) دى لا تتجاوزوا مسألة الهبد يا افندم..

هبد صرف زيه زى اى هبد ملوش اى ثلاثين لزمه في الحياة.. هبد زيه زى الهبد بتاع مكان قبر عمرو بن العاص وان الذئب بتشوف العفاريت وان في غابة في المانيا اتشكل شجرها على شكل راية التوحيد وشجرة تانية معرفش فين اتشكلت على شكل راجل راکع في اتجاه القبلة.. ده طبعاً غير الهبد بتاع الحرم المكى الى باين منور من سطح القمر واسم ربنا الى بيظهر دايماً في الطماطم وعلى قشر البيض "البيض تحديداً مش البطاطس" وسماع صوت الاذان على القمر وان الصيام مفيد طبياً والاف مؤلفة غير منتهية من الهبدات الى الفها أشخاص لهم اهداف الله اعلم بيها لكنها مش في صالح الدين اكيد حتى لو سيطرت على قلوب الناس الطيبة.

وعلشان مبيقاش كلام مرسل.. خلينا نقرب شوية من الحجرة الشريفة نفسها..

مفيش حد فينا مش عارف تفاصيل اليوم الحزين الى ثقلت فيه الرأس الشريفة على صدر الزوجة الملتاعة في مصاب لا يضاهية اى مصاب في التاريخ قبل ما تهبط اليد الشريفة بلا حراك معلنه خروج الروح الطاهرة الى مستقرها الابدى في جوار الرحمن وسكون الجسد الذى لم يهدأ يوماً في سبيل الدعوة الى عبادة من يستحق العبادة في هذا الكون.

اختار الرسول انه يدفن في بيت عائشة.. الزوجة الحبيبة بنت الصديق الوفى.. دعا الرسول قبل وفاته قائلاً "اللهم لا تجعل قبرى وثناً يعبد" والحديث محقق وقوى السند وموجود في أكثر من مصدر عن ابو هريرة والامام احمد وغيرهم.

وعارفين كمان ان الصديق رضى الله عنه لما مات اندفن جوار صحبة الخير في الدنيا وفي الآخرة.. اندفن بحيث ان رأسه كانت عند مستوى صدر الجسد الشريف.. وساعتها مكانش في اى مشاكل للسيدة عائشة في الدخول والخروج عليهم.. ابوها وجوزها.. المشكلة بدأت لما مات سيدنا الفاروق واندفن جمب اصحابه.. بقى هنا في رجل غريب عن السيدة عائشة.. ميت اه.. بس معلش مينفعش تدخل على قبره كده.. دى حاجه كده اسمها الحياء.. بيتكلموا عنها الايام دى باعتبارها تاريخ يعنى.

ومين هيكون أكثر حياء من ام المؤمنين؟؟

قررت السيدة عائشة تفصل المقابر عن حجرتها.. ومن هنا بدأت فكرة عزل الغرفة الى فيها القبور الثلاثة..

طيب هو الجسد الشريف اندفن ازاى؟؟

لو رجعت للدرر السننية هتلاقى السيدة فاطمة قالت لأنس ابن مالك "يا أنس.. اطابت انفسكم ان تحثوا على رسول الله التراب؟"

يعنى قدرت يا انس ترمى التراب على جسد النبي؟؟

معرفش سيدنا أنس جاب منين قوة الاعصاب دى.. اذا كان سيدنا عمر بكل ما كان فيه صرخ في الناس وقال من قال ان محمدا قد مات ضربت عنقه.. الواحد دموعة بتنزل غصب عنه وهو بيتخيل الجسد الشريف مسجى بلا حراك.

ركز على كلمة "تحتوا" ..

يعنى ترموا.. تدفنوا.. تغطوا..

يعنى التراب اترعى من فوق لتحت.. الجسد الشريف اندفن تحت الارض.. وده الى حقيقه الدكتور فهمى احمد القزاز من 10 سنين تقريبا.. وزى ما هو واضح فى الصورة "التوضيحية التخيلية" رقم (4).

وركز اوى على موضوع التوضيحية التخيلية ده لأن مفيش حد دخل لحد مكان الدفن علشان يوصف او يرسم.. وبالتالي الصورة رقم (2) هي كمان هبى رغم ان مفيشاش قبه ولا تركيبة ولا مقام.. اقرب وصف لمكان دفن الرسول عليه الصلاة والسلام هتلاقية فى كتاب وفاء الوفا بأخبار دار المصطفى.. الى حطه نور الدين بن عبد الله السمهودى المتوفى سنة 911 هـ.. السمهودى حضر احداث ترميم القبر سنة 881 هجرية ايام السلطان قايتباى لما لقوا ان الجدار الخماسى "المظلل باللون البنى فى الصور رقم (3) تشقق وكشف ان الجدار الاول الى وراه "المظلل باللون البرتقالى فى نفس الصورة" مال ويكاد انه يسقط لولا انه بميله سند على الجدار الخماسى.

طيب ايه بقى قصة الجدران والرصاص المصبوب حوالين القبور زى ما هو ظاهر فى الصورة رقم (4)؟

الكلام ده يلزمه نرجع بالزمن لورا..

لاحداث محاولات سرقة الجسد النبوى الشريف..

وامسك اعصابك معايا لأن الكلام ده جد مش هبى.. استعد لأن تخنقك العبرات حزناً أو شوقاً.. كمان نصف قلبك كويس لأن فى نفسنة جامده جدا هتحصل على واحد من السلاطين..

## المحاولة الثانية

=====

هل فى حد ممكن يفكر فى سرقة جسد الرسول؟؟

بالأنانية المطلقة والعاطفة.. اه طبعاً.. المنطق الفاسد المبرر للفعل ده يقول ان مفيش شرف يساوى شرف جوار الرسول حتى لو اضطرينا الى سرقة الجسد نفسه.. ليه يعنى دولة معينة تحتكر وجوده؟؟ ما كلنا مسلمين.. يبقى لكل منا فى حبه وقربه وجواره نصيب.

ده المنطق بتاع مثنى وثلاث ورباع يبقوا تسعة.. بالتدين الشكلى اه طبعاً نحب قربه وجواره.. لكن بالايمان الحقيقى والعقل هنعرف ان الشرف الاكبر من جوار الجسد "صوريا زى ما الناس هتموت عليه كده" هو شرف الالتزام بتعاليم صاحب الجسد.. هو عايزك قريب منه فعلاً لا قولاً.. عايز قلبك قريب منه حتى لو ابعدت الأجساد المسافات وفرق بينهم هادم اللذات.. هو عايزك تحبه من غير ما تزعله لأن هو شخصيا أوصى بدفنه حيث توفاه الله والتعامل مع قبره على انه قبر عادى جداً.. لا يعبد ولا يميز ولا تقام حوالياه اى حاجه من الحاجات الى انت عارفها.. وبما انه رسول الأمة.. يبقى وصيته امر واجب النفاذ.

بس دى مكانتش وجهة نظر الحاكم بأمر الله.. واحنا مش تايهين عن الحاكم بأمر الله طبعاً..

راجل دماغه الماظات ادعى الألوهية وكانت سيرته غريبه فتحت الباب لخيالات ناس كثير علشان تزود فى الحكايات وتقول فيه ما قيل عن السيسى ونظامه فى الظلم والجبروت والدموية وغرابة الشخصية.. راجل قال عنه شمس الدين الذهبي فى سير اعلام النبلاء "كان شيطانا مريدا جبارا عنيدا ، كثير التلون ، سفاكا للدماء ، خبيث النحلة ، عظيم المكر ، له شأن عجيب ، ونبا غريب ، كان فرعون زمانه ، أمر بسب الصحابة رضي الله عنهم ، وبكتابة ذلك على أبواب المساجد والشوارع " ومعرفش الحقيقة هو موجود فى سير اعلام النبلاء ليه.. لما ده نبلاء.. امال الملاعين يبقوا ايه؟؟

الناس معاها حق اكيد فى سيرة الحاكم بأمر الله.. لما راجل يقرر انه ينقل الجسد الشريف من مكانة الى مكان اخر يبقى اكيد راجل مخبول.

وبعدين جسد شريف ايه الى انت مهتم بيه وانت نازل فى اصحابه وزوجته شتيمه ليل ونهار!!

بس اهو.. الجنون ملوش حدود.. في اوائل القرن الخامس الهجرى استمع الحاكم بأمر الله لنصيحة الزنادقة الى نفخوا في ودنه بفكره تبناها ابليس شخصيا.. احنا لو نقلنا جسد النبي الى مصر.. يبقى الناس هتشد الرحال ليها.. يعنى السياحة هتنتعش والاقتصاد هيزدهر وتبقى القاهرة ملء السمع والبصر ومعها حاكمها طبعاً.. كمان وجود جسد النبي في مصر هيبقى بركة ويمنع عنها البلاوى.. زى الشدة المستنصرية الى يا دوب ملحقتناش فوق منها.. انت بس تجهز مكان يليق ورجالتك الى تنفذ مفيش اكثر منهم.

وفي نصيحة الحاشية والبطانة هنا ما يسترعى الانتباه.. لما تقرأ التاريخ بالتفصيل مش هتلاق وجود لما يسمى بالحاكم الكويس بس الى حواليه هما الى وحشين.. الطيور على اشكالها تقع.. الحاكم الكويس هيختار مساعدين كويسين يعينوه ويقوموه لو لزم الأمر.. بينما الحاكم الظالم الطاغية المتجبر مش هيجب يسمع الا صوته او صده ولا هيبقى عايز يشوف الا مظاهر تقديسه.. فبالتالى الحاشية الصالحة والبطانة المخلصة مش هيبقى لها مكان في بلاطه.. بالرجوع الى تاريخ العالم هتلاق دايم اهل العلم والاخلاص في النصيحة في زمن الجبابرة مكانهم معتقل العقرب او سجن طره.

مكذبش الحاكم بأمر الله خبر.. بعث امير مكة ابو الفتوح الحسن بن جعفر لأهل المدينة فيما يشبه المفاوضات.. ابو الفتوح قعد مع الناس هناك وقالهم انا جايلكوا في كيت وكيت.. هاجت الناس ضده وكادوا ان يقتلوه وممنعهمش الا انه كان في الحكم وله قوة تحمية.. بينما انفرد في القعدة دى رجل اسمه الزلباني قرأ من سورة التوبة "أَلَا تُقَاتِلُونَ قَوْمًا نَكَثُوا أَيْمَانَهُمْ وَهَمُّوا بِإِخْرَاجِ الرَّسُولِ وَهُمْ بَدَءُوكُمْ أَوَّلَ مَرَّةٍ أَنْتُمْ خَشَوْهُمْ قَالَهُ أَحَقُّ أَنْ تَخْشَوْهُمْ إِنْ كُنْتُمْ مُؤْمِنِينَ" .. وكأنه بيستعين بالقرآن الى مش بينكره الا من انكر الدين كله في دفع الضرر والافكار المجنونة عن الجسد الشريف.

لما سمع ابو الفتوح الآيات حس بضيق في صدره بالرغم من انه كان موالى للفاطمين واقام خطبة الجمعة لهم قبل كده.. قرر انه هيتراجع حتى وان ازهق الحاكم بأمر الله روحه.. صحوة ضمير رجعت الباغي عن بغية.. او ربما هو تأثير الآيات.. او الأكيد انه تدبير الله عزوجل.. كمان ربنا كان رحيم بيه لما بعث عليه رياح عنيفة زلزلت الأرض من تحته وشالت كل حاجه من مكانها ورزعتها في الأرض.. حتى ان الخيل والدواب بقت تتشال في الهواء وتتهيد على الأرض تنزل ميتة.. حاجه مرعبه فكرت الجميع بريح قوم عاد.. ابو الفتوح بن جعفر اعتبرها علامة على مصيره الاسود لو كمل في الفعل الشنيع.. تقبل الرسالة ورجع للحاكم يعتذر له عن عدم اتمام الفعل زى ما حكي السهمودى في وفاء الوفا نقلا عن ابن النجار في كتابة تاريخ بغداد.

حتى وان لم ينبرى اهل المدينة للدفاع عن جسد سيد الخلق.. فكرك ان ربنا كان هيسيب المصيبة دى تحصل؟؟

لا افنى بما لا اعلم.. ولكنى اعتقد انه لا.. مش علشان خاطر اهل المدينة وحبهم للحبيب الى شرف مدينتهم لما رضوا بالتنازل عن حقهم في مغنم الغزوات الى خرجوا فيها مع الرسول في مقابل العودة بالرسول نفسه وحياته وموته وسطهم.. انما كرامة لصاحب الجسد ووصيته.

يهبط الحاكم بأمر الله على كده ويركز مع مصر واهلها وللا لسه في تانى؟

لو كان سكت يبقى انسان عادى اخطأ وتراجع عن خطؤه "رغم فداحة الجرم" وانتبهنا على كده.. لو عمل كده ميبقاش الحاكم بأمر الله.. ده واحد كان شايف نفسه مبيغلطش.. هو كان ببني مصر بتاعته وعاييزها "كده" .. يبقى هيعمل اى حاجه تخلى مصر بتاعته "كده" .. ببني كبارى بقى.. يفرض ضرائب.. يسرق الجسد الشريف.. مش مهم.. هو هيعمل اى حاجه علشان مصر بتاعته هو.. وبكره تشوفوا مصر.

المحاولة الثانية ذكرها السهمودى برضه في وفاء الوفا نقلا عن كتاب تأسي أهل الإيمان فيما جرى على مدينة القيروان لابن سعدون القيرواني الى حكي على لسان واحد اسمه ابن عذرة حضر واقعة محاولة سرقة الجسد الثانية وقال فيها "ثم أرسل الحاكم بأمر الله إلى مدينة الرسول صلى الله عليه وسلم من ينبش قبر النبي صلى الله عليه وسلم ، فدخل الذي أراد نبشه دارا بقرب المسجد ، وحفر تحت الأرض ليصل إلى قبر النبي صلى الله عليه وسلم ، فرأوا أنواراً ، وسمع صائح : إن نبيكم ينبش ، ففتش الناس ، فوجدوهم ، وقتلوهم".

الحاكم بأمر الله قالك المفاوضات مش نافعة.. احنا نلجأ للحيلة.. بس يظهر انه بعث ناس شبه كامل الوزير كده.. لما جم يحفروا نفق من بيت قريب من القبر الشريف استعانوا بالمصاييح علشان ينوروا النفق الى يحفروه.. الناس من بره شافت النور وفهموا الموقف.. وكان ما كان.. اهل المدينة قاموا عليهم فرتكوهم وهما كده كانوا بيهم رحماء جدا.

لم تذكر لنا كتب التاريخ امتى بالظبط كانت الواقعة دى.. هل كانت قبل الواقعة الاولى بتاعة ابو الفتوح وللا بعدها.. كان بينهم اد ايه وقت.. ايه رد فعل الناس على الحاكم بأمر الله نفسه.. للأسف مفيش تفاصيل.. هي كده زى ما جت في كتاب السهمودى.. اغلب الظن انها حصلت بعد المحاولة الاولى لو اعتبرنا ان السهمودى رتب الاحداث في وفاء الوفا تاريخيا.



طيب.. خلصنا من القرن الخامس الهجرى ومحاولاته.. القرن السادس الهجرى بقى.. قرن صلاح الدين الأيوبي والحملات الصليبية.. هل كان في محاولات لنبش قبر النبي؟؟

بكره نكمل

هـ.. قبل ما نقفل.. كتاب وفاء الوفا ده عظيم جدا يا جدعان لأى حد حابب يستزيد عن المدينة المنورة واثارها.

## المحاولة الثالثة

=====

بعد المحاولتين الخابيين بتوع الحاكم بأمر الله لسرقة الجسد النبوى الشريف وبعد ما شفنا المعجزة الى حصلت ومنعت السرقة.. هل اتعظ المجرمين بعدها وعرفوا ان ساكن المكان محمى برب الكون قبل ما يكون محمى بمجموعة من البشر مهما كانت قوتهم؟  
هنشوف..

المحاولة الثالثة حكى عنها جمال الدين عبد الرحيم بن الحسن بن علي الأسنوي المتوفى سنة 772 هـ في رسالة اسمها " نصيحة أولي الألباب في منع استخدام النصارى".. وحكى عنها كمان رئيس المؤذنين في الحرم النبوى الشريف الحافظ جمال الدين عبد الله بن محمد بن أحمد المطري المتوفى سنة 765 هـ. الراجل ده كان مؤرخ له كتب اشهرها "الإعلام فيمن دخل المدينة من الأعلام" قال فيه انه سمع قصة محاولة نبش قبر النبي من الفقيه علم الدين يعقوب بن أبي بكر الى هو بدوره سمعها من من أكابر الناس الى ادركت الحدث نفسه.

ليه المقدمة دى؟؟

بس علشان نوضح سند القصة.. مين نقل عن مين ومين قال ايه ومين كان حاضر او لا..

طيب الحدث نفسه كان ايه وامتى بقى؟

هنرجع لسنة 557 هـ..

احنا دلوقتى فى زمن الملك العادل أبو القاسم نور الدين محمود بن عماد الدين زنكى رحمة الله عليه.. الراجل ده لو فتحنا عنه فى الكلام مش هنخلص الا بعد بكره.. الحديث هنا مش عن سيرته العطرة.. انما عن واقعة محاولة سرقة الجسد النبوى الشريف الى حصلت فى ايامه.

خلاص.. الدولة الفاطمية بتنتهى بكل خرافاتها وتطاولها على الصحابة وفشلها الذريع فى التصدى للحملات الصليبية.. المستنجد بالله وقتها كان شاعر اشتهر عنه العدل والحكمة صحيح.. بس فى المعمل كان ضعيف مقدرش يقف قصاد هجمات الصليبيين المتكررة على مدن الشام.. حاجه غلب.. كل كام سنة حملة من اوربا وجيوش وحروب وملوك تيجى وملوك تروح تحت راية الصليب بإسم الدين.. حروب ارتكب فيها المعتدى كل ما نهى عنه اى دين سماوى او غير سماوى قريب او بعيد عن المسيحية.. وقت الاحداث دى نور الدين زنكى كان عنده 46 سنة.. احنا دلوقتى فى عز زمن الحملة الصليبية الأولى.. نور الدين كان بيكمل جهاد ابوه عماد الدين زنكى فى حرب الصليبيين.. رجل فى قمة كل حاجه ممكن يبقى ليه قمة.. صحة ونضوج وعقل وملك وقوة وكل شيء من سوء حظ المخططين للفعلة المهيبة دى.

نور الدين كان متعود على التهجد.. فى احد الايام بعد ما خلص صلواته دخل ينام.. شاف فى المنام سيدنا النبى عليه الصلاة والسلام وهو بيشاور على رجلين اشقرين وبيقوله "انقذنى من هذين".. صحى نور الدين من النوم مخضوض وجسمه بيصب عرق.. اتوضا وصلى وبعدين حاول ينام.. برضه شاف نفس المنام.. قام اتوضا وصلى وحاول ينام تالت.. نفس المنام بيتكرر هو هو.. مبدهاش بقى.. النبى بيستغيث.. يبقى اكيد النبى فى خطر.. معادش فيها نوم.. بعث فى الحال يستدعى وزيره جمال الدين الموصلى وحكاه الى حصل.. الوزير مفكرش كثير وقاله "وما قعودك؟ اخرج الان الى المدينة النبوية واكتم ما رأيت".

الفرق بين وزير يشور على مولاه بالجهاد ووزير يشور على مولاه بسرقة الجسد الشريف هو نفسه الفرق بين نور الدين زنكى والحاكم بأمر الله.. الموقف ده هو التجسيد الواقعى لكلام سيدنا النبى لما قال "المرء على دين خليله".

شد نور الدين الرحال الى المدينة ومعاه 20 راجل.. الحجة كانت زيارة المقام الشريف وتوزيع الصدقات.. دى حاجه كان معتاد عليها السلاطين "الكويسين" ايامها.. اجتمع نور الدين بالناس فى المسجد النبوى وطلب منهم يسجلوا اسماء اهل المدينة فى كشوف علشان يوزع عليهم الصدقات.. الناس حضرت تنال من عطف السلطان.. نور الدين بيتفحص فى الوجوه.. لسه مش لاقى الاثنين الى شافهم فى المنام.. طول اليوم على الحال ده لما الراجل اصابته الحيرة.. خلصت الناس ولسه برضه ملقاش المراد.. طلب من الناس انها تراجع الكشوف تانى.. الناس تراجع وتقول مفيش يا مولانا.. يا اخوانا الله يهديكوا راجعوا كويس.. قالوله مفيش حد فاضل الا رجلين وصلوا المدينة من اسبوعين جايين من المغرب.. بس سيبك منهم.. دول اساسا معاهم فلوس كثير وبيوزعوا على الناس الصدقات ليل ونهار.

سأل السلطان الناس عن سيرتهم واحوالهم واخلاقهم.. وللأسف الاجابة كانت مخيبة لتوقعاته.. الناس قالت انهم على درجة كبيرة من الصلاح.. بيصلوا كل الفروض فى المسجد وطول الليل بيصلوا القيام والتهجد.. بالنهار صايمين ببيوزعوا الصدقات فى البقيع وقباء واخر اليوم عزله وقرآن وصلاة..

الله.. ايه دى بقى؟؟

طيب شكلهم ايه؟؟ قالوله شقر وفيهم من صفات الافرنج.. انشرح صدر نور الدين.. هما دول اكيد.. قام السلطان فى صحبة الناس لزيارة بيت المذكورين.. اول ما شافهم الله اعلم مسك اعصابه ازاي لانهم كانوا هما بالظبط الى شافهم فى منامه.. كتم نور الدين مشاعره فى ثبات انفعالى يتدرس لحد يوم القيامة وبدأ يتكلم معاهم.. وفى وسط الكلام خلاهم يصحبوه فى جولة فى البيت الى كانوا قاعدين فيه.. الكلام ظاهره الود وباطنة محاولات السلطان سبر اغوار العيال دى.. بس للأسف خلص بحث فى البيت كله ولمقاش حاجه.. هو متأكد ان وراهم مصيبة بس مش لاقى دليل.. الراجل خلاص مخه ولع.

عين السلطان بتلف فى البيت كله زى الغريق الى بيدور على اى قشاية.. عينه ضربت فى الارض من الحيرة واليأس.. لمح حصيرة على الارض يبدو كده ان شكلها او وضعها احواله بشيء.. او ربما هو الهام ومكافأة من الله عزوجل.. رفع الحصيرة فلقوا تحتها سرداب محفور جديد فى اتجاه الحجرة النبوية الشريفة.. ولكن لم يكتمل الحفر.

يا ولاد ال...!!!

الناس الى كانت موجوده حصلها صدمة ورعب.. السلطان قبض عليهم هما الاثنين واوسعهم ضرب لحد ما اعترفوا انهم مش مسلمين بعثهم والى المغرب النصراني بترتيب من اسياده فى اوروبا علشان يسرقوا الجسد الشريف واداهم فى سبيل تحقيق الهدف الحقيقى فلوس بالهبل.

بقى هى الخطة كده؟؟

حملات عسكرية فى الشام وطعنات فى الظهر فى المدينة؟؟

بإعادة البحث تانى فى البيت فى ضوء اعتراف المجرمين لقوا عندهم شنط جلد زى الشنط المعتادة لاهل المغرب.. الشنط دى كانوا بيخبوا فيها التراب الى بيطلعوه من السرداب الى بيحفروه ويروحوا يرموه فى البقيع.. تبقى الناس شايفاهم يوزوروا البقيع ويعيطوا عند قبور الاحبة.. بينما فى الحقيقة هما بيداروا اثار جريمتهم.. الناس كانت بتدعيلهم وهما بياخدوا منهم الصدقات.. بينما الفلوس دى كانت تمن تغفيل الناس علشان سرقة الجسد الشريف.. لك ان تتخيل شعور الناس فى المدينة وهما حاسين انهم مقدروش يحموا قبر النبي الكريم.. لك ان تتخيل شعورهم قصاد الراجل الى جاى من بعيد يكشف عن ثغرة رهيبة كانت هتسبب مصيبة لولا ستر ربنا.. لك ان تتخيل اننا لما نقول ان السلطان امر بضرب رقابهم بس.. فهو كده كان رحيم بيهم جدا جدا.

بعد الحادثة دى امر نور الدين زنكى بحفر خندق كبير حوالين الحجرة الشريفة الى فيها قبور الحبيب وصحبه.. حفروا لحد ما المية طلعت.. بعدها ملوا الخندق رصاص ذائب.. الى هو الجزء الرمادى رقم (2) فى الصورة الأولى المرفقة.. وبعد ما الرصاص نشف.. ردم عليه تانى بالتراب.. ورجع تانى على بلده بعد ما تأكد ان الجسد يرقد فى امان.

رحلة السلطان من الشام للمدينة خدت 16 يوم.. نفس الفترة الى فضل يحفر فيها المجرمين دول.. يوم وصوله كان يوم صيف عادى جدا.. ولكن فى نفس يوم وصوله.. الى هو يوم كشف المجرمين.. حصل رعد وبرق عظيم جدا فى سماء المدينة لدرجة ان الناس تخيلت ان ده صوت خلع الجبال.. معجزة ثانية من معجزات الخالق عزوجل فى حماية رسوله الكريم.. الجسد الشريف مش هيحصله حاجه حتى لو اتفق سكان الكوكب كله على اذيته.. نور الدين زنكى ما هو الا سبب سببه المولى عزوجل علشان يحمى جسد الحبيب.. ويكافئ نور الدين زنكى على جهاده فى نفس الوقت.

انت بتقول يكافئ؟؟

اه طبعاً.. ومش اى مكافأة..

نور الدين زنكى.. ماذا بينه وبين الله علشان ينال الشرف العظيم ده؟؟

انت مدرك معناها ايه انك تشوف النبى فى المنام؟؟

مدرك يعنى ايه النبى يقولك احميى.. وانت تقدر تحميه؟؟

لو نجح فى الحماية.. يبقى ضمن لسيرته الخلود فى الدنيا وضمن لنفسه الجنة فى الآخرة بأذن الله..

لو فشل ومات وهو بيحاول.. يبقى ضمن الجنة برضه بأذن الله لأنها موته كريمة فى الدفاع عن الرسول عليه الصلاة والسلام..

يعنى كده كسبانه وكده كسبانه..

تخيل يوم القيامة يطلع نور الدين زنكى زية زى مليارات البشر بيدور زى المجنون على سيدنا النبى ويطلب شفاعته زى كل الناس.. فيلاقى النبى فاكراً بالاسم ويقول شكراً انك حميت جسدى..

نور الدين زنكى يتسمى راجل..

هـ.. راجل..

اصل فى دلوقتى ناس على رؤوس بلاد المسلمين عندهم سلطة وفلوس وامكانيات اكثر من نور الدين زنكى 10 مرات على الاقل.. اتشتم نبينهم من شوية فرافير لا يقارنوا ابداً بمحاربين زمان الى هزمهم نور الدين اكثر من مرة.. ومع ذلك العالم دى مصرين يتعاملوا معاهم ويشترى منهم بضائع لها الف بديل وبديل تحت مسمى التحضر والاسلام الكيوت الى مبيكرهش حد وكده.

نور الدين زنكى كان راجل حقيقى.. غير كده.. يبقى بلحه.

## المحاولة الرابعة

=====

3 محاولات فاشلة لسرقة الجسد الشريف انتهت بكوارث على رؤوس مخططيها ومنفذيها..

3 محاولات والاغبياء لسه مش عاوزين يبطلوا زى ما حكى العلامة ابو الحسين محمد بن أحمد بن جبير -المتوفى سنة 614 هـ- فى كتابه "رحلة ابن جبير" فى حادثة عن رحلته الى الاسكندرية سنة 578 هـ..

محاولتين عملهم الحاكم بأمر الله فى اوائل القرن الرابع الهجرى..

محاولة رتبها الى المغرب النصرانى سنة 557 هـ بايعاز من ملوك قشتالة..

والمحاولة الرابعة اترتبت فى الادرن.. حصلت فى زمن الملك الناصر.. السلطان صلاح الدين والدنيا.. أبو المظفر يوسف بن ايوب رحمة الله عليه..

ابن جبير حكى عن الى شافه فى مصر بعد فشل المحاولة.. هو محضرش الاحداث نفسها.. هو بس شاف المجرمين وهما بيتنفخوا ولما سأل عملوا ايه.. قالوله دول عملوا كذا وكذا.. اسم واحد ذكر فى معرض حديث ابن جبير خلاى ادور فى كتب تانية غير كتاب ابن جبير نفسه.. اسم انا فاكركه كويس..

حسام الدين لؤلؤ..

ايوه هو.. الباسم.. محمد سلطان فى فيلم الناصر صلاح الدين.. الجدع الى قال للسلطان ان ابنه اتقتل.. ده فى الفيلم طبعاً.. بس الحقيقة مش كده خالص.. الحقيقة كتبها القاضى بهاء الدين بن شداد فى النوادر السلطانية والمحاسن اليوسفية وكتبها تانى المؤرخ الأمريكى برنارد هاملتون فى كتابه الملك المجذوم وورثته.. وكتب معاها كمان تفاصيل اكثر عن محاولة الشؤم دى..

تعرفوا مين الى دبر وخطط المحاولة الرابعة دى؟؟

رينو دى شاتيون.. حاكم الكرك.. الى هو جوز الى بالى بالك فى الفيلم نفسه.. المعروف عندنا باسم ارناط..

واحد من اسفل وأسوأ القادة الى بلتنا بيهم الحملات الصليبية.. كتلة من الكراهية والحقد والغل والغدر تمشى على قدمين.. ده طبعاً بخلاف تاريخه الاسود كقاطع طريق طريد وسجين فى اوربا قبل ما ييجى عندنا ويتجوز ستيفانى اميرة الكرك ويبقى هو الحاكم على حساها.

رينو كان شخص غدار دموى جبان يخشى المواجهات.. كان شجاع بس في الاغارة على قوافل الحجاج والهجوم على المدن وقتل الاطفال والنسوان.. كان يهرب دائما من اى مواجهات مباشرة.. المرة الوحيدة الى واجه فيها حد راجل لراجل كده كان فخ نصبه ليه الامير مجد الدين ابن الداية في سهول الفرات.. ووقع هناك زى الرطل واتحبس في حلب 16 سنة كاملة خرج بعدهم علشان يعاود من تانى سفلاته في الاغارة على المزارعين والمدنيين وقوافل الحجاج لدرجة ان قاضى القضاة في الشام سنة 578 هـ افق باسقاط فريضة الحج عن الناس الى مجبره تمر من اى طريق يقع تحت سيطرة رينو لخطورة المرور على حياتهم.. شفت ابطالهم؟؟

قاطع طريق ولص لا اكثر..

سنة 577 هـ كسر رينو المعاهدة الى كانت بين صلاح الدين وبين ملك بيت المقدس بلدوين الرابع.. قطع اشجار غابات الكرك ونخيل العريش ونقلهم على قلعة الحكم في الكرك.. لم صنايعية المراكب من كل مكان وعمل 5 سفن حربية كبيرة واكثر من 20 مركب خفيف.. وبعد ما عملهم فككهم ونقل على ظهر الجمال من الكرك الى العقبة.. وعلى ساحل البحر الاحمر راح جاى مجمع السفن تانى ونزلها المية بعد ما دهنها زفت اسود وجهها بالسلاح الثقيل وكل معدات الحرب.. وخذ الطريق من العقبة الى بلد كان اسمها عيذاب "حلايب حاليا".. طبعا كل بلد يعدى عليها في سكتة كان ينزل يسرق منها الى يقدر عليه ويجرى على المراكب بتاعته تانى.. والمراكب الى كان يقابلها في الطريق كان يحرقها ويقتل ركبها بعد ما يستولى على الى فيها.. مش فارق بقى مراكب حجاج من مراكب تجارة.. لحد ما وصل عند عيذاب كان دمر 16 مركب وقطع طريق التجارة البحرى الى اليمن وجدة والسودان والحبيشة تماما.. وفضل اسطولة معسكر هناك علشان اى مركب تعدى يسرق منها الى يقدر عليه ويبعد الانظار عن فرقة مشاة نزلت على ساحل جدة بالفعل علشان هدف تانى خالص.. وهو معاهم طبعا. وصلت اخبار رينو والى بيعمله في البحر الاحمر الى صلاح الدين من اول ما كان في العقبة.. المشكلة ان صلاح الدين وقتها مكانش في مصر ومكانش عنده اسطول جاهز.. كلف صلاح الدين القائد حسام الدين لؤلؤ بالمهمة دى.. الراجل قام بالمهمة بمنتهى الكفاءة.. بعث الى سلطان الدولة الموحدية في المغرب يطلب منه العون.. السلطان يعقوب المنصور بعثه مهندسين ومواد خام وسفن جاهزة مبنية علشان يعملوا زبها.. وبالفعل قدر حسام الدين لؤلؤ انه يبني النواه الأولى لأسطول المسلمين في زمن قياسي. كده احنا جاهزين.. المشكلة دلوقتي ان قوات رينو متوزعة بين حامية في مدينة اسمها آيلة "قرب العقبة" وحامية في عيذاب "حلايب" وجزء من القوات نزل البر بالفعل قرب جده واخذ طريقة الى المدينة.

يعمل ايه لؤلؤ؟؟

يبدأ من العقبة وللا عيذاب وللا يجرى ورا العيال الى نزلت عند جده؟؟

خد بالك انهم مكشوش عارفين نية فرقة المشاة البرية دى.. هما كانوا فكريتهم عاملين اغارة عادية بهدف سرقة قوافل الحجاج زى عوايدهم.. محدش انتبه الى خطتهم الخبيثة الا لما خدوا طريق المدينة بالفعل وكانوا وقتها سبقوا قوات حسام الدين لؤلؤ بمسيرة 5 ايام كاملة. حسام الدين لؤلؤ قسم قواته قسمين..

قسم يتعامل مع الحاميات في آيلة وعيذاب والبحر الاحمر..

وقسم تانى مطلوب منه يجرى بسرعة الصواريخ علشان يلحق الفرقة الملعونة الى قربت من مدينة رسول الله..

القسم الاولانى مش بس حقق انتصارات.. ده بهدل الدنيا.. بس ده موضوع تانى نبقي نحكيه بعدين علشان منظملمش الراجل حقه.. خلينا في القسم الى لحق قوات رينو قبل ما توصل المدينة بيوم واحد بس..

خدت بالك من المعجزة الى حصلت مع حسام الدين لؤلؤ؟؟

تيحي نحسبها بالرياضيات؟؟

لو عربية طلعت قبلك بساعتين على الصحراوى.. وانت حصلتها قبل اسكندرية ب 10 كيلو رغم ان سرعتها كانت عادية مش بطيئة..

يبقى انت كنت سابق على كام؟؟

طيب هو الخيل مش ليها سرعة قصوى؟

هو يعنى خيل حسام الدين اجدع من خيل رينو؟؟ ماهى كلها احصنة؟؟

صحيح.. كلها احصنة..

بس في حصان رينا راضى عن راكبة.. وحصان رينا غضبان على راكبة..

في اللحظة دى اعتقد اننا نقدر نقول ان خيل حسام الدين لؤلؤ كانوا جند من جنود الله.. مش الخيل عموما ولا الخيول دى خصوصا.. انما الخيل دى بالذات في الموقف ده بالتحديد تحولوا الى جنود لله عزوجل انتهت مهمتهم بتوصيل المراد في الوقت المطلوب وبعدا اصبحت خيل عادية والله اعلم..

وادركت قوات حسام الدين لؤلؤ قوات رينو على بعد يوم واحد من المدينة المنورة..

وكانت مذبحة لرينو ورجاله..

بالرغم من قوة وضخامة اجساد فرسان الفرق الصليبية.. وبالرغم من احجام سيوفهم ودروعهم المرعبة.. الا ان الشاهد الدائم في اى مواجهة مباشرة بين جيوش المسلمين والعالم دى هو تفوق المسلمين الدائم في المواجهات المباشرة او الفردية.. وده مش كلامى.. ده كلام برنارد هاميلتون في كتابه الملك المجذوم وورثته وده مكانش مسلم ولا حاه.. وكمان كلام اسامة بن منقذ في الاعتبار. التفسير المنطقي هنا هو العقيدة القتالية..

فرسان المسلمين النصر والهزيمة بالنسب لهم مكسب.. لو انتصروا هيبقوا فازوا بمتاع الدنيا وان ماتوا في الحرب وانهزموا هيبقى نالوا الخير كله.. في الحالتين كسبانين احدى الحسنين.. النصر او الشهادة..

بينما الطرف الاخر يبتكر في الفلوس والملك والخمر والنسوان والليالي الحلوة.. يعنى يهيمه اوى يطلع من الحرب حى بجسمه كامل علشان يعيش المجد الى حققه.. هو مش مقتنع زيك انه لو مات وهو بيحاول هدم قبر نبيك هيبقى شهيد.. هو جاي علشان يحرر قبر ابن الرب زى ما فهموه في بلاده.. وقبر ابن الرب تحت سيطرتهم فعليا في تلك الايام.. يبقى كل الى بيحصل من مهاجمة قوافل الحجاج ومحاولات نبش قبر النبي ده ما هو الا سلطة ومقدمات مش لازم يعنى يدفع عمره علشانها.

والكلام ده لا ينطبق على المسلمين اجمالا ولا على المسيحيين اجمالا.. الكلام ده هو الفرق بين الشخص الى بيحارب علشان عقيدة والشخص الى بيحارب علشان الدنيا.. واكبر مثال هنا هو حروب الاسترداد في الاندلس.. النبيل بلايو والفونسو السادس وفرناندو قدروا ينتصروا على جيوش المسلمين لنفس السبب.

طبعاً مش محتاج اقولك ان الحرب لما شدت رينو طلع يجرى لأنه كان استاذ في الهرب.. حسام الدين خد الاسرى متكفين زى الفراخ على مصر وسلمهم للملك العادل شقيق صلاح الدين.. الملك العادل كان عاوز يطلق سراحهم وكفاية عليهم كسرة الهزيمة.. دماغى لفت وانا بيحاول افهم منطقته بكل الطرق بس فشلت.. صلاح الدين رفض كل محاولات العفو عنهم وامر باعدامهم كلهم قصاد الناس جهارا نهارا علشان مش كل واحد الشيطان يلعب في دماغه يقوم يغزو مدينة رسول الله.. ده غير ان اى تهاون معاهم بعد ما عرفوا الطريق هيخلينا ملطشة وكل يومين نلاق واحد كان معدى بالصدفة فقالك اما انبش القبر بالمرة..

عفارم يا ريس.. كده التفكير السليم.. رينو زوج صحيح.. لكن صلاح الدين قتله بعد كده في حطين لما وقع اسير نفس القائد الى هرب منه في الحجاز.. حسام الدين لؤلؤ..

سبحان الله.. مكتوبالك يا حسام.. ماذا بينك وبين الله يا اخي!!!

وهو ده الى شافه وحكى عنه ابن جبير حضرتك..

ابن جبير حكى انه لما نزل اسكندرية لقي اسرى من الروم داخلين البلد والناس مكتفاهم ومركباهم الجمال بالعكس وحواليهم زفة وفضيحة بالطبول والناس بتحدهم بالطماطم والبيض والطوب.. ولما سأل عن قصتهم عرف الفضائع الى عملوها والى حكينا عنها اول الكلام. الريح الى افسدت محاولات الحاكم بأمر الله والزلبانى الى زلزل قلب ابو الفتوح الحسن بن جعفر بأيتين من سورة التوبة ونور الدين زنكى وحسام الدين لؤلؤ ما هم الا أسباب..

الحماية الحقيقية من فوق يا فندم..

مخدتش انت بالك من الثقة والايمان في قوله "ان الله معنا"

ومع ذلك برضه كان في حد تانى من الغباء انه يجرب حظه في القرن السابع الهجرى..

## المحاولة الخامسة

=====

المحطة الأخيرة.. او هكذا سوف ستكون ان شاء الله..

آخر محاولات المخابيل لسرقة الجسد الشريف من مرقده..

الحاكم بأمر الله فشل مرتين.. والى المغرب المسيحي المدعوم من العدو التاريخي الأوروبي فشل.. رينو دى شاتيون نجم نجوم مستنقع الحملات الصليبية فشل.. ولسه برضه في ناس تخيلت انها انصح من الكل ومصممة..

بس المرة دى مش اوروبى ولا نصرانى ولا مدعى الوهية..

المرة دى اخطر من الكل..

الشيعة..

الحادثة دى حصلت سنة 561 هـ.. هتلاق ذكرها في كتاب وفاء الوفا برضه نقلا عن مصدرها الأصلي وهو كتاب الرياض النضرة في فضائل العشرة للفقهاء الشافعي الامام محب الدين ابو العباس الطبرى المولود في مكة سنة 615 هـ..

نلاحظ هنا ان المسافة بين ميلاد راوى الأحداث والاحداث نفسها حوالى 50 سنة.. بالنسبة لحدث جليل زى ده نقدر نقول ان القصة لم تموت ولم تنتهى بمجرد انها خلصت.. بمعنى آخر.. فى اسباب قوية لتصديق القصة خصوصا انها غريبة شوية.

محب الدين الطبرى محضرش الاحداث دى.. انما نقلها عن واحد اسمه هارون ابن الشيخ عمر بن الزغب.. ده كان رجل صالح مشهود له بحسن السيرة والسمعة.. حكي هارون ان ابوه - الشيخ عمر بن الزغب - كان صديق شخصي للمسئول الأول عن المقام النبوى والحجرة الشريفة الشيخ شمس الدين صواب اللمطى.. فى قعدة درشة بين الشيخ عمر والشيخ صواب اللمطى.. الشيخ صواب حكي الحكاية دى لصديقة وجسمه بيرتعش من مجرد الذكرى.

بيقول الشيخ صواب ان كان له صديق وثيق الصلة بأمير المدينة المنورة - أبو فليته عز الدين القاسم بن مهنا بن الحسين - فى الوقت ده.. صديق بيعرف منه اخبار دار الحكم والاشاعات اياها بتاعة الجماعة السياسيين دول على اعتبار ان اخبارهم دايمًا مادة حلوة للتسلية والضحك على بلاهتهم او التحسر على حماقتهم وخيابتهم.. اذ فجأة فى اليوم ده تتغير الحكاية من التسالى والضحك الى شيء مفزع.

عرف الشيخ صواب ان جماعة من اهل حلب وصلوا اليوم ده فى زيارة خاصة للأمير.. زيارة كان فيها فلوس وجواهر وهدايا بالهبل والحاجات الى بيحبها الجماعة الحكام دول.. والمقابل كان السماح ليهم انهم يفتحوا الحجرة النبوية الشريفة ويخرجوا منها سيدنا ابو بكر وسيدنا عمر بس.. النبى نفسه محدش هيمنه بأذى.. كلمة شرف.. مين يقدر يأذى رسول الله يعنى؟؟

المفزع فى الأمر مش ان حد فكر فى نبش القبر وعرض هدايا والكلام ده كله.. المفزع فى الامر بالنسبة للشيخ صواب هو موافقة الأمير على فتح الحجرة النبوية المعزولة تماما بجدار خماسى بناه الخليفة عمر بن عبد العزيز.. تصميم القبر كده.. ملوش اى مدخل الا هدم الجدار المحيط بيه..

ومين يقدر يهدم حجر ويقلق رقاد الحبيب عليه الصلاة والسلام؟؟

فضل الشيخ صواب مهموم ومش عارف يعمل ايه بعد ما سمع الخبر الشؤم ده.. قعد يفكر ازاى هيفسد عليهم خطتهم.. الزوار شيعة.. ومن اخبت من الشيعة فى شدة كراهيتهم لاهم اتنين من صحابة الرسول.. بالقطع نيتهم مش خير ابدأ.. مجرد فتح الحجرة حتى بدون المساس بجسد الرسول يعتبر مصيبة لوحده.

التدبير من عندك يارب..

بينما الشيخ صواب قاعد فى همومة.. جاله مرسال الامير وقاله النهارده هيجيلك ضيوف عاوزين حاجات من الحجرة الشريفة.. لى طلباتهم وسيهم يعملوا ما بداهم من غير اعتراض.. واحنا عارفين طبعا الى يعترض على كلام اى امير بيحصله ايه.

مقدرش الشيخ صواب انه يعترض.. بعد صلاة العشاء خرج الناس وفضى المسجد.. فقل الشيخ الابواب.. بعد دقائق خبط الباب.. فتح فلقى الجماعة اياهم.. بيحكى انه عد اربعين راجل داخلين فى ايديهم الفتوس والمعاول والشموع واللات الحفر المختلفة..

الشيخ متجمد مكانه من هول الموقف.. انعقد لسانه عن الكلام وان كنت اظن ان ضربات قلبة قربت من الالف كلها كانت بتستنجد بالله عزوجل وترجوه انه يحمى حبيبه.. اتجه الجماعة اياهم الى الحجرة الشريفة.. وبمجرد ما بلغوا المنبر الى قبلها.. انشقت الارض وبلعتهم كلهم بعدتهم والاتهم فى ثوانى.. ثوانى معدودة ورجع المكان زى ما كان وكأن شيئًا لم يكن.. انشقت الارض وابتلعت الظلمة وقفلت بطنها عليهم تانى.. مفيش اى اثر فى المسجد لأى واحد منهم.. وكأنهم مجوش من الاساس وكأن الارض لم تنشق.. حتى حصير المسجد لم يتبعثر.. حاجه كده لو حضرتها ممكن تقول ان اكيد كنت بحلم.

الجماعة اتأخروا والأمير قلق عليهم.. ضيوفه برضه.. بعث للشيخ صواب يسأله عنهم.. الشيخ حكا له الى حصل بالظبط.. الامير طبعا مصدقوش وهدهد بضرب عنقه.. ولكن مع ارتجاف جسد الرجل وعدم وجود اى اثر للمعتدين الاربعين مال الامير لتصديق القصة.. اتفق مع الشيخ صواب على كتم الموضوع ده تماما والا هيضرب عنقه.. ولكن بما ان الحكاية وصلتنا.. يبقى الشيخ صواب لم يلتزم بكلام الأمير.

شفت الشيعة يا معلم؟؟

عرفت دلوقتى ليه الشيخ ابو بكر النابلسى قال "لو كان معى عشرة اسهم لرميت تسعة فى المغاربة (يقصد الشيعة) وواحدا فى الروم"؟

العدو معروف.. انت كده كده واخذ حذرك منه.. الادهى والامر من العدو هو الصديق المزيف.. القريب الغادر.. الجار الى انت فاكر انك ممكن تأمنه وان الى بينكوا مجرد خلاف فى رأى.. بينما هو بيخطط لذبحك.. الخطر الحقيقى هو من يدعى الاسلام وقلبة مليون بلاوى.. الخطر كل الخطر هو مسلم يدعى انه بينقى التراث او بيحدد الخطاب الدينى.. وهو مش بيعمل اى حاجه الا التشكيك فى التراث وهدم ثوابت الدين وزرع الشك فى النفوس الضعيفة.

نجا الجسد الشريف من محاولة آثمة اخرى.. مش عارف ليه حسيت ان الصديقين في القبر احدهما تسلل القلق الى قلبه خوفا على صديقه  
لا خوفا من نبش القبر والتمثيل بجثمانه هو شخصيا.. حسيت ان الحبيب المصطفى مد ايده يهدى من روع صديقه وهو بيقوله..  
"لا تحزن ان الله معنا" ..

بينما على مقربة منهم يرقد جسد آخر لو كانوا شافوه – حيا او ميتا - كانوا ماتوا على نفسهم من الرعب.. جسد تحسه بينتفض في رقاده وهو  
بيقول من اراد ان تثكله امه او تترمل زوجته او ييتم اولاده.. فليقرب هذ المقام الشريف.  
هل هيظهر تاني حد يفكر في الافكار السوداء دى؟؟

والله اتمنى.. رغم انه بلاء عظيم خصوصا في وجود اعداء الاسلام على رؤوس الامم الاسلامية.. ولكنه في نفس الوقت هيرد كثير من الغافلين  
لدينهم تاني ويوحد الأمة كلها للدفاع عن سيد الخلق.. وكده كده كلنا ثقة ان حماية نبي الأمة ملهاش اى علاقة بضعف او قوة الامة نفسها..  
رب العزة حاميه شاء من شاء وابي ومن ابى.. الامنية على غرايتها وقسوتها الا انه شبه تعنيفك لأبنك وانت بتحبه او اصرارك على انه يخوض  
التجربة لوحده مع ثقتك التامة انه هيعك بس علشان يتعلم وعوده يشند.

هو ده الى احنا محتاجينه دلوقتي.. حدث جلل نتلم حواليه لعلنا نقوم من سبات طويل اوى قارب على ال 5 قرون.. ومفيش حد يلم  
المشتتين افضل من الحبيب كان حى او ميت  
عليه الصلاة والسلام.



## دنشواي المغربية

في بطولة مفروض انها لكرة القدم - والحقيقية انها ابعد ما يكون عن كرة القدم- نجح منتخب المغرب الشقيق انه يحقق انجاز غير مسبوق لدولة مصنفة عند أصحاب الكوكب انها عالم ثالث.. عالم هامشي اتخلق علشان ياخدوا فلوسه ويستعيدوا شبابه ويعتدوا على نسوانه ولما الزهق يأكلهم يتسلوا بقتل شيوخه واطفاله.. عالم زرعوا فيه خونه يتصوروا معاهم ويكتبوا تحت الصور "لقد جلبنا لهم الحرية."

هما شافينا كده ..

علشان كده الحرقان طايح في أوروبا الأيام دى بسبب نجاح قطر غير المتوقع في تقديم بطولة عالمية نظيفة مناسبة للجميع هزم المغرب فيها ناس كانوا فاكرين انهم يملكوا الكوكب.. في المقابل.. فشل ذريع لآلة الاعلام الغربي بكل ما تملك من مال ونفوذ وانتشار وقدرة رهيبه على الكذب وتأليف المواقف وقلب الحقائق.. سخر الله عزوجل ناس من قلب معسكرهم.. بفلوسهم وعلى شاشاتهم.. علشان يشهدوا ان النسخة دى من البطولة هي افضل نسخة اتعملت - لحد دلوقتى- على الاطلاق.

وسط معمعة الفرحة ظهرت أصوات منخفضة تعانى من مرض حب الظهور حاولت على استحياء تسميم فرحة الملايين.. مره يقولك المغرب الامازيغي.. مره يقولك دى مجرد لعبة.. اقوال مختلفة فيها نسبة من الصواب حقيقي.. لكن النتيجة الى هتوصل لها لو مشيت ورا الكلام ده هو فقدانك للفرحة.. شعورك المؤقت بالانتصار هيموت.. هترجع تانى لنقطة الصفر.. مهزوم في كل المجالات.. مولع بتقليد الغالب زى ما قال ابن خلدون.. دماغك مليانه بالسيفون الى شده فيها خالد منتصر واشباهه عن عظمة الغرب وتحضر الغرب والغرب الى فيه اسلاما بلا مسلمين والأونطا دى.

خلينا نقول مبروك للمغرب المسلم.. مبروك لشريكي في اللغة والدين والقضية.. مبروك لجاري الى بيعانى زي من بلطجة امين الشرطة بتاع المنطقة.. مبروك لى همه من همى.. مبروك للثالثة شمال.

مش واخذ بالك من المفارقة؟

جمهورية هنا وقف يغنى في بورسعيد ويقول "يا مجلس يا ابن الحرام" وجمهورية هناك وقف يغنى في الدار البيضاء ويقول "في بلادي ظلموني.."

نفس الوجع يا اخي..

وانت لسه متصور انها لعبة؟

لو فتحت جوجل وكتبت بالعربي او الفرنسي "جرائم فرنسا في المغرب".. هيجيلك صدمة من كم الى هتشوفه.. والغريب انه موثق بالصور في وقت مكانش عندنا أدوات توثيق ولا كنا على وعى كافي بأهمية التوثيق.. مما يعنى ان التوثيق ده حصل عندهم هما.. أصحاب الجريمة.. مما يعنى كمان ان التوثيق ده اكيد مش علشان يعتذروا لنا بيه بعدين.. لا.. التوثيق ده كان للتفاخر والترقيات والحصول على النياشين..

تخيل!!!

تبقى ظابط في الجيش وتقطع رؤوس ناس او تسمم ابار مية تقتل بيه الاف او تحرق قرى كاملة بأطفالها ونساءها.. او تبديد عشرات الالاف بالسلاح الكيماوي الى يفسد الأرض عشرات السنين.. وتصور كل ده وتطلع بيه على قائد الجيش بتاعك علشان تاخذ ترقية او علاوة..

ده بالظبط الى كان بيحصل في المغرب..

وده الى حكاة صحفي فرنسي اسمه جوستاف بابان عاش في المغرب 8 سنين كاملة وثق فيها كل الى شافه وعاشه ..

بيقول بابان في مستهل كتابه..

"جرائم الاستعمار لا يمكن إحصاؤها جملة ولا جمعها كاملة. بعضها نُسي وكأنه لم يقع، وجُلها مفرق على التاريخ الشفهي المسجل وغير المسجل، بكل المؤاخذات والتناقضات التي قد يرصدها الباحثون، في تفاصيله. لكن الموثقين لأبرز مجازر فرنسا في المغرب اعتمدوا على الوثيقة أولاً، ثم العاطفة ثانياً، وأحياناً بحثاً عن الشهرة، وهم يتناولون مذكراتهم، أو مغامراتهم التي ننظر إليها نحن على أنها توثيق للأحداث من زاوية أخرى"

متشكرين يا عم بابان على المصادقية.. ولو اننا مش محتاجين كتابك أصلاً علشان نصدق حكاوي الجدود عن مجازر نواحي فكيك والشاوية والدار البيضاء والكاربان سنطرا ل وحرقت قري كاملة في تولوات وورزازات ومراكش واغادير وبنى ملال.

كله موجود ومتصور..

محدث ناسي اسامي السفاحين الى سابوا وراهم بحور دم وانتو بتعتبروهم دلوقتي ابطال.. هويير ليوطي وداماد ودوجان.. مجرمين سفاحين هيلعنهم التاريخ مهما عملوا لهم مقامات تزورها الناس ومهما سموهم ابطال ومهما زوروا في التاريخ علشان يمسخوا العار الى سابوه.

عارفين حصل ايه في قرية اكوراي في مكناس سنة 1912؟

بعد توقيع معاهدة الحماية الفرنسية على المغرب سنة 1912م. تغلغت القوات الفرنسية في جبال الاطلس.. مكانش وجود عسكري واستعمار وخلاص.. فرنسا لما بتدخل بلد بتمسح كل تاريخها وهويتها وثقافتها.. الجيش الفرنسي وصل ومعه سياسيين وادباء ومؤرخين وعلماء في مجالات مختلفة.. الهدف مكانش اكتشاف الأرض ولا التوثيق.. الهدف كان محو تاريخ البلد وهويتها وزرع الهوية الفرنسية مكانها.. حرقوا سجلات المواليد ودفاتر توثيق الزواج وسجلات المحاكم الشرعية والعقود التجارية وسجلات الأراضي.. كل الورق الحكومي ومعاملات البلد دمره علشان يحطوا مكانه القانون الفرنسي والاسماء الفرنسية واللغة الفرنسية.. الكلام ده كان مؤذى لسكان الإقليم الى حاولوا بشكل طبيعي جدا يقاوموا المستعمر الأجنبي..

الفرنسيين عملوا ايه لما ظهرت ضدهم المقاومة في اكوراي؟

نظموا حملات لاصطياد المجاهدين المغاربة بطريقة صيد الحيوانات في ادغال افريقيا.. كانوا بيقتلوهم وبعدين يفصلوا رؤوسهم عن اجسامهم.. وفي الاخر علقوا الرؤوس المفصولة وسط الصخور كلوحة سريالية عبثية.. بعد كده صوروا الجريمة دي وعملوا بيها طابع تذكاري يخلد بطولة الجيش الفرنسي..

الطبيعي ان الدول تصدر عملات او طوابع تذكارية لإنجاز رياضي او زراعي او نجاح في مجال من مجالات التنمية في الحياة.. عمرك انت شفت دولة أصدرت طابع عليه رؤوس ناس هي قتلتهم.. في ارضهم.. علشان بيقاوموها؟؟

فرنسا تغرد منفردة في تاريخ سفلة هذا الكوكب.

المرّة دي مش هقولك الحكاية دي قرأتها في الكتاب الفلاني او حكى عنها المؤرخ العلاني.. المرّة دي صورة الطابع نفسه موجوده – ولا زالت – ومكتوب عليها "في ذكرى اكوراي."

سمعت عن مذبحّة دنشواي في مصر؟

بدل 1906 هتخليها 1955.. وبدل دنشواي هتخليها بنى ملال.. شيل الإنجليز وخط مكانهم الفرنسيين.. واحكى باقي القصة زى ما هي بالظبط بنفس التفاصيل.. تطلعك مذبحّة قرية بنى ملال في مارس 1955.

البوليس الفرنسي قرر يوزع معونات على اهل بنى ملال.. الله على الإنسانية.. خدوا البلد وسرقوا فلوسها وبيوزعوا على الناس من فلوسهم معونات.. كتر خيرهم والله.

تدافع العشرات وقت التوزيع.. زحمة غير منظمة زى ما هو متوقع.. عشرات من المغاربة ماتوا في التدافع.. مش مهم.. كلاب وراحت.. الفرنسيين دفنهم في حفرة جماعية بدون غسل ولا صلاة ولا اى طقوس إسلامية.. ردموا بس عليهم شوية تراب وخلاص.. الامر الى استفز خلية مقاومة سرية في مراكش.. راحوا جايين قاتلين واحد بس من الفرنسيين هناك.. شخص واحد بس.. هو كان موظف كبير ومليونير صحيح.. بس في الاخر.. هو انسان واحد.

تحقيقات البوليس الفرنسي قالت ايه؟

الفاعل مجهول.. القتل مات بعشرات الرصاصات خرجت من مسدسات مختلفة ومن مسافة قريبة.. يعنى الفاعل مجموعة مش فرد..

في الوقت ده كانت خلايا المقاومة السرية التابعة لحزب الاستقلال المغربي شغالة على ودنه.. كانوا بيغتلوا بياعين السجائر وأصحاب البارات والأنشطة التجارية الفرنسية.. بدأوا يركزوا على ضرب النشاط الاقتصادي في مراكش.. لعل وعسى يحسوا بالخسارة.. فيغوروا في داهية ..

كده البوليس الفرنسي عرف مين القاتل..

حلو.. نشتغل بقي..

عمليات اعتقال عشوائية جنونية موسعة كان ضحيتها 120 مغربي أعمارهم بين 20 و50 سنة اتساقوا في طوابير طويلة مربوطين في بعض من رقابهم بالحبال زى ما كانوا بينقلوا العبيد من افريقيا لأوروبا وامريكا على السفن إياها.. كل دول اتهموا بالضلع في قتل المواطن الفرنسي.. مرحلوهمش على اى سجن ولا اى معتقل.. سابوهم بس في الشارع كده مربوطين بالحبال.. على نص النهار وحدة من وحدات الجيش الفرنسي معديه شافت المنظر.. سأل قائدهم عسكري الحراسة.. العيال دى عملت ايه يا فرانسوا؟ قاله متهمين بقتل مواطن فرنسي يا مون جنرال..

الجنرال مسمعش باقى الكلام.. وجه الأوامر لعساكر الوحدة فورا بقتل كل الناس دى رميا بالرصاص.. متكلمش حتى مع ظابط البوليس المسؤول عنهم.. هو قرر وحكم ونفذ الحكم عليهم بالإعدام وقتي كده وكمل طريقه عادى جدا ولا كأن اى حاجه حصلت.. سابهم زى ما هما كده مرميين في الشارع بدون دفن.. مخافش من طاعون مثلا ولا اى مرض ممكن يحصل بسبب الجثث اللي هتتعفن.. عادى بقي.. حتى لو حصل طاعون.. ما هو الى هيموت مغاربة يعنى مش حاجه مهمه ولا حاجه.

طلع النهار وجه ظابط البوليس وشاف المنظر ده.. فيؤمر عساكره انهم ينفذوا في الجثث العقاب الفرنسي المشهور.. قطع الرؤوس.. ازاى العيال دى تموت كده في الشارع ويعملوا زحمة ويوسخوا الأرض بدمهم.. فصلوا رؤوسهم عن اجسامهم ووقفوا يتصوروا بيها مع بعض تخليدا للذكرى والبطولة.. وبرضه مش هقولك الحكاية دى في اى كتاب.. الصورة موجودة تحت تغني عن اى كلام.

تسمع تاني؟

أقولك عن مذبحه الريف وللا مذبحه الدار البيضاء وللا مذبحه مكناس وللا الاتفاق الفرنسي الاسباني ضد المغرب وللا استخدام المغاربة دروع بشرية في الحرب العالمية الأولى وللا ايه وللا ايه وللا ايه..

في الحديث عن فرنسا وماضيها شديد السواد.. احكى كل شيء سيء واستخدم كل الالفاظ القذرة.. تخيل كل صورة من صور الوحشية والهمجية والسفالة ووضاعة الاخلاق هتلاقىها موجودة.. مش مهم تقرأ من كتاب او من مقال او تنفج على وثائقي.. مهما قرأت وعرفت وكتبت.. ما فعله الفرنسيين في بلاد المغرب اكثر فظاعة من قدرتك على الاستيعاب والتوثيق والاحصاء..

انا لو من مدرب المغرب اخذ الصورتين دول احطهم في اوض اللعيبه والحمامات واطيعها على التي شيرتات.. يناموا عليهم ويشوفوهم اول ما يصحوا.. يشوفوهم في الحمام وعلى الشاشات وفي الشوارع والمطاعم.. في كل مكان يوجد فيه مغاربه لازم

تكون الصور دى موجودة.. مش لازم ابدأ الثأر مع فرنسا ينام.. مش لازم ابدأ ننسى هما عملوا فينا ايه.. مش لازم ابدأ ننسى انهم لازم يدفعوا الثمن طال الزمن او قصر ..

في صحراء المماليك في قلب القاهرة.. مقابر شهداء القوات المسلحة.. هناك هتلاقى قبر رخامي ابيض مجاور لقبر اللواء محمد نجيب والمشير احمد بدوي والمشير احمد إسماعيل ..

قبر تفوح منه رائحة جميلة.. ولكنها مش اجمل من اسم صاحب القبر..

المجاهد المسلم المغربي.. الأمير عبد الكريم الخطابي..

سبب آخر يخليك مش على بعضك النهارده في انتظار الانتصار المغربي..

ان شاء الله نغلبهم النهارده في ماتش كورة..

وبكره نغلبهم في العلم والاقتصاد..

بعده نتفوق عليهم عسكريا..

بعد كده نحاكمهم على جرائمهم بالقانون العادل.. مش شرط نقتص منهم او نقطع رؤوسهم زى ما عملوا معانا.. كمسلمين متحضرين ممكن جدا نعفو عنهم عند المقدرة.. المهم اننا وقتها نملك القدرة على العقاب..

قريبا ان شاء الله.

مربوحة بالمغاربة..

## وادی المخازن

هل ممكن تبقى في علاقة بين المنبر الذهبي في روضة سيدنا النبي عليه الصلاة والسلام.. وبين منتخب المغرب في قطر 2022؟

طيب.. نرجع مع بعض لكأس العالم بتاع سنة 1578م..؟؟

الكأس ده مكانش كأس عادى ابدأ.. ده كان كأس بعنوان كنا جبلاً..

صحيح ان الأندلس وقتها كانت راحت للأبد.. وصحيح ان السعودية وتونس خرجوا من الدور الأول وصحيح كمان ان مصر موصلتش أصلاً.. بس لو بصينا على التاريخ من فوق كده هنلاقي ان شمس الإسلام عمرها ما غابت ابدأ عن الكوكب ده من يوم ما اشرقت..

الممالك الإسلامية تقع هنا وتقوم هناك.. تضعف هناك وتشد هنا.. أجيال بتسلم أجيال.. في اللحظة اللى وقع فيها الامويين قاموا العباسيين.. ولما العباسيين اتوكسوا قاموا السلاجقة.. ولما السلاجقة خابوا المماليك شالوا الراية.. ولما المماليك ركزوا على جباية الضرائب وضيعوا فلوسنا في العاصمة الادارية.. ظهر العثمانيين علشان يحفظوا ماء الوجوه ويشيلوا راية الإسلام في الاناضول وأوروبا.. كل فترة من دول كان المسلمين فيها سايقين العالم.. كتبوا التاريخ واثروا في الكوكب اثر تاعنا وتاعب الآخرين.. صحيح احنا بقالنا فوق ال 100 سنة واكئين بالجزم.. بس ايه يعنى 100 سنة في عمر التاريخ؟؟ اعتبرها الفترة الانتقالية بين جدك الى كان صاحب اطيان ملهاش آخر ضيعها ابوك وعمك بخناقاتهم على الميراث.. وبين المجد الى هيوثره منك ابنك بعد مشوار حياتك الصاخب علشان ترجع المجد الضائع..

والمجد الضائع ده يا اسيدنا كان معركة اسمها معركة الملوك الثلاثة "وادی المخازن.."

الملوك الثلاثة هما سيباستيان الأول ملك البرتغال وعبد الملك الأول السعدي ملك المغرب.. وابن اخوه محمد المتوكل على الله السعدي الحسني الهاشمي سلطان المغرب برضه في نفس الفترة.

الفترة دى كان فيها زحمة احداث رهيبه ملخصها ان العثمانيين بعد ما فرضوا سيطرتهم على مصر وأجزاء من شمال افريقيا.. حصل بينهم وبين الدولة الحفصية في المغرب الأدنى (تونس) والدولة الزيانية في المغرب الأوسط (الجزائر) والدولة الوطاسية في المغرب الأقصى (المغرب) نوع من أنواع الاتفاق او الاتحاد.. الاتفاق ده كان موجه في الأساس لصد قوى أوروبا الاستعمارية الى كان على راسها في الوقت ده اسبانيا والبرتغال.. اوعى تفتكر ان الاسبان اكتفوا بالأندلس وقالوا شكرا على كده.. ابدأ.. طول ما في الاختراع الى اسمه الباباوات دول.. هيفضل سلسال الدم شغال.. المنطق يقول ان مملكتين بينهم بحر وجبال مينفعش يبقى في بينهم حرب.. تجارة ممكن.. انما حرب ليه والموانع الطبيعية اهي مأمنه كل واحد في ارضه؟

ده كلام الناس بتوع السلام مش كلام باباوات العصور الوسطى.. زى ما كان في البابا جريجوري السابع الى خد باله ان بلاد الشرق تفيض لبن وعسل.. وزى ما اخترع البابا اوريان الثاني صكوك الغفران.. كان في برضه البابا نيقولا الخامس الى خد باله من الموقع المهم لجزر الكناريا وجزر سبته ومليله وطلع هو كمان باختراع اسمه البراءة.. دى صك كنسي يقضى بملكية الجزر دى لمملكة البرتغال الى استغلت الكلام ده وزاطت في سواحل شمال افريقيا لحد ما احتلوا مدن القصر الصغير وأصيلا والصويرة وآسفي في أيام الملك الفونسو الخامس.. الاسبان طبعاً موقفوش يتفجروا.. هما كمان كان لهم نصيب في طنجة وغساسه وإقليم الناطور.. نفس التكنيك بتاعهم في حملاتهم الصليبية الأولى.. يدخلوا على المدن الساحلية الآمنة وعد يا ريس جثث الأبرياء وحمامات الدم الى مش بتخلص.. كل ده تحت راية الصليب.

دخول الأوروبيين عندنا بالمنظر ده مكانش كفاءة منهم ولا حاجه.. والدليل هو الضرب المبرح الى اكلوه في ملاذكرد وحطين وعكا والمنصورة ووادي لكة والارك والزلاقة.. التاريخ اثبت ان في الحروب الحقيقية بتاعة الفروسية والمواجهات المباشرة.. احنا

نتفوق.. انما في شغل الخيانات والمذابح وقتل المدنيين ده.. احنا - وبكل فخر - نسقط بجدارة.. علشان كده زى ما قال الدكتور قاسم عبده قاسم والمؤرخ محمد عنان في تأريخهم للحملات الصليبية والأندلس.. انما هزمونا بتشرذمنا.

في الفترة دى ظهر راجل بركه في المغرب.. كان من الاشراف.. اسمه محمد بن عبد الرحمن الحسني.. قامت على ايده الدولة السعدية.. الناس سموها كده لانهم سعدوا في أيامه بالاستقرار والأمان بعد فترة مضطربة من الحروب والدم.

السعديين رجعوا المدن الى احتلها البرتغاليين والاسبان.. وقدروا كمان يحطوا حد لطموحات واطماع العثمانيين في المنطقة.. مسكوا العصاية من النص.. حافظوا على علاقات متزنة مع العثمانيين، والبرتغاليين، والاسبان، والإنجليز.. كل طرف من الكبار متحين الفرصة علشان ينط على الثاني ويفرتكه.. بس طبعا محدش فيهم يقدر يزعل السعديين لان ده معناه اتفاق السعديين مع عدوه علطول.. علشان كده عاشت المغرب فترة سعيدة لحد وفاة السلطان السعدي الثالث أبي محمد الغالب بالله وصعود ابنه محمد المتوكل على الله مكانه.

وبدأ القفش..

محمد المتوكل على الله ركب العرش في اواخر أيام السلطان العثماني سليم الثاني بن سليمان القانوني.. سليم الثاني كان سلطان على الله حكايته خالص.. لا هو في قوة وحكمة ابوه ولا عنده واحد على الف من غشومية جده.. وزى ما احنا عارفين.. الحاكم الطيب اخره يُوهم بالتخاير مع قطر ويموت في السجن.. في أيام سليم الثاني تجرأ البرتغاليين على سواحل شمال افريقيا في البحر المتوسط.. البحر الى كان خير الدين بارباروسا عامله بركة عثمانية أيام سليمان القانوني.. كل الكلاب دى شمت نفسها لما مات الرجل القوي.

محمد المتوكل على الله السعدي كان عنده ميول لاستبدال العثمانيين في المغرب بالبرتغاليين.. حاجه اخر خالد منتصر.. نفس القرف الى عمله ملوك الطوائف في الاندلس.. كرره تاني محمد المتوكل لما اتحد مع سيباستيان ملك البرتغال ضد أهله.

الكلام ده معجيش اعمام المتوكل.. عبد المؤمن وعبد الملك وأحمد.. الثلاثة لجأوا للعثمانيين علشان يشكوا تحالف يسقطه من الحكم.. 24 معركة دخلها المتوكل "المسنود بالبرتغاليين" ضد اعمامه "المسنودين بالعثمانيين".. وما شاء الله عليه.. خسرهم كلهم.. عبد الناصر اوى في نفسه الراجل ده.

الكلام ده هيج البرتغاليين.. بيقول عبد الرحيم بنحاده في كتاب "تاريخ الدولة السعدية التكمذارية" إن البرتغاليين قالوا للمتوكل: "نحن خارجون وأنت معنا.. فإن ظفرنا بالبلاد فلا قسم لنا معك فيها إلا السواحل.. وما دونها فهو لك.. فأنعم لهم بذلك وتعاهدوا عليه.. فعند ذلك حلفوا لهم في صلبانهم وحلف لهم هو على ما ذكر.. وأخذوا في إقامة العمارة والجيش ودفع المال وما يحتاجون إليه."

كان من نتيجة الاتفاق ده ان المتوكل تنازل عن مدينة اصيلا الساحلية للبرتغاليين.. نفس الى عمله الملك الكامل الايوبي لما تنازل للصليبيين عن القدس مزاجه.. علماء المغرب عرفوا المصيبة دى فبعثوه جواب شديد اللهجة مكتوب فيه:

"انت اتفقت معهم على دخول أصيلا وأعطيتهم بلاد الإسلام.. فيا لله ويا لرسوله هذه المصيبة التي أحدثتها.. وعلى المسلمين فتقتها.. ولكن الله تعالى لك ولهم بالمرصاد.. ثم لم تتمالك أن ألقى نفسك إليهم ورضيت بجوارهم وموالاتهم.. وأما قولك في النصارى أنك رجعت إلى أهل العدو واستنكفت أن تُسميهم بالنصارى ففيه المقت الذي لا يخفى."

وهو جبلة.. لا دم ولا دين ولا نخوة..

اتحرك الجيش البرتغالي من لشبونة في اتجاه المغرب.. من لأكوس الى قادس الى طنجة الى قابل فيها سيباستيان ملك البرتغال حليفه المتوكل.. بعد كده الاتنين اتحركوا سوا على أصيلا في انتظار اللقاء المحسوم.. مع انتشار اخبارهم انتشرت الدعوات في كل مكان في المغرب "اقصدوا وادي المخازن للجهاد في سبيل الله".. ولما اتجمعت قوات المسلمين في مراكش كتب عبد الملك رسالة حلوة لملك البرتغال قاله فيها:

"إن سطوتك قد ظهرت في خروجك من أرضك وجوازك العدو.. فإن ثبت إلى أن نقدم عليك فأنت نصراني حقيقي شجاع.. وإلا فأنت كلب بن كلب.."

ايوه كده.. كلب ابن بوي.. وابن م\*\*\*\*ه كمان.

سيباستيان كان معاه 40 مدفع و125 ألف مقاتل بسلاحهم.. عبد الملك السعدي كان معاه 34 دفع و40 ألف مقاتل.. عبد الملك كان متفوق في الخيل والفروسية.. بس سيباستيان كان متفوق بالفلوس والعدد وخيانة حاكم البلد.. نظريا.. صعب اوى عبد الملك يعمل اى قلق في الظروف دى ..

وهنا يا فندم روح عمرو بن العاص رفرت على المكان..

عبد الملك كان يراقب جيوش سيباستيان ليل ونهار.. سيباستيان قاعد في اصيله ضهره للبحر.. يعنى مؤن وامدادات ملهاش اول من آخر.. عبد الملك كان عاوز يسحب على وادى المخازن الى مفيش بينها وبين اصيله الا جسر واحد.. عبد الملك بعث رسالة مستفزة لغرور سيباستيان قاله فيها:

"إني قد قطعت للمجيء إليك ست عشرة مرحلة.. فهلا قطعت أنت مرحلة واحدة لملاقاتي؟"

انت كذاب ياض وبطنك فاضية ..

غباء اوى من سيباستيان انه يسخن من كلمتين ويسيب اصيله ويروح وادى المخازن.. لو كان اتفرج على فيلم الناصر صلاح الدين كان عرف ان ده بالظبط نفس الفخ الى نصبه أحمد مظهر لرينو دى شاتيون علشان ياخده حطين بلبل ورا مصنع المجانيق.. تجاهل سيباستيان كل النصائح واتحرك فعلا على وادى المخازن.. عبد الملك عامل فيها عبيط ولا كأنه واخذ باله من حاجه.. بينما في ظلمه الليل بعث أخوه احمد المنصور بالله مع أشرف حكيمي وحكيم زياش جابوا عالي الجسر واطيه.. لو السيسي كان عايش ايامهم كان مات قهرا وحزنا على الكوبرى.. وكان مصطفى بكري عمل كتاب سماه "معركة الكوبرى الشهيد".

لما طلع النهار وبدأت المعركة.. سيباستيان امر المدافع بتاعته انها تشتغل بعد ما شاف جيش احمد المنصور بالله ببخلع من الحرب.. تفاعل بالنصر وسط صرخات القساوسة الجنونية.. اتارى الحاج احمد كان بيلف على جيش سيباستيان من الخلف عند مخازن البارود.. عقب سيجارة كليبواترا اندلسي وسط المخزن ده وبقت الانفجارات في قلب جيش البرتغاليين عامله زى صواريخ حرب ايطاليا.. مسافة ما رجعت المقدمة تحاول انقاذ الموقف.. هجم رماة وخيالة عبد الملك عليهم من قدام.. حاول فرسان سيباستيان الهروب عن طريق الجسر الى اصيله.. بس لما وصلوا ملقوش ايوتها جسر.. مكانش في غير جيش احمد المنصور مستنيهم ورا وجيش عبد الملك كابس عليهم من قدام.. العساكر مبقتش عارفه تروح فين ولا فين.. الى رمى نفسه في المية.. واللى ساب نفسه للأسر.. واللى قالهم يا جدعان انا مسلم معاكوا.. احنا كنا بنهزر.. دى حلقة اسمها رامت في الاندلس.. بينما في مؤخرة جيش المسلمين واقف ياسين بونوزى الأسد بيحرس مؤن المسلمين.

سيباستيان اتقتل والمتوكل غرق في النهر.. لقوا جتته طافية على المية تانى يوم.. عبد الملك السعدي كمان للأسف مات هو كمان في الحرب دى.. المؤرخين المسلمين بيقولوا من المرض.. والأوروبيين بيقولوا ان المتوكل دس السم لعمه.. في تاريخ المسلمين مكتوب ان حاجب عبد الملك.. رضوان العليج.. هو الوحيد الى عرف انه مات وكتم الخبر عن الجيش.. كانت الرسائل بتخرج من عنده يختم الملك وفيها توجيهات عسكرية زى ما عملت شجر الدر كده في معركة دمياط.. على اى حال.. يكذب المؤرخين الأوروبيين كما يتنفسون.. علشان كده هنعتمد الرواية الإسلامية.. وهى ان الرجل مات على سرير المرض.. ودليل اخر على كده انه أوصى بالحكم من بعده لأخوه الشجاع احمد المنصور وقاله "فاعلم أني لأحب أحدا بعد نفسي محبتي لك.. ورغبتي في انتقال هذا الأمر بعد إلا إليك لا لغيرك".. ما هو اصل العثمانيين برضه مكانوش ملايكة يعنى.. في الزحمة كده حاولوا يحطوا إسماعيل بن عبد الملك السعدي مكان ابوه لأنه كان حليفهم.. بس الناس مسكت في احمد المنصور الى كان ذكى جدا بالإضافة الى شجاعته.. بعث المنصور طلب للعثمانيين علشان ينضم ليهم ويحكم المغرب باسم الخلافة العثمانية.. بلا مؤامرات بلا دسائس بلا والى كل سنتين والكلام الخايب ده.. وطبعاً كان العرض مغري جدا للعثمانيين.. فوافق مراد الثالث على العرض.. وانطوت الدولة السعدية تحت لواء الخلافة العثمانية الى كفتهم شر البرتغاليين والاسبان لحد القرن ال 19.



الناحية الثانية بقی.. الحركة الخایبة الی عملها سیباستیان دی مسابتش فی اسرته الحاكمة الا فرد واحد بس كان مراهق ایامها.. مكانش فی ای صعوبات قابلت فیلیب الثاني ملك اسبانيا علشان یأخذ البرتغال كلها لحسابه بعد المعركة دی.. وانتھت للابد البرتغال كمملكة استعمارية صاحبة جیوش.. فین بقی فی القرن ال 19 طلع لها جیش علی استحياء كده عمل شویة شقاوة فی أنجولا وموزمبيق.. برضه فی الدول الغلبانة الی ملهاش فی الحرب ولا تعرف من الدنيا الا الزراعة ورعى حیوانات.

نرجع بقی للسؤال الاولانی؟

ایه علاقة المعركة دی بمراد الثالث بالمنبر الذهبي فی مسجد سیدنا النبی؟

اقولك ان مراد الثالث هو الی بعت المدافع العثمانیة "الخبرة" لعبد الملك السعدی ومعاھم 5000 عسكري انكشاري من الی كانوا الأوروبیین بیشفوا هدمهم منشوره علی حبال الغسیل فیطلعوا یجروا من الخوف.. وهو كمان الی عمر منبر المسجد النبوی الموجود حالیا فی الروضة الشریفة علی صاحبها الصلاة والسلام.

حد یعمل منشن لأشرف حکیمی علشان یریحنا من القلق ویخلص معركة النهارده بجون فی الدقیقة 40 من الشوط الثاني.. یفرح ویفرحنا معاه وننزل الشوارع بأعلام المغرب نغنی ونقول مربوچه یالمغاربة.. مربوچه یالأسود.

ان شاء الله.

## ساعة الجزري

قبل ما ارجع من دبي للرياض جالي تليفون طوارئ من ام العيال.. عاوزين حاجات ضروري من اقرب مول.. ده على أساس يعني ان الرياض مفيهاش مولات وان الطلبات لازم تيجي من مولات دبي والا هتصيبنا اللعنة.. هو استعباط طبعاً.. بس طالما فيها دبي.. يبقى انا بموت في الاستعباط "بصوت لطفي لبيب.."  
شدت الرحال وطلبت اوبر وعلى مول ابن بطوطة رأساً.. صدقوني.. الموضوع اكبر من واحد بيحب التاريخ راح مول فكرته مستوحاه من التاريخ.. الموضوع اكبر من كده بكثير.. وهتأكدوا من صحة كلامي مع نهاية الجزء الثاني من الحكاية..  
لو هنتكلمم جد.. يبقى مول ابن بطوطة هو احسن مولات الامارات كلها.. ويمكن مولات العالم كمان..  
قولي ليه..

جميل.. قتلتي ايه..

شوف يا سيدي.. احنا نجيب الكلام من اوله..

سمعت عن رحالة مسلم اسمه ابن بطوطة؟؟

ده يا سيدي يبقى أبو عبد الله محمد بن عبد الله بن اللواتي الطنجي "نسبة الى قبيلة لواته في طنجه في المغرب".. اسم شهرته خده من امه "فظومة" الى اتحرف مع الوقت وبقي بطوطة.. يظهر ان من زمان اسم فاطمة ومشتقاته بيبقى دلعه بطة ومشتقاتها.. لقبته جامعة كامبريدج بأمر الرحالة المسلمين بعد ما لف بلاد المغرب ومصر والحيشة والشام والحجاز ونجد والعراق وفارس واليمن وتركستان وبلاد ما راء النهر والهند والصين وبلاد التتر وأدغال افريقيا.. 120 الف كيلومتر قطعها ابن بطوطة في رحلاته حوالين العالم في عصر مكانش فيه وسيلة انتقال الا الخيل والجمال.. خرج من بيتهم في المغرب ناوي يحج بيت ربنا وهو عنده 22 سنة.. رجع بعد 30 سنة الى المغرب وهو معاه كنوز لا تنتهي من اللي شافه في رحلاته.. فقرر يسجل كل ده في كتاب اسمه تحفة النظار في غرائب الأمصار وعجائب الأسفار "هتلاقوه في التعليقات".. لك ان تتخيل هو شاف ايه في رحلته دي خصوصاً لو عرفت انه بدأ طريق العودة من الهند في زمن الطاعون الأسود الى قضى على ربع الكوكب في أيام السلطان حسن في مصر المحروسة.

الكلام عن ابن بطوطة يحتاج مقالات ومقالات.. ويحتاج اكثر انك تفتح الكتاب بتاعه وتقرأ الى كتبه عن كل بلد زارها.. خصوصاً انه كان موجود في اكثر من منطقة ساخنة حوالين العالم وحضر احداث محضرهاش اغلب مؤرخين الفترة الى سجلوا ما سمعوه من الرحالة الى زى ابن بطوطة كده.

الامارات بقي قررت تسجل تاريخ ابن بطوطة بصورة تدل على عقلية تجارية إدارية تراثية ملهاش مثيل في بلاد كان لها تاريخ وتراث حتى تسلط عليها العسكر وجابوها الأرض.

بنوا مول جميل جدا في دبي مستوحى من رحلات ابن بطوطة وسموه بنفس الاسم.. المول عبارة عن 6 ردهات "اقسام" كبيرة يربطها ممرات زى الشوارع كده.. على اليمين والشمال محلات كل حاجه.. بالإضافة الى ملاهى للأطفال ومطاعم بالهبل وبولينج وسينما وهايبر ماركت ومكاتب كتير للخدمات الحكومية زى الكهرباء والاتصالات وخلافه..

لما تروح المول غصب عنك هيلفت نظرك تصميمه الفريد جدا.. كل قسم من اقسامه معمول على شكل رحلة من اشهر رحلات ابن بطوطة.. كل مكان منهم مصمم بالطراز المعماري المميز للبلد الى معمول شبهه.. ردهة الأندلس مثلاً ترجعك الى أيام الفردوس المفقود بتمثيل الأسود الرخام حوالين النافورة المرمرة.. وفي ردهة تونس هيستقبلك مجسم للعالم الاندلسي عباس بن فرناس وهناك هتحمس انك في أيام قرطاج العظيمة.. هتقضى وقت لطيف في ردهة كونج فو باندا.. التنين الصيني العظيم واكدهم الغريب.. ولما هتدخل ردهة فارس رقبك هتتلوح من رأسك الى باصه لفوق باستمرار علشان تفاصيل القبة الفارسية التحفة.. لو حبيت تختصر تاريخ ايران كله في مشهد واحد مش هتلاقي افضل من القبة دي.. اما في ردهة مصر مش بس التصميم التحفة هيعجبك.. لا.. هيعجبك كمان الطريقة الى خلطوا بها التاريخ المصري القديم بالتاريخ الإسلامي علشان يحلوا معضلة مصر إسلامية وللا فرعونية.. ومسك الختام لازم يبقى ردهة الهند.. هتقف تتصور كتير عند ساعة القلعة وساعة الفيل قبل ما تديها جيم بولينج.. وبعدين تنهي الزيارة الجميلة دي بطلب عربيه ليكزس من اوبر توصلك مكان ما تحب.

في ردهة الهند هتلاقي تمثالين كبار اوى.. ساعة الفيل وساعة القلعة..

خليك معاً ثانية هنا.. دول مش مجرد تماثيل شكلهم غريب محطوطين علشان الناس تتصور جمبهم..

اطلاقاً..

أستاذي الفاضل.. او بمعنى ادق.. المهندسين الأفاضل.. فضلاً قفوا باحترام.. نحن في حضرة بديع الزمان أبو العز بن إسماعيل بن الرزاز.. الملقب بالجزري.. أبو الهندسة والميكانيكا في العصور الوسطى.. الرجل الى نقلت عنه أوروبا عن طريق حملاتهم

الصليبية كل حاحه عملها وكتبها علشان تدور بيهم الأيام ويزلوا انفااس ابونا بالعلم والمخترعات الى نقلوها عن طريق ابونا.. أبو المهندسين المسلمين.. الجزري.

اتولد الجزري سنة 1136م في منطقة اسمها جزيرة ابن عمر "على نهر دجلة في شمال سوريا".. خد بالك من تاريخ الميلاد.. اول الحملات الصليبية الى انتهت بالاستيلاء على القدس وتأسيس مملكة بيت المقدس اللاتينية وبعض الامارات في الشام والاناضول زى الرها وعكا وانطاكيا سنة 1099م. الحملة الى بعدها بدأت سنة 1147م. يعنى مهندسنا العبقري اتولد في احلك فترة مرت بيها الامة الإسلامية في المكان ده.

اشتغل الجزري رئيس مهندسين في ديار بكر شمال الفرات لحد ما لفت نظر حكام ديار بكر الأراقة ودخل في خدمة ملوكهم لمدة 25 سنة.. في الفترة دي خرج من دماغ الجزري العبقرية تصميمات لعشرات وعشرات من الات ممكن نعتبرها مخترعات ذات أهمية عظيمة.. اليات كلها بتدور حوالين استخدام تدفق المياه كعنصر أساسى لتحريك تروس او روافع.. الى هي حاليا يعرفها زمايلنا بتوع ميكانيكا بالهيدروليك.. ابتكر الجزري الات رفع مياه للري وساعات شديدة الفخامة بتشتغل بالمياه برضه.. الجزري دون كل تصميماته دي في كتاب اسمه "لجامع بين العلم والعمل النافع في صناعة الحيل".

في هنا سؤال مهم جدا.. يمكن السؤال يخص موضوع تانى.. لكن اجابته موجوده في الكلام عن الجزري وامثاله. الصليبيين جم عندنا من اول سنة 1096م. وأخرجهم السلطان الأشرف خليل بن قلاوون سنة 1291م. من عكا للأبد.. يعنى قعدوا عندنا في حدود 200 سنة.. هل نقدر نقول هنا انهم خرجوا زى ما دخلوا.. شحاتين؟ اطلاقا..

الصليبيين لما جم عندنا كانت أوروبا في حالة انهيار اقتصادي واجتماعي وعسكري.. في منطقتنا العامرة اتعلموا كثير في كل مجالات الحياة لما احتكوا بالمسلمين الى كانوا فارقين عنهم في سلم الحضارة درجات كثير.. اتعلموا فنون الزراعة وعرفوا محاصيل مكانوش يسمعو عنها قبل كده زى قصب السكر مثلا بينما هما في أوروبا كانوا بيحلوا الأكل بالعلس زى ما ذكر ابن منقذ في كتابه "الاعتبار".. في خلال ال 200 سنة دول نقلوا مخترعات وتصميمات كثير من تراث الجزري وبني موسي واللى زيهم الى أوروبا.. دي كانت البذرة الأولى الى قامت عليها نهضتهم بعد كده لأنهم زى ما نقلوا من الشام والاناضول نقلوا من الأندلس.. وده الى سجله مؤرخيهم زى الدكتور الألمانية زيجيريد هونكه والفيلسوف الفرنسى جوستاف لوبون وغيرهم.. اتعلموا مننا حاجات كثير جدا الا انهم يستحموا ويتطهروا.. مؤخرا بس انتقل اختراع شطاف الحمام من المسلمين الى أوروبا بفضل بعثاتنا التعليمية في جامعاتهم وبفضل كأس العالم في قطر.. يعنى الأوروبيين فضلوا من اول الخليقة لحد أسبوعين فاتوا امبولاتهم ولمؤاخذه مش نظيفة لحد ما عرفوا اختراع الشطاف من عندنا.

اختار الجماعة بتوع مول ابن بطوطة اكثر حاجتين عملهم ابن الجزري اثاره للانتباه والجدل وحطوهم في المول علشان يحكوا للناس حكاية الناس الى كانت.. ثم أصبحت.

ساعة الفيل.. وساعة القلعة..

أيه دول بقى؟؟

بكره نعرف.

نكمل حوار ابن الجزري في مول ابن بطوطة؟؟

في ساحة الهند هتلاقوا مجسمين لساعتين كبار من مخترعات الجزري.. ساعة الفيل وساعة القلعة..

الساعتين دول حكاية يا مون بيه..

ساعة الفيل عبارة عن تصميم ميكانيكي فلسفي "خد بالك من فلسفي دي" بيحسب الوقت بدقة كل نص ساعة.. موجود منها حاليا 3 نسخ.. واحدة في متحف مدينة Le Locle في سويسرا.. والثانية في متحف كاوست "متحف العلوم والتقنية في الإسلام في مدينة الملك عبد الله للعلوم والتقنية في جدة" والثالثة في مول ابن بطوطة في دبي.

تصميم ميكانيكي فلسفي.. ازاي طيب؟

الساعة عبارة عن مجسم فيل ضخمة معمول من النحاس.. الفيل شايلى هودج فوقه قلعة.. وفوق القلعة مجسم لطائر العنقاء.. حوالين أعمدة القلعة في مجسم تنين فاتح بقة.. وفي الهودج قاعد مدرب صقور على ايده صقرين ومعاه طبله.. وفي داخل القلعة

المحمولة على الهودج في كاتب ماسك قلم بيشاور على قوس مدرج "درجات الوقت" والقلم بيتحرك على طول القوس علشان  
يشاور على الوقت الصحيح.. حركة القلم الكاملة على القوس تساوى 30 دقيقة بالتمام والكمال..

بتشتغل ازاي بقى؟؟

جوا الفيل في مخزن مية مخروم من تحت.. المية بتخر منه على جردل.. الجردل متوصل بسلسلة مربوط في اخرها قايم موجود  
في برج القلعة اعلى ظهر الفيل.. الجردل بيتملى كل نص ساعة.. لما يتملى وزنه بيتقل وبيشد السلسلة.. السلسلة تحرك القايم  
الى فوق.. القايم ييزق كرة معدنية بتقع في بق التنين.. يقوم التنين يطلع صوت وهو بيتحرك لقدام.. حركة التنين لقدام بتزق  
محور ثاني بيشغل ضارب الطبل الى قاعد في الهودج مع الصقور.. قوم الطبله تشتغل والصقور ترفرف وتعمل صوت.. وبتتكرر  
العملية دى كل 30 دقيقة بالتمام والكمال.

حد فاكّر حاجه من أيام الثانوية العامة؟؟ كان عندنا في التفاضل فصل اسمه "المعدلات الزمنية المرتبطة".. كانت اشهر المسائل  
بتاعته هي مسألة الحنفية الى يتملي حوض مخروم دى.. نفس فكرة ساعة الفيل بتاعة الجزري بالطبط.

هل معني كده ان نيوتن بقوانينه الكثيرة الى سقطت نص شباب وبنات مصر في الثانوي نقل من الجزري مثلاً!!!

مش انا الى بقول يا فندم.. ده تاريخ الكوكب هو الى بيقول ان الجزري مات سنة 1206م ونيوتن اتولد سنة 1642م.

يبقى مين نقل من مين؟؟

طيب.. دى الميكانيكا.. ايه بقى موضوع الفلسفة ده؟

فكرة الساعة مستوحاه من ساعة "جاتي" الهندية وقوانين الطفو للمهندس اليوناني ارشميدس.. الجزري لما صمم الساعة حط  
فيها فيل هندي وصقر عربي وقلعة خشب فيها كاتب معمم وسجادة إيرانية وطائر مصري وتنين صيني..

واخد بالك الجزري عايز يقول ايه؟

هو بيقولك في الساعة دى "بالهندسة" ان الى انت شايفه ده رمز لتواصل واستمرارية حضارات العالم.. مبادئ هندسة يونانية  
بتحرك تنين صيني علشان يغرد طائر مصري قديم ويسجل الوقت كاتب مسلم حديث قاعد على سجادة فارسية.. حضارة بتسلم  
حضارة وكله بيكمل بعضه.. ولما نوصل للنهاية "كل نص ساعة" تبدأ الدورة من اول وجديد في دلالة واضحة على استمرارية بنى  
آدم طالما بيتعاونوا مع بعض وفي إشارة واضحة جدا لرقى العلماء المسلمين الى معندهم اى مشكلة في نقل معارف السابقين  
وتطويرها وتسليمها للجيل التالي والى بعده.. وهكذا.. الجزري في النموذج ده بيثبت وبيأكد الى عمله عمرو بن العاص في مصر..  
وهو ان الإسلام بيحافظ على الحضارات مش بيدمرها.. ابداعات المهندس المسلم اساسها فلسفة يدعمها العلم.. ولو مش  
مصدقنى.. اسأل اى حد درس هندسة معمارية عن عرايس سور مسجد احمد ابن طولون وتفسير المقرنصات او الممر المكسور  
في الجوامع القديمة ..

كلها رموز يا معلم..

صلاح أبو سيف وداوود عبد السيد لو شافوا كمية الرموز دى ممكن يحصلهم انبهار عصبي ويفقدوا الوعي.

هو ده الإسلام باختصار يا اسيدنا..

ساعة القلعة..

ساعة القلعة دى حكاية ثانية لوحدها.. في الأصل هي ساعة فلكية مش مجرد ساعة توقيت عادية.. طولها حوالى 3.5 متر.. فيها  
عروض للأبراج والمدارات الشمسية والقمرية.. كان فيها مؤشر على شكل هلال بيتحرك في الجزء العلوي من الساعة علشان يفتح  
الطريق لعربية مخفية بتفتح أبواب القلعة او توماتيكيا كل ساعة علشان يخرج منها عارضة أزياء كإشارة على مرور ساعة كاملة..  
طبعاً مع قرع الطبول وحركة باقى المجسمات.. في الجزء العلوي من القلعة هتلاق دائرة كبيرة في الأبراج.. دى بتلف مع مرور

الوقت.. الدورة الكاملة للدائرة دى تساوى سنة كاملة.. يعنى لو احنا في نوفمبر الأيام دى يبقى هتلاقى الدائرة واقفة عند رمز العقرب.. وتحته بشوية على القائم العلوي لسور القلعة هتلاقى مجسمات ل 12 عالم من علماء الإسلام الى سبقوا الجزري.. طبعا مش محتاج اقولك ان كل واحد فيهم بيشاور على ساعة من ساعات اليوم.. وتحت القائم ده في 12 نقش نباتي بتتغير تلقائيا الى كلمة او حكمة لما تيجي الساعة بتاعتها.. يعنى الساعة 1 مثلا هتلاقى النقش اختفي وظهر مكانه "سبحان الله".. والساعة 2 هيختفي النقش الثاني ويظهر مكانه "الله الملك" وهكذا.. ولو بصيت في خلفية الساعة هتلاقى الماكينة بتاعتها.. برضه شغل فيه جرادل وهيدروليك وحاجات من دى.. في مقدمة الساعة في مجسمات ل 5 موسيقيين بيشتغلوا اوتوماتيك كل ساعة.. على اجناب القلعة في مجسم لصقرين.. كل ساعة بيخرج من بقهم كرة معدنية تقع في الزهرية الى قصادهم دى معلنه مرور ساعة كاملة.

شفت السحر!!!

بس في الحقيقة.. كل الى قلته عن الساعة دى مش هو السبب الحقيقي ان الساعة دى تعتبر اعجاز.. السبب الحقيقي ان الساعة دى قابله للبرمجة علشان حساب تغير الوقت في خلال السنة.. بقول آخر.. الساعة دى هي الصورة الأولى للكمبيوتر.. بس في القرن ال 13.

الجزري له تصاميم ساعات تانية زى ساعة الكاتب وساعة الطبال وساعة الراعي البارع.. كلها هتلاقوها في الكتاب بتاعه الى هحطلكوا الرابط بتاعه في التعليقات.

الفيديو ده من انتاج مركز الملك عبد العزيز للعلوم والثقافة بالتعاون مع اليونسكو سنة 2010.. المشرف العام على المشروع هو الدكتور احمد سليم.. المشروع كله اسمه الف اختراع واختراع وعالم ابن الهيثم.. في الفيديو هتلاقوا نجم الاوسكار بن كينسلى وهو قايم بدور امين مكتبه بيشرح للأطفال تاريخ المسلمين في التراث العالمي.. وهتلاقوا سيرة ساعة الفيل.

<https://www.youtube.com/watch?v=iycAN1zhJWY>

وده موقع المشروع كله.. في حاجات جميلة اوى يا ريت تبصوا عليه..

<https://www.1001inventions.com/.../library-of-secrets/>

وده فيديو عن ساعة القلعة من متحف كاوست في جدة..

<https://twitter.com/gbadkook/status/920698404203876353>

وده موقع تاني بيتكلم عن عالم ابن الهيثم..

<https://www.ibnalhaytham.com/>

ودى قناتي على تيلجرام.. مستنيكوا هناك

<https://t.me/HosniAliveHistory>

## فتحية (2)

بما أننا بنحترق في أيام الصيف المرعبة.. يبقى الموضوع ده مناسب تماما..

سمعتوا عن مدينة "فتحية" في تركيا؟؟

فتحية بلد ساحلية قريبة من أنطاليا بتطل على بحر ايجيه.. بينها وبين إسطنبول ساعة بالطيارة و8 ساعات ونص بالأتوبيس.. بلد جميلة صاخبة ومليانة العاب شواطئ.. وانا متشعلق بالباراشوت في فتحية على ارتفاع 2000 متر بينما مراتي تحت على الشط بتحسب نصيبها في الميراث لما اقع وتندق رقبتي.. بدأت اهرب من رعب فكرة السقوط باسترجاع ما قرأت عن فتحية.. فتحية اتبنت على أنقاض مدينة قديمة اسمها تيليمبوس.. فيها معبد الملك امينتاس المقدوني ومسرح ومقابر رومانية منحوتة في الجبل بالإضافة الى قلعة حربية - من آثار مملكة ليكيا الأرمنية- ومتحف لوحات ومشغولات خزف وفسيفساء.. الكلام ده كله يقول انها مدينة خضعت لحكم اليونان ثم الرومان في الازمان الغابرة.. شواطئها رملية ممتدة على خليج البحر الميت "ده غير بتاع الأردن".. سموه البحر الميت بسبب غرق شاب فيه اثناء السباحة فقررت حبيبته انها تموت نفسها وراه في نفس المكان.. مش داخله دماغي الحدوتة دي.. متهيألى ان هى الى غرقته علشان تورثه. في أيام حكم السلطان محمد الخامس "محمد رشاد" فتحت الدولة العثمانية خط جوى بين إسطنبول والقاهرة مروراً بحلب ثم دمشق.. الدولة كانت منهارة وخسرت حروب البلقان وعلى اعتاب حرب عالمية هتقتضى عليها تماما في وجود سلطان ضعيف.. حاول العثمانيون استعادة الهيبة عن طريق طيارة الماني سموها معاونت ملية "نصيرة الدين يعنى".. طولها 7 متر وهيركبها 2 مغامر "اليوزباشي فتحي بك والملازم اول صادق بك" ويطلعوا في رحلة تبدأ من إسطنبول وتنتهى في القاهرة. وقف الجمع المهيب مع السلطان في وداع الطيارة.. الناس بتكرر وتهلل من منظر غريب عليهم في العصر ده.. الناس في حلب منتظرة ومجهزة المهبط.. كل ما يشوفوا حاجه طايه في السماء يهللوا.. لحد ما ظهر النسر الحديدي العثماني وحط على أرض حلب بأمان في 14 فبراير سنة 1914م. بعد آذان المغرب بشوية. الكلام ده بيحكى واحد من المعاصرين اسمه خالد العظم "أصبح رئيس سوريا سنة 1941م".. قال في مذكراته ان الناس كبرت لمرآي الطيارة بينما العالم اياها اعتبروا ان ده كفّر.. الوالي وكبارات رجال الحكومة استقبلوا الطيارين بحفله رسمية.. قبل ما يطير المغامرين على المحطة التالية.. دمشق.. في دمشق كان في انتظارهم 100 ألف بنى آدم.. الأطفال كل ما تشوف نسر طايح تقول الطيارة وصلت.. وبعدين يقعدوا يضحكوا لما يلاقوها مش هي.. لحد ما ظهر النسر الحديدي ابو دخان وصوت مزعج وهبط بعنف على المدرج الأخضر الغير ممهد.. الستات بقت ترغرط والمشايخ سجدوا لله رهبة وشكر على سلامة وصول الطيارين.. الناس شالوا الطيارين على الأكتاف لحد صيوان الوالي.. الطيارين نزلوا ضيوف لمدة يومين على أسرة "ساروجة" الشامية العريقة.. اعتقد ان من كتر الأكل الى أكلوه وكرم الضيافة الشامي المشهور معروفوش يركبو الطيارة تانى. في اليوم الثالث اجتمع نفس العدد في وداع الطيارين في الجزء الأخير من الرحلة.. الى القاهرة.. طلعت الطيارة وسط هتافات الناس وتمنياتهم بسلامة الوصول.. لكن للأسف الحلم الجميل لم يكتمل.. قرب بحيرة طبريا وقعت الطيارة يوم 27 فبراير واتحرق ومقدروش يميزوا جثث أبطالها الا من أوراقتهم الرسمية.. السبب العلمي لسقوط الطيارة هو رياح عنيفة كانت اقوى من محركات الطيارة البخارية ام 200 حصان.. السبب الشعبي هو الحسد وعين الانجليز والفرنسيين الوحشة.. وتكريما لسيرة البطل فتحي بك.. قررت الدولة اطلاق اسمه على مسقط رأسه.. فتحية من فتحي. الناس عاشت في هم وحزن على الشجعان الى راحوا في غمضة عين وعلى الحلم العثماني الى انتهي قبل ما يبدأ.. شحنوا جثث الطيارين لدمشق بالقطر في جنازة رسمية مهيبة.. صوت ولولة النساء غطي على صوت المؤذنين الباكي.. اتفتحت بيوت دمشق للعزاء.. كل شارع وحاره من حواري الشام القديمة كان فيها بكاء حار.. السلطان صمم على رحلة ثانية بعد أيام قليلة بنفس المواصفات لرد الاعتبار بقيادة الملازم أول نوري بك لعلها تحقق الى مقدرتش تحققه الطيارة الأولى.. نزلت الطيارة في بساتين المزه في دمشق ولكن محدش كان منتظرها بسبب حالة الحزن على الطيارة الأولى.. ومنها انطلقت الى القاهرة علشان تسقط قرب سواحل يافا.. للأسف حظها لم يكن أفضل من سابقتها. لما زرت مدفن السلطان صلاح الدين في دمشق لقيت على اليمين وقبل الدخول للضريح شاهد رخامي فخم عليه العلم الأحمر ابو هلال ونجمة بيض.. قربت اقرا الاسامى واشوف مين يستحقوا شرف الدفن جمب السلطان الناصر.. لقيت انهم اليوزباشي فتحي بك والملازم أول صادق بك والملازم أول نوري بك.. ابطال اول محاولة طيران بين اسطنبول والقاهرة. سبحان الله.. "وَمَا تَذَرِي نَفْسٌ بِأَيِّ أَرْضٍ تَمُوتُ" ياااه.. معقول الدنيا صغيرة اوى كده!!!! شرفوني بالمتابعة لو بتحبوا التاريخ.. كل ما اكتب هتلاقوه تحت الهاشتاج ده #تاريخ\_حي